

# 諸子平議

















# 諸子平議

俞樾著



中華書局出版

(本書係用商務印書館國學基本叢書本重印)



———— \* 版權所有 \* ————

## 諸 子 平 議

◎ 定價人民幣二萬七千五百元

著 者： 俞 樾  
出 版 者： 中 華 書 局 股 份 有 限 公 司  
北 京 東 總 布 胡 同 五 七 號  
印 刷 者： 中 華 書 局 上 海 印 刷 廠  
上 海 漢 口 路 四 七 七 號  
總 經 售： 新 華 書 店 上 海 發 行 所

分類：哲學 編號：26475  
54.10修，商務型，360頁，399千字；787×1092，1/32開，22—1/2印張  
1954年10月上海初版 印數：滬1—2,100

(上海市書刊出版營業許可證出零二六號)

## 序目

諸子平議三十五卷。德清俞樾撰。樾有羣經平議三十五卷。已自爲序錄矣。及諸子平議成。又序其端曰。聖人之道。具在於經。而周秦兩漢諸子之書。亦各有所得。雖以申韓之刻薄。莊列之怪誕。要各本其心之所獨得者。而著之書。非如後人剽竊陳言。一倡百和者也。且其書往往可以考證經義。不必稱引其文。而古言古義。居然可見。故讀莊子人間世篇曰。大枝折。小枝泄。泄卽摧之段字。謂牽引也。而詩七月篇。以伐遠揚。猗彼女桑之義見矣。讀賈子君道篇曰。文王有志爲臺。令匠規之。而詩靈臺篇。經始靈臺。經之營之之義見矣。讀管子大匡篇曰。臣祿齊國之政。而知尙書全文家說大麓。古有此說。讀董子春秋繁露王道篇曰。恩衛葆。而知春秋左氏傳齊人來歸衛俘。字固不誤。讀商子禁使篇曰。騶虞以相監。而知韓魯詩說以騶虞爲掌鳥獸官。亦古義也。讀楊子吾子篇曰。如其智。而知論語如其仁。如其仁。非孔子之許管仲以仁矣。讀楊子五百篇曰。月未望則載魄于西。而知僞孔傳解哉生魄之誤。讀商子賞刑篇曰。昔湯封於贊茅。而知皇甫謐謂湯居穀熟之非。讀呂氏春秋音律篇曰。固天閉地。陽氣且泄。而知月令以固而閉地氣沮泄之文。有奪誤也。讀淮南子時則篇曰。大禱祭于公社。而知月令大割祠于公社。割乃周之誤字。周乃禩之段字。禩祠卽禱祭也。凡此之類。皆秦火以前。六經舊說。孤文隻字。尋繹無窮。烏呼。西漢經師

之緒論。已可寶貴。況又在其前歟。然諸子之書。文詞奧衍。且多古文假借字。注家不能盡通。而儒者又屏置弗道。傳寫苟且。莫或訂正。顛倒錯亂。讀者難之。樞治經之暇。旁及諸子。不揣鄙陋。用羣經平議之例。爲諸子平議。亦三十五卷。今錄其目於左方。

管子平議六卷

晏子春秋平議一卷

老子平議一卷

墨子平議三卷

荀子平議四卷

列子平議一卷

莊子平議三卷

商子平議一卷

韓非子平議一卷

呂氏春秋平議三卷

董子春秋繁露平議二卷





賈子平議二卷

淮南內經平議四卷

楊子太元經平議一卷

楊子法言平議二卷

是書也。成與羣經平議同置。匣中未出也。及羣經平議刻成。而此書亦遂不自祕。稍稍聞於人。諸君子聞有此書。乃謀釀錢而刻之。經始於強圉單閼之歲。至上章敦牂而始觀厥成。蓋非一日之功。亦非一人之力也。詩不云乎。無德不酬。輒仿漢人碑陰之例。書其名。字焉。曰潘君霽。字偉如。曰李君鴻裔。字眉生。曰吳君煦。字曉帆。曰吳君雲。字平齋。曰郭君德炎。字日長。曰劉君佐禹。字治卿。曰沈君瑋寶。字書森。曰陳君其元。字子莊。曰馮君渭。字少渠。烏呼。成書難。傳書不易。諸君子之刻此書。將謂此書足以傳乎。抑愛樾而姑以徇其意乎。樾固不足以知之。





3 0539 4026 2

# 諸子平議卷一

管子一

守國之度，在飾四維，牧民、

樾謹按禮義廉恥，非由修飾，飾當讀爲飭。詩六月篇，戎車既飭。毛傳曰，飭，正也。飭四維者，正四維也。飭與飾，古通用。易雜卦傳，蠱則飭也。釋文曰，王肅本作飾。禮記樂記篇，復亂以飭歸。史記樂書作復亂以飾歸，並其證矣。

順民之經。

樾謹按順當讀爲訓，訓民之經，言教訓其民之道也。古順訓通用。尚書洪範篇，于帝其訓，是訓是行。史記宋微子世家，訓並作順，是其證。

不璋兩原，則刑乃繁。

樾謹按尹注云，璋當爲章，章明也。兩原，謂妄之原，上無量也。淫之原，不禁文巧也。尹氏據上文以說兩原是矣。讀璋爲章，未得其字。璋乃璋字之誤。說文土部，璋，擁也。經典多以璋爲之。呂氏春秋貴直篇，是障其原而欲其水也。高誘注曰，障，塞也。障，塞卽璋擁也。此云不璋兩原，正與呂氏春秋所云障其原者



同義。若非誤作璋，亦必改而爲障矣。

毋曰不同生。

樾謹按生與姓古字通。哀四年春秋經，公孫姓。釋文曰：姓本又作生。然則同生猶同姓也。詩杕杜篇，不如我同姓。毛傳曰：同姓同祖也。尹注謂不與汝同家而生，未達古義。

無私者可置以爲政。

樾謹按政當作正。詩節南山篇，不自爲政。禮記緇衣篇，作不自爲正。史記秦始皇紀，始皇名政。徐廣曰：政一作正。是政正古通用。爾雅釋詁，正，長也。可置以爲正者，可置以爲長也。與上文可立以爲長，下文可奉以爲君，文義一律。

山高而不崩，則祈羊至矣。形勢。

樾謹按祈當讀爲畿。說文血部，畿，以血有所剗。涂祭也。周官或以幾爲之。犬人職，凡幾珥沈辜是也。或以剗爲之。士師職，凡剗珥是也。或以祈爲之。肆師職，及其祈珥。小子職，掌珥于社稷，祈于五祀是也。肆師之祈，故書作幾。小子之祈，鄭云或爲剗。是知祈爲段字矣。依說文，正當作畿。凡作幾者，畿之省。凡作剗者，音同也。陸德明云，剗音機也。鄭注於士師職云，剗珥，饋禮之事，用牲毛者曰剗。羽者曰珥。此云祈羊，正毛者曰剗也。尹注烹羊以祭，故曰祈羊。北宋本作耳羊以祭耳，卽珥之壞字。蓋以珥釋剗也。剗珥



雖有毛羽之別。然散文亦通。山海經中山經云。祠毛用一雄雞一牝豚。刳郭璞注曰。刳亦割刺之名。夫雞豚並言刳。是刳卽通稱之證。尹注以卽羊釋祈羊。未乖古義。因卽壞作耳。後人遂臆改爲烹并祈字之義而亦晦矣。

銜命者君之尊也。

樾謹按銜命形勢解作銜令。其解曰。令出而民銜之。此作銜命。雖於義亦通。然非管子原文矣。當據解訂正。

抱蜀不言而廟堂旣修。

樾謹按形勢解曰。所謂抱蜀者。祠器也。宋氏于庭據公羊祠兵。左穀作治兵。謂祠器卽治器。又據方言蜀一也。謂抱蜀卽老子所謂抱一。其說祠字是矣。至抱一之說。終有未安。抱一可謂之治道。不可謂之治器。一也。影宋本第一卷音釋曰。蜀音猶。宋謂猶乃獨字之誤。是固然矣。然蜀不當音獨。二也。竊疑管子原文當作抱櫨。櫨卽櫨字也。詩葛生篇傳。櫨而藏之。釋文曰。櫨本作櫨。又作櫨。是櫨櫨櫨三字通用。古者國之寶器。皆櫨而藏之。故論語曰。龜玉毀於櫨中。而陳國所分肅慎氏之貢。亦藏於金櫨。事見魯語。抱櫨不言而廟堂旣修者。言有德之君。但謹守宗器。恭默不言。而廟堂之上。已無所不治也。櫨字經典罕見。故須音釋。宋本音獨。正爲櫨字作音。自字壞作蜀。遂不可曉矣。

飛蓬之間不在所賓。

樾謹按尹注曰：蓬飛因風動搖不定，喻二三之聲問。明主所不賓敬，此未達問字之義也。問猶言也。廣雅釋詁：言問也。言爲問，故問亦爲言。飛蓬之間，猶飛蓬之言也。形勢解曰：無儀法程式，蜚搖而無所定，謂之蜚蓬之間。蜚蓬之間，明主不聽也。無度之言，明主不許也。然則蜚蓬之間，卽無度之言。問字之義，於此可見矣。

裁大者衆之所比也。

樾謹按尹注曰：裁，斷也。能斷大事，衆必比之。此未達裁字之義也。裁讀爲材。文選長笛賦：裁已當適，使易持。李善注曰：裁或爲材。是裁材古通用。國語鄭注曰：材，兆物。韋昭注曰：材，裁也。材可爲裁，故裁亦可爲材。裁大者衆之所比，謂材質大者。容物必多也。形勢解曰：天之裁大，故能兼覆萬物。地之裁大，故能兼載萬物。人主之裁大，故容物多而衆人得比焉。裁字並當讀爲材。謂天之材大，地之材大，人主之材大也。若從尹注，訓裁爲斷，不可通矣。

美人之懷，定服而勿厭也。

樾謹按此句之義，爲不可曉。據形勢解曰：貴富尊顯，民歸樂之。人主莫不欲也，故欲民之懷樂己者，必服道德而勿厭也。而民懷樂之，然則管子原文本作欲人之懷，必服而勿厭也。故其解如此。若作美人

之懷定服而勿厭。則解何以不及美字定字之義乎。尹注曰。欲令人貴美而懷歸者。須安定服行道德。勿有疲厭。則其所據本已誤。夫令人貴美而懷歸。不得云美人之懷。卽尹注之迂回難通。知管子原文。必不如是。當據後解訂正。

曙戒勿怠。後稷逢殃。

樾謹按。既勿怠矣。又何逢殃之有。勿疑夕字之誤。曙戒夕怠。言朝戒之而夕怠之也。下文云。朝忘其事。夕失其功。此以夕對曙言。猶彼以夕對朝言矣。

衣冠不正。則賓者不肅。

樾謹按。賓讀爲擯。古字通用。尙書堯典。賓于四門。鄭注以賓爲擯是也。主君衣冠不正。則擯者亦不肅。若上文云。上失其位。則下踰其節矣。

生棟覆屋。

樾謹按。生當讀爲笙。方言曰。笙。細也。自關而西。秦晉之間。凡細貌謂之笙。

見其可也。喜之有徵。見其不可也。惡之有刑。樾修。

樾謹按。刑當作形。孝經形于四海。釋文曰。形又作刑。荀子彊國篇。刑范正。注曰。刑與形同。成相篇。讒夫弃之形是詰。注曰。形當爲刑。是形刑古通用也。惡之有形。與喜之有徵。文義正同。尹氏解喜之有徵曰。

徵驗也。必有恩賜以驗見喜。無空然矣。則惡之有形。義亦然也。韓非子難三篇。引管子曰。見其可說之有證。見其不可惡之有形。是其明證。

賞罰不信於其所見。而求其所不見之爲之化。

樾謹按。化當作外。字之誤也。爲之二字衍文。此本作賞罰不信於其所見。而求其所不見之外。因外字隸書或作外。見魯峻碑。化字隸書或作水。見夏承碑。兩形相似。故外誤爲化。後人又加爲之二字。使成義耳。韓非子引此。正作賞罰不信於所見。而求所不見之外。

上好詐謀。聞欺。

樾謹按。尹注曰。開隔也。有所隔礙。而欺誑也。然隔礙與欺誑。判然兩義。恐非聞欺並言之本旨。開當讀爲姦。昭二十二年經文。大蒐於昌開。左穀並同。而公辛作昌姦。是其例矣。

道塗無行禽。立政。

樾謹按。尹注曰。無禽獸之行。此曲說也。禽獸之行。謂之禽行。已於文義未安。況倒其文曰。行禽乎。此承上文。使辟無威於國而言。禽猶囚也。襄二十四年左傳。收禽挾囚。是禽與囚同。蓋以拘囚而言。則謂之囚。以禽獲而言。則謂之禽也。使辟左右之人。擅作威福。則赭衣滿路矣。今也不然。是以道塗無行禽也。下文疏遠無蔽獄。孤寡無隱治。皆以獄訟言。可證此文禽字之義。



疏遠無蔽獄。孤寡無隱治。

樾謹按無隱治與無蔽獄同義。周官小宰職曰。聽其治訟。司市職曰。聽其大治。大訟。小治。小訟。胥師職曰。聽其小治。小訟。而斷之。皆治訟並言。治亦訟也。公羊僖二十八年傳。叔武爲踐土之會。治反衛侯。何休解詁曰。叔武訟治於晉文公。令白王者反衛侯。使還國也。是古人以治爲訟之證。然則隱治與蔽獄一也。

大德不至仁。不可以授國柄。

樾謹按尹注曰。德雖大而仁不至。或包藏禍心。故不可授國柄。此注於義未安。大德之人。何至包藏禍心乎。羣書治要引此作大位。疑亦後人以意改之。未足據也。大德不至仁。仁乃人之段字。謂雖有大德而獨善其身。不能及人也。下文曰。卿相不得衆。國之危也。卽承此文而言。惟不至人。故不得衆。人卽衆也。

草木不植成。

樾謹按植本作惠。古德字也。德與得通。易升象傳。君子以順德。釋文曰。德姚本作得。詩碩鼠篇。莫我肯德。呂氏春秋舉難篇。作莫我肯得。並其證也。此云草木不惠成。卽草木不得成。以惠爲得。猶以得爲德耳。字壞作直。因誤爲植。失其義矣。宋本竟改作得。則又非管子之原文也。

五鄉之師出朝。遂于鄉官。致于鄉屬。及于游宗。皆受憲。

樾謹按王氏引之曰。致于鄉屬。于字衍文。然此文實非止衍一于字也。遂于鄉官句。衍鄉字。及于游宗句。亦衍于字。管子原文當云。遂于官。致鄉屬。及游宗。皆受憲。官古館字。周易隨初九。官有渝。釋文曰。官蜀才本作館。蓋官館古今字也。官字从宀从自。自交覆深屋也。自猶衆也。以屋覆衆。是官之本義。爲館舍字也。官司者其引申之義。本義爲引申義所奪。乃別製从食之館字。說文自部有官。食部有館。歧而二之。殆非矣。故古書每以官爲館。禮記曲禮篇。在官言官。鄭注曰。官謂版圖文書之處。玉藻篇。在官不俟屨。注曰。官謂朝廷治事處。皆卽館字也。此文官字亦然。遂于官。致鄉屬。及游宗。皆受憲。言五鄉之師出朝。遂于館舍之中。致鄉屬。及游宗。而受憲焉。下文曰。憲旣布。乃致令焉。尹注曰。致令于君。夫受憲之後。卽致令于君。則未反其鄉。可知所謂官者。卽在國中。不得有鄉字明矣。後人不達官字之義。疑遂于官三字未足。妄增鄉字。又疑鄉官鄉屬爲對文。鄉官上有于字。鄉屬上亦不得無于字。兩句旣皆有于字。則及游宗三字。文不成義。亦不得無于字。轉展相加。遂成此誤矣。又按戒篇曰。進二子於里官。尹注曰。里官謂里尉也。齊國之法。舉賢必自里尉始。故令里官進二子。將旌別而用之。夫管仲隰朋。皆國之大臣。乃令里官進之。不亦褻乎。且果如此。當云令里官進二子。不當云進二子於里官。尹注非也。官亦卽館字。里字亦後人不得其義而妄加也。此所謂官。正鄭君注玉藻所謂朝廷治事處者。桓公進二子

於官再拜頓首誠重之也。後人不達古訓率意增益或爲鄉官或爲里官大可笑矣。使民於宮室之用薪蒸之所積虞師之事也。

樾謹按當作使足於宮室之用薪蒸之積足字與民字相似而誤所字衍文。

正地者其實必正長亦正短亦正小亦正大亦正長短大小盡正正不正則官不理乘馬、

樾謹按正不正句上正字乃衍文也此承正地者而言不正則官不理即謂地不正也今作正不正不可通矣蓋涉上句長短大小盡正而誤疊正字耳下爵位章云是故爵位正而民不怨民不怨則不亂然後義可理理不正則不可以治理不正句亦衍理字此承爵位正而言不正則不可以治即謂爵位不正也今作理不正蓋亦涉上句然後義可理而誤疊理字耳兩文一例其誤亦同皆宜訂正是故百貨賤則百利不得百利不得則百事治。

樾謹按太平御覽資產部引此文作百利得乃後人不得其義而臆改也管子之意本謂百貨賤則百利不得於是人人竭其智力以求利而百事反因之治下文云是故事者生於慮成於務失於傲不慮則不生不務則不成不傲則不失正中說此文之義百利不得則謀慮從此出事之所以生也又不得不盡力於所當務事之所以成也若百利皆得則轉以輕傲而失之矣後人不達此旨疑百利不得何以百事能治遂妄刪不字然貨賤何以得利其說殊不可通孫氏星衍王氏念孫反以爲是由未詳釋

下文故耳。

季絹三十三制當一鎰。

槪謹按尹氏於三十三下出注曰三等其下者曰季是誤以季絹三十三爲句失其讀也此當以九字連讀謂季絹三十三制而當黃金一鎰也儀禮既夕篇贈用制幣鄭注曰丈八尺曰制秋曰大稽與民數得亡。

槪謹按與讀爲舉周官師氏王舉則從故書舉爲與是古字通也舉民數得亡謂記錄民數之得失也襄二十七年左傳仲尼使舉是禮也釋文引沈注曰舉謂記錄之也是其義十仞見水不大潦五尺見水不大旱。

槪謹按十仞當爲一仞一仞見水其地較高故不大潦五尺見水其地較卑故不大旱若作十仞則太縣絕矣其說更詳見下條。

十一仞見水輕征十分去二三二則去三四四則去四五則去半比之於山。

槪謹按王氏引之曰以五則去半推之則當爲一仞見水輕征十分去一二則去二三則去三四則去四五則去半此說是也上文云一仞見水不大潦五尺見水不大旱此卽承上而言益知上文之誤王氏但知此文十字之衍而不知上文十字之誤故其說猶未盡得也。

五尺見水。十分去一。四則去三。三則去二。二則去一。三尺而見水。比之於澤。

樾謹按尹注以五尺見水屬上比之於山爲義。解曰言平地五仞見水。同於山五尺見水。不知五尺見水與上文一仞見水相對爲文。尹注誠非也。劉氏績曰當澇之時。若高亢地十一仞見水。則常征十分中免二三。十二仞見水。則免三四。十四仞見水。則免四分。十五仞見水。則免五分。以其極高難澇。溉可以比於山也。當旱之時。若汙下地五尺見水。則常征十分免四分。四尺見水。則免三分。三尺見水。則免二分。二尺見水。則免一分。以其極低易澇。溉可以比於澤也。十分去一。當作十分去四。乃字之誤。今按劉氏所說亦未得也。十一仞見水數句。王氏引之已訂正矣。至此文亦有錯誤。當作五尺見水。十分去一。四則去二。三則去三。二則去四。一尺而見水。比之於澤。此王氏所未及訂正也。請合上文而具論之。上文曰一仞見水不大澇。然則一仞見水之地。所患非澇也。其輕征之故。以旱不以澇。故一仞見水。十分去一。至二仞見水。地更高矣。故十分去二。至三仞見水。地更高矣。故十分去三。推而至於五仞見水。則比之於山地愈高旱愈甚也。上文曰五尺見水不大旱。然則五尺見水之地。所患非旱也。其輕征之故。以澇不以旱。故五尺見水。十分去一。至四尺見水。地更卑矣。故十分去二。三尺見水。地更卑矣。故十分去三。推而至於一尺見水。則比之於澤地愈卑澇愈甚也。一尺見水之地。當去十分之五。此不言者。以上文五則去半推之可見。蓋比於山與比於澤同也。古書遇數目字。往往錯誤。春秋繁露爵國

篇所說諸數無一不誤。辯見本書。然則此文之誤亦無怪矣。劉氏以旱爲潦。以潦爲旱。兩義顛倒。故不得其解。且此文惟五尺見水。十分去一兩句不誤。劉氏反以爲誤。信古書之難讀也。

民之生也。辟則愚。閉則類。

樾謹按尹注曰。縱其淫辟。則昏愚類善也。閉其淫辟。則自爲善。此注非也。辟卽闢之段借字。闢與閉正相對。此兩句之誼。卽所謂民可使由不可使知者。老子曰。其政悶悶。其民醇醇。其政察察。其民缺缺。亦此意也。管子書與老子大指每相近。

若是安治矣。七法。

樾謹按上文云。若是而能治民者。未之有也。下文云。形勢器械未具。猶之不治也。上下文均無安字。則此安字乃語辭也。古書每以安爲語辭。王氏引之釋詞。引管子書凡九事。而不及此。蓋亦誤以爲實字矣。

猶左書而右息之。

樾謹按息猶滅也。古人文字皆先書於竹。風俗通曰。劉向校書。皆先書竹。改易刪定。可繕寫者。以上素是也。書竹故可滅去。以左手書之之難。而右手滅之之易。其不成也必矣。尹注曰。息止也。未得其義。世主所貴者實也。所親者戚也。所愛者民也。所重者爵祿也。亡主則不然。

樾謹按實乃寶字之誤。王氏念孫已訂正矣。下文曰不爲重寶虧其命。不爲愛親危其社稷。不爲愛人枉其法。不爲重祿爵分其威。皆非世主所及。乃以爲亡主。殊不可曉。亡疑當作良。良字古作莒。闕其上

半。則爲亡矣。襄十四年左傳。良君將賞善而刑淫。此稱良主。猶彼稱良君。

立少而觀多。則天下懷之矣。  
樾謹按尹注曰。或曰觀當爲勸。然大戴記四代篇曰。臣願君之立知而以觀聞也。亦以立與觀對。則觀字不誤。立知觀聞者。知聞卽見聞也。謂立乎近以觀乎遠也。說詳大戴記。此云立少觀多。義正與彼相近。

凡將立事。正彼天植。版法。

樾謹按尹注曰。謂順天道以種植。此義非也。植乃惠字之誤。古德字也。惠字壤作直。因誤作植矣。管子原文本作凡將立事。正彼天惠。故版法解曰。天惠者天心也。周官師氏職。鄭注曰。在心爲德。觀天心之解。知其字必作惠。若作天植。於義難通矣。

遠近高下。各得其嗣。

樾謹按嗣讀爲司。尙書高宗彤日篇。王司敬民。史記殷本紀。作王嗣敬民。是古字通也。各得其嗣。卽各得其司。尹注曰。嗣續也。失之。

行毆養幼官、

樾謹按毆之與養二義不倫。尹注曰：謂禽獸之屬能爲苗害者，時毆逐之，所以養嘉穀也。斯亦曲說矣。毆當讀爲嘔。莊子人間世篇：「以下偃拊人之民。」釋文引崔注曰：「偃拊猶嘔嘔，謂養也。」字亦作嘔。禮記樂記篇：「煦嫗覆育萬物。」此云嘔養，彼云煦嫗覆育，其義正同。嘔卽嫗也。養卽育也。

秋行夏政，葉行春政，華

樾謹按葉字無義。淮南子時則篇：「作秋行夏令，華行春令。」疑此葉字是榮字之誤。蓋榮華二字義本相近。故管子言「秋行夏政，榮行春政，華行春政」，而淮南子言「秋行夏令，華行春令」。榮文雖互易，義實不殊也。器成於僂。

樾謹按尹注曰：「冬行刑之時，故成僂器。」此妄說也。僂者，𡵓之段字。說文三部，𡵓，細文也。器成於僂，與下句「教行於鈔同義」。鈔猶眇也。皆謂始於微眇也。𡵓聲與麥聲相近。故穆字從𡵓得聲。而昭穆或爲昭繆，穆公或爲繆公，然則以僂爲𡵓，猶以繆爲穆矣。

動靜不記，行止無量，戒。

樾謹按「戒」一字爲句，承止爲義。言動靜不記，行止無量，所當戒也。修春秋冬夏之常祭，食天壤山川之故祀，必以時。



櫛謹按食者飭之壞字。修與飭義相近。修。春秋冬夏之常祭。飭。天壤山川之故祀。二句相對成文。尹注以常祭食三字連讀。解爲常所祭常所食。失其義矣。

官處四體而無禮者。

櫛謹按處四體而無禮者。與下文立四義而毋議者相對爲文。尹注以官處二字連讀。解曰。官處謂處官也。失之。

立四義而毋議者。

櫛謹按議讀爲俄。說文人部。俄。行頃也。廣雅釋詁。俄。衰也。是俄有傾邪之意。管子書或以義爲之。明法解曰。雖有大義。主無從知之。大義卽大姦也。是以義爲俄也。此文又以議爲之。立四義而毋議。卽立四義而毋俄。謂不傾邪也。尹注以無異議說之。未達假借之旨。

二千里之外。三千里之內。諸侯五年而會。至習命。三年名卿請事。二年大夫通吉凶。十年重適入正禮義。五年大夫請受變。

櫛謹按三年二年之下。又云十年五年。於義難曉。諸侯既五年而會。至習命矣。安得又使大夫請受變。再及五年卽爲十年。亦是五年而會之期。安得又使重適入。至幼官圖。十年作七年。亦不可通。合十年計之。則爲七年。就五年計之。則卽二年耳。今以上下文求之。此皆傳寫誤也。蓋三千里內之諸侯。二年

而使大夫通吉凶三年而使名卿請事至五年則自來會矣計五年之中止空閒二年適當未會之前一年及既會之後一年立法周密不容更有五年十年之事此二句當在下文三千里之外諸侯世一至之下蓋世一至則太疏闊故五年必使大夫請受變十年必使重適入正禮義也傳寫之誤所宜訂正。

幾行義勝之。

樾謹按說文人部儼精謹也幾卽儼之段字謂精謹行義也行義二字平列賈子俗激篇此其無行義之尤至者已尹注謂庶幾行義者非是。

交物因方。

樾謹按交讀爲校謂考校其物必因其方也尹注謂交質之物因方之有非是由守不慎。

樾謹按由疑申字之誤哀二十六年左傳申開守陴。

死亡不食。

樾謹按食乃飭之壞字上文飭天壤山川之故祀今亦誤作食是其證也死亡不食當作死亡不飭禮記月令篇曰飭死事卽此飭字之義。

不可數。則爲詐不敢鄉。

樾謹按爲詐當作僞詐。爲乃僞之叚字。兵法篇作不可數。則僞詐不敢嚮。是其證。

箸於取與之分。則得地而不執。

樾謹按執讀爲熱。漢書陳萬年傳。豪彊執服。注曰。執讀曰熱。是其例也。說文心部。熱。補也。補卽今怖字。箸於取與之分。則得地而無後患。故不熱。與上文審於動靜之務。則功得而無患。義正相同。尹注謂不悛執失之。

慎將宿。五輔。

樾謹按尹注曰。傳送貨財。必慎止宿。其義甚爲迂曲。且上文修道途便關市。皆二字平列。則將宿二字亦當平列。廣雅釋詁。將行也。宿止也。然則將宿猶言行止耳。

貧富無度則失。

樾謹按失當讀爲軼。廣雅釋詁。軼。過也。言貧富無度。則相過軼也。尹注曰。失其節制。非是。

士修身功材。

樾謹按功讀爲攻。謂政治其材藝也。尹注謂士旣修身。必於藝能有功。非是。

修飢饉。

樾謹按飢饉不當言修。修乃備字之誤。備俗作脩。脩誤作脩。又誤作修耳。版法篇修長在乎任賢。據後解則作備長。此本書二字相亂之證也。

今工以巧矣。而民不足於備用者。其悅在玩好。

樾謹按尹注曰。君悅玩好。則民務未作。故備用不足。然本文無君字。注義非也。悅乃說字之誤。其說在玩好。言求其所以然之說。則在玩好也。韓子內儲說外儲說篇。並有其說在某某之文。墨子經下篇。言說在某某者七十八句。蓋古人自有此文法。下文其悅在珍怪。其悅在文繡。義並同此。

毋監于讒。甯令。

樾謹按毋監于讒。義不可通。監當讀爲啗。監本從𩇛省聲。與啗聲同。故得通用也。字又作𩇛。淮南子齊俗篇。荆吳芬馨。以𩇛其口。𩇛卽啗字。蓋古或以監爲啗。因卽監字而加口旁耳。管子作監者。啗之𩇛字。淮南子作𩇛者。啗之俗字矣。

不用其區區。

樾謹按區字不當疊。下文云不用其區。區者虛也。可知此文不疊區字。蓋卽涉下文兩區字相連而誤衍耳。

故君出令正其國。而無齊其欲。

樾謹按齊讀爲濟。荀子王霸篇以國齊義。楊倞注曰：齊當爲濟，是其例也。此言君但求正其國，而無自濟其私欲也。尹注非。

夫繩扶撥以爲正。

樾謹按說文𧈧部：𧈧，足刺𧈧也。讀若撥。此文撥字，卽𧈧之段字。刺𧈧則有不正之意，故與正爲對文也。荀子正論篇：不能以撥弓曲矢中，亦是以撥爲𧈧。又或以發爲之。考工記弓人曰：菑栗不逆，則弓不發，不依其樂。

樾謹按依讀爲殷。禮記中庸篇：壹戎衣。鄭注曰：衣讀如殷，聲之誤也。齊人言殷聲如衣，然則管子書以依爲殷，正齊言耳。不殷其樂，謂不盛其樂也。說文角部曰：作樂之盛稱殷。業明而不矜。

樾謹按業明而不矜，謂業盛而不矜也。淮南說林篇：長而愈明，高誘注曰：明猶盛也。雖廣其威，可損也。

樾謹按北宋本：損作須。然則威疑威字之誤。其威可須，言其滅亡可待也。涉下文是以威盡焉而誤，威爲威，遂臆改可須爲可損矣。

失植之正而不謬，不可賢也。植而無能，不可善也。

樾謹按此本作夫植之正而不謬。涉上文兩失字而誤作失耳。植而無能句。文義未足。疑有闕文。所賢美於聖人者。以其與變化隨也。

樾謹按美乃善字之誤。上文云夫植之正而不謬。不可賢也。植而無能。不可善也。此云所賢善於聖人者。卽承上而言。不容有異文。

薄承灑而不滿。

樾謹按說文水部洧。淺水也。字亦作泊。此文薄字。卽泊之段字。廣韻博字注曰。古有博勞。善相馬。博勞卽伯勞也。然則薄之通作泊。猶博之通作伯矣。上句泉踰灑而不盡。與此相對成文。泉是水之深者。泊是水之淺者。因以薄爲之。尹注遂失其義矣。

十日不食。無儔類盡死矣。樞言。

樾謹按無字衍文。旣云盡死矣。不必言無。涉上句七日不食無國土而衍。能而稷乎。能而麥乎。

樾謹按而字並當作爲。古爲字作𠂔。故與而字相似而誤。襄十四年左傳。射爲禮乎。太平御覽工藝部。引作射而禮乎。孟子滕文公篇。方里而井。論語顏淵篇正義。引作方里爲井。並其證矣。

## 諸子平議卷二

### 管子二

教訓習俗者衆，則君民化變而不自知也。八觀、

樾謹按：化變而不自知，當以民言，不當以君言。此君字涉下文「明君在上位而衍」。

萬家以下，則就山澤可矣。萬家以上，則去山澤可矣。

樾謹按：下上二字，疑傳寫互易。上云萬家之衆，可食之地，方五十里，可以爲足矣。是方五十里之地，可食萬家之衆。然萬家或有盈有絀，此復分別言之。若在萬家以上者，則宜兼就山澤之地。若在萬家以下者，則山澤之地可去也。如今本義不可通，所宜訂正。

論賢不鄉舉，則士不及行。

樾謹按：及當爲服，服從良聲，古或止作良，與及相似，往往致誤。僖二十四年左傳：「子臧之服不稱也。」夫釋文作「子臧之及」，曰「一本作之服」，是其證也。尚書呂刑篇：「何敬非刑，何度非及。」及當爲服。刑謂五刑，服謂五服，卽堯典之五刑五服也。大戴記王言篇：「及其明德也。」及亦當爲服，謂天下皆服其明德也。說詳羣經平議。此文士不及行，當作士不服行，謂士不服行道藝也。字誤作及，失其義矣。

則豪傑材臣不務竭能。

樾謹按臣當依下文作人。

良田不在戰士三年而兵弱。

樾謹按兵字衍文也。三年而弱與下五年而破十年而亡十年而滅句法一律故申說之曰戰不勝弱也。地四削入諸侯破也。離本國徙都邑亡也。有者異姓滅也可證此文無兵字。

則國居而自毀矣。

樾謹按古謂坐爲居如所稱居吾語汝之類是也。居而自毀者坐而自毀也。猶云坐而待亡也。尹注曰居然自致毀滅以居爲居然文不成義矣。

法制不議則民不相私。法禁

樾謹按議當讀爲俄說詳幼官篇立四義而無議者下俄者傾也邪也言法制平正而不傾邪則民不相私也。尹注曰君出法制下不敢議未達假借之旨。

故下與官列法而上與君分威。

樾謹按列讀爲裂裂亦分也。列裂古通用。五輔篇曰大袂列卽其證矣。毋事治職但力事屬私王官私君事去非其人而人私行者聖王之禁也。



樾謹按但力事屬四字爲句。毋事治職但力事屬言不以治職爲事。而其所竭力從事者。惟在互爲連屬也。私王官爲句。私君事爲句。言以王官爲私。以君事爲私也。去非其人而人私行者爲句。去乃法字之誤。言法本非其所宜行而其人私行之也。尹失其讀。故所解皆非。

交於利通。而獲於貧富。

樾謹按利通猶利達也。言以賄賂結交利達之人。而所從得者。皆出於貧窮之民也。尹注非絕而定。

樾謹按絕猶截也。釋名釋言語曰。絕。截也。如割截也。穆天子傳。乃絕漳水。郭注曰。絕猶截也。是絕截義通。絕而定。猶截而定。謂整齊而定也。詩長發篇。海外有截。鄭箋云。截。整齊也。是其義矣。

凡君國之重器。重令。

樾謹按宋本作右國。當從之。右讀爲有。後人不知右之通作有。而疑爲君之壞字。因臆改之耳。天道之數。

樾謹按爾雅釋詁。數。疾也。禮記曾子問篇。不知其已之遲數。鄭注曰。數讀爲速。此云天道之數。猶云天道之速。與下句人心之變。相對爲文。下云至則反盛則衰。正是言天道之速也。尹注謂天道數終。是讀爲數且幾終之數。失之。

國無怪嚴法、

樾謹按說文心部怪異也。禮記大傳篇收族故宗廟嚴。鄭注曰嚴猶尊也。國無怪嚴謂國無異尊與下文無雜俗無異禮一律。尹注曰國不作奇怪則嚴肅是無怪爲一義。嚴爲一義失其旨矣。況主倨傲易令。

樾謹按主乃其字之誤。尹注云況其倨傲易風俗是其所據本未誤。

財無砥滯。

樾謹按砥讀爲底。昭元年左傳勿使有所壅蔽湫底。杜注曰底滯也。故以底滯連文。故善用民者軒冕不下儼而斧鉞不上因。

樾謹按軒冕不下儼謂其人有善卽從而軒冕之。不以其人在下位而有所儼議也。斧鉞不上因謂其人有罪卽從而斧鉞之。不以其人在上位而有所依違也。心術篇曰因也者舍己而以物爲法者也。此因字之義也。尹注曰不以下有私寵妄以軒冕有所許擬不因上有私憾妄以斧鉞有所誅戮。此說殊不可通。豈上有私寵卽可以軒冕許擬之下有私憾卽可以斧鉞誅戮之乎。

君臣之會六者謂之謀。

樾謹按六者謂之謀當作六者爲之媒。言君臣會合皆此六者爲之媒也。說文女部媒謀也。廣雅釋詁。

文同，是謀與媒聲近義通。禮記禮器篇，誰謂由也而不知禮乎？家語公西赤問篇，作孰爲，宣二年穀梁傳，孰爲盾而忍弑其君者乎？公羊傳作誰謂，是爲與謂古亦通用也。令入而不至謂之瑕。

櫛謹按瑕當讀爲格。古字通也。儀禮少牢饋食禮，以嘏于主人。鄭注曰，古文嘏爲格。瑕之爲格，猶嘏之爲格也。說文人部引書曰，假于上下。今書作格。瑕之爲格，猶假之爲格也。令入而不至謂之格，謂有所扞格而不得達也。尹注曰，君臣相閒，故曰瑕。未合入而不至之義。德行成於身而遠古，卑人也。

櫛謹按尹注以遠古卑人連讀，非也。上文云，凡論人而遠古者，無高人焉。則此文當以德行成於身而遠古爲句。句末亦當有者字。今奪之耳。卑人也三字爲句，與無高人焉義正相應。猶下文愚士也與上文無智士焉義亦相應也。

世無公國之君，則無直進之士，無論能之主，則無成功之臣。

櫛謹按無論能之主，當作無論能之士。上文云，忠臣直進以論其能，然則直進論能，皆以人臣言，不以人主言。論能之士，卽直進之士也。雖分爲二句，其實一耳。後人不察，疑下言臣，上當言君，妄改爲主，非管子之舊矣。

此四者用兵之禍也。四禍其國而不危矣。兵法、

樾謹按此當作四禍具而國無不危矣。具其形譌。國而文倒耳。

官無常則下怨上。器械不巧則朝無定。賞罰不明則民輕其產。

樾謹按巧乃功字之誤。王氏念孫已據七法篇訂正矣。定乃正字之誤。正讀爲政。七法篇曰。朝無政。是也。王氏未訂。又以七法篇參考。則此文尚有錯誤。當作官無常下怨上。則器械不功。朝無正則賞罰不明。賞罰不明則民輕其產。方與七法篇官無常下怨上而器械不功。朝無政。則賞罰不明。賞罰不明則民幸生。文義相合。

故曰早知敵則獨行。

樾謹按宋本作而獨行。當從之。而獨行者。如獨行也。七法篇曰。故蚤知敵。人如獨行。

縱強以制。

樾謹按尹注曰。有制則強可縱。然縱字殊爲無義。當讀爲從。襄十年左傳。從之將退。杜注曰。從猶服也。從強以制。謂有制則強可服也。古字縱與從通。論語八佾篇。從之。何晏集解曰。從讀曰縱。人知從之可讀縱。而不知縱之可讀從。斯莫得其解矣。

一氣專定。則旁通而不疑。

樾謹按疑當讀爲礙。廣雅釋言曰：礙，闕也。旁通而不礙，言無隔礙也。尹注曰：精一其氣，專而且定，故不異。以本字讀之，則與旁通之義不貫矣。

盡而不意，故不能疑神。

樾謹按此本作故能疑神，疑神猶言如神也。形勢篇曰：無廣者疑神，是其證也。盡而不意，故能疑神。與下文和合故能諧，諧故能輯一律，後人不達疑神之義，而妄增不字。尹注曰：皆非彼所意，故不能疑度，謂之爲神，則神字與不能疑不相連屬，其不辭甚矣。

利適器之至也。用敵教之盡也，不能致器者，不能利適；不能盡教者，不能用敵；不能用敵者，窮，不能致器者，困。

樾謹按諸敵字，並當作適。利適器之至也，用適教之盡也。尹注曰：兵力利而適者，其器得宜之至，士卒用命而適者，則教練之盡，是其所據本作用適，不作用敵也。不能致器者，不能利適；不能盡教者，不能用適，即承上二句爲文。乃用適誤作用敵。尹注遂曰：器既不利，教又不盡，敵則不服，豈能用之哉？望文爲說，而不一檢上文，何也？今本因下作用敵，遂并用適教之盡也，亦改作用敵，則又非尹氏所據之舊矣。宋本尙不誤。

出入異塗，則傷其敵。

樾謹按出入異塗。卽所謂多方以誤之也。故足以傷敵。尹注反云爲敵所傷。誤矣。

不廣閒大匡。

樾謹按廣者曠之段字。荀子王霸篇。人主胡不廣焉。楊倞注曰。廣或讀爲曠。列子湯問篇。不思高林廣澤。釋文曰。廣一本作曠。是其證也。不廣閒者。不曠閒也。詩何草不黃篇。毛傳曰。曠。空也。空與閒義正相近。尹注曰。廣求閒安。則增出求字矣。

夫所以定齊國者。非此二公子者將無已也。

樾謹按尹注曰。二公子謂諸兒子糾。然上文曰。夫國人憎惡糾之母。以及糾之身。而憐小白之無母也。諸兒長而賤。事未可知也。旣云事未可知。安知齊國之必屬諸兒子糾哉。二疑三字之誤。齊僖公止此三子。更無異人。故曰非此三公子將無已也。

受君令而不改。奉所立而不濟。是吾義也。

樾謹按奉所立而不濟。安得云是吾義也。尹注曰。更有所立。不濟而死。則增出死字矣。疑管子原文。本作奉所立而不廢。上文云。犯吾君命而廢吾所立。奪吾糾也。雖得天下。吾不生也。此卽所謂奉所立而不廢。涉上文事將不濟句而誤。作不濟則不可通矣。

夷吾之爲君臣也。將承君命奉社稷以持宗廟。

械謹按兩君字並指僖公言。夷吾爲君之臣，則將承君之命爲社稷宗廟之計，不爲子紂一人死也。尹注曰：言已立君臣之義，誤以君臣連讀失之。

賢者死忠以振疑。

械謹按振通作振。儀禮士喪禮：振用巾。古文振作振，是也。爾雅釋詁：振，拭刷，清也。是振與拭刷同義。此云振疑，謂拭刷其疑也。作振者，段字。尹注曰：振，救也，未得其旨。

今彭生二於君。

械謹按二當爲貳。禮記坊記篇：唯卜之日稱二君。鄭注曰：二當爲貳。唯卜之時，辭得曰君之貳某爾。然則彭生貳於君，謂彭生爲君之貳也。彭生爲公子，故云然。尹注曰：不以正道輔君而從之於昏，故曰二。夫從君於昏，非有二心之故，安得云二於君乎？

公若先反，恐注怨焉，必不殺也。

械謹按反乃彼之壞字。當以公若先爲句，彼恐注怨焉爲句，彼謂施伯也。尹注云：若先反管仲，是其所據本已誤。

夫雖不得行其智，豈且不有焉乎？

械謹按且乃語詞，豈且不有焉乎，猶云豈不有焉乎。故尹注云：直是智不行，不得言無智也。莊子齊物

論篇。誰獨且無師乎。又曰。果且有彼是乎哉。果且無彼是乎哉。呂氏春秋無義篇。豈且忍相與戰哉。並用且字爲句中語助。說見王氏引之經傳釋詞。而未引此文。故爲說之。

召忽雖不得衆。其及豈不足以圖我哉。

樾謹按。及乃友字之誤。言召忽雖不得衆。然其一二死友。亦足以圖我矣。故下文管仲之言曰。朋友不能相合。摻正釋桓公此疑耳。

臣祿齊國之政。而不死糺也。

樾謹按。祿讀爲錄。謂領錄其政也。尙書堯典篇。納于大麓。今文家讀麓爲錄。故劉昭注後漢書百官志。引新論曰。昔堯試于大麓者。領錄天子事。如今尙書官矣。鄭君注尙書大傳。亦云堯聚諸侯。命舜陟位。居攝。致天下之事。使大錄之。與史記堯使舜入山林川澤之說不合。然管子書已云祿齊國之政。則其義古矣。尹注不知祿爲錄之段字。而云空食齊政之祿。夫食齊政之祿。不可言祿齊國之政。足知其非也。

請修兵革。吾士不練。吾兵不實。諸侯故敢救吾讐。內修兵革。

樾謹按。內修兵革。亦宜作請修兵革。蓋卽上語而申言之也。涉下文內奪民用而誤。又因下文云乃令四封之內修兵。適與相合。故讀者莫知訂正耳。



管仲對曰。以臣則不而令人以重幣使之。

樾謹按尹注讀不字絕句。解曰。以臣之意。則不與君同。此說非也。蓋此文十二字當作一句讀。古而如通用。不而卽不如也。言以臣之意。則不如令人以重幣使之也。

問病臣願賞而無罰。

樾謹按尹注於臣字絕句。解曰。臣有病者。君當慰問之。夫慰問病臣。雖亦盛德事。然何與霸業乎。且病臣又何罰之有。此文問字疑國字之誤。山權數篇。君不高仁。則國不相被。宋本國誤作問。卽其例也。當讀國病爲句。臣願賞而無罰爲句。言國家罷病。臣願有賞無罰以寬之也。下文管仲又請賞於國以及諸侯。君曰諾行之。管仲賞於國君。賞於諸侯。按賞於國者。承此文而言也。賞於諸侯者。承下文諸侯之禮而言也。蓋此兩節。國與諸侯分言。下又合并而言之耳。

衛國之教危。

樾謹按危當讀爲詭。漢書天文志。司詭星出正西。史記天官書。詭作危。淮南說林篇。尺寸雖齊。必有詭。文子上德篇。詭作危。是古字通也。衛國之教危。謂其政教詭譎。尹注以高危釋之。非是。魯邑之教。好邇而訓於禮。

樾謹按邇當讀爲爾。說文爰部。爾。麗爾。猶靡麗也。然則魯國好爾。謂麗爾也。正靡麗之意。尹注曰邇近。

也。未得其義。

齊車千乘。卒先致緣陵。

樾謹按。卒下有闕文。據上文大侯車二百乘。卒二千人。小侯車百人。卒千人。則齊車千乘。當言卒萬人矣。先致者。先至也。致與至通。

戰於後故敗狄。

樾謹按。戰上闕諸侯二字。上文齊請救於諸侯。而齊車卒先致緣陵。故諸侯之師戰於後也。後字正對上先字而言。尹注誤以後故連讀。解爲地名。非是。

斬孤竹。

樾謹按。斬讀爲擗。文選長楊賦。麾城擗邑。李善引蒼頡篇曰。擗。拍取也。擗孤竹。猶取孤竹。尹注謂斬其君。則當云斬孤竹之君矣。

二歲而稅一。上年什取三。中年什取二。下年什取一。

樾謹按。此卽什一之法而變通之。仍是什而取一也。蓋雖有取三取二取一之不同。然二歲一稅。假令六年之中。上年二。中年二。下年二。則通三二一之數而適得六。是卽歲取其一也。

桓公使鮑叔識君臣之有善者。

樾謹按王氏念孫讀書雜誌曰。君當爲羣。其說非也。乘馬篇曰。士聞見博。學意察。而不爲君臣者。又云。賈知賈之貴賤。日至於市。而不爲官賈者。工治容貌功能。日至於市。而不爲官工者。君臣與官賈官工竝稱。則君臣猶言公臣耳。襄二十九年傳。公臣不足。取於家臣。古君公通稱。則公臣君臣亦得通稱。又問篇曰。君臣有位而未有田者。幾何人。義亦同此。古蓋自有君臣之稱。未可臆改也。

### 令一人爲負以車

樾謹按尹注曰。當令一人以車爲負。載其行裝。然正文明言人爲負。注乃云車爲負。義不可通。尹氏特疑車非人所能負。故曲爲是說耳。今按車乃連字之誤。海王篇行服連。注曰。輦名。所以載作器。人挽者。然則此云負連。猶云服連。負服古通用。淮南子人閒篇。負輦載衆而至。御覽治道部。負輦作服輦。是其證也。連本人挽者。故可以一人負之。下文云。若宿者令人養其馬。然則彼從諸侯來者。固自有車馬。必令一人負以連者。當是分載其囊橐耳。

### 費義數而不當有罪

樾謹按尹注曰。義謂供客之禮。徒費義數。而於事不當者。罪之。夫既爲供客之禮。又何不當之有。且義數連文。亦不可通。義疑羨字之誤。七臣七主篇。歲有敗凶。故民有義不足。王氏念孫謂義當爲羨。正與此同。有所溢於正數之外。是謂羨數。費羨數而不當。是妄費也。故有罪矣。

又多不發起訟不驕。

樾謹按尹注曰。又教之和通。不相告發。雖有起而訟者。莫不恭恪。不爲驕傲。此於句讀未審也。當以起字絕句。多字衍文。涉下文又多發起句而衍。七臣七主篇曰。然彊敵發而起。雖善者不能存。即可證此文發起之義。上云野爲原。謂能辟草萊也。此云又不發起。謂能治盜賊也。又云訟不驕。謂能聽獄訟也。驕讀爲矯。國語周語曰。其刑矯誣。韋注曰。以詐用法曰矯。是其義也。下文云。又多發起訟驕。亦當以起字絕句。其下又云。又多而發訟驕。則誤衍而字奪起字。

桓公謂管仲曰。請致仲父。中匡。

樾謹按。請致仲父者。欲仲父就己飲酒也。仲父猶仲甫。夷吾之字耳。尹注曰。仲父者。尊老有德之稱。桓公欲尊事管仲。故以仲父之號致之。此說非是。蓋自毛公解。尙父爲可尙可父。鄭君亦以尙父爲尊稱。後人因疑仲父之稱。猶尙父之比。故有此說。不知尙父亦字也。初非尊稱。說詳羣經平議。

公與管仲父而將飲之。

樾謹按。與讀爲預。一切經音義卷六曰。預古文作與。是也。公預管仲父而將飲之。猶襄十四年左傳曰。衛獻公戒孫文子寧惠子食也。戒與預其義相近。

三王失之也。非一朝之萃。

樾謹按萃當讀爲猝。言由來者漸，非起於一朝之猝然也。尹注讀如本字，而訓爲萃集，非是。夫鮑叔之忍，不僂賢人，其智稱賢以自成也。小匡

樾謹按釋名釋言語曰：仁，忍也。好生惡殺，善含忍也。然則鮑叔之忍，猶云鮑叔之仁。下云其智，正以仁智並言也。左傳正義引作鮑叔之不忍，戮賢人，蓋後人不達忍字之義而妄改之，不足爲據。與魯以戰，能使魯敗。

樾謹按與以二字，傳寫互誤。當作以魯與戰，言以魯國之師與齊戰也。能字義不可通。管仲以魯師與齊戰，豈反使魯敗乎？能當讀爲乃，以魯與戰，乃使魯敗，明是天意，非人力所爲也。能與乃聲近，故得通用。淮南人間篇：此何遽不能爲福乎？藝文類聚禮部：能作乃。漢書匈奴傳：東援海代，南取江淮，然後乃備。漢紀乃作能，並其證也。

功足以德天與失天，其人事一也。

樾謹按足乃定字之誤。言鮑叔相小白而得國，管仲奉公子糾，以魯與齊戰而敗，此非人事有優劣，乃由小白得天，而公子糾失天也。功之成不成，定以得天與失天。若以人事論，則一而已矣。定與足字形相似而誤。君臣上篇：朝有足度衡儀，足亦定字之誤。宋本正作定，可證也。若依尹注說此文，違戾甚矣。糞除其顛施。

樾謹按尹注解顛旋之義殊不可通。據國語作班序顛毛。韋昭注曰顛頂也。毛髮也。言次列頂髮之白黑。使長幼有等。然則此文糞字疑糞字之誤。糞篆文作糞。與糞字相似故誤也。糞卽今所用頒賜字。亦或以班爲之。是故管子書以糞爲班。亦猶他書之以班爲糞也。除乃敍字之誤。敍與序通。糞敍卽班序也。糞誤作糞。後人乃改敍爲除。以求合其義。而不知其不可通矣。

以待時乃耕。

樾謹按時字絕句。乃當作及。字之誤也。及耕二字屬下爲義。齊語作及耕深耕而疾耰之。是其證。惟齊語時下有耕字。似爲衍文。當據此刪。

奇怪時來珍異物聚。

樾謹按物當爲總。言珍異總聚也。若作物聚。則不詞矣。因俗書總字作摠。其上半與物相似而誤。無坐抑而訟獄者。

樾謹按坐當爲挫。言人有挫折屈抑。則宜訟。若無是而訟。是好訟也。故必有以禁之。尹注謂其人自無所坐。而被抑爲訟者。非是。

擇其沈亂者而先政之。

樾謹按政乃征之。政字齊語作擇。其淫亂者而先征之。是其證也。尹注非。

存魯蔡陵。

械謹按地無名蔡陵者。據下文云築蔡鄢陵。疑此文蔡上奪築字。陵上奪鄢字。存魯爲一事。築蔡鄢陵。又爲一事。

割越地。南據宋鄭。征伐楚。

械謹按南字當在鄭字下。管子原文本作割越地。據宋鄭南征伐楚。今本南字誤移在上。則征伐楚句不成義矣。齊語作遂南征伐楚。其明證也。

制冷支。

械謹按制乃刺字之誤。齊語作刺令支。韋注曰。刺擊也。

握粟而筮者屢中。

械謹按筮卽筮字。古書從巫從巫之字。往往相亂。呂氏春秋察傳篇。沈尹筮贊能篇作沈尹筮。是其證也。顏氏家訓書證篇曰。巫混經。正謂此類。

而蓬蒿藜蘼並興。

械謹按蘼乃蘼字之誤。卽藿字也。莊子徐尤鬼篇。藜藿柱乎鼯鼯之徑。釋文曰。藿本或作蘼。檣載而歸。

樾謹按櫛字當從禾，卽稭字也。說文禾部，稭，糞束也。從禾困聲。此作櫛者，又變從磨聲。磨字亦從困得聲者，故其聲同也。傳寫誤從木，非是。

培夏。

樾謹按齊語作負夏，古字通也。尙書禹貢篇，至于陪尾。史記夏本紀，作至于負尾，卽其例矣。

其相曰夷吾，大夫曰甯戚，隰朋，賓胥無，鮑叔牙，用此五子者何功。

樾謹按尹注曰：言何功而不成，然正文止有何功二字，乃增益其文曰：何功而不成，殆失之矣。據下文管仲請立隰朋爲大行，甯戚爲大司田，王子城父爲大司馬，賓胥無爲大司理，東郭牙爲大諫，而繼之曰：君若欲治國彊兵，則五子者在矣。若欲霸王，夷吾在此，然則此文疑當作甯戚，隰朋，王子城父，賓胥無，東郭牙，所謂五子者，指此五人，不數夷吾。明桓公所以霸者，皆由其相夷吾之力。若止用此五人者，則何功之有。故下文曰：則唯有明君在上，察相在下也。正見齊桓明君，夷吾察相，兩相得而成霸功，非由此五大夫矣。傳寫奪王子城父，又誤東郭牙爲鮑叔牙，與後文五子不合。遂并數夷吾爲五子，而何功之義不可解矣。管子此篇多與齊語同，蓋本齊國史之文。齊語末云：惟能用管夷吾，甯戚，隰朋，賓胥無，鮑叔牙之屬，而伯功立。此自是當時公論，爲管氏之徒者，取其文入管子書，則獨歸功於管仲，而他人不與焉，以其書固管氏之書也。今本錯誤大非其旨矣。



晦夜而至禽側。田算不見禽而後反。

樾謹按尹注解田算不見禽爲其田必見禽。此非也。田乃日字之誤。算古暮字。言日暮不見禽而後反也。

則五子者在矣。

樾謹按呂氏春秋勿躬篇。作則五子者足矣。當從之。此作在者。涉下夷吾在此而誤。



## 諸子平議卷三

### 管子三

桓公不救，裸體紉胷稱疾，霸形。

樾謹按尹注曰：紉，猶摩也。此訓未知所本。楚辭離世篇：情素潔於紉帛。王逸注曰：紉，結束也。紉，胷疑卽結束之義，亦若僖二十八年左傳：魏擘束胷歟。

於是令之縣鍾磬之棖。

樾謹按尹注曰：棖，所以嚴飾之。此未得其義也。玉篇木部：棖，禹煩切。絡絲纏也。或作簠。說文無棖，簠二字。蓋卽續字。說文糸部：續，落也。落，與絡通。廣雅釋器曰：續，絡也。此文棖字，當訓爲絡。又下文兩言鍾磬之縣，疑此文本作於是令之棖鍾磬之縣。陳歌舞等瑟之樂，故下文曰：於是伐鍾磬之縣，併歌舞之樂，卽承此文而言也。所謂棖鍾磬之縣者，鍾磬本在縣，更從而繫絡之，使牢固也。尹注飾字雖非，而嚴字則是。觀尹注以嚴飾爲解，疑其所據本正作棖鍾磬之縣，故解爲嚴飾。若如今本，則爲縣鍾磬之嚴飾矣。於義豈可通乎？

楚取宋鄭而不知禁，是失宋鄭也。

樾謹按此本作楚取宋鄭而不止。止卽禁也。故下文曰：禁之，則是又不信於楚也。後人因下文是禁字，遂改不止爲不禁，而傳寫者又或誤合之。故宋本作楚取宋鄭而不止禁也。今本作不知禁，則又因止禁連文於義重複，故易止爲知耳。夫楚取宋鄭而不止者，非不知也，乃不能也。不曰不能禁，而曰不知禁，是可見其文之誤矣。下文曰：知失於內，兵困於外，知失於內，猶云計失於內，此知字乃智慮之智，非知識之知，不得因此而疑本文之非誤也。

東存晉公於南

樾謹按此承上西伐秦北伐狄爲文。自秦而言，則晉在東矣。自狄而言，則晉在南矣。故曰東存晉公於南。尹注曰：自伐楚而遂存晉於晉之南，故曰東存。此得東字之義，而未得南字之義。

兼正之國之謂王霸言

樾謹按上之字疑它字之誤。它卽他字也。故尹注曰：兼能正他國者王。

故貴爲天子，富有天下，而伐不謂貪者，其大計存也。

樾謹按伐乃代字之誤。上文化人易代，宋本代誤作伐，卽其例也。管子原文本作世，不謂貪，言一世之人不以爲貪也。唐人避諱改世爲代，因又誤爲伐耳。

國在危亡而能壽者。

櫛謹按國語楚語臣能自壽也韋注曰壽保也然則能壽猶能保也晏子春秋雜下篇賴君之賜得以壽三族壽三族亦猶保三族也說文士部壩保也古壽字作壽與壩字並從壽聲故義亦得通矣繼最一世

櫛謹按繼乃彊字之誤草書糸旁與弓旁相似又涉上文繼絕世而誤耳下文云彊最一伐而天下共之國必弱矣宋本作彊最一代代卽世也然則此云彊最一世彼云彊最一代兩文正同此彊字誤爲繼彼代字誤爲伐而兩不可通矣

因其大國之重

櫛謹按其字衍文下文因彊國之權因重國之形並無其字

霸王不在成曲

櫛謹按尹注曰在於全大體然成曲之義殊有未安曲疑典字之譌霸王不在成曲言圖霸王者不必拘守成法也曲與典形近而誤國語周語晉獻曲注曰曲樂曲也宋明道二年槧本如此今本曲皆作典是其例矣

精於權則天下之兵可齊

櫛謹按齊讀爲濟詩載馳篇不能旋濟毛傳曰濟止也周易雜卦傳既濟定也定亦止也天下之兵可

濟謂天下之兵可止也。上文云：「彊國之兵可圍也。」罔亦有止義。

舉知人急，則衆不亂，行此道也。問。

樾謹按：行此道也，乃總承上文以起下文。尹注以「則衆不亂，行此道也」作一句讀，大謬。王氏讀書雜誌已辨正矣。尹解「舉知人急」爲「舉困難之事以示人」，則亦不然。牧民篇：「地辟舉則民留處。」尹彼注曰：「舉，盡也。」此「舉」字義與「彼同」。舉知人急者，盡知人急難之事也。

餘子父母存，不養而出離者，幾何人。

樾謹按：離讀爲儷。禮記月令篇：「宿離不貸。」鄭注曰：「離讀如儷偶之儷，是也。」不養而出離，謂出而儷偶於他族。若後世贅壻矣。

官賤行書，身士以家臣自代者，幾何人。

樾謹按：尹注曰：「其人居官乃賤，自行文書，身任士職，輒以家臣自代，亦須知其數也。然身任士職以家臣自代，疑無是理，即有之，亦私事，無從核其數也。」士蓋出字之譌，言身出而以家臣自代也。隸書出字或似士，如賣之爲賣，散之爲敖，皆是。故古書士出二字往往相亂。王氏引之經義述聞詳言之。

國子弟之無上事，衣食不節，率子弟不田弋獵者，幾何人。

樾謹按：尹注曰：「既無上事，乃率子弟不田農，但弋獵。」此釋「率」字未得其義。小匡篇曰：「十邑爲率，十率爲

鄉。然則率子弟者，率之子弟也。下文曰：男女不整齊，亂鄉子弟者有乎？鄉子弟率子弟，蓋當時有此名。尹氏不達，以謂由國子弟率之使然，非其義矣。國子弟與率子弟，文正相對。

冗國所開口而食者，幾何人。  
榘謹按：冗乃問字之誤，與上下文一律。尹注不釋冗字，則所見本未誤也。是其事。

榘謹按：是猶視也。荀子解蔽篇：是其庭可以搏鼠。楊倞注曰：是蓋當爲視，卽其證也。上云視其色，此云是其事，文異而義同。尹注謂是正其事，失之。

邊信傷德。

榘謹按：尹注曰：邊人失信，故傷德也。然邊人失信，不得謂之邊信。於義殊不可通。邊當讀爲籥，卽今籥字也。玉篇：竹部，籥，籥也。然說文無籥字，籥卽籥也。籥信者，小信也。小信傷德，正與上文小利害信、小怨傷義一律。尙書君奭篇：文王蔑德，正義引鄭注曰：蔑，小也。然則小信謂之籥信，猶小德謂之蔑德矣。顧命篇：敷重蔑席，孫氏星衍疏曰：蔑，俗從竹，當爲蔑，卽籥段音字。據此，知籥爲正字，蔑爲段字，籥爲俗字。管子之籥信，與尙書之籥德，文異而義同矣。

故天不動，四時云下而萬物化，君不動，政令陳，下而萬功成，戒。

樾謹按云字陳字皆絕句。下而萬物化。言天氣下行而萬物自化也。下而萬功成。言君道下行而萬功自成也。王氏引之謂云卽運字得之。謂上句下字涉下句而衍。則非也。兩句一律。不得參差。由失其句讀故耳。

妾人聞之。君外舍而不鼎饋。非有內憂。必有外患。

樾謹按妾人聞之。當作妾聞之。先人。侈靡篇作吾聞之。先人。是其證。

管仲對曰。君請饗已乎。

樾謹按尹注曰。饗已謂有所驚懼而問未止也。此注於義未安。饗疑獲字之誤。隸書獲字或作獲。見祝陸碑。又或作獲。見靈臺碑。其左旁皆與饗相似。缺其右旁。因誤爲饗矣。請者問也。儀禮士昏禮聘禮。鄭注並曰。請猶問也。君請者。君問也。君請獲已乎。言君有所問。不得已而爲此對也。下文將歷言鮑叔牙諸人之短。故以此發之。

東郭有狗噬嚙。旦暮欲齧。我猥而不使也。

樾謹按王氏引之據宋本朱本注中猥字作枷。訂正文猥字爲枷字之誤。又云枷者遡之段字。引說文遡互。令不得行。以說其義。並勝舊解。惟讀我字絕句。則猶未爲得也。此當以旦暮欲齧爲句。我枷而不使也爲句。我者管仲自我也。



用日維夢參患、

樾謹按尹注曰用吉日襲吉夢此不然也。雖武王伐商有筮襲於夢之說然亦偶然之事豈用兵者必以夢爲主乎。今按夢覺字依說文本作寤非此夢字夢隸夕部與夜篆相次其說解曰不明也然則夢之本義爲夜不明故此以夢與日對用日維夢謂將於其日有事必先於其夜預爲之計是所以用日者在夢故曰用日維夢也。因經傳夢字皆寤之假借而無用其本義者故於此文莫得其解耳。

而足以修義從令者忠臣也君臣上、

樾謹按修與從二義不倫修乃循字之誤下文云下之事上也不虛則循義從令者審也正作循義從令可證此文修字之誤。

上下相希

樾謹按希讀爲睇說文目部睇望也上下相睇謂上下相望也故下句曰若望參表。

主誠也以守戰。

樾謹按誠當爲成言人齋夫教成之後可用以守戰也。涉上文賞在信誠句而誤爲誠耳。然誠與成古亦通用。

法制有常則民不散而上合。

樾謹按不字衍文也。上云治國無法則民朋黨而下比。此云法制有常則民散而上合。兩文正相對。散者散其朋黨也。昔文王厲政於臧丈人而列士散植壞羣。見莊子田子方篇。此所謂民散。卽散植壞羣之義。後人不達其旨而妄增不字。非管子原文也。

奔走而奉其敗事。不可勝救也。

樾謹按奉乃救字之誤。上云坐而收其福。不可勝收也。此云奔走而救其敗事。不可勝救也。兩文相對。今誤作奉其敗事。不特義不可通。且與不可勝救句亦不合矣。

主身者正德之本也。

樾謹按主當作立。涉上文兩主字而誤。下文曰。身立而民化。德正而官治。身立德正。卽承此文立身正德而言。

主德不立。則婦人能食其意。

樾謹按尹注曰。君意委曲隨於女謁。若食之充口。其說甚迂。且如此則君食婦人之意。非婦人食君之意矣。食當讀爲餽。周易豐彖詞。月盈則食。釋文曰。食或作餽。是古字食與餽通。說文虫部。餽。敗創也。婦人能餽其意者。婦人能敗其意也。正與下文國無常法則大臣敢侵其勢。文義一律。下篇云。便辟不能食其意。義亦同此。

是故歲一言者君也。

樾謹按周官冢人及葬言轡車象人司農注曰言言問其不如濃度者此言字與彼同義歲一言者謂每歲一言問其不如濃度者也下文云時省者相也月稽者官也言問亦有省察稽考之意尹注曰謂正歲之朝布之縣象是未解問字也

是以明君之舉其下也盡知其短長知其所不能益若任之以事賢人之臣其主也盡知短長與身力之所不至若量能而授官

樾謹按兩若字並當訓乃小爾雅廣言曰若乃也國語周語引書曰必有忍也若能有濟也韋注曰若猶乃也此文言君必知其臣乃任之以事臣必知己乃量能而授官授當作受周官典婦功職曰凡授嬪婦功司儀職曰登再拜授幣鄭注並云授當爲受是古授受得通言也陳力就列不能者止是謂量能而受官矣

布法出憲而賢人列士盡功能於上矣君臣下

樾謹按功當作貢說文貝部貢獻功也貢能於上猶上文言歸親於上也周易繫辭傳六爻之義易以貢釋文曰貢苟作功是功貢相通之證治斧鉞者不敢讓刑治軒冕者不敢讓賞

櫟謹按尹注曰讓猶距也。然此以治斧鉞治軒冕者言。非以受之者言。尹解讓字。殆非其義。讓當讀爲攘。禮記曲禮篇左右攘辟。鄭注曰攘古讓字。是攘讓古字通也。此文兩讓字。並當爲攘竊之攘。不敢讓刑。不敢讓賞。謂不敢攘竊刑賞之權也。

穆君之色。

櫟謹按續漢祭祀志注引決疑要注曰穆順也。穆君之色卽順君之色。下句曰從其欲從亦順也。尹訓穆爲悅未得。

雖有偏卒之大夫不敢有幸心。

櫟謹按偏者車數。卒者人數。成七年左傳杜注引司馬法曰百人爲卒。車九乘爲小偏。十五乘爲大偏。是也有偏卒之大夫。蓋謂大夫之家有車徒者耳。尹注未得。

此先王所以明德囿姦昭公威私也。

櫟謹按威乃威字之誤。威者滅也。劉氏續謂是戒字之誤。非是。

若稽之以衆風若任以社稷之任。

櫟謹按兩若字並當訓乃。說詳上篇。此承上文而言。旣稱德度功勸其所能。乃稽之以衆風。乃任以社稷之任也。衆風者衆人之風謠。尹解非是。

去惡充以求美名，又可得乎？小稱、

樾謹按尹注斷去惡充三字爲一句，解曰：所往去於人者，皆以惡事充。此說殊未安。去惡充以求美名，七字爲句。惡充美名，相對成文。詩山有扶蘇篇，毛傳：子充良人也。正義曰：充者實也。呂氏春秋正名篇，不肖者之充。淮南子主術篇，此皆有充於內。高誘注並訓充爲實。然則惡充者，惡實也。正與美名相對。求乃來字之誤。上文我託可惡以來美名，字正作來，可證也。去來亦相對成文。去惡充以求美名，謂自我而去者爲惡實。自人而來者爲美名，此必不可得之數也。故曰：又可得乎？上文怨氣見於面，惡言出於口，此皆惡之實也。尹氏不知充有實義，故失其解。

故之身者使之愛惡，名者使之榮辱。

樾謹按身上衍之字，蓋涉上文澤之身，去之身，審行之身，審去之身，四句而衍。身者使之愛惡，名者使之榮辱，兩文相對，今作之身者於義難通。尹注曲爲之說，非是。

酒食則慈。四稱、

樾謹按酒食則慈，謂有酒食必分以予人，以見慈惠之意也。或疑其當作辭，非是。

見賢若貨。

樾謹按此本作見貴若貨，與下句見賤若過相對成義。謂見貴者則趨之若貨財然，見賤者則若行者。

之相過不相顧也。因涉上句以攻賢者句而誤貴爲賢。尹注曲爲之說非是。

不友善士。讒賊與鬪。不彌人爭。唯趣人詔。

樾謹按鬪一作通。詔一作訟。並當從之。不友善士。故讒賊與通。不彌人爭。故唯趣人訟。四句之義皆上下相承而通與訟又韵也。今作鬪詔則失其韵矣。訟之與詔以形似而誤。鬪字則因注文而羈入者。尹注云其見人爭則恣令鬪無彌縫之心。此自解不彌人爭之意。鬪卽爭也。豈正文有鬪字乎。

遷損善士。

樾謹按尹注曰善士則遷改而損棄之。疑正文及注文損字均捐字之誤。惟是捐字故尹氏以棄字足成其義耳。宜訂正。

耕以自養。以其餘應良天子。故平修靡。

樾謹按應良天子義不可通。良疑卽養之壞字。應之言承也。爾雅釋樂小者謂之應。釋文引李巡注曰小者聲音相承。故曰應。應承也。說文手部承奉也。然則應養猶奉養也。言耕以自養而以其餘奉養天子也。養字闕其上半而誤爲良。尹氏曲爲之說曰有時有賦曰良。謬矣。

今周公斷指滿稽。斷首滿稽。斷足滿稽。

樾謹按尹注曰今周公謂時所用法也。如注義則當云今周公之法於文方足。不得但云今周公也。疑

周公二字，乃用法二字之誤。法字奪水旁，止存太字，與公相侔，因誤爲公。後人因用公二字無誼，妄加口於用下，而爲周字耳。尹氏作注時，文尙未誤，故曰今用法，謂時所用法也。後人據已誤之正文而改注文，遂并注義而不可通矣。

而死民不服。

樾謹按此本作而民死不服，言民至死不服也。民死二字，傳寫誤倒。尹注遂斷而死二字爲句，失之矣。若夫教者，標然若秋雲之遠，動人心之悲，藹然若夏之靜雲，乃及人之體，鵬然若藹之靜，動人意以怨，蕩若流水，使人思之。

樾謹按動人心之悲，當作動人心以悲，與下文動人意以怨一律。古以而字通用，說見王氏引之經傳釋詞。動人心以悲，猶云動人心而悲也。動人意以怨，猶云動人意而怨也。今作之悲，則不詞矣。蓋涉上句有之字而誤耳。藹然若夏之靜雲，當作藹然若夏雲之靜，與上秋雲句一律。惟雲不能及人之體，尹注增成其義曰：油然含潤，將降其澤及人之體。此曲說也。疑管子原文本作藹然若夏雲之靜，動人意以怨，與上文標然若秋雲之遠，動人心以悲，相對成文。乃及人之體，當在鵬然若藹之靜下。鵬然句不可解，疑當作寫然若高山，與下蕩蕩若流水相對成文。山字與篆文之字相似而誤。又涉上文夏雲之靜句，而衍靜字。後人因若高之靜，義不可通，乃加言旁作謫耳。鵬字字書所無，乃寫字之誤，因其字從

穴從鳥篆文穴字與隸書肉字相似傳寫者誤從肉後人因從肉之字皆在左旁作月因變而爲膺矣墨子備城門篇有膺字卽寶字之誤正與此同說詳墨子可以爲證乃及人之體乃字衍文卽及字之誤而複者也及讀爲岌文選羽獵賦天動地岌注引韋昭曰岌動貌竄然若高山岌人之體言如登高山動人之體也管子此文最舛譌難讀今考正之如此

薄德之君之府囊也

樾謹按尹注但云德薄之君皆囊而藏之不釋府字之義疑府乃所字之誤隸書所字作𠂔與府相似而誤管子原文本云薄德之君之所囊也故尹注止解囊字也

鄰國之君俱不賢然後得王俱賢若何曰忽然易卿而移忽然易事而化

樾謹按尹注解易卿句曰黜不肖立仁賢解易事句曰去故而取新皆非管子之意也管子蓋謂隣國之君俱賢則不得王故必待其有變忽然而易卿忽然而易事皆就鄰國言之易卿而移易事而化皆謂變而不善使我有可乘之機也故下文曰變而足以成名尹注失之

故日月之明

樾謹按故疑放字之誤唐石經桓九年穀梁傳則是放命也今本放誤作故卽其例也放日月之明正尹注所謂與日月齊其明者若作故字則文義未足矣



吾君長來獵。君長虎豹之皮。

樾謹按上長字衍文。下長字當訓爲上。呂氏春秋貴公篇。用管子而爲五伯長。勿躬篇。雖不知可以爲長。高注並曰。長上也。此文當以吾君來獵爲句。君長虎豹之皮爲句。君長虎豹之皮者。君上虎豹之皮也。與下文上金玉幣上甲兵文異而義同。尹注曰。君好虎豹皮故來獵。則其所據本尙未衍上長字。若如今本。則君長二字連文。君長虎豹之皮。文義未明。尹何以云君好虎豹皮乎。注文好字。正釋長字之義。長卽上也。上之是好之也。後人不達。誤以君長連讀。遂於上句亦增長字。而文義失矣。

百振而食。非獨自爲也。

樾謹按百乃自字之誤。言自振作而食。非獨自爲也。兩自字正相應。因涉上句百姓字而誤自爲百。文不可通。

有雜禮我而居之。

樾謹按有當爲肴。我當爲義。並壞字也。肴讀爲殺。說文攴部。殺。相雜錯也。漢書食貨志。殺雜爲巧。亦以殺雜連文。

強而可使服事。辯以辯辭。智以招請。廉以標人。堅強以塞六。廣其德以輕上。位不能使之而流徙。此謂國亡之鄰。

樾謹按國亡之郢當依注作亡國之郢與下文成國之法正相對成文然則此七句者非美事也而尹注皆失之今爲釋其義曰強而可使服事者言下不順從上令強之而後可使服事也辯以辯辭者下辯字當讀爲變禮記禮運篇大夫从宗廟謂之變鄭注曰變當爲辯是其例也謂以辯給變亂人之辭也智以招請者請讀爲情荀子成相篇聽之經明其請楊注曰請當爲情是其例也國語周語曰而好盡言以招人過此招字義與彼同言恃其智以招人之情實也廉以標人者標讀爲剽後漢書崔寔傳剽賣田宅李賢注曰剽一作標是其例也說文刀部剽斫刺也廉而剽人言恃其廉而傷人也堅強以槩六者尹注曰君能堅意強力以槩上之六者然上文並無六者注說非也六乃下字之誤草書相似故也國語周語曰槩人不義韋注曰槩陵也堅強以槩下言堅強以陵下也廣其德以輕上位者位字當屬下讀廣其德以輕上與堅強以槩下正相對成文言廣樹其德以分上之權若齊之陳氏也位不能使之而流徙者位字據尹注作任故云可以分其上之任是位乃任之誤也此文當作任不能而使之流徙言不能之人任之以事而使之得罪流徙所謂賊夫人之子也今而字在使之下乃傳寫誤倒又誤任爲位而屬之上句遂不可曉矣

好緣而好駟

樾謹按上好字乃惡字之誤尹注曰緣卽捐也怯惡者必亂故棄之是其所據本正作惡緣惟尹解此

句未得其義。緣之言循也。廣雅釋詁曰。緣循也。莊子列禦寇篇注曰。緣循仗物而行者也。然則緣與駟義正相反。惡緣而好駟。謂惡因循而好壯健也。

開國閉辱。知其緣地之利者。

樾謹按以下文證之。其字當在開字之下。閉字乃門字之誤。辱知下有神次二字。而今奪之。管子原文本作開其國門。辱知神次。下云開其國門者。玩之以善言。辱知神次者。操犧牲與其珪璧。以執其辱。皆舉此文而釋之也。因傳寫奪誤。遂不可讀。尹注以知其二字屬下。緣地之利者爲句。不知緣地之利者。亦是舉上文而釋之。不當有知其二字也。

奈其辱辱。

樾謹按辱字當屬下。知神次者爲一句。乃覆舉上文而釋之也。奈其辱三字。並衍文。卽下文執其辱之誤而衍者。執字闕壞。止存左旁之奈。因誤爲奈矣。尹曲爲之說。非是。

若是者。必從是齟亡乎。

樾謹按尹注曰。齟卽鼻字也。洪氏筠軒曰。齟疑𪔐字之譌。王氏讀書雜誌從之。謂尹注亦似作𪔐字解。其實非也。此字實𪔐之古文。說文𪔐相敗也。從人𪔐省聲。管子疑本作𪔐。亦從人從𪔐省。而止省去中間一回。猶齟字從鳥。齟省聲。與𪔐字同。而籀文作𪔐。止省去中間一回也。𪔐之義爲相敗。故以𪔐亡連。

文猶言敗亡也。字誤作噩。於是其字義俱失矣。

大王不恃衆而自恃。

樾謹按尹注以大王亶父爲說。非也。古之賢王多矣。何獨舉一亶父乎。大王蓋泛言古之王者。曰大者。尊之之辭。猶言盛王也。說詳羣經平議禮記。

賤寡而好大。

樾謹按法法篇。故仁者知者有道者。不與大慮始。尹彼注曰。大猶衆也。然則賤寡而好大。猶賤寡而好衆。謂不問是非曲直。但以衆寡爲斷也。尹此注非。

先後功器事之治。

樾謹按事字衍文也。尹注曰。功有大小。器有精麤。各定其先後之差也。是其所據本無事字。祭之時上賢者也。故君臣掌。君臣掌則上下均。

樾謹按掌當爲黨字之誤也。祭禮有賓主。故有賓黨主黨。天子諸侯之祭亦然。故曰君臣黨。無使其內使其外。

樾謹按此當作使其內無使其外。與下句使其小毋使其大一律。如以予人財者。不如無奪時。如以予人食者。不如毋奪其事。

樾謹按如以予人財者。如以予人食者。當作如以財予人者。如以食予人者。不如無奪其時。當作不如無

親戚之愛。性也。

樾謹按古人稱父母亦曰親戚。韓詩外傳。曾子曰。親戚既沒。雖欲孝誰爲孝。是也。親戚之愛。句性也。正見人子之於父母。其愛出於天性。與君臣之以義相屬者不同也。尹注非。

人死則易云。生則難合也。

樾謹按說文雨部。雲山川氣也。從雨。云象雲回轉形。是云字本象回轉之形。故有旋繞之義。詩正月篇。昏姻孔云。毛傳曰。云。旋也。鄭箋曰。云。猶友也。蓋旋繞卽有相親之義。故得訓友。廣雅釋詁曰。云有也。有與友通。古者謂相親曰有。昭二十年左傳。是不有寡君也。杜注曰。有。相親有也。云訓有。卽相親有也。襄二十九年傳。晉不鄰矣。其誰云之。猶言其誰親之也。此以易云難合。相對爲文。易云者易親也。古人族葬。故有死則易云之說。下文多賢可云。亦言可親也。故下曰則士云矣。言士親之也。尹注以爲可言。非是。

其亟而反其重。陔動毀之進退。

樾謹按之字衍文也。尹注曰。或遲重滯疑。久而不去者。或發動而有所毀傷者。或乍進乍退者。是三者

並列不當有之字。

視之亦變。

樾謹按亦乃天字之誤。亦古作𠂔。與天字相似。又涉上句應國之稱號亦更矣。因而致誤。視之天變。與下句觀之風氣。兩句一律。尹注非。

古之祭者。有時而星。有時而星燿。有時而燭。有時而胸。

樾謹按此四句。皆以天象言。謂方祭之時。天象不同如此。卽上文所謂視之天變。觀之風氣也。星者。詩定之方中篇。星言夙駕。釋文引韓詩曰。星晴也。次句星字。涉上句而衍。當作有時而燭。燭者。禮記樂記篇。天地訴合。鄭注曰。訢讀爲熹。熹猶蒸也。正義曰。言天地氣之蒸動。猶若人之喜也。燭熹一字耳。燭字他無所見。疑亦以氣言。胸者。胸字之誤。說文日部。胸。日出溫也。

鼠應廣之實。陰陽之數也。華若落之名。祭之號也。

樾謹按應字若字。皆衍文也。尹解上句曰。鼠。憂也。凡此皆君之憂人。故廣爲祈福祥而祭之。不釋應字之義。則上句無應字也。應卽廣字之誤而復者耳。尹解下句曰。言祭時爲物作美號。若花落也。以花落連文。卽正文華落字也。然則華落兩字之閒。不當有若字。因注言若花落。遂誤闢入正文耳。管子原文。本作鼠廣之實。句陰陽之數也。華落之名。句祭之號也。雖其義不盡可通。而其文猶可考也。華落對文。

鼠廣疑亦對文。漢書五行志曰：鼠盜竊小蟲，意者以鼠喻小，故與廣對歟。





# 諸子平議卷四

## 管子四

故曰上離其道，下失其事。心術上。

樾謹按此不當有故曰二字，涉下解而衍。

掃除不潔，神乃留處。

樾謹按宋本作神不留處，當從之。下解曰：不潔則神不處，是其證。

求之者不得處之者。

樾謹按下之者二字，衍文也。求之者不得處，謂不得其處也。尹注謂不知其處而得之，是其所據本未衍。

天曰虛，地曰靜，乃不伐。

樾謹按伐乃貸字之誤。貸字闕壞，止存上半之代，因誤爲伐矣。據下解曰：天之道虛，地之道靜，虛則不，靜則不變，不，變則無過，故曰不伐，以無過釋不伐，則不伐是不貸之誤。明矣。禮記月令篇：宿離不貸。鄭注曰：不得過差也。是貸之義爲過差。周易豫象傳曰：天地以順動，故日月不過，而四時不忒。忒與貸。

同。日月曰不過。四時曰不忒。文異而義不殊。然則此文言不貸。而後解言無過。正合古義。且言天地者。當美其不差貸。不當言不伐天地之大。誰能伐之乎。於義求之。既不可通。貸字與上文色字則字爲韻。今誤作伐。則於韻求之。又不合矣。是不可不正也。以無爲之謂道。

樾謹按以衍字。尹注曰。無爲自然者道也。是無以字。法者所以同出。

樾謹按尹注曰。有禮則有法。故曰同出也。如其說。當曰與禮同出。乃曰所以同出。義不可通矣。出疑世字之誤。世。隸書或作卅。故與出相似而誤也。所以同世。謂所以齊同一世之人。下文曰。故殺僂。禁誅以一之也。卽所以同世之義。莫人言至也。

樾謹按此云莫人。句言至也。下云不宜。句言應也。又云不顧。句言因也。皆釋上文直人之言不義不顧之義。不宜卽不義也。然則莫人乃直人之誤。疑管子原文本作直人言正也。蓋以正釋直。禮記曲禮篇直而勿有。郊特牲篇直祭祝於主。鄭注並曰。直。正也。以正釋直。乃古義也。直與莫。正與至。皆以形近而誤。

因也者，非吾所顧，故無顧也。

樾謹按：非吾所顧，當作非吾所取。此與上文應也者，非吾所設，相對成文。據下文云：「其應非所設也，其動非所取也。」又云：「感而後應，非所設也。緣理而動，非所取也。」並以所設所取對言，故知此文亦當作所取也。廣雅釋詁：「取，爲也。」尹氏作注時，文尙未誤，故釋其義曰：「非吾所爲，故無顧，以爲訓取，正本廣雅義。」或據尹注，謂正文亦當作爲，則是尹氏空舉正文，無所訓詁，無爲貴注矣。

闕其門。

樾謹按：據上文是開其門，此誤開爲闕。

變化則爲生，爲生則亂矣。

樾謹按：古爲僞字通。禮記月令篇：「毋或作爲淫巧。」鄭注曰：「今月令作爲，詐僞。」成九年左傳：「爲將改立君者。」定十二年傳：「子爲不知，釋文並云：『爲本作僞，是其證也。』」此言變化則僞生，僞生則亂，而尹氏以本字讀之，曰：「謂有爲於營生，失之。」

纂選者所以等事也。心術下、

樾謹按：纂乃纂字之誤。詩猗嗟篇：「舞則選兮。」毛傳：「訓選爲齊。」仲尼弟子傳：「任不齊。」字子選，是選有齊義。韓詩作舞，則纂兮，蓋選與纂聲近而義通。此云纂選者，所以等事也。正以纂選之義，並爲齊也。賈子等

齊篇曰撰然齊等。是其義也。纂與慕字形相似。因而致誤。尹注曰。或占慕之。或選擇之。失其義矣。

金心在中不可匿。

樾謹按尹注曰。金之爲物彌精。心之爲用彌明。故比心於金。此說迂曲。誠不可從。劉氏續謂當依內業篇作全。今按內業篇。全心在中。不可蔽匿。此劉所據也。又曰。心全於中。形全於外。則所謂全心者。或卽心全之說。然心全於中。文義俱安。全心在中。則有未安矣。內業篇又曰。正心在中。萬物得度。疑金心全心。皆正心之誤。正誤爲全。全又誤爲金耳。正心者誠心也。論語述而篇。正唯弟子不能學也。鄭注曰。魯讀正爲誠。是正與誠。古得通用。誠心在中。則自不可得匿矣。所謂有諸內必形諸外也。下文金心之形。明於日月。察於父母。義亦同此。

昔者明王之愛天下。故天下可附。暴王之惡天下。故天下可離。

樾謹按兩之字皆心字之誤。此承上文正心之形。明於日月。察於父母而言。正心者誠心也。言明王誠心以愛天下。故天下可附。暴王誠心以惡天下。故天下可離也。下文故貨之不足以爲愛。刑之不足以爲惡。貨者愛之末也。刑者惡之末也。正見愛惡之在於心耳。若但云明王之愛天下。暴王之惡天下。安見其愛不以貨。惡不以刑乎。又按貨字乃賞字之誤。賞與刑相對爲文。今作貨則不倫矣。內業篇云。賞不足以勸善。刑不足以懲過。彼篇文義多與此同。可據以訂正。

出者而不傷人，入者自傷也。自心。

樾謹按此本作出者而不傷人，傷人者自傷也。今本奪傷字，入卽人字之誤。尹注曰：出者既主生，則不當傷人，遠而傷人是還自傷也。注中有兩傷人字，知正文必有兩傷人字，注中無入字，知正文亦無入字矣。

故曰有中中有中。

樾謹按此本作不中有中，故尹注曰：舉事雖得其中，而不爲中，乃是有中也。今誤作有中，有中義不可通。

孰能已無已乎。

樾謹按已無已，猶云我喪我也。尹注曰：能效天地者，其唯忘已乎。此乃說其義如此。王氏念孫謂已無已當作忘已，非是。

事有適而無適，若有適，觸解不可解，而後解。

樾謹按王氏讀書雜誌曰：此當作事有適，句無適而后適，句觸有解，句不可解而后解，句言事之有適也，必無適而后適，觸之有解也，必不可解而后解，其說誠是。然必改參差之文法，以爲整齊，轉非古書之舊矣。小爾雅廣言曰：若乃也。管子書君臣上篇：若任之以事，若量能而授官，下篇：若稽之以衆風，若

任以社稷之臣諸若字並猶乃也此文若有適亦當訓爲乃有適言事有適而無適乃爲有適。觴必解其不可解而後能解也如此則從舊讀義自可通無庸增改。

爲善乎毋提提。

樾謹按提當讀爲湜。說文水部湜水清底見也。從水是聲。詩曰湜湜其止爲善毋湜湜者卽老子知其白守其黑之意。水至清則無魚人至察則無徒故以湜湜爲戒。湜與提並從是聲古音相同得相通用。尹注曰提提謂有所揚舉也是誤以本字讀之。淮南子說林篇的的者獲提提者射提提與的的竝言其義可見高注曰提提安也亦失之矣。

愕愕者不以天下爲憂刺刺者不以萬物爲筴。

樾謹按筴字義不可通當讀爲慝。說文心部慝快也廣雅釋詁慝可也不以萬物爲慝正與不以天下爲憂相對言萬物不足以快其心也。筴慝並從夾得聲故段用之耳。

知苟適可爲天下周。

樾謹按周字無義疑君字之誤可爲天下君猶下文言可以爲天下王也君古文與周相似而誤。

君親六合以考內身。

樾謹按此君字乃周字之誤與上文可互證。尹注曰遍六合之種一一考之於身蓋以遍釋周是其所

據本未誤也。惟親字無義。尹亦無注。或視字之誤。周視六合。其義甚明。故尹注不及耳。無遷無衍。

樾謹按尹注曰。無遷移。無寬衍。然遷移與寬衍。兩意不倫。恐非也。衍當讀爲延。周官大祝。二曰衍祭。鄭注曰。衍字當爲延。又男巫掌望祀望衍授號。注曰。衍讀爲延。詩椒聊篇。蕃衍盈升。一切經音義十九引作蕃延盈升。是衍延古通用也。遷延乃疊韻字。古有此語。襄十四年左傳。晉人謂之遷延之役。是也。無遷無延。猶曰無遷延耳。不當分爲二義。

是以水者萬物之準也。諸生之淡也。水地、

樾謹按淡字義不可通。尹注曰。能濟諸生以適中。故曰淡。亦未知淡字作何解也。淡疑本作澹。淮南子原道篇。富澹天下而不既。齊俗篇。智伯有三晉而欲不澹。高注並曰。澹。足也。又主術篇。求寡而易澹。注曰。澹。給也。蓋澹足之澹。說文無之。古人書澹字。每作澹。漢書食貨志。司馬遷傳。東方朔傳。趙充國傳。字皆作澹。師古注並云。澹古澹字。是其證也。水兼利萬物。諸有生之物。皆于水取給。故云諸生之澹。正合古人澹字從水之義。而後人又以澹淡爲一字。文選潘安仁金谷集詩。綠池泛淡淡。注引東京賦。淥水澹澹。云。澹與淡同。於是諸生之澹。改爲諸生之淡。而其義始晦矣。

遠非得失之質也。

樾謹按達當讀作踰。隱十一年左傳。犯五不踰。杜注曰。踰是也。踰非猶曰是非正與得失一律。萬物莫不盡其幾。

樾謹按詩楚茨篇。如幾如式。毛傳曰。幾期也。萬物莫不盡其幾。言無不盡其期也。猶云終其天年耳。尹注非。

耳之所聽。非特雷鼓之聞也。察於淑湫。

樾謹按淑當作嗽。湫當作啾。並以聲言。說文口部。啾。嘆也。啾。小兒聲也。

或世見或世不見者。生螭與慶忌。

樾謹按生字衍文也。據下文云。或世見或不見者。螭與慶忌。無生字可證。

涸川之精者。生於螭。

樾謹按於字衍文。王氏讀書雜誌已訂正矣。惟此文尙有可疑。上文云涸澤數百歲。谷之不徙。水之不絕者。生慶忌。是則當有生字者也。若此文言涸川之精者。則卽是螭矣。何得更言生乎。據太平御覽妖異部。法苑珠林六道篇引此文。川下並有水字。疑管子原文本作涸川之水生螭。因涉上文此涸澤之精也。而誤著此文已云涸川之精者生螭。而下文又云此涸川水之精也。則於文義複矣。知非管子原文也。



秦之水汔取而稽。淤滯而難。

樾謹按尹注曰。取。絕也。稽。停留也。謂秦之水絕甘而味停留。蓋尹所據本作甘最而稽。故其說如此。然義實未安。當以今本爲長。說文水部。周謂潘曰汔。潘。浙米汁也。門部。取。積也。徐鍇曰。古以聚物之聚爲取。此二句之義。蓋謂汔汁會聚而停留。淤泥沉滯而混雜也。尹據誤本爲說。非是。宋本取作最。則依尹注爲文耳。未足據也。

齊晉之水。枯旱而運。

樾謹按齊與晉聲相近。周易釋文曰。晉。孟本作齊。是也。管子原文本作晉之水。聲誤爲齊。校者芻注晉字。傳寫并入正文。遂作齊晉之水矣。尹注謂是齊之西而晉之東。此曲說也。王氏雜志謂涉上文而誤。夫上文有齊之水。楚之水。越之水。秦之水。何獨誤作齊乎。是猶未明其致誤之由也。又按運字無義。乃渾之段字。惟其枯旱。是以渾濁。故曰枯旱而渾也。

使不能爲惛。惛而忘也者。皆受天禍。四時。

樾謹按使不能爲惛。下有闕文。據上文使能之謂明。聽信之謂聖。則此文當有聽不信爲忘五字。忘讀爲芒。莊子齊物論篇。人之生也。固若是芒乎。釋文曰。芒。昧也。蓋與惛同義。七臣七主篇有芒主。

上見功而賤。則爲人下者直。爲人上者驕。

樾謹按直當爲惠。乃壞字也。惠古德字。言爲下者自以爲德也。九變篇曰。凡民之所以守戰。至死而不德其上者。蓋有數焉。注曰。雖復至死。不敢恃之以德於上。此文惠字。義與彼同。因字誤爲直。尹氏卽以肆直釋之。誤矣。

星者掌發爲風。

樾謹按此本作星掌發。發爲風。與下文日掌賞。賞爲暑。歲掌和。和爲雨。辰掌收。收爲陰。月掌罰。罰爲寒。文法一律。今衍者字奪發字。

除急漏田廬。

樾謹按除急二字。衍文也。尹注曰。田中之廬欲漏之。不欲人惡盛陽之氣也。不及除急之義。是尹所據本無此二字。

所惡其察。所欲必得。

樾謹按當作所惡必察。兩句一律。下文云。所求必得。所惡必伏。亦兩句一律。是其證。

鬪譯跽。

樾謹按此三字之義。爲不可曉。據尹注曰。譯傳言語相疾忌。爲鬪訟者。是其所據本作譯忌鬪。因傳寫奪鬪字。誤補之。譯字之上。而忌字又從足作跽。此是所傳之異。非尹本之舊也。然尹說亦不可通。上文

曰禁博塞圍小辯。上一字皆禁止之意。下二字皆實指其事。此文疑亦當同。忌鬪連文。雖未詳其義。然譯必舉之。段字說文率部。率司視也。從橫目。從率。令吏將目捕罪人也。然則率有捕治之義。禁圍之不止。從而捕治之。亦事之相因者矣。

是故人有六多。六多所以街天地也。五行、

樾謹按六多之義未詳。尹氏曲爲之說。殆非也。街字義亦難明。劉氏續曰。街猶通也。然則街當作術。字之誤也。說文行部。術通街也。術之訓通。正得其義。而其誤爲街。亦有由矣。字亦作迴。玉篇迴通達也。淮南子要略篇。通迴造化之母。上德篇。德迴乎天地。王氏念孫讀書雜誌。謂迴字並迴字之誤。是也。即可

以說術天地之義矣。

修概水上。以待乎天堇。

樾謹按王氏念孫謂上當作土。然此與下文治祀之下以觀地位相對爲文。則上字不誤也。其義未詳。奢龍辨乎東方。故使爲土師。

樾謹按土師當作工師。此官在唐虞爲共工。在周官爲司空。司空卽司工。空者工之段字也。故小宰職曰冬官掌邦事。不曰冬官掌邦土。漢世說經者有司空主空土之說。僞古文遂曰司空掌邦土矣。說詳羣經平議。此文工師作土師。蓋以形近而誤。然與經義違矣。故不可不辨。

賭甲子木行御。

樾謹按賭字義不可通。疑當爲都。都古字作𡈼。因誤爲覩。後人遂書作賭耳。爾雅釋詁曰。都於也。都甲子木行御。言於甲子之日。木行御也。下文賭丙子火行御。賭戊子土行御。賭庚子金行御。賭壬子水行御。諸賭字並當作都。

不誅不貞。

樾謹按貞乃賞字之誤。上文於春曰。賦祕賜賞於四境之內。於夏曰。發臧任君賜賞。是皆有賞也。下文於秋曰。命左右司馬衍組甲厲兵。合什爲伍。以修於四境之內。諛然告民有事。所以待天地之殺歛也。於冬曰。令民出獵禽獸。不釋巨少而殺之。所以貴天地之所閉藏也。是皆有誅也。蓋賞以春夏。刑以秋冬。古制如此。至戊子土行御。則不誅不賞。但務農事而已。故不誅不賞。農事爲敬。賞字闕壞。遂誤爲貞。尹注從而爲之辭。斯曲說矣。

其氣不足。則發擱瀆盜賊。

樾謹按發字涉上句而衍。據尹注無。

不釋巨少而殺之。

樾謹按釋乃擇字之誤。

君危不殺。太子危。

樾謹按殺當爲發聲之誤也。釋名釋用器曰：鑕，殺也。釋名一書皆以聲取義。鑕從發聲，而訓爲殺，是殺與發聲近。詩噫嘻篇：駿發爾私。毛傳曰：發，伐也。廣雅釋詁曰：伐，殺也。發訓伐而伐訓殺，然則殺之與發義亦得通矣。君危自爲句，不發又自爲句。上文曰：睹甲子木行御。天子出令，命左右士師內御，總別列爵，論賢不肖，士吏賦祕賜，賞於四境之內，發故粟以田數出，國衡順山林，禁民斬木，所以順草木也。此文承上而言，故曰：天子不賦，不賜賞，而大斬伐傷君危，不發。太子危，家人夫人死，所云不賦，不賜賞，而大斬伐傷，與上文賦祕賜賞於四境之內，及禁民斬木相應。所云不發，與上文發故粟相應。蓋當發故粟而不發，故其災禍如此也。不發正與不賦，不賜賞一律。因字誤作殺。尹注遂誤以君危不殺四字爲句。解曰：若君雖危而下見殺，則又太子危而家人夫人有死禍也。此曲說不可從。下文曰：睹戊子土行，御天子修宮室，築臺榭，君危外築城郭，臣死，君危爲一事，臣死爲一事。然則此文亦當以君危爲一事，太子危爲一事，非君危不見殺，而後太子乃危也。

動靜者比於夙，動作者比於醜，動信者比於距，動誑者比於避，勢

樾謹按四動字皆當作重，與任法篇重愛曰失德，重惡曰失威，兩重字義同。蓋靜作信，誑各有所宜，偏重之則非矣。尹注皆迂曲未合。

未得天極。則隱於德。

樾謹按古依隱同聲。故釋名釋衣服曰。衣。依也。廣雅釋器曰。衣。隱也。是依隱義同也。此云隱於德。猶云依於德。禮記少儀篇曰。士依於德。是其義矣。尹注謂隱而修德。失之。

形於女色。

樾謹按此女字。讀如爾女之女。形於女色。猶言形於其色耳。蓋既裕德無求。則其安徐正靜。必有見於顏色者。故云然。尹注讀如本字。以爲女之容色。失之。

秉時養人。

樾謹按周書諡法篇曰。秉。順也。秉時養人者。順時養人也。尹注曰。持四時之政。以順養其人。訓秉爲持。未得其義。

萬物崇一正。

樾謹按崇。讀爲宗。尙書牧誓篇。是崇是長。漢書谷永傳。崇作宗。是古字通也。廣雅釋詁。宗本也。萬物宗一。言萬物本乎一也。老子曰。一生二。二生三。三生萬物。

刑以弊之。毋失民命。

樾謹按刑以弊之。當作弊之以□其□。方與下文令之以終其欲。遏之以絕其志意。養之以化其惡。明

之以察其生。文法一律。因弊之下奪四字。遂據上文於弊之上加刑以二字。非其舊矣。致刑其民。庸心以蔽致政。其民服信以聽致德。其民和平以靜致道。其民付而不爭。

樾謹按致刑致政致德致道皆二字爲句。其民屬下讀。言上能致其刑政德道。故其民如此也。蔽字與聽靜爭不協韻。蔽蓋敬字之誤。爾雅釋詁庸勞也。釋訓庸庸勞也。是庸之義爲勞。上能致其刑則其民勞心而敬矣。尹據誤本作注。又誤讀致刑其民爲句。遂以庸心以蔽爲就上之人言。解曰不用心以斷則濫及不辜。乃其解下文和平以靜付而不爭。又就民言何也。夫四句一律。下二句旣以民言。則上二句亦以民言。故知其民二字必屬下讀。不屬上讀也。付而不爭當作附而不爭。古字通用。尙書梓材篇皇天旣付中國民。釋文曰付馬本作附。周官小司寇職附刑罰。鄭注曰故書附作付。並其證也。附而不爭謂民親附而不爭。尹注曰人被道則相付任而不爭。未達假借之旨。

出令時當曰政。

樾謹按尹注曰令當於正時之謂也。疑正文及注均有誤。正文當曰出令當時曰政。注文當曰令當於時政之謂也。並傳寫者到之。正之與政則古通用字耳。

正衡一靜能守慎乎。

樾謹按尹注曰衡平也。言但能守慎則政平而靜一。是尹所據本作正衡靜一。今作一靜誤。

能服信政。此謂正紀。能服日新。此謂行理。

樾謹按上云。立常行政。能服信乎。中和慎敬。能日新乎。此承上文而言。當作能服信。此謂正紀。能日新。此謂行理。上句政字。涉上文臨政官民而衍。下句服字。卽涉上句能服信而衍。

不事心。不勞意。不動力。任法。

樾謹按爾雅釋詁。事。勤也。勤。勞也。是事與勞義通。禮記儒行篇。先勞而後獲。鄭注曰。勞猶事也。然則事亦猶勞也。不事心者。不勞心也。至動字。亦無意。疑勤字之誤。不事心。不勞意。不勤力。三句一意。奇術技藝之人。莫敢高言孟行。以過其情。以遇其主矣。

樾謹按遇讀爲愚。詩巧言篇。遇大獲之。釋文曰。遇。世讀作愚。莊子則陽篇。匿爲物而愚不識。釋文曰。愚本作遇。是遇與愚通。愚其主者。自以爲知。而以其主爲愚也。尹注訓遇爲待。則失其義。國法。法不一。則有國者不祥。

樾謹按此本作有國者。國法不一。則不祥。有國者三字。總冒下五句。國法不一。則不祥。與下民不道。法則不祥。一律。因寫者奪有國者三字。而誤補之。則字之下。則與下文句法不一。律矣。國法不一。句。又誤疊法字。尹注遂斷國法二字爲句。解曰。有國者有法也。增益以成其義。足知其非。國更立法以典民。則祥。



櫛謹按上下文凡四言不祥則此亦當作不祥傳寫奪不字耳立法固所以典民然成法具在必更易之則不祥矣尹所據本奪不字故失其解

故曰法者不可恆也

櫛謹按尹注曰法敝則當變故不恆此說雖若有理然以上下文求之殊不可通上文曰故黃帝之治也置法而不變使民安其法者也此乃云法不可恆則非置法不變之謂矣其不可通一也既云法不可恆而下文乃曰故明王之所恆者二一曰明法而固守之二曰禁民私而收使之此二者主之所恆也則又非法不可恆之謂矣其不可通二也反覆推求三恆字皆慎字之誤法者不可恆也本作法者不可不恆也故其下卽曰存亡治亂之所從出聖君所以爲天下大儀也君臣上下貴賤皆發焉乃申明不可不恆之意禁藏篇曰法者天下之儀也所以決疑而明是非也百姓所縣命也故明主慎之正與此文同義自慎誤爲恆而又奪不字遂失其義矣明王之所恆者二當作明王之所慎者二此二者主之所恆也當作此二者主之所慎也慎字右旁之眞隸書作莫闕壞而爲巨故慎誤爲恆矣夫兩言所慎文義甚明若作所恆便爲無義其誤顯然所宜訂正

然故謹柁習士聞識博學之人不可亂也

櫛謹按尹解謹柁曰柁所以毀碎於物者也謂姦詐之人僞託於謹以毀君法此說殊爲迂曲殆非也

謹杵疑當作謹樹。乃疊韻字。後漢書馮衍傳。意樹慙而不愴兮。李賢注曰。樹慙猶遲疑也。此作謹樹者。謹與慙同。杵乃樹字之誤。古書樹字或作埤。故樹鄒亦作埤鄒。見玉篇土部。又或作埤。見漢書地理志。應劭注。管子原文。疑本作埤。因誤爲杵也。習士者俗士也。說文人部。俗。習也。習與俗雙聲。故義亦得通。謹樹習士。謂流俗之士。意識遲疑者也。此指愚不肖者而言。下云聞識博學之人。則指賢知者而言。此兩等人。皆能出其私議。以亂國法者也。

卿相不得翦其私。

樾謹按上云。翦公財以祿私士。此乃云翦其私。義不可通。此翦字當讀爲濟。聲之誤也。爾雅釋言。翦。齊也。郭注曰。南方人呼翦刀爲劑刀。是齊與翦聲相近。又涉上文翦公財而誤耳。

夫日侵而產怨。此失君之所愼也。

樾謹按失君當作人君。涉上文失君則不然而誤。

令求不出謂之滅。出而道留謂之擁。下情求不上通謂之塞。下情上而道止謂之侵。

明法、

樾謹按令求不出。據後解作令本不出。然則下情求不上通。亦當作下情本不上通。後解奪本字。遂并此文而無從是正矣。尹注曰。求不出令。則下無所稟。故滅。求不上通。則與君隔絕。故曰塞也。兩求字亦本字之誤。

比周以相爲匿。是忘主死交。以進其譽。

樾謹按是下奪故字。後解作比周以相爲匿。是故忘主死交。以進其譽。可證也。尹注誤讀是字絕句。劉氏已訂正矣。惟匿字亦當從後解作匿。言比周而爲姦慝也。匿慝古字通。洪範五行傳。朔而月見東方。謂之側匿。漢書孔光傳作側慝。

不一圖國。

樾謹按當從後解。作不一圖其國。

力罷則不能毋墮倪。

正世。

樾謹按尹注曰。倪。傲也。則墮當讀爲惰。惰與傲義相近。輕重戊篇。歸市亦惰倪。是其證。

不繁匿。

樾謹按匿亦當爲慝。說見上篇。下文曰。法禁不立。則姦邪繁。繁慝卽姦邪繁也。

有愛人之心。而實合於傷民。

樾謹按合於傷民者。足於傷民也。合與給通。給。足也。故合亦有足義。論語子路篇。始有曰苟合矣。言苟

足也。孟子梁惠王篇。此心之所以合於王者何也。言足於王也。說詳羣經平議。

治莫貴於得齊。

櫛謹按水經濟水注引春秋說題辭曰齊度也周官亨人以給水火之齊鄭注曰齊多少之量又酒正辨五齊之名注曰齊者每有祭祀以度量節作之是齊有度量之義治莫貴於得齊謂得其度量也史記孝武紀事化丹砂諸藥齊爲黃金矣索隱曰齊音分劑之劑此齊字讀當與彼同尹注非是

# 諸子平議卷五

## 管子五

謀乎莫聞其音內業、

樾謹按謀乎乃形況之辭。與下文卒乎冥冥乎淫淫乎一律。尹注曰。今謀欲尋於道。則不聞其音。此大誤也。謀卽禮記玉藻篇瞿瞿梅梅之梅。正義曰。梅梅猶微微。謂微昧也。正與莫聞其音之義合。梅或體作媒。與謀並從某聲。故得通用。莊子知北遊篇媒媒晦晦。釋文引李注曰。媒媒晦貌。謀與媒亦同。飢不廣思。飽而不廢。

樾謹按下飽字疑飢字之誤。上文曰。飢則廣思。尹注曰。飢而廣思。則忘其飢。然則飢不廣思。其飢益甚矣。故曰飢而不廢。言飢不止也。尹注曰。廢。止也。是其義也。今作飽而不廢。義不可通。蓋後人不達其旨。而臆改耳。

是謂雲氣。

樾謹按下文云。靈氣在心。一來一逝。疑此文雲氣亦靈氣之誤。隸書靈字或作靈。見王稚子闕。與雲相似。故誤爲雲耳。尹注曰。能調其氣。故比於雲。此其所據本已誤。故曲爲之說。

不可爲數小問、

樾謹按不可爲數猶言不可勝數言天下之精材皆聚於我不可爲之計數也尹注非。

守戰遠見有患。

樾謹按尹注曰爲國者必入守出戰今吾於此二者預見其患矣尹氏蓋以遠見有患連讀而解爲預見其患甚爲不辭遠見卽外知也下文曰夫民不必死則不可與出乎守戰之難不必信則不可恃而外知夫恃不死之民而求以守戰恃不信之人而求以外知此兵之三闕也卽承此文而言故知遠見卽外知也儀禮特牲饋食禮若不吉則筮遠日鄭注曰遠日句之外日呂氏春秋有始覽冬至日行遠道高注曰遠道外道也是遠卽外也呂氏春秋自知篇文侯不說知於顏色高注曰知猶見也是見卽知也。

而憂之以德。

樾謹按說文久部憂行之和也凡經傳憂字皆憂之段字此則其本字憂之以德謂和之以德也除君苛疾與若之多虛而少實。

樾謹按若乃君字之誤王氏引之已訂正矣至尹氏謂此句蒙除字爲文解曰謂君之材能多似有而非實如此者亦祝去之也果如此則祝臆已疵之言未始不善公何爲不說乎蓋一除一興自是兩事。

除者祝去之。與者求與之也。多虛而少實。謂致力者少而收功者多。下文曰。又與君之若賢。亦是此意。祝之意以爲不賢。固不可。然必實賢則勞矣。故以若賢爲祝也。此二句正所謂婦寺之忠。桓公怒而將誅之。是可以責難矣。管仲是以知其可霸也。

中有卷城。

櫪謹按。卷當讀爲圈。大元交次六。大圈閼閼。小圈交之。范望注曰。圈。國也。是圈有國邑之義。故與城並言。

今者寡人見人長尺。而人物具焉冠。

櫪謹按。冠下本有冕字。說苑辨物篇。作有人長尺冠冕。是其證也。今本奪冕字。而藝文類聚太平御覽開元占經諸書所引。並作冠冠。則又因奪冕字而誤補冠字。

右袪衣。

櫪謹按。說苑作左袪衣是也。說詳後。

從左方涉。其深及冠。從右方涉。其深至膝。

櫪謹按。水而及冠。是滅頂矣。又何涉乎。說苑作從左方渡至踝。從右方渡至膝。疑此文冠字亦當作踝。以聲近而誤也。左至踝。右至膝。是左淺而右深也。自踝誤作冠。則爲左深而右淺。遂改上文之左袪衣。

爲右袂衣。左方涉爲右方涉。皆非管子之原文矣。

昔者吳干戰。未亂不得入軍門。國子櫛其齒。遂入爲干國多。

櫛謹按尹注曰。干。江邊地。亂。毀齒也。戰功曰多。言於干戰。國子功多也。此注於干字未得其義。干當作邗。說文邑部。邗。國也。今屬臨淮。從邑干聲。一曰邗。本屬吳。蓋邗古國名。後爲吳邑。哀九年左傳。吳城邗。卽其地矣。此文吳干戰。吳干乃兩國也。國子乃干國之人。故曰爲干國多。言此役也。國子在干國中。戰功爲最也。尹氏不知干爲國名。誤解爲江邊地。則吳與戰者何國也。且其解爲干國多句。更文不成義矣。

皆要審則法令固。七臣七主。

櫛謹按尹解皆要。爲事皆得要。殆非也。下句曰。賞罰必則下服度。皆要與賞罰相對爲文。若從尹解。則不倫矣。皆當作比。大戴記保傳篇。於是比選天下端士。漢書賈誼傳。比作皆。戰國秦策。斷死於前者比是也。韓子初見秦篇。比作皆。並其例矣。周官小司徒職。及三年則大比。大比則受邦國之比要。鄭司農云。五家爲比。故以比爲名。今時八月案比是也。要謂其簿。然則比要者。大比之簿籍。大比之簿籍審。則法令固矣。管子多本周制。於此可見。

不許則國失勢。



樾謹按許乃悟之段字。言不覺悟則國勢必失也。上文曰得六過一是以還自鏡以知得失。然則過主能早自覺悟。或尙可爲。不悟則已矣。下文凡言不許者。其義並同。尹注謂許古伍字。謂偶合也。非是。四鄰不計。

樾謹按此本作四隙不計。故尹注曰四鄰與已爲隙。不計度而知之。四鄰與已爲隙。正解四隙之義。今作四鄰不計者。卽涉注文而誤。下文曰故上僭則隙不計。文與此同。彼奪四字耳。瑤臺玉舖不足處。

樾謹按尹注曰玉舖猶玉食。然云不足處。則當是居處之事。舖疑圃之段字。舖與圃並從市聲。故得通耳。玉圃猶瑤圃也。楚辭涉江篇曰吾與重華遊於瑤之圃。夫亡國陪家者。非無壤土也。

樾謹按者字衍文也。此以國家言。故曰非無壤土。若有者字。則以人言。不當云壤土矣。下文夫凶歲雷早。非無雨露也。亂世煩政。非無法令也。暴主迷君。非無心腹也。並無者字。故知此者字誤衍。直多賸臺。

樾謹按直與菹同。孟子滕文公篇驅蛇龍而放之菹。趙注曰菹澤生草者也。今青州謂澤有草爲菹。斷名決。

樾謹按尹注曰依名而斷決則其所據本當作名斷決故下文曰名斷言澤

吏不敢以長官威嚴危其命禁藏

樾謹按危當讀爲詭古字通用說見大匡篇曹大家注幽通賦曰詭反也詭其命者反其命也謂反易其命也與上句不爲親戚故貴易其法一律

民之承教重於神寶

樾謹按爾雅釋詁神重也此言神寶卽上言重寶因句有重字故變重言神耳尹注曰夫寶有靈故曰神寶失之

能節宮室適車輿以實藏

樾謹按適猶節也呂氏春秋重己篇故聖人必先適欲高注曰適猶節也情欲篇情有節古樂篇有節有侈注並曰節適也是適節義通適車輿猶節車輿也與節宮室一律

氣情不營則耳目穀

樾謹按穀讀爲慤禮記祭義篇其親也慤正義曰慤謂質慤氣情不營則耳目質慤矣尹讀如本字非菹笠以當盾櫓

樾謹按尹注曰取菹澤草以爲笠然則當云草笠不當云菹笠且與上文被裘以當鎧鍔文義不倫殆

非也。菑者組之段字。說文糸部。組。綬屬。其小者以爲冕纓。然則組笠猶言纓冠。正與被裘相對成文。農事習則功戰巧矣。

樾謹按功當作攻。上文云耕農當攻戰。此承上文而言。故曰農事習則攻戰巧矣。尹注曰習農則當功戰。卽依上文爲說。功亦應作攻。荀子議兵篇。械用兵革。攻完便利者強。楊注曰攻當爲功。是攻功古通用。然觀尹注。則其所據本似本作攻。作功者聲近而誤。

順天之時。約地之宜。忠人之和。

樾謹按王氏念孫謂約當爲得。草書札似而誤。而未及忠字之義。忠當讀爲中。枚氏古文尙書仲虺之誥。建中于民。釋文曰中。本或作忠。是中忠通用也。中人之和。猶言得人之和。周官師氏職曰。掌國中失之事。鄭注曰。故書中爲得。呂氏春秋行論篇。以中帝心。高注曰。中猶得。戰國策齊策。是秦之計中。高注曰。中得也。並古人謂得爲中之證。得人之和。正與得地之宜一律。荀子富國篇。上得天時。下得地利。中得人和。文義與此相近。可以證成王說。

夫鈹鈞者所以多寡也。

樾謹按所以下有鈹字。下文云權衡者所以視重輕也。戶籍田結者所以知貧富之不訾也。可證而謀有功者五。

樾謹按當作謀而有功者五。

外內蔽塞可以成敗。

樾謹按此欲其敗非欲其成。而曰可以成敗。乃因敗而連言成。古語往往如此。說見日知錄卷廿七。後漢書何進傳。先帝嘗與太后不快。幾至成敗。亦因敗而連言成。正與此同。王氏引之謂成當爲或非是。謹其忠臣。

樾謹按謹當讀爲結。言與其忠臣相結也。結與謹一聲之轉。故古或通用。桓三年穀梁傳。謹言而退。公羊傳作結言而退。是其證。

上收而養之疾官。而衣食之入國。

樾謹按疾官二字連文。官古館字。說詳余所著字義載疑。疾官乃有疾者所居之館舍。當時蓋特設之以居有疾之人。故曰上收而養之疾官。而衣食之。尹注誤於疾字斷句。則兩句皆不可通矣。

虛心平意以待須。九守

樾謹按須本作傾。與上文靜定爲韻。待訓爲備。國語周語。其何以待之。韋注曰。待猶備也。以待傾者。以備傾也。言虛心平意。以備其傾覆也。今誤作須。則不特失其韻。且須卽待也。於義複矣。鬼谷子符言篇。作虛心平意。以待傾損。是其塙證。

誠暢乎天地，通於神明，見姦僞也。

樾謹按：見乃兄字之誤。管子書每以兄爲況字。大匡篇：兄與我齊國之政也，是其證也。此言精誠可以暢天地，通神明，況姦僞乎？言必爲其所化也。古字也與邪通。故陸德明經典釋文曰：邪也弗殊。然則況姦僞也，猶云況姦僞邪？因段兄爲況，又誤兄爲見，而其義全失。鬼谷子符言篇：作誠暢於天下神明，而況姦者干君，其文雖不同，然況字正不誤，可據以訂正。

因之修理，故能長久。

樾謹按：修乃循字之誤。鬼谷子正作循理。下文修名而督實，修亦當爲循。鬼谷子作循名而爲實，其文雖不同，而循字不誤，可據訂。

明知千里之外，隱微之中，曰動姦。

樾謹按：動當作洞，聲之誤也。鬼谷子作是謂洞天下姦。

上相稽著者，所以爲固也。度地。

樾謹按：方言：蒿，合也。廣雅釋詁：繡，合也。稽與蒿繡並通。稽著猶合著也。文選七發：中若結繡。李善注：引說文曰：繡，車籍交革也。義亦相近。

大夫佐各一人，率部校長官佐各財足。

樾謹按財足猶纔足也。史記孝文本紀見馬遺財足。索隱曰財字與纔同。漢書楊雄傳財足以奉郊廟。師古注曰財讀與纔同。漢書以財爲纔不可枚舉。此文財足正與彼同。言人數不必過多。取其纔足任事而已。尹注曰財謂其祿廩。非是。下文云給卒財足亦言給之以卒使纔足任事不必過多也。注云財其糧用也亦非是。

可省作者半事之。

樾謹按省與少一聲之轉。故義得相通。禮記喪服小記篇多陳之而省納之。荀子仲尼篇省求多功。並以省與多對。省卽讀如少矣。此言雖有疾病不能多作猶可少作。故半事之也。尹注謂可以省視作者取其半功未得其義。

補弊久去苦惡。

樾謹按尹注曰其器既補弊而久有苦惡者除去之。此未得其義。補弊久與去苦惡相對。久讀爲舊。尙書無逸篇舊勞于外。舊爲小人。史記魯周公世家舊皆作久。是舊久古通用。詩抑篇告爾舊止。鄭箋曰舊久也。文選答賓戲時暗而久章者注曰久舊也。並其證也。此文言弊舊者補之。苦惡者去之。兩句文義一律。若云補弊而久則不辭甚矣。

不利作士功之事放農焉。

櫪謹按放讀爲妨。禮記月令篇。毋發令而待以妨神農之事也。卽其義。寡人悖。不知四害之服。奈何。

櫪謹按服讀爲備。謂不知四害之備也。戰國策趙策。騎射之服。史記趙世家作騎射之備。是服與備古字通。

五種無不宜。其立后而手實。地員。

櫪謹按兩句傳寫誤倒。其立后而手實。本在五種句前。總冒本篇五種無不宜。自與其本宜。甄菴云云。相屬。乃專說五施之士。證以下文。其誤自見矣。

先主一而三之。四開以合九九。

櫪謹按一而三之爲三。三而三之爲九。九而三之爲二十七。二十七而三之爲八十一。是謂四開以合九九。尹注誤。

陝之芳。

櫪謹按芳當作旁。字之誤也。陝之旁與下文山之上山之側一律。

七八五十六尺而至於泉。

櫪謹按宋本作八七五十六尺。與上文六七四十二尺。七七四十九尺。一律。當從之。下文七九六十三

尺亦當作九七。

其草如茅與走。

樾謹按如茅疑卽爾雅釋草所謂茹蘆茅蒐非必二草也走未詳。

山之材。

樾謹按材字無義疑手字之誤手誤作才因誤作材矣手者垂之古文見說文我部山之手卽山之垂說文士部垂遠邊也是垂有邊側之義尹注曰材猶旁也正得其義但未得其字耳。

其木乃格。

樾謹按木無名格者格乃椳之借字爾雅釋木櫟椳郭注以爲柚屬說文本部椳木可作牀几徐鍇繫傳以爲梓屬二者未詳孰是此文以格爲椳猶儀禮古文以格爲椳蓋古音相近故得通用。

有龍與斥。

樾謹按尹注曰龍斥並古草名此古字殊爲無義疑正文本作有龍古與斥注文本作龍古與斥並草名傳寫奪誤耳爾雅釋草紅龍古卽此草也。

右執挾七弟子職。

樾謹按尹注曰七者所以載鼎實故曰挾七此說非也古時七有二儀禮士昏禮七俎從設鄭注曰七



所以別出牲體也。此一匕也。少牢饋食禮。廩人概飴。飴匕與敦于廩爨。注曰。匕所以匕黍稷者也。此又一匕也。說文匕部。匕相與比敘也。从反人。匕亦所以用比取飯。一名柶。木部。柶匕也。所以取飯。是匕之本義爲取飯之匕。因別出牲體之具。爲用略同。故亦以匕名之。取飯之匕小。而別出牲體之匕大。易震象辭。不喪匕鬯。注。詩大東篇有捭棘。匕傳。並云。匕所以載鼎實。蓋皆別出牲體之匕也。尹氏因亦襲用其說。然管子此文。言弟子爲先生設食之禮。豈必列鼎而食。則所謂匕者。自是取飯之匕。挾匕蓋二物也。挾讀爲挾。禮記曲禮篇。羹之有菜者用挾。鄭注曰。挾猶箸也。然則挾也匕也。正食時所必用者。雖蔬食菜羹。不可無此二物。弟子執之。正其宜矣。

周還而貳。唯嚵之視。同嚵以齒。

嚵。謹按尹注曰。貳謂再益。食盡曰嚵。齒類也。謂食者則以其所盡之類而進。尹氏此說。於同嚵以齒。未得其義。齒者年也。長幼之次也。同嚵以齒。以先生之齒言。猶下文弟子乃食。以齒相邀。以弟子之齒言也。蓋食盡則更益之。有同盡者。則以齒爲序。先生亦或非一人。自有長幼也。

各徹其餽。如於賓客。

嚵。謹按於猶爲也。見王氏經傳釋詞。如於賓客者。如爲賓客也。尹注曰。賓客食畢亦自撤也。正見各徹其饋。與賓客同。

既徹并器。

樾謹按并當爲屏。尙書金縢篇。我乃屏璧與珪。枚傳曰。屏藏也。既徹屏器。謂既徹之後。則藏其器。故尹

注曰。并謂藏去也。

先生若作乃興而辭。

樾謹按先生若作者。先生謙故爲之起也。弟子不敢當。故必辭。尹注謂以并未畢。故辭之令止。此未達其旨。爲弟子者。豈宜以己并未畢而止先生之作乎。

有墮代燭。

樾謹按尹注曰。燒燭者有墮。卽令其次代之也。然則正文及注文墮字。並當作惰。大戴記盛德篇。無度量則小者偷墮。是墮與惰古字通。

治安百姓。形勢解。

樾謹按治安上當有主字。主治安百姓。與地生養萬物相對。猶上文主牧萬民。與天覆萬物相對也。

人主去其門。而迫於民。

樾謹按門字無義。疑明字之誤。禮記禮運篇。故君者所明也。鄭注曰。明猶尊也。去其明。卽去其尊。上云虎豹去其幽。此云人主去其明。兩文正相對。虎豹必居於幽僻之地。故以幽言。人主必居於高明之地。

故以明言一幽一明。正管子取譬之指也。

濟濟者誠莊事斷也。

樾謹按詩泂水篇實始翦商。毛傳云翦齊也。鄭箋云斷也。正義謂齊卽斬斷之義。此文以誠莊事斷釋濟濟卽此意也。可證古詩說故特表出之。

度量馬力。

樾謹按此本作度量其力。承上文善視其馬而言。不必言馬也。下文說明主善治其民。亦云度量其力。不言民力。可證此文馬力之誤。

奚仲之爲車器也。

樾謹按車器二字不詞。據下文云巧者奚仲之所以爲器也。則此文亦當作奚仲之爲器也。車字蓋後人妄加耳。藝文類聚及御覽引此文並作奚仲之爲車。蓋反以器字爲衍而刪之。考工記曰一器而工聚也者。車爲多。車亦器也。此文以作器爲長。

備利而儉得。

樾謹按備字無義。疑苟字之誤。苟誤作荀。因誤爲備矣。禮記表記篇安肆日儉。鄭注曰儉苟且也。是儉與苟同義。苟利卽儉得也。

爲人君而不明君臣之義，以正其臣，則臣不知於爲臣之理，以事其主矣。

樾謹按：不知下不當有於字，乃衍文也。下文云：爲人父而不明父子之義，以教其子而整齊之，則子不知爲人子之道，以事其父矣。不知下亦無於字，可證。

禹身決瀆，斬高橋下，以致民利。

樾謹按：斬當讀爲鑿。說文金部：鑿，小鑿也。字亦作嶄。文選海賦：巖陵巒而嶄鑿。汪鑿與嶄古字通。禹鑿龍門，卽此所謂斬高矣。橋讀爲橋引之橋，蓋引而上行之意。斬高橋下，義正相當。猶言高者下之，下者高之耳。

然能戰勝攻取，立爲天子。

樾謹按：能與而古字通。然能戰勝攻取，卽然而戰勝攻取也。下文桀紂貴爲天子，富有海內，地方甚大，戰卒甚衆，而身死國亡，爲天下僂者，羣書治要作然而身死國亡。此文正與彼對。一作然能，一作然而。文異而義同。韓詩外傳：貴而下賤，則衆弗惡也。富能分貧，則窮士弗惡也。崔駰大理箴：或有忠能被害，或有孝而見殘，能而互用，古書往往有此。

如是則朋黨者處前，寡黨者處後，夫朋黨者處前，賢不肯不分，則爭奪之亂起，而君在危殆之中矣。立政九敗政解。

樾謹按王氏念孫謂朋黨當作多黨是也。惟此數句尙有闕文。當云夫多黨者處前寡黨者處後則賢不肖不分賢不肖不分則爭奪之亂起而君在危殆之中矣。今本奪二句則文義不備。

凡觀樂者宮室臺池珠玉聲樂也。

樾謹按此釋上文觀樂玩好不當專舉觀樂而釋之疑本作凡觀樂者宮室臺池玩好者珠玉聲樂也。傳寫奪三字。

疏遠微賤者無所告誦則下饒版法解。

樾謹按饒當爲譏說文言部譏悲呼也。

凡人君者欲衆之親上鄉意也欲其從事之勝任也而衆者不愛則不親不親則不明不教順則不鄉意。樾謹按不親則不明句當爲衍文上下文均無此意且下文曰明教順以道之是明屬君不屬民故知此句衍文也不教順則不鄉意下尙有闕文據下文當曰不利則不勝任故莫不得其職姓。

樾謹按得職猶得所也漢書趙廣漢傳小民得職注曰得職各得其常所也此文以職姓連文甚爲不詞疑管子原文止作莫不得其職而佗本或有作得其姓者姓乃性之段字言得其性也亦與得職同義而後人誤合之遂作得其職姓耳明法解篇孤寡老弱不失其所職所職二字亦爲不詞蓋亦一本

作所一本作職而誤合之。

夫學者所以自化所以自撫。

樾謹按撫當作撫。撫卽模字。漢書蕭望之傳注曰。撫讀曰模。是也。說文木部。模。法也。所以自撫。言以學自爲模範。

明主者有術數而不可欺也。明法解。

樾謹按有字乃明字之誤。明字之下。又奪於字。當云明主者。明於術數而不可欺也。與下文審於法禁而不可犯也。察於分職而不可亂也。文誼一律。

明主之治國也。案其當宜。行其正理。

樾謹按羣書治要作案賞罰行其正理。此非原文也。案其當宜。行其正理。兩句相對成文。當猶正也。廣韻。正。正當也。正可謂之當。當亦可謂之正。漢書李尋傳。當賀良等執左道亂朝政。注曰。當。謂處正其罪名。素問六節藏象論。當其時則甚也。注曰。當。謂正直之年也。是當與正同也。宜通作誼。周官肆師職。注引鄭司農曰。古者書儀但爲義。今書所謂義爲誼。是誼者古義字。宜乃誼之省耳。故曰仁者人也。義者宜也。仁人古通用。則義宜亦通用。案其當宜。猶案其正義。與下句行其正理一律。王氏念孫反謂當從治要本誤也。

人主不參驗其罪過，以無實之言誅之，則姦臣不能無事貴重，而求推譽，以避刑罰，而受祿賞焉。  
穢謹按：姦臣當作人臣。蓋人主以無實之言誅人，則人臣皆事貴重以求免，非必姦臣也。涉上文兩云姦臣而誤。





## 諸子平議卷六

### 管子六

日至六十日而陽凍釋。七十日而陰凍釋。陰凍釋而秋稷。百日不秋稷。故春事二十五日之內耳也。

臣乘馬

櫟謹按。七十日陰凍釋而秋稷。至百日而止。則尙有三十日。乃云春事二十五日之內。義不可通。疑管子原文本作七十五日而陰凍釋。後人但取六十日。七十日兩文相對。而不顧其數之不合。遂妄刪五字耳。易乾鑿度曰。天氣三微而成一箸。鄭注曰。五日爲一微。十五日爲一箸。故五日成一候。十五日成一氣。然則日至六十日。得三微一至者二。七十五日。又得三微一至者一。以周書時訓篇言之。日至六十日而陽凍釋。是爲驚蟄。七十五日而陰凍釋。是爲雨水。若作七十日。則不相當矣。故知其誤也。

王國守始。乘馬數。

櫟謹按。下文國用一不足。則加一焉。國用二不足。則加二焉。云云。是乃無策之甚者。何以謂之王國。疑王國乃亡國之誤。上文云。出準之令。守地用人。筴故開闢。皆在上。無求於民。霸國守分上分下。游於分之間而用足。夫無求於民者上也。游於分之間而用足者次也。然則此爲最下矣。王國之誤無疑也。民無檀賣子數矣。

樾謹按數矣二字衍文。涉上文又失諸夏秋之筴數也。而衍宋本作數也。此其初衍之本。今作數矣。則又誤也。字爲矣字。

故以上壤之滿。補下壤之衆。

樾謹按衆字義不可通。疑本作補下壤之虛。虛與滿相對。國蓄篇曰。萬物之滿虛。又曰。守歲之滿虛。並其證也。隸書虛字或作𠂔。故誤爲衆耳。

齊諸侯方百里。事語、

樾謹按內業篇。節適之齊。尹注曰。齊中也。齊諸侯者。中諸侯也。謂中國之諸侯也。與下文負海子相對。負海則非中國矣。輕重乙篇。作𡗗諸侯。齊𡗗一聲之轉。猶鱗魚之爲鯨魚也。

彼壤狹而欲舉與大國爭者。

樾謹按舉衍文。蓋卽與字之誤而衍者。

吾子食鹽二升少半。海王、

樾謹按尹注曰。吾子謂小男小女也。然則吾當讀爲牙。後漢書崔駰傳注曰。童牙謂幼小也。吾子卽牙子。其作吾者。牙吾古同聲。猶𡗗吾之或爲𡗗牙矣。大玄勤次三曰。羈角之吾。其泣呱呱。義與此同。集韻有𡗗字音牙。云吳人謂赤子曰𡗗𡗗。蓋卽牙字而加子旁耳。

萬乘之國。正九百萬也。

樾謹按九乃人字之誤。隸書人字或作九。張休崖溪銘行九過茲。隸續云九卽人字是也。其形與九相似。又因上下文多言數。故誤爲九耳。正人二字連文。國蓄篇云以正人籍。謂之離情。以正戶籍。謂之養。嬴。是正人正戶。當時有此名目。尹彼注曰。正數之人。若丁壯也。此正人之義。亦當與彼同。揆度篇曰。萬乘之國爲戶百萬戶。爲開口千萬人。爲當分者百萬人。是萬乘之國。正人止百萬而已。故曰正人百萬也。王氏引之說與余同。而誤以正字絕句。讀爲征。則猶未得。

今夫給之鹽筴。則百倍歸於上。

樾謹按百字衍文。上云月人三千錢之籍。爲錢三千萬。今吾非籍之諸君。吾子也。而有二國之籍者六千萬。是國之常征。止三十萬。鹽筴之利。得六十萬。適加一倍。故曰倍歸於上。若作百倍。則太多矣。蓋後人不察文義而妄如。又按上文三千萬六千萬之數。王氏引之說最塙。尹注皆非也。說具讀書雜誌。今不錄。

歲適美。則市糶無予。國蓄。

樾謹按方言。予。讎也。此予字當訓爲讎。讎卽售字。說文新附。售。賣去手也。詩抑篇箋云。物善則其售賈貴。釋文云。售本作讎。蓋古無售字。卽以讎爲之。此文言無予。卽無售也。猶詩云。賈用不售矣。下文云。穀

賤則以幣予食。布帛賤則以幣予衣。言穀賤則以幣售食。布帛賤則以幣售衣也。兩予字亦當訓讎。物適賤則半力而無予。

樾謹按無予之義已見上矣。半力二字義不可通。疑半分之誤。下文云物適貴則什倍而不可得。半分與什倍正相對。輕重乙篇十倍而不足。或五分而有餘。以五分與十倍相對。義與此近。

鍾鑲糧食。畢取贍於君。

樾謹按鑲宋本作饒。當從之。傳寫誤從金耳。鍾本作種。今從金旁亦誤。山國軌篇尹注引此文。正作種。饒糧食可證。

夫國之君不相中。舉兵而相攻。

樾謹按夫國者彼國也。漢書賈誼傳。夫將爲我危。師古注曰。夫。夫人也。亦猶彼人耳。此夫字義亦與同。以百乘之國。視千乘萬乘之國。則皆彼國耳。故曰夫國之君。王氏念孫謂當作大國。非是。

人衆田不度食若干。山國軌。

樾謹按不度食當作不足食。涉上文終歲度人食若干而誤也。下文云終歲其食不足於人若干。可證。萬物重十倍。府官以市橫出萬物。隆而止。

樾謹按隆當作降。古字通用。書大傳。隆谷。鄭注曰。隆讀如麗降之降。是其證也。此言物重則出之。及降。

殺而後止。故曰降而止。廣雅釋詁。降與屬同。

故王者歲守十分之參。三年與少半成歲。三十一年而藏十一年與少半。山權數。

樾謹按王氏引之曰。三年二字。因下文而衍。當作歲守十分之參與少半。言一歲之穀。分爲十分。守其三分與一分之少半。是所守者。爲十分中三分之一也。成歲者。順成之歲也。藏十一年衍一字。當作藏十年。言順成之歲。三十一年而藏其十年與一年之少半。是所藏者。爲三十一年中三分之一也。今按王氏此說。殊不可通。所守者既爲三分之一。則但曰王者歲守三之一。豈不簡而易明。乃必設爲十分。然後以十分之參及一分之小半。迂回取數。何也。且果三分之一。則是三十年而藏十年也。乃不曰三十年而藏十年。而曰三十一年而藏十年與少半。必多此一年。使成奇零之數。又何也。且前之少半。爲十分中一分之少半。後之少半。爲一年之少半。則多寡迴殊矣。而同以少半言之。使人疑誤難曉。又何也。是故王氏說此文。未得其理。此文初無衍字。但三十一年當作三十七年。七誤爲一。所闕止一筆耳。王者歲守十分之參者。一歲之穀。分爲十分。用其七。藏其三。是謂歲守十分之參。於是三年得九分。又加一年之少半。則又得一分。合而爲十分。是與一歲之數相當矣。故曰三年與少半成歲也。三十七年之中。每年三分。共得一百一十一分。夫一百一十分。是十一年也。尙餘一分。是一年之少半也。故曰三十七年而藏十一年與少半。所以必如此計算者。正以三十三年以前。尙不足十年之數。至三十四年。

則十年而餘二分，三十五年則十年而餘五分，三十六年則十年而餘八分，其所餘之數，皆不能適與上文少半之數合，故必三十七年方可計算也。古人屬辭之密如此，至歲守十分之三，雖非三之一，然所少亦無幾，故下文曰：藏參之一也。王氏泥參之一以爲說，宜所解之皆誤矣。

桓公曰：隄者所以益也。

樾謹按：此本作隄者，所以隄也。故管子對曰：隄則易益也。正承桓公此語而言。今作所以益也，卽涉下句益也二字而誤耳。禮記禮器篇：君子以爲隄矣。釋文曰：隄本作隄。是隄隄義得相通，故曰隄者所以隄也。隄誤作益，於義難通。且管子隄則易益之言，爲贅設矣。

古者輕賦稅，而肥籍歛，山至數。

樾謹按：肥當爲肥，乃薄之段字也。魏孝武弔比干墓文：被芰荷之輕衣，電狀容之蒨裳。顧氏炎武金石文字記：謂蒨卽葩字。然蒨裳之文，殊不成義。蓋段葩爲薄，故與輕衣相對。管子此文：段肥爲薄，以輕賦稅，薄籍歛相對。正與彼同字，誤作肥，遂不可解矣。下文祿肥則士不死，幣輕則士簡賞，肥亦當作肥而讀爲薄，祿薄幣輕，亦相對也。

內則大夫自還而不盡忠。

樾謹按：還當讀爲環。韓子五蠹篇曰：自環者謂之私。

特命我曰。

樾謹按特者人名也。命猶告也。禮記緇衣篇鄭注曰：傳說作書以命高宗，是古者上下不嫌同詞。以君告臣謂之命，以臣告君亦謂之命也。事語篇：秦奢教我曰：佚田謂寡人曰。及此篇梁聚謂寡人曰：有人教我謂之請士曰：輕重乙篇：衡謂寡人曰：並舉人言以問管子，則特命我曰：義亦同也。

上有鉛者，其下有鉉銀，上有丹沙者，其下有鉉金。地數。

樾謹按玉篇金部：鉉，送死人具也。然則鉉金鉉銀，殊不可通。疑鉉字之誤。五音集韻曰：鉉，堅金也。

故先王各用於其重。

樾謹按各當爲託，聲之誤也。國蓄篇作先王爲其途之遠，其至之難，故託用於其重，可證。揆度篇作故先王度用其重，度亦當爲託。

修河濟之流。

樾謹按修乃循字之誤，言循流而下也。循誤作脩，因誤作修。本書類此者，不可勝舉。

巨錢而天下貴。

樾謹按此本作吾賤而天下貴，言五穀興豐，則吾國之穀價賤，而天下貴矣。故曰五穀興豐，吾賤而天下貴，則稅於天下。然則吾民常爲天下虜矣。今作巨錢者，吾字闕壞，止存上半之五，遂誤爲巨。至賤之

與錢字形相似音又相同致誤尤易矣。

故相任寅爲官都揆度。

樾謹按寅字無義疑更字之誤。隸書寅作寅其下與更相似故更誤爲寅矣。相任更爲官都者言使之相保任而更迭爲官都也。官都見問篇。按問篇曰問五官有度制官都其有常斷今事之稽也何待。然則官都者五官之總司也。淮南子天文篇曰何謂五官東方爲田南方爲司馬西方爲理北方爲司空中央爲都都卽此所謂官都也。上文云自言能爲司馬不能爲司馬者殺其身以釁其鼓自言能治田土不能治田土者殺其身以釁其社司馬也田也五官中之二也。然則相任更爲官都殆謂使四官相保任而更迭爲官都乎。

二五者童山竭澤人君以數制之人味者所以守民口也聲者所以守民耳也色者所以守民目也人君失二五者亡其國大夫失二五者亡其勢民失二五者亡其家。

樾謹按童山竭澤四字當在上文至於黃帝之王句下輕重戊篇云黃帝之王童山竭澤是其明證傳寫誤入此不可通矣。人君以數制之人句亦不可通疑下人字衍文也。此文本云二五者人君以數制之人君失二五者亡其國大夫失二五者亡其勢民失二五者亡其身至味者所以守口也三句當在二五者人君以數制之之上試連上文讀之曰其在色者青黃白黑赤也其在聲者宮商羽徵角也其



在味者酸辛鹹苦甘也。味者所以守民口也。聲者所以守民耳也。色者所以守民目也。如此則文義俱順矣。二五者人君以數制之。又遠蒙事名五正名五而言。下接人君失二五者亡其國。今於中間又錯入味者所以守民口也三句。則文不貫矣。幸其衍一人字。知以數制之下。本與人君相連。其迹未泯。尙可訂正。

重門擊柝不能去。亦隨之以法。

樾謹按去字乃者字之誤。上文云。自言能爲司馬。不能爲司馬者。殺其身以殲其鼓。自言能治田土。不能治田土者。殺其身以殲其社。自言能爲官。不能爲官者。劓以爲門父。故此言重門擊柝不能者。亦隨之以法。不以其職微而寬之也。重門擊柝。猶言抱關擊柝。

臣之能謀厲國定名者。

樾謹按厲讀爲利。厲國卽利國也。史記陳杞世家。是爲厲公。索隱曰。厲利聲相近。國策秦策曰。綴甲厲兵。高注曰。厲。利也。

百乘之國中而立市。東西南北度五十里。

樾謹按度當爲各。聲之誤也。謂東西南北各五十里也。上文故先王度用其重而因之。地數篇作故先王各用於其重。度各聲近而誤。在本篇卽可證矣。又按此文當作東西南北各百五十里。故其下云。三

日出境。明每日行五十里也。荀子大略篇所謂吉行五十是也。下文千乘之國中而立市。東西南北度百五十餘里。當作度二百五十里。故其下云。十日出境。亦是每日行五十里也。何以明之。據下文曰。萬乘之國中而立市。東西南北度五百里。其下卽云。十日出境。夫五百里而十日出境。則日行五十里可知。前後必當一例。故知此文有奪誤也。詳管子之意。萬乘之國方千里。是古王畿之制。千乘之國方五百里。是周禮諸公之國之制。百乘之國方三百里。是周禮諸伯之國之制。蓋管子多與周禮合也。古者公侯爲一等。伯子男爲一等。故左傳曰。在禮卿不會公侯。會伯子男可也。此文言公以該侯。言伯以該子男耳。若如今本。則百乘之國方百里。千乘之國方三百餘里。萬乘之國方千里。參差不齊矣。又五百均無餘數。獨於百五十言餘。亦不可通也。

三日出境。五日而反。

樾謹按此本作六日而反。據下文五日出境。十日而反。十日出境。二十日而反。是反之日。必倍其出境之日。此云三日出境。則必六日而反。可知傳寫誤也。

上農挾五。中農挾四。下農挾三。

樾謹按挾猶給也。挾讀爲浹。古無浹字。故以挾爲之。浹之言周也。徧也。故有給足之誼。荀子解蔽篇。雖億萬已不足浹萬物之變。注曰。浹。周也。文選東京賦。養餼浹乎家陪。注曰。浹。徧也。並與給足義相近。此

言上農足以給五人，中農足以給四人，下農足以給三人。與下文上女衣五，中女衣四，下女衣三同義。輕重丁篇，此何以洽？洽卽給也。猶言此何以給也。洽，狹誼同，故並有給義矣。王氏念孫以洽爲給之誤，非也。

天酸然雨，輕重甲。

樾謹按：酸當爲霰。說文雨部：霰，小雨也。從雨酸聲。

三月解弣，弓弩無匡軫者。

樾謹按：字書無弣字，疑医字之誤。說文匸部：医，盛弓弩矢器也。從匸從矢。國語曰：兵不解医。

王者乘勢，聖人乘幼。

樾謹按：幼當讀爲幽。大戴記誥志篇曰：幽幼也。史記麻書亦曰：幽者幼也。是幽與幼聲近義通。禮記玉藻篇：再命赤韍幽衡。鄭注曰：幽讀爲黝。然則幼之讀爲幽，猶幽之讀爲黝矣。聖人乘幽，卽上文所謂君請籍於鬼神者。

令以矩游爲樂。

樾謹按：矩當爲渠。說文水部：渠，水所居。從水桼省聲。故得段矩爲之。以渠游爲樂，謂以游於渠爲樂。北郭者，盡履縷之厖也。

樾謹按屢縷二字無義。乃寡數之段字。釋名釋姿容曰。寡數猶局縮。皆小意也。然則寡數之屢。謂小民也。寡數二字。並從婁聲。屢縷二字。亦並從婁聲。故得通用矣。

北海之衆。無得聚庸而煮鹽。

樾謹按尹注曰。庸。功也。其說未合。庸當爲傭。史記陳涉世家。嘗與人傭耕。索隱引廣雅曰。傭。役也。漢書每以庸爲之。周勃傳。取庸苦之。不與錢。司馬相如傳。與庸保襍作。並段庸爲傭。是其證也。無得聚庸而煮鹽。此所謂庸。正是賃作者。尹訓爲功。失其義矣。地數籍。毋得聚庸而煮鹽。義同。

是君朝令一怒。布帛流越而之天下。

樾謹按怒讀爲弩。方言。凡人語而過。東齊謂之劒。或謂之弩。是齊人謂語而過者爲弩。朝令一怒。正謂其語之過也。怒者弩之段字。管子齊人。故齊言耳。

誰能聽旌旗之所指。而得執將首者。輕重乙。

樾謹按執將。卽主將也。淮南說山篇。執獄牢者無病。高注曰。執。主也。

桓公問於管子曰。崇弟蔣弟丁惠之功世。吾歲閔。寡人不得籍斗升焉。去菹菜鹹鹵。斥澤山閒。壞墜不爲用之壤。寡人不得籍斗升焉。去一削稼。緣封十五里之原。強耕而自以爲落其民。寡人不得籍斗升焉。則是寡人之國。五分而不能操其二。

樾謹按此文凡三云寡人不得籍斗升焉。句下並有去一兩字。言如此則是去其一分也。今第一句下有去字而奪一字。第二句下去一兩字俱存。而誤屬下讀。第三句下去一兩字俱奪矣。不能操其二。當作不能操其三。蓋上文三言去一。則是去其三分。故桓公言五分不能操其三也。如今本則皆不得其指矣。又按吾歲罔者。卽吾歲無也。罔無一聲之轉。尙書湯誓罔有攸赦。西伯戡黎罔敢知吉。微子乃罔恆獲金縢。王其罔害。史記並易以無字。是其證也。歲無卽歲凶。或疑罔字爲凶字之誤。非是。

非歲凶而民飢也。辟之以號令。引之以徐疾。施平其歸我若流水。

樾謹按施乃也字之誤。平乃乎字之誤。宋本正作乎。可證也。乎上當有粟字。管子原文本云。非歲凶而民飢也。辟之以號令。引之以徐疾也。粟乎其歸我若流水。輕重甲篇曰。故申之以號令。抗之以徐疾也。民乎其歸我若流水。文法與此同。知此文是粟乎非民乎者。以本文是言粟事耳。

則請重粟之價金三百。

樾謹按此言粟價。而云金三百。義不可通。金乃釜字之誤。釜字壞其上半。故成金字矣。據輕重甲篇云。故善者重粟之。賈釜四百。則是鍾四千也。十鍾四萬。二十鍾者八萬。然則此文亦必與彼同。三百當作四百。古書四字或作三。因誤爲三耳。

使卿諸侯藏千鍾。

榷謹按此卿諸侯。卽儀禮所謂諸公。鄭注燕禮曰。諸公謂大國之孤也。孤一人。言諸者。容牧有三監。管子此文。有卿諸侯之名。且列於大夫之上。其爲孤無疑矣。

江淮之間。有一茅而三脊。母至其本。名之曰善茅。輕重丁。

榷謹按母當作毋。古貫字。

齊東豐庸而糶賤。

榷謹按庸乃康字之誤。淮南子天文篇。十二歲一康。高注曰。康盛也。然則豐康者。豐盛也。尹注曰。庸用也。謂豐稔而足用。非是。

然則釜十之粟。皆實於倉廩。

榷謹按上云。齊西之粟。釜百泉。齊東之粟。釜十泉。然則所謂釜十之粟者。乃一釜十泉之粟。指齊東而言也。蓋齊西粟貴。齊東粟賤。故雖均是籍人三十泉。而齊西止以粟三斗當泉三十。齊東必以粟三釜當泉三十。於是齊西之粟。所入無多。而齊東之粟。皆實於倉廩矣。其下曰。西之民飢者得食。寒者得衣。以此故也。管子因桓公欲以東之賤。被西之貴。故爲此法。則其所注意者。本在齊東一釜十泉之粟。故曰。然則釜十之粟。皆實於倉廩。王氏念孫謂十當爲斗。釜斗之粟。承上三斗三釜而言。則全失其義矣。此謂乘天賈而求民鄰財之道也。

櫛謹按天畜無義。當爲天留。留者災之段字也。隸書留字或作畱。畱字或作畱。兩形相似而誤。崢丘之戰。

櫛謹按尹注曰。崢丘地名。未聞。說卽葵丘。此說殊不可解。經傳多言葵丘之會。無言葵丘之戰者。安得謂崢丘卽葵丘乎。葵疑乘字之誤。春秋莊十年夏六月。齊師宋師次于郎。公敗宋師于乘丘。或說殆以崢丘之戰爲指此役。故云卽乘丘耳。乘古字作乘。與葵字相似。因而致誤。然則吾非託食之主邪。

櫛謹按吾字乃君字之誤。管仲謂桓公爲託食之主。故桓公遽然起曰。然則爲之柰何。道四涇之水。以商九州之高。輕重戊。

櫛謹按商當爲障。古音商與章近。尙書棗誓篇。我商賁女。釋文曰。商徐邈音章。是也。障從章聲。故得以商爲之。呂氏春秋勿躬篇。臣不如弦章。韓子外儲說篇。作弦商。然則以商爲障。猶以商爲章矣。魯梁之於齊也。千穀也。蠡螯也。

櫛謹按千一本作子。當從之。子穀蓋穀之不成者。猶言童節矣。說文艸部節篆下云。禾粟之粟。生而不成者。謂之童節。子穀童節。其義一也。

令謂左右伯沐塗樹之枝。左右伯受沐塗樹之枝。闕其年。民被白布。清中而濁。

樾謹按闕字無義，乃闕字之誤，其讀爲基，古字通也。此當以閱基年三字爲句。尹氏以闕字屬上讀，注云：闕，涂也，非是。

一樹而百乘息其下者，以其不增也。

樾謹按增當從宋本作捐。考工記輪人，以其圍之防捐其藪。鄭注曰：捐，除也。此言一樹而百乘息其下者，以其不捐除之故。下文曰：今吾沐涂樹之枝，日中無尺寸之陰，正是捐除之也。

二十八月，萊莒之君請服。

樾謹按二十八月當作二十四月。上文曰：二十四月，魯梁之民歸齊者十分之六。此文亦必與彼同。蓋二十四月者，質言之則二年也。若作二十八月，於義無取，故知其非。

楚生鹿當一而八萬。

樾謹按此本作楚生鹿一而當八萬。言一鹿直八萬泉也。傳寫者誤移當字於一而之上，義不可通。又按下文曰：子爲我致生鹿二十，賜子金百斤。是一鹿直金五斤也。而當八萬泉，則金一斤直泉一萬六千，蓋金一兩而泉一千也。漢書食貨志曰：黃金重一斤，直錢萬。是春秋時金價貴於漢也。

代民必去其本，而居山林之中。

樾謹按此文類聚及御覽引作必去其農。下文代人果去其本，處山林之中，亦然。此後人不曉古語，而



臆改之也。本者根本也。凡有根本之義者。皆可以本言之。故古人言本者。初無定名。禮記大學篇。此謂知本。正義曰。本謂身也。禮器篇。反本脩古。正義曰。本謂心也。周易大過彖傳。本末弱也。侯果曰。本君也。是知本無定名。對天下國家而言。則身為本矣。對四體而言。則心為本矣。對臣民而言。則君為本矣。管子地數篇。守圉之本。其用鹽獨重。又云。夫齊衢處之本。通達所出也。游子勝商之所道。人求本者。食吾本粟。因吾本幣。輕重甲篇曰。守圉之國。用鹽獨重。輕重乙篇曰。吾國者。衢處之國也。遠結之所通。游客蓄商之所道。財物之所遵。故苟入吾國之粟。因吾國之幣。前後文小異大同。或言本。或言國者。國亦可謂之本也。淮南子汜論篇。立之于本朝之上。注曰。本朝。國朝也。此古人謂國為本之證。是故守圉之本。言守圉之國也。衢處之本。言衢處之國也。人求本者。求乃來字之誤。言人來吾國也。食吾本粟。因吾本幣。言食吾國粟。因吾國幣也。此篇代民必去其本而居山林之中。言去其國而居山林之中也。若易本為農。則失其義矣。

此三人者。皆就官而衆。輕重已。

櫛謹按。衆當作稟。漢書文帝紀。吏稟當受鬻者。師古注曰。稟。給也。就官而稟。謂就官而給也。作衆者。形近而誤。

苟不樹藝者。謂之賊人。下作之地。上作之天。謂之不服之民。

榘謹按兩作字皆讀爲詛。古字通用。詩蕩篇侯作侯視。釋文曰作本作詛是其證也。此言有不榘斲者必下詛之於地。上詛之於天。明其爲不服之民。蓋以神道設教之意。若依本字讀之則不可通矣。

毋聚大衆毋行大火毋斷大木誅大臣毋斬大山毋戮大衍滅三大而國有害也。

榘謹按誅大臣三字衍文也。此蓋以斷大木斬大山戮大衍爲滅三大。其上文聚大衆行大火非滅之也。故不數也。若加誅大臣則爲滅四大矣。又按斬大山之斬當讀爲鑿與形勢解篇斬高同。

西出其國百三十八里而壇。

榘謹按上文以冬至始數四十六日冬盡而春始。天子東出其國四十六里而壇。以冬至始數九十二日謂之春至。天子東出其國九十二里而壇。下文以秋日至始數九十二日天子北出九十二里而壇。里數皆與日數相符。此云以夏至始數九十二日謂之秋至則亦宜出國九十二里乃出國百三十八里者蓋自夏至上溯春盡夏始之四十六日而并計之也。然所云四十六日乃舉成數而言實止四十五日有奇。故歲實三百六十五日有奇而四時出國則爲三百六十八里也。

# 諸子平議卷七

晏子春秋

公涵而不聽諫上

櫟謹按此但言公之不聽耳。非必言其沈涵也。涵疑倆字之誤。離騷。倆規矩而改錯。王逸注曰。倆。背也。公問晏子言而不樂。故背之而不聽耳。倆涵同聲。又因本篇言飲酒事。遂誤爲涵矣。寡人出入不起。交舉則先飲禮也。

櫟謹按也當作邪。乃詰問之詞。古也邪字通用。故陸德明經典釋文曰。邪也。弗殊。顏氏家訓音辭篇曰。邪者未定之詞。北人卽呼爲也。並其證矣。荀子正名篇。其求物也。養生也。粥壽也。楊倞注曰。也。皆當爲邪。問之詞。正與此同。

男女羣樂者。周觴五獻。過之者誅。

櫟謹按小爾雅廣言。周。市也。蓋觴各五獻。一市而止。故曰周觴五獻。故里窮而無告。無樂有上矣。飢餓而無告。無樂有君矣。

櫟謹按里窮而無告。義不可通。據下文云。民飢餓窮約而無告。卽承此文言之。則此文亦當作窮約而

無告矣。里字上疑當有鄉字。據上文云：懷寶鄉有數十。飢氓里有數家。以鄉里並言。是其證也。晏子原文蓋云：故鄉里窮約而無告。無樂有上矣。飢餓而無告。無樂有君矣。因奪鄉字約字。遂不可通耳。上文懷寶乃壞室之誤。說本王氏念孫讀書雜誌。此所謂窮約者。卽承壞室鄉有數十而言。所謂飢餓者。卽承飢氓里有數家而言。

命稟巡氓家有布縷之本而絕食者。使有終月之委。絕本之家。使有期年之食。無委積之氓。與之薪糧。使足以畢霖雨。

樾謹按孫氏星衍音義曰：命稟言給之稟也。此說與文義未合。又云：下云柏。則此或臣名。說稍近之。然亦非也。稟乃官名。卽周官廩人也。稟廩古字通耳。使之巡行氓閒。有乏食者周給之。正廩人之事。

令柏巡氓家室。不能禦者予之金。

樾謹按柏亦官名也。與上文命稟一律。古柏與伯通。故漢書古今人表。伯與作柏。譽。伯蓋作柏益。伯封作柏封。逢伯陵作逢柏陵。是其證也。此柏字亦當作伯。管子輕重丁篇。令謂左右伯。沐涂樹之枝。然則此所謂伯。卽左右伯也。其職卽古之常伯。周書立政篇曰：王左右常伯。常任。文選藉田賦注。引應劭漢官儀曰：侍中周成王常伯任。是古之常伯。猶漢之侍中。乃近臣也。說文支部。敝。迨也。引周書常敝。常任。敝。訓迨。有迫近之意。是此官名本當作敝。伯柏並段字也。發金予民。出自內府之藏。故使近臣將命焉。

巡求氓寡用財乏者。夙三日而畢。後者若不用令之罪。

樾謹按夙三日而畢。五字爲句。夙當作終。字之誤也。古文終字或作終。廣雅釋詁曰。終。竟也。終與夙相借。因致誤耳。巡求氓寡用財乏者。終三日而畢。若過三日。是不用令。將治以罪。故曰後者若不用令之罪。下文云。三日吏告畢上。是適如其期。無敢後也。

人待三十待四出之關外也。

樾謹按三謂三日。四謂四日。人則以三日爲期。士則稍優容之。以四日爲期。皆使得辦裝也。

景公燕賞于國內。萬鍾者三千鍾者五。令三出而職計莫之從。公怒。令免職計。令三出而士師莫之從。

王氏念孫讀書雜誌曰。元人刻本云。職計莫之從。士師莫之從。一作職計算之。士師算之。明沈啓南本。與此同。羣書治要作職計策之。士師策之。念孫按羣書治要是也。策。隸書策字也。據下文云。請從士師之策。則本作策之明矣。策之蓋謂以策書諫也。

樾謹按王氏說非也。職計莫之從。文義甚明。若作策之。則義轉晦矣。王氏謂以策書諫。無論以策書諫不可僅謂之策。且亦豈待令三出而始諫乎。令三出而莫之從。正見其持之堅。若令三出而始諫。轉病其諫之晚矣。蓋晏子原文。正作莫之從。傳寫奪從字。則莫之二字。於義未足。後人因下文有請從士師之策句。以意妄改之。或爲策。或爲算。禮記仲尼燕居篇注曰。策。謀也。文選運命論注引倉

韻曰。算計也。是策算義相近。疑下文請從士師之策。或作請從士師之算。後人各據所見本改之耳。不作策而作策者。因策字之形與莫字不類也。卽此可知原文之作莫矣。晏子曰。今君賞讒諛之民。而令吏必從。正指兩莫之從者而言。凡古書之義。必求其安。未可喜新而厭故也。

先王之立愛以勸善也。其立惡以禁暴也。

王氏讀書雜誌曰。立惡本作去惡。去惡斯可以禁暴。今作立惡。則文義反矣。羣書治要正作去惡。

樾謹按王氏說非也。此惡字乃愛惡之惡。非善惡之惡。若改立惡爲去惡。則上句立愛之文又不可通。必改爲立善始得矣。禮記祭義篇。立愛自親始。教民睦也。立敬自長始。教民順也。此云立愛立惡。義與彼同。不當改立爲去。羣書治要作去惡。乃後人不知立字之義而妄改之耳。

今有之家。此一國之權臣也。

樾謹按今有之家。文義未明。上文云景公有男子五人。所使傅之者。皆有車百乘者也。疑此當云今有車百乘之家。傳寫奪之耳。

置大立少。亂之本也。

樾謹按王氏念孫從羣書治要作置子立少。非也。下文云。廢長立少。不可以教。下又云。今君用讒人之謀。聽亂夫之言也。廢長立少。臣恐後人之有因君之過以資其邪。廢少而立長。以成其利者。並以長少

對言則此文亦當作置大立少。國語周語曰：是以小怨置大德也。韋注曰：置猶廢也。然則置大立少，猶云廢大立少，正與廢長立少同義。晏子原文疑本作置大立小，亂之本也。大與小對，猶長與少對也。後人因下文立少字兩見，因亦改爲立少耳。少小音義並相近，故易淆亂。儀禮鄉飲酒禮：主人少退，注云：少退少避。釋文作小避。特性饋食禮：挂於季指。注云：季小也。釋文作季少，並其證也。王氏不知少爲小字之誤，而反以置大爲置子，失之矣。

使史固與祝佗。

樾謹按：衛祝鮒，漢書古今人表作祝佗，是祝佗衛人，未聞齊亦有祝佗也。佗疑佞字之誤。昭二十一年左傳：君益誅於祝固史嚚。此云史固祝佞，卽彼祝固史嚚也。祝史互錯，嚚與佞聲近而誤耳。

使君之年長于胡。

樾謹按：胡者，蓋謂齊之先君胡公靜也。詩齊譜正義言：胡公歷懿王、孝王、夷王，是享國久矣。諡法保民耆艾曰胡，則胡公壽考令終可知。故封人以爲祝詞，而史記乃有見殺之說，或傳聞之異，不足據也。今君若設文而受諫。

樾謹按：設疑說字之誤，說讀爲悅。下文云：惡文而疏聖賢人，惡文與說文正相對成義，乃令出裘發粟與飢寒。

樾謹按國中之寒者何限，必人人衣之以裘，勢必無以給之。且文王之民，老者衣帛而已，未聞其衣裘也。出裘當作去裘，意林作公乃去裘，是也。公本被狐白之裘，聞晏子之言，不安於心，令左右之人爲之去裘，故曰乃令去裘也。發粟與飢寒，本作發粟與飢人，因去裘誤作出裘，遂改飢人爲飢寒。藝文類聚太平御覽諸書引此文，又因飢寒二字，於文未安，於飢寒下增者字，皆非晏子原文也。文選雪賦注，引作以與飢人，可據以訂正。

爲田野之不辟，倉庫之不實，則申田存焉。

樾謹按孫氏音義曰：申田，疑人名，此不然也。申田，官名也。申當爲司，史記留侯世家以良爲韓司徒，徐廣曰：申徒卽司徒耳，但語音訛轉，故字亦隨改。莊子大宗師篇：申徒狄，釋文曰：崔本作司徒狄，是申與司古通用。申田卽司徒也。管子小匡篇：墾草入邑，辟土聚粟，多衆盡地之利，臣不如甯戚，請立爲大司田，此齊有司田之證。

晏子止而問于公曰：堯舜支解人，從何軀始？公瞿然曰：從寡人始。

樾謹按晏子問支解人從何軀始，而公遽云從寡人始，語殊不倫。據韓詩外傳作景公離席曰：縱之罪在寡人，疑晏子本作公瞿然曰：從之，從卽縱也。寡人始三字，必有奪誤，或亦如外傳文，或文不必同，而意則必相近也。



則要有壹妄，能書足以治之矣。諫下。

樾謹按孫氏音義曰：言一妄男子能書記者，卽成讖矣。此說非也。一妄男子不可止曰一妄。妄疑妄字之誤。要有壹妄，能書足以治之，極言治之之易，雖婦女可也。下文曰：則君使吏比而焚之而已矣。蓋兩語皆滑稽之詞，故景公不說也。

今東鷄豚妄投之，其折骨決皮，可立得也。

樾謹按得字義不可通，乃見字之誤。史記趙世家：未得一城。趙策得作見。留侯世家：果見穀城山下黃石。漢書見作得。蓋得字古作學，其上從見，故見得二字，往往相混。吾細人也，皆有蓋廬以避燥濕。

樾謹按蓋乃盍字之誤。盍讀爲闔。襄十七年左傳：吾儕小人皆有闔廬以避燥濕寒暑。語意與此同。未幾朝韋罔解役而歸。

樾謹按孫氏音義曰：朝韋罔未詳，或人名。今按韋罔人名，朝者召也。劉向九歎遠逝篇曰：朝四靈于九濱。王逸注曰：朝，召也。左傳：蔡朝吳。公羊傳作昭吳，是朝與昭通。故亦與召通。上文景公曰：唯唯，將弛罷之。故未幾召韋罔解役而歸也。後人不知古書之段，朝爲召，故不得其解。若從孫氏以朝韋罔三字爲人名，則彼自解役而歸，與景公無與，卽不足見晏子匡諫之功矣。

帶球玉而冠且。

櫛謹按且當作組。說文糸部。組。綬屬。其小者以爲冕纓。

聾暗非害國家而如何也。

櫛謹按害下奪治字。家下衍而字。晏子原文。本作非害治國家如何也。古而如通用。如何卽而何。上文公曰。則曷害於治國家哉。故晏子言。非害治國家如何也。明其與治國家有害也。今奪治字。則與上語不應。又衍而字。則文義複矣。皆由後人臆改。說苑正諫篇作聾暗。則非害治國家如何也。當據以訂正。嬰恐國之流失。而公不得享也。

櫛謹按流失義不可通。問上篇曰。臣恐國之危失。而公不得享也。疑此文流字亦危字之誤。

景公與晏子登寢而望國。

櫛謹按寢非可登之地。此本作景公與晏子登路寢之臺而望國。傳寫奪之耳。上章。景公登路寢之臺。下章。景公成路寢之臺。三章皆一時之事。

服牛舂夫婦笑。非有骨肉之親也。爲其利之大也。

櫛謹按笑當爲哭。字之誤也。言服牛于人。非有骨肉之親。然舂而哭之者。爲其有利于己也。左傳載晏子之言曰。陳氏之德。民歌舞之矣。卽此意也。

是以諂諛繁於閒邪行交於國也。

樾謹按王氏念孫謂閒字不可通疑閭字之誤然閭里門也諂諛之言豈在里門乎此閒字本不誤王氏特以閒字與國字虛實不倫故疑其誤耳問上篇曰嗜欲備於側毀非滿於國彼以側與國對文則此以閒與國對文亦何不可而必改其字乎

津人皆曰河伯也若治視之則大鼃之首

樾謹按若治二字衍文也津人皆曰河伯也視之則大鼃之首蓋津人始皆驚疑以爲河伯及審視之則大鼃之首耳視之者津人非古治子也古治子親殺鼃挈其頭而出復何視乎因涉下文若治之功而衍若治二字耳爾雅釋水疏引此文無若字疑原文并無治字後人據誤本晏子增入之而省若字也

二子同桃而節治專其桃而宜

樾謹按二語不可曉孫氏解上句曰同爭一桃而節解下句曰宜言不宜夫同爭一桃何節之有且宜言不宜則節亦言不節兩句豈容異義乎孫說非也古治子之意蓋以二子之勇相等二子同食一桃則得其節矣治專食一桃則得其宜矣使二子不死即以此言處置二桃可也上文二子死之治獨生之云云已自明不得不死之故此二言又處置二桃即以定已與二子之分量故用雖然二字作轉也

君得合而欲多問上、

樾謹按合與給通。說文糸部給相足也。孟子梁惠王篇是心足以王矣。下文曰此心之所以合於王者何也。上言足於王。下言合以王。合卽給也。君得合而欲多。謂所得者既給而所求者彌多也。

佞不吐愚。

樾謹按吐當作咄。從士從出之字。隸書易混。若賣之爲賣。數之爲敖是也。咄者詘之段字。從口從言之字。古得相通。若詠之爲咏。譜之爲瞀是也。佞不詘愚。言不以佞而詘愚也。佞者有才辯之稱。故與愚相對。正與上文貴不凌賤。富不傲貧。功不遺罷一律。

彼鄒滕雉奔而出其地。猶稱公侯。

樾謹按雉奔而出其地。乃極言其地之小。謂一雉奔竄。卽出其邦域之外也。孫氏音義曰雉奔言捷也。未達其旨。又所謂公侯者。有國之君之通稱。故五等之封皆曰諸侯。而春秋書諸君之葬皆稱公也。孫氏必以其爵爲疑泥矣。

大之事小。弱之事強。久矣。彼周者。殷之樹國也。

樾謹按大之事小。義不可通。王氏念孫謂當作小之事大。其說是也。彼周者。殷之樹國也。乃證小事大。弱事強之誼。言周之初。乃殷之樹國耳。及周日強大而爲天子。則殷且事之矣。微子是也。正見魯以弱

小而不能事強大之失。

魯近齊而親殷。以變小國而不服於鄰。以遠望魯。滅國之道也。

樾謹按此所謂殷。卽宋也。宋得稱商。則亦得稱殷矣。變小。孫氏星衍謂疑卽徧小是也。變徧音近。故段用耳。以遠望魯。當作以遠望晉。左氏傳所謂魯有佗竟。走望在晉也。因晉與魯形相似。此章又論魯事。晉字止此一見。淺人不察文義。妄改爲魯耳。晏子之意。蓋謂魯與齊爲鄰。而不知事齊。所親者宋。所望者晉。宋旣小弱。不足爲援。晉相去又遠。緩急不足恃。故曰此滅國之道也。

廢罪順於民。

樾謹按廢罪當作廢置。字之誤也。舉直錯諸枉。則民服。是謂廢置順於民。

不爲行以揚聲。

樾謹按古爲僞字通用。成九年左傳。爲將改立君者。定十二年傳。子爲不知。釋文並云。爲本作僞。是也。不僞行以揚聲。言不僞託高行。以揚聲譽。

中聽以禁邪。

樾謹按聽謂聽訟也。古謂聽訟爲聽。書大傳。諸侯不同聽。注曰。聽議獄也。中聽以禁邪。言聽訟得中。則足以禁邪也。尙書呂刑篇曰。罔不中聽獄之兩辭。然則中聽二字。蓋本於尙書矣。問下篇曰。中聽則民

安。夫刑罰不中，民無所措手足。故中聽則民安也。又曰：慢聽厚斂，則民散；聽與斂並言，亦孟子省刑罰薄稅斂之意。

不權居以爲行，不稱位以爲忠。

樾謹按：王氏念孫據羣書治要，以居字爲君字之誤，非也。權居與稱位相對，權猶稱也，居猶位也。若作權君，則義不倫矣。古之君子，所居雖卑，所行則高；所居雖汙，所行則潔，是謂不權居以爲行，積豐義之養。

樾謹按：豐義二字，誼不可通。義當作羨，字之誤也。羨，饒也。豐羨猶豐饒矣。地不同生。

樾謹按：古生性字通用。周官大司徒職曰：辨五地之物生。杜子春讀生爲性，然則此文生字亦當讀爲性。地不同性，卽所謂辨五地之物性也。羣書治要作宜，蓋不知生爲性之段字而改之，未足爲據。

吾欲和民親下，柰何。

樾謹按：和民當作和臣。下文晏子對曰：君得臣而任使焉云云，則臣和矣。可證此文民字之誤。

聞甯戚歌，止車而聽之，則賢人之風也。問下

樾謹按：風者聲也。風之所至必有聲，故文六年左傳曰：樹之風聲，因而古人卽謂聲爲風。管子宙合篇

君失音則風律必流。風律卽聲律也。輕重已篇。吹壘簾之風。猶言壘簾之聲也。淮南原道篇。結激楚之遺風。高注曰。遺風猶遺聲。得其義矣。此云賢人之風。猶賢人之聲也。孫氏曰。讀如諷。非。

景公問晏子。廉政而長久。其行何也。

樾謹按廉字義不可通。疑當作秉。說文秝部。兼持二禾。秉持一禾。秉與兼形相侶。秉誤爲兼。又誤爲廉耳。爾雅釋詁曰。秉。執也。秉政猶言執政。景公問晏子。人臣執政而能長久。其所行何若。秉誤爲廉。則義不可通矣。下文曰廉政而遯亡。其行何也。誤同。

不以威強退人之君。

樾謹按退人之君。義不可通。退疑迫字之誤。若吳人藩衛侯之舍。是以威強迫人之君矣。故晏子以爲諷也。

雖然不滿。

樾謹按雖然當爲歎。說文欠部。歎。食不滿。从欠甚聲。是歎之本義爲食不滿。引申之。凡不滿者皆得言歎。故曰歎然不滿。

犒魯國化而爲一心。

樾謹按犒當爲橋。字之誤也。說文手部。擣。舉手也。故引申之有舉義。史記扁鵲倉公列傳。舌橋然而不。

下索隱云。橋舉也。橋魯國化而爲一心。猶云舉魯國化而爲一心。韓非子內儲說作舉魯國盡化爲一。此作橋。彼作舉。文異而義同。若作稿則不可通矣。

夫偪邇于君者。距本朝之勢。國之所以治也。

樾謹按此言近臣專權也。乃云國所以治於義難通。治蓋殆字之誤。國之所以殆也。與下文行之所以衰也。身之所以危也。一律。

謹聽節儉衆民之術也。

樾謹按儉乃斂字之誤。上云慢聽厚斂則民散。此云謹聽節斂衆民之術也。兩文正相應。

晏子使晉。晉平公饗之文室。旣靜矣。晏以平公問焉。

樾謹按旣靜矣。晏以五字。文不可通。孫云疑有脫誤是也。靜字疑當作請。聲近而誤。晏當作宴。聲近形似。且本書多晏字少宴字。故誤也。矣衍字。以字當在宴字之上。其原文云。晏子使晉。晉平公饗之文室。句旣。句請以宴。句平公問焉。蓋饗禮畢。後又行宴禮。若昭二十五年左傳。宋公享昭子。明日宴是也。

考菲履。

樾謹按詩山有樞篇。毛傳曰。考。繫也。廣雅釋詁文同此。考字亦當訓繫。孟子滕文公篇。柵屨。趙注曰。柵。叩屨也。然則考履與柵屨同義。孫氏訓考爲成。猶未得也。



蠶桑象牧之處不足。雜上、

樾謹按收乃牧字之誤。蠶桑象牧之處不足。故下云絲蠶于燕。牧馬于魯也。孫氏不知收爲牧之誤。反讀象爲黍。失之矣。

若使不可得。則依物而偶於政。

樾謹按依猶因也。偶讀爲寓。古字通用。寓猶寄也。依物而偶於政者。因物而寄於政也。若晏子因築臺之事。而寄發粟之政是也。孫曰。言據事而不達于政。未得其義。

蚤歲溜水至。

樾謹按孫氏音義曰。說文。霑。屋水流也。溜同霑。此說非是。下文曰。鄉者防下六尺。則無齊矣。是水之大如此。豈屋霑水乎。溜疑溜字之誤。齊都營上。溜水過其南。及東。故有時溜水大至而爲害也。

醉而不出。是謂伐德。賓之罪也。

樾謹按說苑反質篇。作賓主之罪也。當從之。上云既醉而出。並受其福。賓主之禮也。此云醉而不出。是謂伐德。賓主之罪也。兩文相應。不得無主字。後人因醉而不出。以賓言。不以主言。故刪主字。然不出者。賓也。留賓不出者。主也。是時晏子爲主人。則固不應專罪客矣。當從說苑補主字。

豈過我哉。吾託國于晏子也。

樾謹按豈過我哉當作我豈過哉公自喜託國之得人故曰我豈過哉吾託國于晏子也如今本則語不可通矣

公曰善哉知苦言

樾謹按知當作如苦當作若皆形似而誤也善哉如若言猶云善哉如若所言

夫愚者多悔不肖者自賢

樾謹按愚者多悔與不肖者自賢兩意不倫說苑雜言篇載越石父曰不肖人自賢也愚者自多也即本晏子之言疑此文本作愚者自多傳寫奪自字淺人妄補悔字耳

噎而遽掘井

樾謹按掘井與噎無涉說苑雜言篇作譬之猶渴而穿井

方見國之必侵不若死

樾謹按方乃與字之誤與本作与隸書方字作方相似故誤也與見國之必侵不若死曰與曰不若正相應今誤作方則不可通矣

臣請禳而去

樾謹按句末當有之字說苑辨物篇正作臣請禳而去之

爲禳君鴟而殺之。

樾謹按說苑作爲君禳鴟而殺之。此文君禳字誤倒。

且無令君知之。

樾謹按柏常騫知地之將動而借此以欺景公。自必不令君知。何必晏子戒之乎。當從說苑作且令君知之。蓋此與外篇所載太卜事相類。彼必使太卜自言。臣非能動地。地固將動。即令君知之之意。所謂恐君之惶也。後人不達。臆加無字。則晏子與騫比周以欺其君矣。有是理乎。

賴君之賜得以壽三族。

樾謹按國語楚語。臣能自壽也。韋注曰。壽。保也。然則以壽三族者。以保三族也。管子霸言篇。國在危亡而能壽者。明聖也。能壽亦即能保也。說文土部。塲。保也。壽字古作𣎵。與塲並從囂聲。故義亦得通矣。免粟之食飽。

樾謹按上云。食脫粟之食。此云免粟之食飽。免即脫也。廣雅釋詁。免。脫也。錢氏大昕養新錄曰。免與脫同義。引論衡道虛篇。免去皮膚爲證。謂免去即脫去也。而未引晏子此文。失之。士之一乞也。

樾謹按乞當作既。說文皀部。既。小食也。論語曰。不使勝食既。今論語作氣。此省作乞。古字並通。士之一

既猶云士之一食。下文二乞三乞並同。故曰嬰無倍人之行。而有參士之食也。

國不可窮。窮不可竊也。

樾謹按荀子哀公篇竊其有益與其無益。楊倞注曰竊宜爲察。莊子庚桑楚篇竊竊乎又何足以濟世哉。釋文曰竊竊崔本作察。蓋竊與察一聲之轉。廣雅釋詁曰竊著也。釋訓曰察察著也。是其聲近義通之證。窮不可竊當作窮不可察。言窮極之則反無以察矣。故國不可窮也。

召衣冠以迎晏子。外篇重而異者、

樾謹按此本作召晏子衣冠以迎。上文景公曰請易衣革冠更受命。故此云衣冠以迎。王氏念孫謂易衣革冠已見上文不當重出。非也。下云公下拜送之門有迎乃有送。可知此四字之非衍。特傳寫奪去而補者誤著之召字之下。則文不成義。羣書治要因刪此四字矣。

若使古之王者毋知有死。

樾謹按毋知有死本作如毋有死。如與而通。如毋有死者而毋有死也。諫上篇云若使古而無死。此云若使古之王者如毋有死。文異而義同。因如誤作知。寫者遂移至毋字之下。義不可通矣。

是以鬼神不饗其國以禍之。祝史與焉。

樾謹按之字衍文。其國以禍四字爲句。言國以之而受禍也。與上文國受其禍相對爲文。說詳羣經平

議左傳

田無宇爲埤矣。

樾謹按埤字義不可通。疑圻字之誤。圻誤爲埤。又誤爲埤耳。圻者幾之段字。隱元年穀梁傳注。天子畿內。釋文曰。畿本作圻。然則圻之通作幾。猶圻之通作幾也。田無宇爲圻矣。猶曰田無宇爲幾矣。問上篇曰。田無宇之後爲幾。是其證。

子胥忠其君。故天下皆願得以爲子。今爲人子臣。而離散其親戚。孝乎哉。足以爲臣乎。

樾謹按。今爲人子下。不當有臣字。蓋衍文也。盆成适之意。蓋謂忠孝一也。故子胥自忠其君耳。而天下之父母。皆願得以爲子矣。今爲人子而父母不得合葬。是離散其親戚也。親戚謂父母也。韓詩外傳。親戚既沒。雖欲孝。誰爲孝。是其證也。爲人子而離散其親戚。非孝矣。非孝卽非忠矣。故曰足以爲臣乎。王氏念孫不達此意。謂有闕文。非是。

臣何敢稿也。

樾謹按此稿字。與問下篇稿魯國之稿。同爲橋之誤字。荀子臣道篇曰。率羣臣百吏而相與彊君。橋君。又曰。事暴君者。有補削。無橋拂。晏子言臣何敢橋。言臣何敢有所橋拂乎。蓋因公忿然作色。故云然。譏佞之人。隱君之威以自守也。

樾謹按古依隱同聲。廣雅釋器曰衣隱也。釋名釋衣服曰衣依也。是隱與依聲近誼通。此隱字當讀爲依。依君之威以自守。正與上社鼠之喻相應。

由是觀之。其無宇之後無幾。

樾謹按無幾當作爲幾。字之誤也。問上篇正作田無宇之後爲幾。可據以訂正。

今日吾譏晏子。譬猶保而高擻者也。

樾謹按譬乃譬字之誤。擻乃擻字之誤。高讀爲咎。以高爲咎。猶以咎爲皐。尙書皐陶謨釋文曰皐本作咎。是其例也。墨子公孟篇是猶果謂擻者不恭也。此卽保而咎擻之義。保爲保體。擻者揭衣也。禮記內則篇不涉不擻。鄭注擻揭衣也。擻誠不恭。保則更甚。故曰譬猶保而咎擻者也。

當此之時民無飢。

樾謹按飢下當有者字。如今本則文義不足。說苑政理篇正作民無飢者。

廢置不周於君前謂之專。

樾謹按不周當爲不由。廢置不由於君前。故爲專也。疑古本段專擻之專爲由。其形與古文周字作𠂔者相近。因誤爲周耳。

敬見不問其道。外篇不合經術者。

樾謹按敬字當作苟。爾雅釋詁：亟，疾也。釋文曰：字又作苟。是苟與亟通。苟見猶云亟見。孟子萬章篇：教公亟見於子思，與此同義。亟見而不問其道，仲尼所以行也。苟字經傳罕見，淺人遂加支作敬耳。

此三者，路世之政、道事之教也。

孫氏星衍音義曰：一本道作單，非。王氏引之曰：作單者是也。單讀爲瘡。爾雅：瘡，病也。字或作痺。大雅板篇毛傳曰：痺，病也。路與單義相近。方言：露，敗也。路露古字通。言此三者以之爲政，則世必敗；以之爲教，則事必病也。

樾謹按王說是矣。惟從別本作單，而訓爲病事之教，似近不詞。道乃退字之誤。說文：辵部，退，數也。周書曰：我與受其退。退，事者數事也。今微子篇作我與受其敗。經傳遂無退字。淺人不知其義，見上句有路字，因妄改爲道字耳。

公曰：合色寡人也。

樾謹按合色無義。下文公曰：色寡人，故將殺之。晏子曰：雖使色君於法不宜殺也。色上並無合字，合疑否字之誤。否字自爲一句。說文：部，否，相與語，唾而不受也。從口，否聲。公曰：否者，深怪其語，故先唾而不受耳。

昔者秦繆公乘龍舟而理天下，以黃布裹烝棗，至東海而捐其布，彼黃布故水赤，烝棗故華而不實。

樾謹按孫刻本據文選注藝文類聚改彼爲破。其實非也。彼黃布者。言彼其所捐之布。乃黃布也。若作破字。則破黃布三字。文不成義矣。然聚上亦當有彼字。蒙上而省。

晏子沒十有七年。景公飲諸大夫酒。公射出質。堂上唱善。若出一口。公作色大息。播弓矢。弦章入。公曰。章。樾謹按此下各本均闕。孫刻本據太平御覽增。而王氏讀書雜誌謂雜取諸書補入。不足爲據。因詳錄元刻。又以羣書治要及御覽人事部所引補之。洵較孫刻爲備矣。惟此文實見於說苑君道篇。治要及御覽所引。均非其全者。王氏不錄說苑何也。故備錄于左。補王氏徵引所未及。

晏子沒十有七年。景公飲諸大夫酒。公射出質。堂上唱善。若出一口。公作色太息。播弓矢。弦章入。公曰。章。自吾失晏子。於今十有七年。未嘗聞吾過不善。今射出質。而唱善者若出一口。弦章對曰。此諸臣之不肖也。知不足以知君之不善。勇不足以犯君之顏色。然而有一焉。臣聞之。君好之。則臣服之。君嗜之。則臣食之。夫尺蠖食黃。則其身黃。食蒼則其身蒼。君其猶有諂人言乎。公曰。善。今日之言。章爲君。我爲臣。是時海人入魚。公以五十乘賜弦章。歸魚乘塞途。撫其御之手曰。曩之唱善者。皆欲若魚者也。昔者晏子辭賞以正君。故過失不掩。今諸臣諂諛以干利。故出質而唱善如出一口。今所輔於君。未見於衆。而受若魚。是反晏子之義。而順諂諛之欲也。固辭魚不受。君子曰。弦章之廉。乃晏子之遺行也。



## 諸子平議卷八

老子

道可道，非常道。名可名，非常名。一章、

樾謹按：常與尙古通。史記衛綰傳：劍尙盛。漢書尙作常。漢書賈誼傳：尙憚以危爲安。賈子宗首篇：尙作常。並其證也。尙者上也。言道可道，不足爲上道。名可名，不足爲上名。卽上德不德之旨也。河上公以上篇爲道經，下篇爲德經。道經首云：道可道，非尙道。德經首云：上德不德，其旨一也。故常無欲以觀其妙，常有欲以觀其微。

樾謹按：易州唐景龍二年所刻道德經碑，與今本異者數百事。此文作常無欲觀其妙，常有欲觀其微。無兩以字當從之。司馬溫公王荊公並於無字有字絕句，亦當從之。常字依上文讀作尙，言尙無者欲觀其微也。尙有者欲觀其歸也。下云此兩者同出而異名，同謂之玄。正承有無二義而言。若以無欲有欲連讀，既有欲矣，豈得謂之玄乎。

萬物作焉而不辭。二章、

樾謹按：不辭當就聖人說，不當就萬物說。方與生而不有，爲而不恃，一律。河上公注：謂不辭謝而逆上。

非也。不辭猶不言。卽上文所謂行不言之教者。唐傅奕本作萬物作而不爲始。畢氏沉謂辭始同聲。以此致異。奕義爲長。然三十四章云。萬物恃之而生而不辭。與此章文義相近。恐未可舍古本而從傅本也。

道沖而用之。或不盈。四章、

樾謹按說文皿部。盅。器虛也。老子曰。道盅而用之。盅訓虛。與盈正相對。作沖者。段字也。河上公訓沖爲中。失之。第四十五章。大盈若沖。沖亦當作盅。又按或不盈。唐景龍碑作久不盈。久而不盈。所以爲盅。殊勝今本。河上公注曰。或常也。訓或爲常。古無此義。疑河上本正作久也。

解其紛。

樾謹按釋文河上公本。紛作芬。然芬字無義。此句亦見五十六章。河上公於此注云。紛結恨也。當念道無爲以解釋。於彼注云。紛結恨不休。當念道無爲以解釋之。注義大略相同。則河上本芬字。當讀爲忿。若以本字讀之。則注中結恨之義不可解。此章紛結恨也。俗刻又譌爲結根。而義益晦。賴此文兩見。注又相同。尙可訂正耳。王弼本五十六章。作解其分。注云。除爭原也。則亦讀爲忿矣。顧歡本作忿。乃其本字。芬紛並段字耳。

谷神不死。六章、

樾謹按釋文河上本谷作浴云浴養也然浴字實無養義河上本浴字當讀爲穀詩小弁篇蓼莪篇四月篇並云民莫不穀毛傳並云穀養也穀亦通作谷爾雅釋天東風謂之谷風詩正義引孫炎曰谷之言穀穀生也生亦養也王弼所據本作谷者穀之假字河上古本作浴者谷之異文王弼不達古文假借之義而有中央無之說斯魏晉之清談非老氏之本旨

抱一能無離乎十章

樾謹按河上公本無乎字唐景龍碑亦無乎字然淮南子道應篇引老子曰載營魄抱一能無離乎專氣至柔能如嬰兒乎則古本固有乎字又按能如嬰兒句河上公及王弼本均無如字於文義未足惟傳奕有如字與古本合

愛民治國能無知乎天門開闔能無雌乎明白四達能無爲乎

樾謹按唐景龍碑作愛民治國能無爲天門開闔能爲雌明白四達能無知其義並勝當從之愛民治國能無爲即孔子無爲而治之旨明白四達能無知即知白守黑之義也王弼本誤倒之河上公本兩句並作無知則詞複矣天門開闔能無雌義不可通蓋涉上下文諸句而誤王弼注云言天門開闔能爲雌乎則物自賓而處自安矣是王弼本正作能爲雌也河上公注云治身當如雌牝安靜柔弱是亦不作無雌故知無字乃傳寫之誤當據景龍本訂正

五色令人目盲。五音令人耳聾。五味令人口爽。十二章、

樾謹按河上公注云。爽亡也。王弼注云。爽。差失也。並未得爽字之義。呂氏春秋尊師篇曰。且天生人也。而使其耳可以聞。不學其聞不若聾。使其目可以見。不學其見不若盲。使其口可以言。不學其言不若爽。以口爽與耳聾。目盲並舉。正與老子此章同。列子仲尼篇曰。目將眇者。先睹秋豪。耳將聾者。先聞蚺飛。口將爽者。先辨淄澠。鼻將窒者。先覺焦朽。體將僵者。先亟奔佚。心將迷者。先識是非。然則爽者。口病之名。故莊子天地篇云。五味濁口。使口腐爽。淮南子精神篇云。五味亂口。使口爽傷。疑古語然也。新序雜事篇引呂子。爽作暗。可知口爽猶口暗。正與聾盲一律矣。

何謂寵辱若驚。寵爲下。十三章、

樾謹按河上公本作何謂寵辱。辱爲下。注曰。辱爲下賤。疑兩本均有奪誤。當云何謂寵辱若驚。寵爲上。辱爲下。河上公作注時。上句未奪。亦必有注。當與辱爲下賤對文成義。傳寫者失上句。遂并注失之。陳景元李道純本均作何謂寵辱若驚。寵爲上。辱爲下。可據以訂諸本之誤。

古之善爲士者。十五章、

樾謹按河上公注曰。謂得道之君也。則善爲士者。當作善爲上者。故以得道之君釋之。上與士形似而誤耳。

夫唯不盈，故能蔽不新成。

樾謹按蔽乃蔽之段字。唐景龍碑作弊，亦蔽之段字。永樂大典正作蔽，不新成三字。景龍碑作復成二字。然淮南子道應篇引老子曰：服此道者，不欲盈，故能弊而不新成。則古本如此。但今本無而字，於文義似未足耳。

如春登臺，二十章。

樾謹按如春登臺，與十五章若冬涉川一律。河上公本作如登春臺，非是。然其注曰：春陰陽交通，萬物感動，登臺觀之，意志淫淫，然是亦未嘗以春臺連文。其所據本亦必作春登臺。今傳寫誤倒耳。文選開居賦注引此已誤。

衆人皆有以，而我獨頑似鄙。

樾謹按似當讀爲以。古以似通用。易明夷彖傳：文王以之。釋文曰：以，荀向本作似。詩旄丘篇：必有以也。儀禮特牲饋食禮篇：注引作必有似也。並其證也。而我獨頑以鄙，六字爲句。頑以鄙，猶言頑而鄙也。故傳弼本作我獨頑且鄙，可證河上公於頑字絕句之非。王注曰：悶悶昏昏，若無所識，故曰頑且鄙。疑王本亦與傳本同矣。

道之爲物，惟恍惟惚。惚兮恍兮，其中有象；恍兮惚兮，其中有物。二十一章。

樾謹按惚兮恍兮二句當在恍兮惚兮二句之下蓋承上惟恍惟惚之文故先言恍兮惚兮其中有物與上道之爲物惟恍惟惚四句爲韻下文惚兮恍兮其中有象乃始變韻也王弼注曰萬物以始以成而不知其所以然故曰恍兮惚兮惚兮恍兮其中有象也注文當是全舉經文而奪其中有物四字然據此可知王氏所見本經文猶未倒也

以閱衆甫

樾謹按甫與父通衆甫者衆父也四十二章我將以爲教父河上公注曰父始也而此注亦曰甫始也然則衆甫卽衆父矣一章曰有名萬物之母二十五章曰可以爲天下母衆父者猶云萬物母天下母也莊子天地篇可以爲衆父而不可以爲衆父父

故從事於道者道者同於道德者同於德失者同於失二十三章

樾謹按下道者二字衍文也本作從事於道者同於道其下德者失者蒙上從事之文而省猶云從事於道者同於道從事於德者同於德從事於失者同於失也淮南子道應篇引老子曰從事於道者同於道可證古本不疊道者二字王弼注曰故從事於道者以無爲爲君不言爲教縣縣若存而物得其真於道同體故曰同於道是王氏所據本正作故從事於道者同於道然以河上公注觀之則二字之衍久矣

其在道也。曰餘食贅行。二十四章、

樾謹按此河上公本也。河上注曰。使此自矜伐之人。在治國之道。是河上本作在道。王弼注曰。其唯於道而論之。若卻至之行。盛饌之餘也。則當作其於道也。方與注合。今弼本作在道。河上本作於道。由傳寫互誤。兩失其真矣。

輕則失本。躁則失君。二十六章、

樾謹按河上公本作輕則失臣。注云。王者輕淫。則失其臣。竊謂兩本均誤。永樂大典作輕則失根。當從之。蓋此章首云重爲輕根。靜爲躁君。故終之曰。輕則失根。重則失君。言不重則無根。不靜則無君也。王弼所據作失本者。本與根一義耳。而弼不曉其義。以失本爲喪身。則曲爲之說矣。至河上公作失臣。殆因下句失君之文而臆改耳。

聖人用之。則爲官長。二十八章、

樾謹按此河上公本也。河上注曰。聖人升用。則爲百官之元長也。是其本作聖人用之。至王弼注曰。聖人因其分散。故爲之立官長。則當作聖人因之。方與注合。今作用者。後人據河上本改之耳。

或挫或隳。

樾謹按挫河上本作載。注曰。載。安也。隳。危也。是載與隳相對爲文。與上句或強或羸一律。而王弼本乃

作挫。則與墮不分二義矣。疑挫乃在字之誤。在篆文作𢇛。故誤爲挫也。或在或墮。卽或載或墮。載從戔聲。在從才聲。而或亦從戔聲。州輔碑。戔貴不濡。是也。其聲旣同。故得通用矣。

以道佐人主者三十章、

樾謹按唐景龍碑。作以道作人主者。乃古本也。河上公注曰。謂人主能以道自輔佐也。則河上公本亦是作字。若曰以道佐人主。則是人臣以道輔佐其主。何言人主以道自輔佐乎。因作佐二字相侶。又涉注文輔佐字而誤耳。王弼所據本已爲佐字。故注曰。以道佐人主。尙不可以兵強於天下。况人主躬於道者乎。後人以王本改河上公本。而河上注義晦矣。

善有果而已。

樾謹按河上公本作善者果而已。當從之。王注曰。果猶濟也。言善用師者。趣以濟難而已矣。是其所據本亦作善者。故以善用師者釋之。今作善有。以形近而誤。

不敢以取強。

樾謹按敢字衍文。河上公注曰。不以果敢取強大之名也。注中不以二字。卽本經文。其果敢字。乃釋上文果字之義。非此文有果字也。今作不敢以取強。卽涉河上注而衍。王注曰。不以兵力取強於天下也。亦不以二字連文。可證經文敢字之衍。唐景龍碑正作不以取強。當據以訂正。



果而勿強。

樾謹按傳奕本作是果而勿強。當從之。上文云善者果而已。不以取強。又云果而勿矜。果而勿伐。果而勿驕。果而不得已。皆言其果。不言其強。故總之曰是果而不強。正與上文果而已。不以取強相應。讀者誤謂此句與果而勿矜諸句一律。遂妄刪是字耳。唐景龍碑亦有是字。當據增。

道常無名。三十二章。

樾謹按常與尙通。說見首章。道尙無名者。言以無名爲貴也。河上注。王注。並非。三十七章。道常無爲。義同。

知止可以不殆。

樾謹按唐景龍碑無可以二字。是也。王注曰。知止所以不殆也。蓋加所以字以足句。而寫者誤入正文。故今河上公本作知之所以不殆。此作可以者。又所以之誤矣。

衣養萬物而不爲主。三十四章。

樾謹按河上公本作愛養。此作衣養者。古字通也。蓋衣字古音與隱同。故白虎通衣裳篇曰。衣者隱也。以聲爲訓也。而愛古音亦與隱同。故詩烝民篇毛傳。訓愛爲隱。孝經疏引劉炫曰。愛者隱惜而結於內。不直訓惜。而必訓隱惜者。亦以聲爲訓也。兩字之音本同。故愛養可爲衣養。傳奕本作衣被。則由後人

不通古音。不達古義。率臆妄改耳。

是以上德無爲而無以爲三十八章。

樾謹按無爲與無以爲似無所區別。下文云。上仁爲之。而無以爲。夫無爲與爲之。其義迥異。而同言無以爲。其不可通明矣。韓非子解老篇。作上德無爲而無不爲也。蓋古本老子如此。今作無以爲者。涉下上仁句而誤耳。傳奕本正作不。

下士聞道大笑之四十一章。

樾謹按王氏念孫漢書雜志曰。大笑之。本作大而笑之。猶言迂而笑之也。牟子引老子。正作大而笑之。抱朴子微旨篇。亦云大而笑之。其來久矣。是牟葛所見本。皆作大而笑之。今按王說是也。下士聞道。大而笑之。與上文上士聞道。勤而行之。兩句相對。傳奕本作上士聞道。而勤行之。下士聞道。而大笑之。蓋誤移兩而字於句首。然下句之有而句。則尙可藉以考見也。而勤行之。是勤而行之之誤。然則而大笑之。是大而笑之之誤。可以隅反矣。

建德若偷。

樾謹按河上公注曰。建設道德之人。若可偷引使空虛也。王弼注曰。偷。匹也。建德者。因物自然。不立不施。故若偷匹。然偷匹之訓。於古無徵。義亦難曉。豈王氏所據本。偷或作偷邪。以韻求之。固不然矣。河上

公蓋讀偷爲掄。說文手部。掄。引也。故解爲若可偷引。又因其義未足。加使空虛三字以足成之。非經旨矣。今按建當讀爲健。釋名釋言語曰。健。建也。能有所建爲也。是建健音同而義亦得通。健德若偷。言剛健之德。反若偷惰也。正與上句廣德若不足一律。

禍莫大於不知足。四十六章。

櫛謹按河上公本。此句之上。有罪莫大於可欲一句。據韓非子解老篇。則此句當有。惟韓子作禍莫大於可欲。誤也。其上文曰。夫上侵弱君。而下傷人民者。大罪也。則本是罪字明矣。

取天下常以無事。四十八章。

櫛謹按常乃當字之誤。河上公注曰。取。治也。治天下常當以無事。疑河上原注作治天下當以無事。後人因經文譌作常。因於注文增入常字耳。

爲天下渾其心。聖人皆孩之。四十九章。

櫛謹按爲天下渾其心下。河上公本有百姓皆注其耳目七字。王弼本當亦有之。故注云如此。則言者言其所知。行者行其所能。百姓各皆注其耳目焉。吾皆孩之而已。是可證其有此句也。注有各用聰明四字。在爲天下渾其心句下。正解百姓皆注其耳目之誼。而經文奪此句。當據河上公本補之。人軍不被甲兵。五十章。

樾謹按被河上公本作避。據韓非子解老篇云。入山不恃備以救害。故曰入軍不備甲兵。則甲兵以在己者言。自當以作被爲長。

兵無所容其刃。

樾謹按釋名釋姿容曰。容。用也。合事宜之用也。兵無所容其刃。言兵無所用其刃。莊子胠篋篇。容成氏。六韜大明篇作庸成氏。是容與庸通。庸爲用。故容亦用也。

塞其兌。五十二章、

樾謹按兌當讀爲穴。文選風賦。空穴來風。注引莊子空闕來風。闕從兌聲。闕可段作穴。兌亦可段作穴也。塞其穴。正與閉其門文義一律。

是謂盜夸。五十三章、

樾謹按夸字無義。韓非子解老篇作盜竽。其解曰。竽也者。五聲之長者也。故竽先則鍾瑟皆隨。竽唱則諸樂皆和。今大姦作則俗之民唱。俗之民唱則小盜必和。故服文采。帶利劍。厭飲食。而貨盜有餘者。是之謂盜竽矣。蓋古本如此。當從之。

蜂蠆虺蛇不螫。五十五章、

樾謹按河上公本作毒蟲不螫。注云。蜂蠆虺蛇不螫。是此六字乃河上公注也。王弼本亦當作毒蟲不

螫後人誤以河上注驢入之。

猛獸不據。

樾謹按據當作虞。說文豕部。虞。鬪相凡不解也。从豕虎。豕虎之鬪不相捨。一曰虎兩足舉。然則於猛獸言不虞。正與於毒蟲言不螫同。今作據者。段字耳。

未知牝牡之合而全作。

樾謹按全字之義未詳。王注曰。作長也。無物以損其身。故能全長也。說殊未安。河上公本全作𩚑。而其注曰。赤子未知男女之合會。而陰作怒者。由精氣多之所致也。是以陰字釋𩚑字。玉篇肉部。𩚑。赤子陰也。𩚑卽𩚑也。疑王氏所據本作全者。乃𩚑字之誤。𩚑者陰之本字。蓋陰陽字本作𩚑。易其從𩚑者。陽則山南水北。陰則山北水南。並以地言。非𩚑易之本義也。老子古本。蓋從古文作𩚑。而隸書或作𩚑。武梁祠堂畫象。陰字左旁作𩚑。是也。𩚑字闕壞。止存上半。則與全字相似。因誤爲全矣。是故作𩚑者。老子之原文。作全者。𩚑之誤字。作𩚑者。其別本也。王氏據誤本作注。不能訂正。遂使老子原文。不可復見。惜之。知和曰常。知常曰明。益生曰祥。心使氣曰強。

樾謹按此下本有是故用其光。復歸其明二句。後人因已見於五十二章。而刪去之耳。淮南子道應篇引老子曰。知和曰常。知常曰明。益生曰祥。心使氣曰強。是故用其光。復歸其明也。是古本有此二句之

明證。且用其光復歸其明。正見物不可終壯之意。故下文曰。物壯則老。謂之不道。不道早已。今脫此二句。則與下文之意不屬矣。文子下德篇曰。知和曰常。知常曰明。益生曰祥。心使氣曰強。是謂元同。用其光。復歸其明。亦有下二句。

以正治國。以奇用兵。以無事取天下。吾何以知其然哉。以此。五十七章。

樾謹按此數句。當屬上章。如二十二章曰。吾何以知衆甫之然哉。以此。五十四章曰。吾何以知天下之然哉。以此。並用以此二字爲章末結句。是其例矣。下文天下多忌諱。而民彌貧。乃別爲一章。今誤合之。夫唯嗇是謂早服。早服謂之重積德。五十九章。

樾謹按困學紀聞卷十。引此文。兩服字皆作復。且引司馬公朱文公說。並云。不遠而復。又曰。王弼本作早服。而注云。早服常也。亦當爲復。今按韓非子解老篇曰。夫能嗇也。是從於道。而服於理者也。衆人離於患。陷於禍。猶未知退。而不服從道理。聖人雖未見禍患之形。虛無服從於道理。以稱蚤服。然則古本自是服字。王說非。

故大國以下小國。則取小國。小國以下大國。則取大國。故或下以取。或下而取。六十一章。

樾謹按古以字與而字通。周易同人彖傳曰。文明以健。中正而應。繫辭傳曰。善之德圓而神。卦之德方以知。昭十一年左傳曰。桀克有緡。以喪其國。紂克東夷。而隕其身。孟子告子篇曰。秦楚之王。悅於利以

罷三軍之師。秦楚之王。悅於仁義而罷三軍之師。並以而互用。是其義同也。大國以下小國。則取小國。小國以下大國。則取大國。猶曰大國而下小國。則取小國。小國而下大國。則取大國也。故或下以取。或下而取。兩句文義無別。疑有奪誤。當云故或下以取小國。或下而取大國。蓋即承上文而申言之。一句作以一句作而。以而互用。正與前所引諸文一律。因下文有大國不過欲兼畜人句。兩大國字適相連屬。古人遇重文。每省不書。止於字下作二畫識之。此文云故或下以取小國。或下而取大國。大國不過欲兼畜人。小國不過欲入事人。古本兩大國字不重書。止作大二國二。後人傳寫奪之。因以大國字屬下句。而以或下而取四字爲句。并上句小國字亦刪去之。使兩句一律。而其誼不可曉矣。美言可以市尊。行可以加人。六十二章。

樾謹按淮南子道應篇。人間篇。引此文。並作美言可以市尊。美行可以加人。是今本脫下美字。古之所以貴此道者何。不曰以求得有罪以免邪。故爲天下貴。

樾謹按唐景龍碑及傳奕本。並作求以得。正與有罪以免相對成文。當從之。古之所以貴此道者何。九字爲句。乃設爲問辭。以曉人也。不曰求以得有罪以免邪。言人能修道。則所求者可以得。有罪者可以免也。不曰字邪字相應。猶言豈不以此邪。謙不敢質言也。下云故爲天下貴。則自問還自答也。河上公本不曰誤作不日。因曲爲之說曰。不日日遠行求索。近得之於身。失其義矣。

報怨以德 六十三章、

樾謹按論語子路篇以德報怨。朱文公集注曰。或人所稱。今見老氏書。然老氏之意。實不如此。第三十六章云。將欲翕之。必故張之。將欲弱之。必故彊之。將欲廢之。必故興之。第四十二章云。故物或損之而益。或益之而損。此云報怨以德。其旨一也。下文言圖難於易。爲大於細。夫圖難於易。善於圖難者也。爲大於細。善於爲大者也。然則報怨以德。正深於報怨矣。第七十三章云。天之道不爭而善勝。老子之說。大抵如此。朱文公引以證論語。或人所稱。失老子本旨矣。

不敢爲天下先。故能成器長。六十七章、

樾謹按韓子解老篇。作不敢爲天下先。故能爲成事長。事器異文。或相傳之本異。或彼涉上文事無不事句而誤。皆不可知。至故能下有爲字。則當從之。蓋成器二字相連爲文。襄十四年左傳。成國不過半天子之軍。杜注曰。成國。大國。昭五年傳。皆成縣也。成縣亦謂大縣。然則成器者。大器也。二十九章。天下神器。不可爲也。爾雅釋詁。神。重也。神器爲重器。成器爲大器。二者並以天下言。質言之。則止是不敢爲天下先。故能爲天下長耳。乃上言天下而下變文言成器。古人自有此例。史記伯夷傳。伯夷叔齊雖賢。得夫子而名益彰。顏淵雖篤學。附驥尾而行益顯。顏淵所附。本是夫子。因上句言夫子。故下句變文言驥尾。顧氏炎武謂是回避段借之法。是也。自宋以來。儒者不以修辭爲事。莫窺斯祕矣。



是謂配天古之極。六十八章、

樾謹按此文王弼無注。河上公以是謂配天四字爲句。注云。能行此者。德配天也。古之極三字爲句。注云。是乃古之極要道也。然此章每句有韻。前四句以武怒與下爲韻。後三句以德力極爲韻。若以是謂配天爲句。則不韻矣。疑古字衍文也。是謂配天之極六字爲句。與上文是謂不爭之德。是謂用人之力。文法一律。其衍古字者。古卽天也。周書周祝篇曰。天爲古。尙書堯典篇曰。若稽古帝堯。鄭注曰。古。天也。是古與天同義。此經配天之極。它本或有作配古之極者。後人傳寫誤合之耳。

故抗兵相加。哀者勝矣。六十九章、

樾謹按哀字無義。疑襄字之誤。史記梁惠王卒。襄王立。襄王卒。哀王立。據竹書紀年。無哀王。顧氏日知錄謂哀襄字近。史記誤分爲二人。又按秦哀公陳哀公。史記十二諸侯年表。皆作襄公。是二字之相混久矣。襄者讓之段字。周官保氏職。鄭注襄尺。釋文曰。襄音讓。本作讓。是古襄讓通用。上文曰。吾不敢爲主而爲客。吾不敢進寸而退尺。卽所謂讓也。故曰抗兵相加。讓者勝矣。亦卽七十三章不爭而善勝之意。因段襄爲讓。又誤襄爲哀。故學者失其解耳。

聖人不病。以其病病。是以不病。七十一章、

樾謹按上文已言夫唯病病。是以不病。此又言以其病病。是以不病。則文複矣。韓非子喻老篇。作聖人

之不病也。以其不病，是以無病。當從之。蓋上言病病，故不病。此言不病，故無病。兩意相承，不病者，不以爲病也。韓非所謂越王之霸也，不病官武王之王也，不病冒是也。無病則莫之能病矣。此越王所以霸，武王所以王也。

常有司殺者殺。七十四章、

樾謹按：常當作尙。與第一章非常道非常名諸常字同。尙者上也。上有司殺者，謂天也。河上公注曰：司殺者天，居高臨下，司察人過，是正作上字解。

木強則兵。七十六章、

樾謹按：木強則兵，於義難通。河上公本作木強則其，更無義矣。老子原文本作木強則折，因折字闕壞，止存右旁之斤，又涉上句兵強則不勝而誤爲兵耳。其字則又兵字之誤也。列子黃帝篇引老聃曰：兵強則滅，木強則折，卽此章之文，可據以訂正。

是以聖人爲而不恃，功成而不處，其不欲見賢。七十七章、

樾謹按：賢下當有乎字。其不欲見賢乎，文義方足。乎者語之餘。古人多不箸於文字，而使讀者自得之。尙書西伯戡黎篇：我生不有命在天，據史記則句末亦有乎字，而經文無有，卽其例也。

無德司徹。

樾謹按古字徹與轍通。二十七章善行無轍迹。釋文作徹。引梁注曰。徹應車邊。今作彳者。古字少也。然則此文徹字。亦與彼同矣。有德司契。無德司轍。言有德之君。但執左契合符信而已。無德之君。則皇皇然司察其轍迹也。河上公解善行無轍迹曰。善行道者。求之於身。不下堂不出門。故無轍迹。此即可說無德司徹之義。

使有什伯之器而不用。八十章。

樾謹按什伯之器。乃兵器也。後漢書宣秉傳注曰。軍法五人爲伍。二五爲什。則其器物。故通謂生之具爲什物。然則什伯之器。猶言什物矣。其兼言伯者。古軍法以百人爲伯。周書武順篇。五五二十五曰元卒。四卒成衛曰伯。是其證也。什伯皆士卒部曲之名。禮記祭義篇曰。軍旅什伍。彼言什伍。此言什伯。所稱有大小。而無異義。徐鍇說文繫傳。於人部伯下引老子曰。有什伯之器。每什伯其用器。謂兵革之屬。得其解矣。使有什伯之器而不用。使民重死而不遠徙。兩句一律。下文云。雖有舟輿。無所乘之。雖有甲兵。無所陳之。舟輿句。蒙重死。不遠徙而言。甲兵句。蒙什伯之器不用而言。文義甚明。河上公本什伯下誤衍人字。遂以使有什伯四字爲句。失之矣。

信言不美。美言不信。八十一章。

樾謹按此當作信者不美。美者不信。與下文善者不辯。辯者不善。知者不博。博者不知。文法一律。河上

公於信者不美注云信者如其實不美者朴且實也是可證古本正作信者不美無言字也於美言不信注云滋美之言者孳孳華詞不信者飾僞多空虛也疑此注爲後人增益其原文云美者孳孳華詞不信者飾僞多空虛也自經文誤作美言不信後人因改注文美者爲滋美之言者不詞甚矣

## 諸子平議卷九

### 墨子一

三子之能達名成功於天下也。皆於其國抑而大醜也。親士。

樾謹按抑之言屈抑也。抑而大醜。與達名成功相對。言於其國則抑而大醜。於天下則達名成功。正見其由屈抑而達。下文所謂敗而有以成也。畢氏沅校注曰。抑安也。猶曰安其大醜。於文義未得。君子進不敗其志。內究其情。

樾謹按內當作納。卽退字也。進不敗其志。退究其情。正相對成文。所謂大行不加。窮居不損也。因退從或體作納。又闕壞而作內。畢氏遂據上句增入不字。說曰。疚究同。猶云內省不疚。殊失其旨。分議者延延。而支苟者詬詬。焉可以長生保國。

樾謹按王氏念孫斷焉字下屬爲句。謂焉猶乃也。其說是也。支苟二字。畢云疑誤。今按支苟乃積穢二字之段音。說文禾部。穢。積穢也。徐鍇曰。穢。穢不伸之意。然則積穢者詬詬。殆謂在下位者或爲上所凌壓而不得伸。亦必詬詬然自伸其意而後已。上文所謂上必有詬詬之下。是也。

是以甘井近竭。招木近伐。靈龜近灼。神蛇近暴。

樾謹按四近字皆先字之誤。上文曰：今有五錐。此其銛。銛者必先挫。有五刀。此其錯。錯者必先靡。然則甘井四喻。正承上文而言。亦必是先字明矣。先篆書作𠂔。近字古文作𠂔。篆書作𠂔。兩形相似而誤。禮記大學篇。舉而不能先。先乃近字之誤。與下退而不能遠。相對成文。說詳羣經平議。可以與此互證。夫惡有同方取。不取同而已者乎。

樾謹按取不二字。傳寫誤倒。而字當在取同二字之上。已當爲人己之已。此文本云。夫惡有同方不取。而取同己者乎。同方謂同道也。同己謂與己意同也。聖人但取其與道同。而不必其與己意同。故曰夫惡有同方不取。而取同己者乎。傳寫錯誤。遂不可讀。畢曲爲之說。非是。是故谿陝者速涸。逝淺者速竭。

樾謹按逝當讀爲澁。古字通也。詩有杞之杜篇。噬肯適我。釋文曰。噬韓詩作逝。然則逝之通作澁。猶逝之通作噬也。成十五年左傳。則決睢澁。楚辭湘夫人篇。夕濟兮三澁。杜預王逸注並曰。澁。水涯。澁淺與谿陝對文。因段逝爲澁。其義遂晦。王氏引之謂逝當作遊。亦未免不求之聲而泥其形矣。

君子戰雖有陳。而勇爲本焉。喪雖有禮。而哀爲本焉。士雖有學。而行爲本焉。脩身。

樾謹按君子二字。衍文也。此蓋以戰雖有陳。喪雖有禮二句。起士雖有學一句。若冠以君子二字。則旣言君子。不必又言士矣。馬總意林。作君子雖有學。行爲本焉。戰雖有陳。勇爲本焉。喪雖有禮。哀爲本焉。

與今本不同。然有君子字。卽無士字。亦可知。今本旣言君子。又言士之誤矣。士雖有學。與君子雖有學。文異而義同。或它本自有作君子者。而馬氏誤移作首句。傳寫者乙正之。仍從古本作士。雖有學。而篇首君子二字。失於刪去耳。

是故置本不安者。無務豐末。

樾謹按者衍字也。下文近者不親。無務來遠。親戚不附。無務外交。事無終始。無務多業。舉物而闇。無務博聞。上句並無者字。是其證。

守道不篤。徧物不博。辯是非不察者。不足與游。

樾謹按徧亦辯也。儀禮鄉飲酒禮。衆賓辯有脯醢燕禮。大夫辯受酬。少牢饋食禮。辯擣于三豆。今文辯皆作徧。是辯與徧通用。物言徧是非言辯。文異而義同。

晉文染於舅犯高偃。所染

樾謹按畢云。呂氏春秋高作卻。疑當爲卻。晉有卻氏。然晉有卻氏。未聞有卻偃也。王氏念孫曰。高當作臯。卽城郭之郭。左傳晉大夫卜偃。晉語作郭偃。今按王說得之矣。然必謂高是臯之誤。則猶求之形而未求之聲也。高與郭一聲之轉耳。故從高得聲之字。玉篇。塙音口角切。敲音口卓切。雷音胡角切。然則高亦可讀如郭矣。詩縣篇毛傳曰。王之郭門曰皋門。郭偃之爲高偃。猶郭門之爲皋門也。

無巧工不巧工，皆以此五者爲法。法儀、

樾謹按：五當作四。上文百工爲方以矩，爲圓以規，直以繩，正以縣，並無五者。

賊其人多，故天禍之。

樾謹按：當作其賊人多，與上文其利人多，故天福之相對。

仕者待祿，游者憂反。七患

樾謹按：王氏念孫謂待當爲持，憂反當爲愛交。管子明法篇：小臣持祿養交。晏子春秋問篇：士者持祿游者養交。養交與愛交同意。今按王說是矣。然以憂爲愛字之誤，恐未必然。古書多言持祿養交，豈言持祿愛交者？且持養二字同義。荀子勸學篇：除其害者以持養之。榮辱篇：以相羣居，以相持養。議兵篇：高爵豐祿以持養之。呂氏春秋長見篇：申侯伯善持養吾意，並以持養連文。墨子天志篇亦云：持養其萬民。然則此文既云持祿，必云養交，不當云愛交也。墨子原文：蓋本作恙交。恙卽養之段字。古同聲而通用。莊子至樂篇：若果養乎？予果歡乎？養當讀爲恙。爾雅釋詁：恙，憂也。故與歡爲對文也。此云仕者持祿，游者恙交，恙當讀爲養。後人不達假借之旨，引爾雅恙憂也之訓以釋之，遂有改其字作憂者，而墨子原文不可復見矣。

所言不忠，所忠不信。



樾謹按言乃信字之誤。

二穀不收謂之旱。

樾謹按旱者不雨也。不得爲二穀不收之名。疑旱乃罕字之誤。一穀不收謂之饑。二穀不收謂之罕。饑也。罕也。皆稀少之謂。饑猶饑也。故襄二十四年穀梁傳作一穀不升謂之饑。饑猶歉也。然則二穀不收謂之罕。其義正一律矣。

爲者疾。食者衆。則歲無豐。

樾謹按疾當爲寡。爲之者寡。食之者衆。則雖有豐年。不足以供之。故歲無豐也。今作爲者疾。則不可通矣。蓋後人據大學以改之。而不知其非也。

故食無備粟。不可以待凶饑。

樾謹按食乃倉字之誤。倉無備粟。與下句庫無備兵。文正相對。若作食字。失其旨矣。下文云食者國之寶也。兵者國之爪也。食字卽此文粟字。不得據彼而疑此文當作食也。

以爲錦繡文采靡曼衣之辭過。

樾謹按衣之當作之衣。此十字一句讀。

此非云益煖之情也。

樾謹按情猶實也。煇之情猶言煇之實。云益者有益也。廣雅釋詁曰云有也。此非云益煇之情猶曰此非有益煇之實。上文曰冬則輕煇夏則輕清。而此獨言煇者衣固以煇爲主耳。

冬則凍冰夏則飾體。

樾謹按畢解飾字曰若覆食之幕然凍冰二字一義飾體二字亦必一義不當如畢氏說也。飾疑餽字之誤。論語曰食體而餽冬則凍冰夏則餽體兩句文義正一律餽字右旁之曷隸書或止作曷而飾字隸書或以飭爲之兩形相近故誤耳。

無乃非有血氣者之所不能至邪。三辯

樾謹按非字衍文。

昔者堯舜有第期者且以爲禮且以爲樂。

樾謹按畢據太平御覽改第期爲茅茨然茅茨土階是言古明堂之儉不得云且以爲禮且以爲樂也。下文曰周成王之治天下也不若武王武王之治天下也不若成湯成湯之治天下也不若堯舜故其樂逾繁者其治逾寡然則其說堯舜亦當以樂言不當以宮室言也。下文程繁曰子曰聖王無樂此亦樂已若之何其謂聖王無樂也今作茅茨則真無樂矣疑後人不達第期之義而臆改之未可爲據仍當從原文而闕其疑。

以勞殿賞尙賢上

樾謹按畢云。殿讀如奔而殿。此殆非也。論功行賞。勞者當在前。安得反云殿乎。殿者定也。殿與定一聲之轉。文選江賦注曰。澱與淀古字通。殿之與定。猶澱之與淀也。詩采芣篇。殿天下之邦。毛傳曰。殿鎮也。鎮卽有定義。小爾雅廣言。殿填也。填與奠通。禮記檀弓篇。主人旣祖。填池。鄭注。填池當爲奠徹是也。奠亦定也。周官司士職曰。以久奠食。此云以勞殿賞。句法一律。殿奠文異而義同。

舉公義辟私怨

樾謹按畢云。辟讀如辟舉之辟。此說非也。豈有私怨者。不問其賢否而概辟舉之乎。小爾雅廣言。辟除也。辟私怨。謂惟公義是舉。而私怨在所不問。故除去之也。又禮記郊特牲篇。有由辟焉。鄭注曰。辟讀爲弭。此辟字或從鄭讀亦通。

雖在於厚祿尊位之臣。莫不敬懼而施。

樾謹按畢云。下疑脫一字。非也。施當讀爲惕。尙書盤庚篇。不惕予一人。白虎通號篇。引作不施予一人是也。敬懼而施。卽敬懼而惕。文義已足。非有闕文。

是以民皆勸其賞。畏其罰。相率而爲賢者。以賢者衆而不肖者寡。尙賢中。

樾謹按相率而爲賢絕句。者字乃是字之誤。屬下讀。惟其相率而爲賢。是以賢者衆而不肖者寡也。兩

句皆用是以字。古人行文。不避重複。今誤作相率而爲賢者。則是民之相率爲賢。以賢者衆而不肖者寡之故。於義不可通矣。

內有以食饑息勞。將養其萬民。

樾謹按。將當作持。持養乃古人恆言。詳見七患篇。此作將養。形似而誤。天志中篇。正作內有以食飢息勞。持養其萬民。可據以訂正。非命上篇。將養老弱。亦持養之誤。

旣曰若法。未知所以行之術。則事猶若未成。

樾謹按。王氏念孫以曰字爲有字之誤。非也。曰字乃云字之誤。云者有也。說見辭過篇。旣云若法。卽旣有此法。淺人不達。云字之義。謂是云曰之云。疑本書皆用曰字。此不當用云字。故改云作曰耳。

親戚則使之無故富貴。面目佼好則使之。夫無故富貴。而目佼好則使之。豈必智且有慧哉。

樾謹按。無故富貴。義不可通。無乃衍字。故富貴謂本來富貴者也。不問其賢否。而惟故富貴者是使。則非尙賢之謂矣。上文曰。故古者聖王甚尊尙賢而任使。能不黨父兄。不偏富貴。不嬖顏色。此云親戚則使之。是黨父兄矣。故富貴而目佼好則使之。是偏富貴而嬖顏色矣。後人不達。故富貴之義。而妄加無字。殊失其旨。下篇同。

周頌道之曰。聖人之德。若天之高。若地之普。其有昭於天下也。若地之固。若山之承。不圻不𡵚。若日之光。

若月之明與天地同常。

樾謹按此文疑有錯誤。當云聖人之德昭於天下。若天之高。若地之普。若山之承。不圻不𡵚。若日之光。若月之明。與天地同常。蓋首四句下。普隔句爲韻。中二句承崩。末三句光明常皆每句協韻。昭於天下句。傳寫脫去。而誤補於若地之普下。則首二句無韻矣。又增其有也三虛字。則非頌體矣。旣云若地之普。又云若地之固。重複無義。故知其錯誤也。

是故昔者舜耕於歷山。陶於河瀕。漁於雷澤。灰於常陽。尙賢下。

樾謹按灰字之義不可曉。疑反字之誤。反者販之段字。販從反聲。古文以聲爲主。故止作反也。尙書大傳曰。販於頓丘。

昔者伊尹爲莘氏女師僕。

樾謹按師當爲私。聲之誤。僕猶臣也。禮記禮運篇。什於公曰臣。仕於家曰僕。是臣僕一也。私僕猶曰私臣。中篇曰。伊摯有莘氏女之私臣。

古者民始生。未有刑政之時。蓋其語人異義。尙同上。

樾謹按此本作古者民始生。未有政長之時。蓋其語曰。天下之人異義。中篇文同。可據訂。天下之百姓皆上同於天。一而不上同於天。則舊猶未去也。

樾謹按而字乃夫字之誤。夫字篆書作而，與而相似，故誤。一夫不上同於天，謂有一夫不與天同也。尚同下篇使天下之民若使一夫，以一夫對天下之民言，與此一律可證。

古者聖王爲五刑，請以治其民，譬若絲縷之有紀，罔罟之有綱，所連收天下之百姓，不尙同其上者也。

樾謹按請字衍文。古者聖王爲五刑以治其民，十一字爲一句。中篇曰：昔者聖王制爲五刑以治天下，是其證也。所下奪以字，所以連收天下之百姓，不尙同其上者也。若無以字，則不成義。中篇曰：將以運役天下，淫暴而一同其義也。彼云將以此云，所以文法雖異而實同。運役卽連收之誤。王氏念孫已訂正矣。

是故靡分天下，設以爲萬諸侯國君，尙同中。

樾謹按靡當爲歷字之誤也。大戴記五帝德篇：歷離日月星辰，是歷與離同義。此云歷分天下，與彼云歷離日月星辰文義正同。若作靡字，則無義矣。非攻下篇：禹旣已克有三苗焉，磨爲山川，別物上下。天志中篇：磨爲日月星辰以昭道之。兩磨字皆曆字之誤。曆卽歷之段字也。說本王氏念孫。此歷字誤作靡，彼磨字誤作曆，古書之晦久矣。

故古者聖王明天鬼之所欲，不避天鬼之所憎，以求與天下之利。

樾謹按此本作明天鬼之所欲，而避天鬼之所憎。今作不避者，篆文相似而誤。天志中篇：正作而辟天

鬼之所憎。

春秋祭祀不敢失時幾。

樾謹按畢以幾字屬下聽獄不敢不中讀。解曰：幾讀如關市譏。然關市與獄訟不當并爲一事。殆失之矣。幾字仍當屬上讀。幾者期也。詩楚茨篇如幾如式。毛傳訓幾爲期。是也。不敢失時幾者。不敢失時期也。國語周語注曰：期將事之日也。是期以日言。不敢失時。并不敢失日。故曰不敢失時幾。

昔者聖王制爲五刑以治天下。逮至有苗之制五刑以亂天下。

樾謹按之衍字。

故古者聖王唯而以尙同以爲正長。是上下情請爲通。

樾謹按畢云而讀與能同。又據文選東京賦注引此文作古者聖王惟能審以尙同。是故上下通情。因增入審字故字。王氏念孫謂此本作是故上下請通。請卽情字。墨子書多以請爲情。今作情請爲通者。後人旁記情字而誤入正文。又衍爲字耳。文選注作通情者。涉賦文上下通情而誤。今按其說皆是也。惟以爲正長句。亦有衍字。下文曰：故古者聖人之所以濟事成功垂名於後世者。無它故異物焉。曰唯能以尙同爲政者也。然則此文當云唯而審以尙同爲政。上下文義始相應。因涉上文屢言正長。遂誤作以爲正長。上下不應矣。且既云審以尙同。又云以爲正長。一句中兩用以字。義亦未安。上文曰：其爲

正長若此，是故出誅勝者，何故之以也？曰：唯以尙同爲政者也。然則爲正長以人言爲政以事言，明爲正長者，當以尙同爲政也。若作尙同以爲正長，卽失其義矣。下篇云：聖王皆以尙同爲政，故天下治，亦其證也。選注刪此句，畢氏王氏說亦未及，故具說之。

助之動作者衆，卽舉其事速成矣。

樾謹按：此本作卽其舉事速成矣。上文三言則其，此言卽其，卽則古通用也。今作卽舉其事，誤。今天下之王公大人、士君子，請將欲富其國家。

樾謹按：請上奪中字。墨子書多以請爲情。中請卽中情也。下篇曰：今天下王公大人、士君子，中情將欲爲仁義，是其證也。後人不知請之當讀爲情，故誤刪中字耳。尙賢篇曰：且今天下之王公大人、士君子，中實將欲爲仁義，中實亦卽中情也。

當若尙同之，不可不察，此之本也。

樾謹按：若字衍文，不可不察。上奪說字，此下奪爲政二字，當據下篇補。

故賞不得下之情，而不可不察者也。尙同下。

樾謹按：賞下當有罰字，義見上文，而不可當作不可而，猶言不可以也。說見王氏引之經傳釋詞。然胡不審稽古之治爲政之說乎？



櫛謹按治字乃始字之誤。下文曰：古者天之始生民，未有正長也。云云。是從古之始爲政者說。故此云胡不審稽古之始爲政之說乎。

故又使國君選其國之義，以義尙同於天子。

櫛謹按下義字衍文。上文云：故又使家君總其家之義，以尙同於國君。下文云：天子又總天下之義，以尙同於天。並無下義字。是其證也。畢校已及之矣。上下文並言總，而此言選，選亦總也。詩猗嗟篇：舞則選兮。毛傳：訓選爲齊。選其國之義，猶齊其國之義。曰總曰選，文異而義同也。史記仲尼弟子列傳：任不齊字選。是選有齊義。賈子等齊篇曰：撰然齊等，撰與選通。

天子又總天子之義，以尙同於天。

櫛謹按當作天子又總天下之義，以尙同於天。義見上下文。

先之譽令聞，先人發之。

櫛謹按畢校云：先之二字，一本作光。當從之。光廣古通用。光譽卽廣譽。孟子曰：令聞廣譽施於身。

臣自愛不自愛君。兼愛上、

櫛謹按下自字衍文也。上文子自愛不愛父，弟自愛不愛兄，皆無下自字。

賊愛其身不愛人，故賊人以利其身。

樾謹按兩人字下並奪身字。本作賊愛其身。不愛人身。故賊人身。以利其身。方與上句一律。下文云。視人身若其身。誰賊。亦以人身其身對言。中篇云。今人獨知愛其身。不愛人之身。是以不憚舉其身。以賊人之身。並可證人下當有身字也。

然則崇此害。亦何用生哉。兼愛中。

樾謹按崇字無義。乃察字之誤。何用生者。何以生也。一切經音義卷七。引蒼頡篇曰。用以也。詩桑柔篇。逝不以濯。尚賢篇。引作鮮不用濯。卽其證也。言國與國相攻。家與家相篡。人與人相賊。以及君臣父子兄弟之不惠忠。不慈孝。不和調。當察其害之何以生。故曰。然則察此害。亦何用生哉。上篇曰。當察亂何自起。與此同義。

以不相愛生邪。子墨子言以不相愛生。

樾謹按以不相愛生邪。當作以相愛生邪。乃反言以問之。起子墨子之正對也。下篇云。姑嘗本原。若衆害之所自。此胡自生。此自愛人利人生。與卽必曰非然也。必曰從惡人賊人生。又云。姑嘗本原。若衆利之所自生。此胡自生。此自惡人賊人生。與卽必曰非然也。必曰從愛人利人生。皆以反言發問。而起正對。正與此同。若如今本。則文義複沓矣。

然而今天下之士。君臣相愛則惠忠。父子相愛則慈孝。兄弟相愛則和調。天下之人皆相愛。強不執弱。衆

不劫寡，富不侮貧。子墨子曰：「然，乃若兼則善矣。雖然，天下之難物於故也。」

樾謹按：君臣相愛至富不侮貧四十字，本在上文。人與人相愛則不相賊之下，然而今天下之士，子墨子言曰十二字，當作然而今天下之君子曰。王氏念孫已訂正矣。惟天下之難物於故也，句亦難解。於故二字當爲衍文。下文云：「然而今天下之士君子曰：然，乃若兼則善矣。雖然，不可行之物也。」正與此文一律，惟其爲難物，故爲不可行之物也。今衍於故二字，則無義矣。

子墨子曰：「天下之士君子，特不識其利辯其故也。」

樾謹按：辯其下脫害字。下文愛人者人必從而愛之，利人者人必從而利之，是其利也。惡人者人必從而惡之，害人者人必從而害之，是其害也。

連獨無兄弟者。

樾謹按：畢云連同鰥，音相近，字之異也。經典或作鰥，或作鰥，皆假音。然鰥鰥三字，聲皆不與連相近。畢說非也。連當讀爲離，連與離一聲之轉。淮南子原道篇：「終身運枯，形于連嚶列埒之門。」高注曰：「連嚶猶離嚶也。」是其證也。又本經篇：「愚夫蠢婦，皆有流連之心。」注曰：「流連猶爛漫，失其職業也。然則流連卽流離也，亦其證也。」

是故別非也。子墨子曰：「兼愛下。」

樾謹按此本作是故子墨子曰別非也。下文是故子墨子曰兼是也。與此爲對文可證。

非人者必有以易之。若非人而無以易之。譬之猶以水救火也。其說必將無可焉。

樾謹按以水救火。何不可之有。畢校云。一本作火救水。然墨子此譬本明無以易之不可。若水火是相反之物。無論以水救火。以火救水。皆是有以易之。與設喻之旨不合。疑墨子原文本作猶以水救水。以火救火也。故曰其說必將無可。今本作水救火。別本作火救水。皆有脫文。疾病不侍養。

樾謹按侍當爲持。古書多言持養。淺人不達。而改爲侍。非是。非命下篇下以待養百姓。待亦當作持。然卽敢問不識將惡也。

樾謹按惡下脫從字。將惡從也。猶云將何從也。下文曰不識將擇之二君者將何從也。是其證。吾惡能爲吾萬民之身爲吾身。

樾謹按爲吾身上當有若字。上文曰吾豈能爲吾友之身若爲吾身是其證。意我先從事乎惡人之親。然後人報我以愛利吾親乎。

樾謹按惡下脫賊字。當據上文補。

故約食爲其難爲也。

樾謹按其當作甚。下二句並同。甚難爲卽至難爲也。下文曰。是故約食焚舟苴服。此天下之至難爲也。是其證。

以攻戰之故。土地之博。至有數千里也。人徒之衆。至有數百萬人。故當攻戰而不可爲也。非攻中、  
樾謹按不可爲也。當作不可不爲也。方與上文語意相屬。此是飾攻戰者之言。非子墨子之言也。今脫不字。義不可通。

古者吳闔閭教七年。奉甲執兵。奔三百里而舍焉。

樾謹按教下疑脫士字。奉甲執兵。奔三百里而舍。卽教士之法。乃古所謂武卒者。荀子議兵篇。魏氏之武卒。以度取之衣。三屬之甲。操十二石之弩。負矢五十箇。置戈其上。冠鞬帶劍。贏三日之糧。日中而趨百里。中試。則復其戶。利其田宅。今據墨子之言。則闔閭先有此法矣。

今天下之諸侯。將猶多皆免攻伐并兼。非攻下、

樾謹按免字衍文。天志篇云。今天下之諸侯。將猶皆侵凌攻伐兼并。無免字可證。

夫殺之人爲利人也博矣。

樾謹按博疑當作薄。言殺人以利人。其利亦薄也。若作博字。則不可通。

率不利和。

樾謹按率讀爲將率之率。利卽和字之誤而衍者。

糧食不繼。僚食飲之時。

樾謹按之時當作不時。王氏念孫已訂正矣。僚字王云未詳。今按僚卽際字。張遷碑。臆正之僚是也。昭四年左傳。爾未際。孟子萬章篇。敢問交際何心也。杜預趙岐注並曰。際。接也。疑墨子原文本作糧食不僚。不僚卽不接也。與中篇所云糧食輟絕而不繼。文異義同。後人不達僚字之義。據中篇改爲不繼。而寫者兩存之。遂作不繼僚耳。

然則是虧不足而動有餘也。

樾謹按動乃重字之誤。中篇曰。則是棄所不足。而重所有餘也。是其證。

天不序其德。

樾謹按序乃享字之誤。莊子則陽篇。隨序之相理。釋文曰。序一本作享。是其例也。天不享其德。文義甚明。字誤作序。不可通矣。下文曰。量我師舉之費。以諍諸侯之斃。則必可得而序利焉。序亦享字之誤。

# 諸子平議卷十

## 墨子二

芋𩺰不加者去之。節用上、

樾謹按芋𩺰二字凡四見。疑當作鮮。且蓋鮮字左旁之魚。誤移在且字左旁耳。且讀爲醢。鮮且者鮮醢也。說文薺部。醢合五采鮮色。從薺。虍聲。詩曰衣裳薺薺。鮮色謂之醢。故合而言之曰鮮醢。今詩作楚楚。毛傳曰楚楚鮮明貌。然則鮮醢連言。正古義也。鮮且不加。謂徒爲華美而無益於用。畢云不加猶言無益。是也。醢從虍聲。虍從且聲。故醢得以且爲之。如籀文遼。小篆作𡗗。或作𡗘。而詩溱洧篇。士曰旣且。釋文曰且往也。則卽以且爲之。是其例矣。

凡其爲此物也。無加用而爲者。

樾謹按上文云。無不加用而爲者。此脫不字。

於是利爲舟楫。足以將之則上。雖止者三公諸侯至。舟楫不易。津人不飾。節用中

樾謹按利當作制。王氏念孫已訂正矣。上當作止。止當作上。足以將之則止。雖上者三公諸侯至。文義甚明。兩字互易。不可通矣。畢氏但訂正止字。未訂正上字。故爲補訂之。

仁者將與之天下。誰賈而使民譽之。終勿廢也。節葬下。

樾謹按此上舊有仁者將求與天下誰霸而使民譽之云云。共六十四字。畢氏謂與下文複。故刪之。今按畢說是也。惟將下當有求字。下文云仁者將求除天下之相廢。而使人非之。終身勿爲。與此爲對文可證也。然兩文均有錯誤。此當云仁者將求與天下之利。而使民譽之。終身勿廢也。下當云仁者將求除天下之害。而使人非之。終身勿爲也。文義方明。其下云且故與天下之利。除天下之害。令國家百姓之不治也。自古及今。未嘗之有也。正承此兩文而言。又按且故二字。文義不順。蓋終身勿爲下。舊有也字。且卽也字之誤。

虛車府。然後金玉珠璣北乎身。

樾謹按車乃庫字之誤。北乃比字之誤。漢書王尊傳師古注曰。比。周也。比乎身。猶言周乎身。使王公大人行此。則必不能蚤朝。

樾謹按蚤朝下脫晏退二字。蚤朝晏退。與下蚤出夜入夙興夜寐對文。若無晏退二字。文義未完。尙賢中篇。非樂上篇。非命下篇。並有蚤朝晏退之文。尙賢篇與夜寢夙興蚤出莫入相對。非樂篇非命篇與

蚤出暮入夙興夜寐相對。是其證也。細計厚葬爲多埋賦之財者也。



槨謹按細字無義。蓋卽上句紕字之誤而衍者。紕本作紕。因誤爲細矣。埋賦二字亦不可通。賦當作賊。玉篇貝部。賊作郎切。藏也是埋賊卽埋藏也。賊賦相似。因而致誤耳。賊字雖說文所無。然藏字亦說文所無。且從艸無義。不如從貝之爲勝。玉篇收賊字。而訓爲藏。或轉爲古字古義乎。

財以成者扶而埋之。

槨謹按扶字義不可通。扶乃扶字之誤。廣雅釋詁。扶穿也。扶而埋之。謂穿地而埋之也。說文穴部。突穿也。又曰窆深扶也。義並與扶相近。

君死喪之三年。父母死喪之三年。妻與後子死者五皆喪之三年。

槨謹按王氏念孫曰。者五當爲五者。謂君父母妻與後子也。然上文君死父母死。旣已別而言之。此不當總數爲五。五疑二字之誤。

內續奚吾。並爲淫暴。而不可勝禁也。

槨謹按內續奚吾四字。不可解。疑當爲內積奚后。皆字之誤也。奚后卽譌訥之段音。說文言部。譌。恥也。重文譌。曰譌或從奚。又曰。譌。譌訥也。重文詢。曰譌或從句。荀子非十二子篇作譌詢。是其本字。漢書賈誼傳作集譌。集卽譌之省。墨子作奚后。奚卽譌之省。后卽譌之省。古文以聲爲主。故省不從言耳。內積譌訥者。內積恥辱也。蓋出則無衣。入則無食。不勝其恥辱。故並爲淫暴而不可勝禁也。

無封。

樾謹按畢注云。後漢書注引作窆封。窆聲相近。然上云既泚。畢云泚當爲犯。窆字之假音也。則此不當云無窆矣。且窆者葬下棺也。葬雖至薄。亦必下棺。而云無窆。理不可通。封仍當讀如本字。禮記王制篇。不封不樹。鄭注曰。封謂聚土爲墳。無封言不爲墳也。檀弓曰。古也墓而不墳。

此所謂便其習。而義其俗者也。

樾謹按義猶善也。謂善其俗也。禮記緇衣篇。章義殫惡。釋文曰。尙書作善。皇云。義善也。是義與善同意。秦之西有儀渠之國者。

樾謹按渠舊作乘。畢據列子改。今按史記秦本紀。厲其公三十三年。伐義渠。虜其王。卽此國也。

且語言有之曰。焉而晏曰。焉而得罪。將惡逃避之。天志上。

樾謹按畢改兩曰字皆作日。然上曰字實不誤。且語有之曰。蓋述古語也。言字卽語字之誤而衍者。下曰字當從畢改作日。焉而字疊出。文義難通。疑上焉而字亦爲衍文。墨子本作且。語有之曰。晏日焉而得罪。將惡逃避之。晏者清也。明也。說文日部。晏。天清也。小爾雅廣言。晏。明也。文選羽獵賦。于是天清日晏。淮南子繆稱篇。暉日知晏。陰蟠知雨。並其證也。此謂人苟於昏暮得罪。猶有可以逃避之處。若晏日則人所共覩。無所逃避矣。下文曰。夫天不可爲。林谷幽門無人。明必見之。然則墨子正以晏日之不可。

逃避起下文。文明必見之意。晏之當訓。明無疑矣。畢注謂猶云日暮途遠。是但知晏晚之義。而忘天清之本訓。宜於墨子之意不得矣。

天之爲政於天子天下百姓未得之明知也。

樾謹按。下之字。當在知字下。畢校已及。上之字。當在天字上。屬上爲句。本云天子爲政於三君諸侯士庶人。天下之士君子。固明知之。今之字誤在天字下。則固明知句。文氣未足。且天爲政與天子爲政相對。不當作天之爲政也。畢校未及。故具說之。

義者善政也。何以知義之善政也。曰。天下有義則治。無義則亂。是以知義之善政也。天志中。

樾謹按。三善字皆言字之誤。隸書善字或作善。張遷碑有張良善用籌策。靈臺碑君子善之。孫叔敖碑去不善如絕紂。與言字相似。故言誤爲善。義者言政也。何以知義之言政也。曰。天下有義則治。無義則亂。是以知義之言政也。語意甚明。若作善政。則義之善政不可通矣。下篇曰。義者正也。何以知義之爲正也。天下有義則治。無義則亂。我以此知義之爲政也。並無善字。可知此文善字之誤。義之言政。猶義之爲正也。

今國君諸侯之有四境之內也。夫豈欲其臣國萬民之相爲不利哉。

樾謹按。臣國當爲國臣。正對國君而言。君曰國君。故臣曰國臣也。今倒作臣國。義不可通。

今夫天兼天下而愛之，檄遂萬物以利之。

檄謹按檄遂二字，義不可通。檄當爲邀，疑本作邀，或作檄。傳寫誤合之爲檄邀。而邀又誤爲遂耳。邀與交通。莊子庚桑楚篇：夫至人者，相與交食乎地，而交樂乎天。徐無鬼篇：作吾與之邀樂於天。吾與之邀食於地。是邀古通用也。邀萬物以利之，卽交萬物以利之。與兼天下而愛之同義。交猶兼也。兼愛中篇曰：以兼相愛，交相利之法易之。又曰：況兼相愛交相利，與此異矣。又曰：欲天下之治而惡其亂，當兼相愛交相利。下篇曰：今若夫兼相愛交相利，此自先聖六王者親行之。非命上篇曰：與其百姓兼相愛交相利，然則愛言兼，利言交，固本書之通義矣。

若豪之末，非天之所謂也。

檄謹按非上脫無字，下文同。言雖至秋豪之末，無非天之所爲也。謂當作爲，古字通用。下文正作爲，而民得而利之，則可謂否矣。

檄謹按否字義不可通。乃后字之誤。后讀爲厚。禮記檀弓篇：后木，正義曰：世本云厚，此云后，其字異耳。是后厚古通用。說文：厚，古文作屋。本從后聲，故聲近而義通也。此云若豪之末，無非天之所爲也。而民得而利之，則可謂厚矣。言天愛民之厚也。下文且吾所以知天之愛民之厚者有矣。又曰：此吾以知天之愛民之厚也，並可爲證。

然而莫知以相極戒也。天志下、

樾謹按極戒卽儆戒也。極通作亟。荀子賦篇出入甚極。又曰反覆甚極。楊倞注並曰極讀爲亟。是也。廣雅釋詁亟敬也。亟爲敬故亦爲儆矣。亟又與苟通。見爾雅釋詁篇釋文。而敬字卽從苟。是可知其義之通。說文心部恆疾也。從心亟聲。一曰謹重貌。謹重之義亦與儆相近。誰爲知。天爲知。然則義果自天出也。

樾謹按此上脫誰爲貴。天爲貴六字。中篇曰然則孰爲貴。孰爲知。曰天爲貴。天爲知而已矣。是其證。三不利而無所利。是謂之賊。

樾謹按之當作天。是謂天賊。與是謂天德對文。中篇正作天賊。

今知氏大國之君寬者。

樾謹按知字衍文。蓋涉上句吾以知天下之士君子。何以知天下之士君子。兩句並有知字而衍。氏當讀爲是。禮記曲禮篇是職方。鄭注曰是或爲氏。儀禮覲禮篇大史是右。注曰古文是爲氏也。周官射人注引作大史氏右。然則是氏古通用。今氏卽今是也。今是卽今夫也。禮記三年問篇今是大鳥獸。荀子禮論篇今是作今夫。荀子宥坐篇今夫世之陵遲亦久矣。韓詩外傳今夫作今是。並其證也。上文曰今是楚王食於楚之四境之內。此云今氏大國之君。文法正同。上文作是。此文作氏。則字之異耳。寬者下

當有關文。蓋言其土地之廣大也。故下文以然字作轉語。今無他據。不敢臆補。比列其舟車之卒。

樾謹按。卒下脫伍字。非攻下篇作皆列其舟車之卒伍。是其證也。皆列卽比列。王氏念孫說。而況有踰人之牆垣。扭格人之子女者乎。

樾謹按。扭字無義。當爲衍文。蓋卽垣字之誤而複者。格人之子女。與下竊人之金玉蚤桑。竊人之牛馬。一律曰格曰竊。皆以一字爲文也。下文踰人之牆垣。扭格人之子女者。亦衍扭字。又下文此爲踰人之牆垣。格人之子女者。正無扭字。可證上兩處之衍矣。畢反謂其脫扭字。非也。格人之子女。謂拘執人之子女。後漢書鍾離意傳注曰。格拘執也。是其義。

與角人之府車。

樾謹按。角字無義。乃穴字之誤。穴隸書作內。角隸書作角。兩形相似而誤。

於先生之書大夏之道之然。

樾謹按。大夏卽大雅也。雅夏古字通。荀子榮辱篇曰。越人安越。楚人安楚。君子安雅。儒效篇曰。居楚而楚。居越而越。居夏而夏。是夏與雅通也。下文所引帝謂文王六句。正大雅皇矣篇文。

退無罪人乎。道路率徑。明鬼下。

樾謹按退字無義疑迫字之誤謂迫而奪其車馬衣裳也率徑二字亦無義據下文此語兩見而皆無率徑二字疑爲衍文

故當鬼神之有與無之別以爲將不可以明察此者也

樾謹按此本作故當鬼神之有與無之別不可以不察者也下文曰既以鬼神有無之別以爲不可不察已然則吾爲明察此此文以爲字卽涉下文而衍明察此字卽涉下文而誤下云不可不察正承此而言故知此文無明字也

若死而有知不出三年必使吾君知之其三年周宣王合諸侯而田於圃田車數百乘從數千人滿野

樾謹按必使吾君知之絕句其下脫後字本作其後三年太平御覽引此文正作後三年但刪其字耳韋昭注周語引作後二年雖誤三爲二而後字固在皆可爲證文選劉孝標重答劉秣陵書注引作必死吾君之期則誤其爲期而屬上讀且誤使爲死又脫知字文不成義不足據也田於圃田者圃田地名詩車攻篇東有甫草駕言行狩鄭箋以鄭有甫田說之爾雅釋地作鄭有圃田卽其地也畢讀圃字絕句非是從乃徒字之誤車數百乘徒數千人徒與車爲對文御覽引作車徒滿野是其證

株子杖揖出

樾謹按下文株子舉揖而橐之揖未知何物疑此文本作株子揖杖出下文本作株子舉杖而橐之尙

書大傳八十者杖於朝。見君揖杖。鄭注曰。揖。挾也。此揖杖之義也。因揖杖誤倒爲杖揖。後人遂改下文之舉杖爲舉揖以合之耳。舉杖而橐之。猶定二年左傳云。奪之杖以敲之。橐卽敲之假音。

請品先不以其請者。鬼神之誅。至若此其僭速也。

樾謹按。畢云。品當爲盟。下請字當爲情。王氏引之云。上請字當爲諸。下請字卽情字。墨子書通以請爲情。不煩改字。今按二說皆是也。惟先字之義。尙不可曉。王氏改爲共字。而移在盟字之上。似亦未安。先疑矢字之誤。矢誓古通用。盟矢卽盟誓也。矢字隸書或作夫。見孔宙碑。先字隸書或作先。見北海相景君碑。兩形相似而誤。

雖有深谿博林幽澗。毋人之所施行。不可以不董。

樾謹按。董字無義。疑董字之誤。董借爲謹。言不可以不謹也。管子五行篇。修暨水土以待乎天董。尹知章注曰。董。誠也。訓董爲誠。卽讀董爲謹也。說文。董古文作董。形與董相似。故誤。

予非爾田野葆土之欲也。

樾謹按。葆土無義。土疑玉字之誤。葆玉卽寶玉也。史記周本紀。展九鼎葆玉。徐廣曰。保一作寶。卽其例也。古之伐國者。或取其田野。或俘其寶玉。故禹自言予非爾田野寶玉之欲也。

湯乘大寶。



樾謹按畢云贊疑輦字實非也。湯乘大贊卽書序所謂升自陟者。枚傳云湯升道從陟出其不意是也。呂氏春秋簡選篇亦云登自鳴條蓋湯之伐桀必由開道從高而下故書序言升呂覽言登墨子言乘乘卽升也登也詩七月篇毛傳曰乘升也襄二十三年左傳杜注曰乘登也升陟登鳴條皆以地言則乘大贊亦必以地言但不能知其在耳。

自夫費之特注之汙壑而棄之也。  
樾謹按畢云一本作非直注之是也直特固得通用而非字則必當有墨子蓋謂非空棄之而已且可以合驩聚衆也今脫非字則義不可通下文正作非直注之汙壑而棄之也當據補。  
則是得吾父母弟兄而食之也。

樾謹按弟兄當作兄姪義見上文。

仁之事者必務求與天下之利除天下之害。非樂上。

樾謹按仁之事者當作仁人之所以爲事者見兼愛中篇。

非直掊潦水拆壤坦而爲之也。

樾謹按畢氏改坦爲垣是也。壤疑壞字之誤掊者說文手部云杷也今鹽官入水取鹽爲掊拆者說文广部云斥卻屋也一切經音義引說文作卸屋也隸變作斥俗又加手耳行潦之水而掊取之毀壞之。

垣而拆卸之。不足爲損益。若王公大人造爲樂器。豈直如此哉。故曰非直搭潦水拆壞垣而爲之也。王氏念孫以此二語爲未詳。故具說之。

意舍此。

樾謹按此三字乃承上文而作轉語也。意通作抑。論語學而篇。抑與之與。漢石經抑作意。是其證也。抑舍此者。言姑舍此弗論。而更論它事也。上文言樂之無益於飢者。寒者勞者。下文言樂之無益於大國攻小國。大家伐小家。而以此三字作轉語。正墨子文法之妙。王氏念孫謂此下有脫文。非也。卽我未必然也。

樾謹按我下脫以爲二字。當據上文補。

明不轉朴。

樾謹按此句義不可曉。下文作眉之轉朴。更爲無義。疑眉字乃音字之誤。此句作明。則涉上文耳目不聰明而誤也。朴當作抹。亦以形似故誤。抹者變之畷字。尙書堯典篇。於變時雍。孔宙碑作於卞時雍。卽其例也。上句云聲不和調。此云音不轉變。正以類相從矣。

昔者齊康公與樂萬。

樾謹按與猶喜也。禮記學記篇。不與其藝。鄭注曰。與之言喜也。歆也。尙書堯典。庶績咸熙。史記五帝紀。

作衆功皆興。揚雄勸秦美新。引作庶績咸喜。是興與喜一聲之轉。其義得通。興樂萬者。喜樂萬也。樂卽本篇非樂之樂。萬謂萬舞也。

孰爲大人之聽治。而廢國家之從事。曰樂也。

樾謹按。而廢二字。當在大人之上。國家二字。當作賤人。後人不達文義而誤改也。此本云孰爲而廢大人之聽治。賤人之從事。曰樂也。言大人聽樂則廢聽治。賤人聽樂則廢從事也。上文曰。與君子聽之。廢君子聽治。與賤人聽之。廢賤人之從事。是其證也。

啓乃淫溢康樂。野于飲食。將將銘莧磬以力。

樾謹按。畢云。野于疑作于野。實非也。此本以啓乃淫溢康樂爲句。野于飲食爲句。野于飲食。卽下文所謂淪食于野也。與左傳室於怒市於色。文法正同。將將銘莧磬以力。疑有脫文。蓋亦八字作二句也。力字與食字爲韻。畢失其讀。故但知下文翼式是韻也。

百姓之諄也。非命上。

樾謹按。諄讀爲惓。說文心部。惓憂也。猶曰百姓之憂也。故下文曰。說百姓之諄者。是滅天下之人也。畢引爾雅。諄告也。釋之非是。與其百姓兼相愛交相利。則

樾謹按則上脫移字下脫分字。上文曰：與其百姓兼相害交相利移則分。是其證也。王氏念孫謂則卽利字之誤而衍者，非。

奈何乎使文王之地及我，吾則吾利，豈不亦猶文王之民也哉。

樾謹按則上吾字，豈上利字，並衍文。

此上之所賞而百姓之所譽也。執有命者之言曰：上之所賞，命固且賞，非賢故賞也。上之所罰，命固且罰，不暴故罰也。

樾謹按上之所罰，命固且罰，不暴故罰也。十三字當爲衍文，說詳下。

此上之所罰，百姓之所非毀也。執有命者言曰：上之所罰，命固且罰，不暴故罰也。上之所賞，命固且賞，非賢故賞也。

樾謹按上之所賞，命固且賞，非賢故賞也。十三字當爲衍文。蓋上文說賞事，故述執有命者之言曰：上之所賞，命固且賞，非賢故賞也。此文是說罰事，故述執有命者之言曰：上之所罰，命固且罰，不暴故罰也。今上文衍上之所罰云云，此文衍上之所賞云云，皆於文義未合。卽此文之罰賞倒置，而其傳寫誤衍之跡，居然可見矣。

今故先生對之曰：非命中、

樾謹按此子墨子託爲先生之言以折執有命者之說畢謂生當爲王非是。是故國爲虛厲身在刑僇之中必不能曰我見命焉。

樾謹按必不能曰下有闕文下文必不能曰我罷不肖我從事不疾必曰我命固且窮是其證也。

凡出言談則必可而不先立儀而言非命下。

樾謹按則必可當作則不可中篇曰則不可而不先立義法是其證也。不可而者不可以也王氏念孫說。

大誓之言也於去發曰。

樾謹按下文又云武王爲大誓去發以非之去發二字畢云未詳竊疑是大子發之誤古人作書或合二字爲一如石鼓文小魚作鯨散氏銅盤銘小子作季是也此文大子字或合書作季其下闕壞則似玄字因誤爲去耳詩思文篇正義引大誓曰惟四月大子發上祭於畢下至於孟津之上又云太子發升舟中流白魚入於王舟王跪取出涖以燎之注曰得白魚之瑞卽變稱王應天命定號也疑古大誓三篇其上篇以太子發上祭於畢發端至中下兩篇則作於得魚瑞之後無不稱王矣故學者相承稱大誓上篇爲太子發以別於中下兩篇亦猶古詩以篇首字命名之例也。從十簡之篇以尙皆無之。

樾謹按尙當讀爲上。

今雖毋在乎王公大人，黃若信有命而致行之。

樾謹按黃字乃藉字之誤，藉若猶言假如也。本書屢見。

若以尊卑爲歲月數，則是尊其妻子與父母同，而親伯父宗兄而卑子也，非儒下。

樾謹按親伯父宗兄句，文義未明。王氏念孫謂親伯父宗兄，親當爲視，其說是也。王氏引之謂而讀爲如，亦當從之。惟謂當作卑如庶子，則以意增益，未爲可據。今按視伯父宗兄如卑子者，卑子卽庶子，乃取卑小之義。僖二十二年左傳：公卑邾，杜注曰：卑，小也。故凡從卑得聲者，並有小義。廣雅釋詁：稗，小也。方言曰：籛，小者謂之籛。史記孟子荀卿列傳：於是有稗海環之。索隱曰：稗海，小海也。漢書衛青傳：得右賢裨王十餘人。師古曰：裨王，小王也。若言裨將也，然則卑子之稱，正與裨王裨將一律矣。

秉轡授綬，如抑嚴親。

樾謹按抑當作御，字之誤也。天志下篇：以御其溝池。王氏引之謂御當爲抑。隸書抑字或作抑，見漢校官碑。御字或作御，見帝堯碑。兩形相似而誤，正可與此互證。

君子必服古言，然後仁。

樾謹按此本作君子必古服古言，然後仁。脫上古字。公孟篇作必古言服，然後仁，亦當作必古言古服。

脫下古字。

巧垂作舟。

樾謹按巧垂當作功垂。字之誤也。周官肆師職注曰：古者工與功同字。然則功垂卽工垂也。莊子肱簋篇：儷工倕之指。釋文曰：儷音垂。堯時巧者也。堯典：咨垂，女其工。是稱工垂者，工其官垂其名。

夫仁人事上竭忠，事親得孝，務善則美，有過則諫。

樾謹按得字，務字傳寫互易。事親務孝，言事親者務爲孝也。與事上竭忠相對，得善則美，言有善則美之也。與有過則諫相對。

隱知豫力恬漠，待問而後對。

樾謹按豫猶儲也。荀子儒效篇：仲尼將爲司寇，魯之鬻牛馬者不豫賈。家語相魯篇：孔子爲政，三月則鬻牛馬者不儲賈。是豫與儲義通。隱知豫力，兩文相對，言隱藏其知，儲蓄其力也。畢云：言隱其先知豫事之識，失其義，并失其讀。

雖恐後言。

樾謹按雖當作唯。古字通也。上文有見利二字，蓋言利之所在，唯恐後言也。下文云：君若言而未有利焉，則高拱下視，會噎爲深，曰：惟其未之學也。正與此文反復相明。言苟無利，則君雖言之而已，亦以未

學謝也。正所以破儒者擊之則鳴，弗擊不鳴之說。

務與天下之利，曲直周旋，利則止。

樾謹按：利則止，當作不利則止。傳寫脫不字也。非樂上篇曰：必務求與天下之利，除天下之害，將以爲法乎天下，利人乎卽爲，不利人乎卽止。與此文有詳略，而義正同。

教行下必於上。

樾謹按：此本作教行於下必利上，與上句言聽於君必利人相對爲文。教行下脫於字，而利字又誤作於，義不可通矣。

深慮同謀以奉賊。

樾謹按：同乃周字之誤。深慮周謀相對爲文，言其慮深沈，其謀周密也。

其道不可以期世。

樾謹按：晏子春秋雜篇作其道也不可以示世。此文期字亦示字之誤。古文其字作丌，見集韻。示誤爲元，因誤爲期矣。

曩與女爲苟生，今與女爲苟義。

樾謹按：王氏念孫以苟爲說文自急救之苟，而非苟且之苟，謂曩以生爲急，今以義爲急也。然求之文



義亦似未合。本文言爲苟生爲苟義。不言以生爲急以義爲急也。此字仍當爲苟且之苟。苟生者。苟可以得生而止也。苟義者。苟可以得義而止也。儀禮燕禮聘禮記。並有賓爲苟敬之文。鄭注聘禮曰。燕私樂之禮。崇恩殺敬也。又曰。苟敬者。主人所以小敬也。然則苟敬之義。亦謂苟可以致敬而止。此言爲苟生爲苟義。正與爲苟敬一律。蓋古語有然。未可臆改也。淮南子繆稱篇云。小人之從事也。曰苟得。君子之從事也。曰苟義。文義正與此相近。



# 諸子平議卷十一

## 墨子三

知材也。經上、

樾謹按知讀爲智。故經說上曰。知也者。所以知也。所以知者卽智也。淮南子主術篇。任人之才。難以至治。高誘注曰。才智也。才與材通。才訓智。故智亦訓材。

同長以忬。

樾謹按畢謂忬卽正字是也。惟此句疑當在下文中同長也之下。爾雅釋言。齊中也。是中與齊同義。故以同長釋之。而中之義又爲正。下文曰。日中忬南也。是也。故又申之曰。同長以正。卽自作也。

樾謹按作疑佐字之誤。爾雅釋言。俱貳也。佐與貳義相近。老子以道佐人主者。唐景龍二年石刻。作以道作人主者。作佐形似。本易相混。而此又涉下文有三作字。故誤耳。

勇志之所以敢也。次無閒而不櫻櫻也。力刑之所以奮也。

樾謹按次無閒而不櫻櫻也。當在上文似有以相櫻有不相櫻也之上。文義方以類相從。此文勇志之

所以敢也。力刑之所以奮也。兩語本相儷。中閒闌入此句。則儷句隔絕矣。下文利所得而喜也。害所得而惡也。譽明美也。誹明惡也。功利民也。罪犯禁也。賞上報下之功也。罰上報下之罪也。聞耳之聰也。言口之利也。法同則觀其同。法異則觀其宜。並是儷句。今皆以它文隔絕。由墨子寫此篇本旁行。故易以錯亂。今亦未敢一一訂正也。

廣與循經下、

樾謹按循乃脩字之誤。蓋以廣脩相對爲文。隸書脩與循相似。古書二字互誤者。不可枚舉。經說下篇。廣循堅白。循亦脩之誤。廣脩與堅白。皆二字平列。

鑑位量一小而易一大而市。

樾謹按鑑上脫臨字。位當讀爲立。量乃景字之誤。畢氏王氏均訂正矣。惟未及易字之義。易讀爲施。詩何人斯篇。我心易也。釋文曰。易韓詩作施。戰國韓策。易三川而歸。史記韓世家作施三川。是易與施古字通。施者邪也。淮南子要略篇。接徑直施。高注曰。施邪也。孟子離婁篇。施從良人之所之。趙注曰。施者邪施而行。丁公著音迪。說文走部。迪。衰行也。是迪正字。施段字。此作易者。又其段字也。一小而易。猶言一小而邪。與一大而市。相對爲文。市卽正字。經說下篇。木施景短大。木正景長小。以施與正對。卽其例也。

一少於二，而多於五。

樾謹按：數至於十，則復爲一，故多於五。經說下篇曰：一句五有一焉，一有五焉，五有一者，一二三四之一也。一有五者，一十一百之一也。

知狗而自謂不知犬，過也。說在重，物箕不甚，說在若是。

樾謹按：畢讀說在重，物爲句，非也。上文云：狗，犬也。而殺狗非殺犬也可。說在重，文義與此相近。然則此文亦當以說在重斷句矣。物箕不甚，疑當作物甚不甚，言有甚有不甚也。甚誤作其，又誤爲箕耳。

知材知也者，所以知也，而必知若明慮。經說上。

樾謹按：經上篇有知材也，又有知接也。知接之知是本字，知材之知則是智字。故此先著知材二字，然後以知也者釋之，所以別於下文之知也者。古人文字之密也。若明慮句，慮字涉下慮也者而衍，下文若說知句知字，涉下知也者而衍。若見恕句恕字，涉下恕也者而衍，並當刪去。

義志以天下爲芬，而能利之，不必用。

樾謹按：志當作者，草書相似而誤。能，能疊用無義。當作而能利之，不能必用。下文孝以親爲芬，而能能利親，不必得，亦當作而能利親，不能必得，誤與此同。

且自前曰且，自後曰已，方然亦且。若石者也。

樾謹按若石者也。涉下句君以若名者也而衍。又誤名爲石耳。此當讀云且。句自前曰且。句自後曰已。句方然亦且。蓋凡事從事前言之。或臨事言之。皆可曰且。如歲且更始之且。事前之且也。如匪且有且之且。毛傳曰。此也。此方然之且也。惟從事後言之。則爲已然之事不得言且。故云自後曰已。唐外之利害。未可知也。趨之而得。力則弗趨也。是以所疑止所欲也。

樾謹按力字無義。疑人字之誤。篆書人字作刀。故誤爲力耳。趨之而得爲句。人則弗趨也爲句。蓋趨之則得利。而人以爲利害未可知。止而弗趨。是以所疑止所欲也。

鼃買化也。

樾謹按鼃買之義難曉。上文雖有化若鼃爲鶉之文。然買與鶉音義俱遠。形又不相似。未可與彼并爲一談也。鼃疑賣字之誤。說文貝部。賣。衛也。讀若育。今經典通以鬻爲之。上云買鬻易也。此云賣買化也。文異而義同。易有交易之義。故以買鬻言。化亦易也。尙書皋陶謨篇。懋遷有無化居。枚傳曰。化。易也。交易其所居積。是化易同義。故亦以買鬻言也。

非力之任也。爲握者之頰倍。經說下。

樾謹按字書無頰字。疑解字之誤。玉篇角部。解。女卓切。握也。

惟是當牛馬。數牛數馬。則牛馬二。數牛馬。則牛馬一。

樾謹按惟是當牛馬絕句。數牛數馬則牛馬二。謂分牛馬而數之也。數牛馬則牛馬一。謂合牛馬而數之也。畢讀惟是當牛馬數爲句。失之。

景光至景亡若在盡古息。

樾謹按此當讀云景句光至景亡句。若在盡古息。蓋句首景字。舉經文而說之。光至景亡者。謂所以有景由無光也。下文曰足敝下光。故成景於上。首敝上光。故成景於下是也。光之所至則景亡矣。若在盡古息。又與上句反復相明。言景若在則光盡古息也。盡古猶終古也。考工記則於馬終古登陴也。莊子大宗師篇終古不忒。是終古爲古人恆言。釋名釋喪制曰終盡也。故終古亦曰盡古也。畢讀皆誤。遠脩近脩也。先後久也。

樾謹按上脩字衍文。遠近脩也。先後久也。相對爲文。以地之相去言曰脩。以時之相去言曰久。牛狂與馬惟異。以牛有齒馬有尾。說牛之非馬也。不可。

樾謹按狂與惟皆性字之誤。此言牛性與馬性異。非徒以牛有齒馬有尾爲別也。

權非爲是也。非非爲非也。大取。

樾謹按下句當作非爲非也。衍一非字。

意獲也。乃意禽也。

櫛謹按乃意禽也。當作非意禽也。與上文非意木也。非意人也。一律。

智是之世之有盜也。盡愛是世。

櫛謹按當作智是世之有盜也。不盡是世。下文智是室之有盜也。不盡是室也。可證。

益其益。尊其尊。

櫛謹按尊當讀爲劓。說文刀部。劓。滅也。劓有滅損之義。故與益其益對文成義。

昔之知牆。非今日之知牆也。

櫛謹按牆字不可通。乃嗇字之誤。呂氏春秋情欲篇。論早定則早知嗇。先己篇。嗇其大寶。高注並曰。嗇。

愛也。昔之知嗇。非今日之知嗇。猶上文云昔者之愛人也。非今之愛人也。

貴爲天子。其利人不厚於正夫。

櫛謹按正夫當爲匹夫。禮記禮器篇。匹士大牢而祭。謂之攘。釋文曰。匹本或作正。是其例也。節葬下篇。

存乎匹夫賤人死者。今亦誤作正夫。王氏念孫已訂正。

長人之異短人之同。其貌同者也。故同。

櫛謹按長人之異短人之同。當作長人之與短人也同。下二句正釋長人短人所以同之故也。下文曰。指之人也。與首之人也。異。人之體非一貌者也。故異。將劍與挺劍異。劍以形貌命者也。其形不一。故異。



並與此文一律可證。

摹略萬物之然。小取、

樾謹按然字無義。疑當作狀。狀誤爲狀。因誤爲然。

行而異轉而危。

樾謹按危讀爲詭。漢書天文志。司詭星出正西。史記天官書。詭作危。是危詭古字通。行而異轉而詭。詭亦異也。

不愛人。不待周。不愛人。不失周愛。因爲不愛人矣。

樾謹按周猶徧也。失字衍文。此言不愛人者。不待徧不愛人。而後謂之不愛人也。有不徧愛。因爲不愛人矣。今衍失字。義不可通。乃淺人不達文義而加之。

子兼愛天下。未云利也。我不愛天下。未云賊也。耕桂

樾謹按廣雅釋詁云。有也。此兩云字均當訓有。說詳王氏經傳釋詞。

毋幾何而遺十金於子墨子。

樾謹按戰國齊策注。二十兩爲一金。然則十金爲二百兩矣。墨氏崇儉。其徒以十金餽遺。不爲不豐。畢云。十金當爲千金之誤。率意增益。厚誣古人。殊爲無謂。

古之善者不誅。

樾謹按誅當爲誅字之誤也。上文君子不作術而已。此云古之善者不誅。術與誅並述之段字。其字並從虎聲。故得相假借也。若作誅則與述聲絕遠矣。

故有我有殺彼以我。無殺我以利。

樾謹按此當作故我有殺彼以利我。無殺我以利彼。

是猶弇其目而視於禁社也。苟使我皆視。

樾謹按祝於禁社也。當作祝於禁社曰。其下句卽祝詞也。上文而祝於禁社曰。苟使我和。是其證。又按禁社乃叢社之誤。王氏念孫已訂正。

嘿則思。言則誨。動則事。使者三代御。必爲聖人。貴義。

樾謹按使者三代御。當作使三者代御。三者卽嘿言動三事也。御用也。荀子禮論篇。時舉而代御。楊注曰。御。進用也。此云代御。義與彼同。言更迭用此三者。則必爲聖人也。因三者二字傳寫誤倒。畢遂曲爲之說。謬矣。

必去喜去怒去樂去悲去愛而用仁義。

樾謹按去愛下當有去惡二字。傳寫脫之。喜怒哀樂悲愛惡共六者。皆宜去之。卽上文所謂去六辟也。

鉅者白也。

樾謹按鉅無白義。字當作豈。豈者皚之段字。廣雅釋器。皚。白也。皚省作豈。又誤作巨。因爲鉅矣。呂氏春秋有始覽。南方曰巨風。李善注文選。木元虛海賦。王子淵洞簫賦。潘安仁河陽縣作詩。並引作凱風。蓋亦省凱爲豈。而誤爲巨也。可以爲證。

吾取飾車食馬之費。與繡衣之財。以畜士。

樾謹按吾當爲若。字之誤也。

是數人之齒。而以爲富。公孟。

樾謹按畢云。齒。年也。然數人之年。安得以爲富。畢說非也。齒者契之齒也。古者刻竹木以記數。其刻處如齒。故謂之齒。易林所謂符左契。右相與合齒是也。列子說符篇。宋人有遊於道。得人遺契者。歸而藏之。密數其齒曰。吾富可待矣。此正數人之齒。以爲富者。蓋古有此喻。

是譬猶噎而穿井也。

樾謹按晏子春秋雜上篇。噎而遽掘井。說苑雜言篇。作譬之猶渴而穿井。渴字較噎爲勝。疑此文亦當作渴。因噎字古作餽。漢書賈山傳。祝餽在前。師古曰。餽古噎字是也。形與渴微似。故渴誤爲噎。是猶果謂噎者不恭也。

樾謹按畢謂果當爲裸是也。謂擗當爲蹶。引說文云僨也。一曰跳也。則失之矣。蹶與裸兩意不倫。不當取以爲喻。禮記內則篇不涉不擗。鄭注。擗。揭衣也。擗衣雖不恭。然裸則更甚。故曰是猶果爲擗者不恭也。

三年之喪。學吾之慕父母。

樾謹按吾下脫子字。管子海王篇。吾子食鹽二升少半。尹知章注曰。吾子謂小男小女也。此文公孟子曰。三年之喪。學吾子之慕父母。故下子墨子曰。夫嬰兒子之知。獨慕父母而已。嬰兒子卽吾子也。今我問曰。何故爲室。曰。冬避寒焉。夏避暑焉。室以爲男女之別也。

樾謹按避寒避暑爲男女之別三句。皆以室言。不當於男女之別句。獨著室字。室乃且字之誤。古書且字或誤爲宜。詩假樂篇釋文曰。且君且王。一本且並作宜是也。且誤爲宜。因誤爲室矣。是亦當而不可易者也。

樾謹按亦當爲𠂔。古文其字也。言我所稱於孔子者。是其當而不可易者也。其字卽以孔子言。本篇其字多誤爲亦。畢氏已訂正。而未及此。子亦聞乎。匿徒之刑之有刑乎。

樾謹按之刑二字衍文。子亦聞乎。匿徒之有刑乎。徒謂胥徒給徭役者。匿徒謂避役。

魯君謂子墨子曰。吾恐齊之攻我也。可救乎。魯問。

樾謹按此魯君自是魯國之君。故恐齊攻而求救。畢謂是魯陽文君。楚縣之君。非也。魯陽文君。耕柱篇再見。此篇亦屢見。子墨子之意。皆勸以無攻小國。與此不同。且此篇有魯君。又有魯陽文君。別而書之。其非一人明甚。

讐怨行暴失天下。

樾謹按怨字乃忠字之誤。言與忠臣爲讐也。上文說禹湯文武曰。說忠行義取天下。與此相對可證。

子墨子見齊大王曰。

樾謹按齊大王卽田齊之大公和也。大公者始有國之尊稱。故周追王自亶父始。而稱大王。齊有國自尙父始。而稱大公。以及吳之大伯。晉之大叔。皆是也。說詳羣經平議。田齊始有國者和也。故稱大公。猶尙父稱大公也。至其後子孫稱王。則亦應稱大王矣。猶亶父稱大王也。因齊大王之稱。它書罕見。故學者不得其說。太平御覽引此文。遂刪大字矣。

子墨子曰。出曹公子而於宋。

樾謹按王氏念孫謂此本作子墨子出曹公子於宋。曰字而字皆衍文。其說是也。然出字義不可通。出當爲士字之誤。史記夏本紀稱以出。徐廣曰。一作士。是其例也。士與仕通。子墨子士曹公子於宋。卽仕

曹公子於宋也。貴義篇曰：子墨子仕人於衛，而以夫子之政，家厚於始也。

樾謹按：政乃故字之誤。蓋子墨子仕曹公子於宋，則宋必致祿，故曰以夫子之故，家厚於始也。耕柱篇曰：君以夫子之故，致祿甚厚。

若以白公爲不義，何故不受王誅？白公然而反王。

樾謹按：畢讀誅白公爲句，則然而反王，文不成義矣。禮記檀弓篇：穆公召縣子而問然，鄭注曰：然之言焉也。誅白公然而反王，猶云誅白公焉而反王，七字爲一句。

北方有侮臣，願藉子殺之。公輸

樾謹按：有侮臣下脫者字。

子墨子解帶爲城，以牒爲械。

樾謹按：畢據太平御覽改作牒。王氏念孫又以作牒爲是。其實牒、襍皆段字也。其本字當作桼。桼與牒疊韻。字玉篇：人部。襍，決襍也。虫部。蚘，蚘蝶也。桼之與牒，亦猶決之與襍。蚘之與蝶，聲近而義通矣。禮記曲禮篇：羹之有菜者用桼。鄭曰：桼猶箸也。以桼爲械者，以箸爲械也。文選：陳孔璋爲曹洪與文帝書曰：墨子之守，縈帶爲垣，折箸爲械。

然則守者必善。而君尊用之。然後可以守也。備城門。

櫺謹按尊當爲遵。古字通也。此下有脫簡在下文。說詳後。

塹長以力。

櫺謹按力字無義。疑方字之誤。

廣三尺廣四尺。

櫺謹按兩言廣。義不可通。下廣字疑當作長。蓋言爲坐候樓之法。廣三尺長四尺也。下文言陞之制曰。

廣長各三尺。彼廣長同制。故合言之。此廣長異制。故別言之也。

五十步一方。

櫺謹按方者房之段字。五十步置一房。爲守者入息之所。故必爲關籥守之也。尙書序。乃遇汝鳩汝方。

史記殷本紀作女房。是方房古字通。

百步爲幽牘。

櫺謹按牘卽竇字之誤。其上本從穴。篆文穴字與隸書肉字相似。傳寫誤從肉。後人以從肉之字皆在

左旁作月。因變而爲牘矣。管子侈靡篇有牘字。卽寫字之誤。正與此同。說詳管子。可以爲證。

夫長丈二尺。

櫪謹按畢云夫疑卽扶字所以著手王氏念孫據雜守篇改夫爲矢今按二說皆非也下文云爲頤皋必以堅杖爲夫畢云夫同趺如足兩分也此說得之下云臂長六尺是趺也臂也皆取象於人身畢得之後而失之前偶不照耳雜守篇作矢乃字之誤不當反據以改不誤者後文夫字應讀趺者視此五十二者十步而二

櫪謹按上二字衍文下二字當爲四古人書四字作三傳寫誤分爲兩二字遂移其一於上耳上十字當爲升上文云容十升以上者五十步而十此云五升者十步而四蓋言盛水之器大者容十升小者半之容五升其大者則五步而一故五十步而十其小者則五步而二故十步而四也下文五十步丈夫十人丁女二十人又曰廣五百步之隊丈夫千人丁女子二千人是丈夫五十步而十丁女十步而四與此數一律

城四面四隅皆爲高磨斲

櫪謹按王氏引之謂磨當爲磨斲當爲斲卽說文斲斲押指之異文其說是也惟以爲樓名則無據疑高下脫樓字本云皆爲高樓磨斲號令篇曰它門之上必夾爲高樓與此同義爲高樓磨斲猶云夾爲高樓也磨斲卽夾也

時換吏卒署而毋換其養養毋得上城



櫓謹按畢云養糧也。此說非是。養卽廝養之養。宣十二年公羊傳。廝役扈養。死者數百人。何休注曰。炊亨者曰養。

此十四者具。則民亦不宜上矣。然後城可守。十四者無一。則雖善者不能守矣。

櫓謹按上云。備穴者。城內爲高樓以謹。下云。守法五十步。丈夫十人。丁女二十人。老小十人。文氣正相聯貫。入此三十字。則隔斷矣。此三十字當在上文。罰嚴足畏也之下。又按上文。自凡守圍城者至罰嚴足畏也。凡一百十二字。亦與前後文義不倫。當在篇首。然則守者必善而君尊用之。然後可以守也之下。蓋自子墨子曰。我城池修守器具。至十四者無一。則雖善者不能守矣。皆是先論守城之本。其下云。故凡守城之法。備城門爲縣門云云。乃始詳言其法也。今考正之如左。

子墨子曰。我城池修。守器具。推粟足。上下相親。又得四鄰諸侯之救。此所以持也。且守者雖善。而君不用之。則猶若不可以守也。若君用之。守者又必能守。守者不能而君用之。則猶若不可以守也。然則守者必善而君尊用之。然後可以守也。凡守圍城之法。□□厚以高。壕池深以廣。樓櫓掘。守備繕利。薪食足以支三月以上。人衆以選。吏民和。大臣有功勞於上者多。主信以義。萬民樂之無窮。不然。父母墳墓在焉。不然。山林草澤之饒足利。不然。地形之難攻而易守也。不然。則有深怨於適。而有大功於上。不然。則賞明可信。而罰嚴足畏也。此十四者具。則民亦不宜上矣。然後城可守也。十四者無一。則雖善者不

能守矣

右文字譌脫之處。皆據畢氏王氏之說訂正。惟第一句則猶若不可以守也。舊脫猶字。今據下句補。守者又必能守。舊作守者又必能乎。今以意改。君尊用之尊。讀爲遵。古字通也。凡守圍城之法。以下所說。凡十四事。其文自明。大臣有功勞至萬民樂之無窮。共爲一事。蓋大臣素有功勞。則主信而義之。萬民樂之。然後可以有爲也。此十四者具。則民亦不宜上矣。總上十四事而言。當作則民亦宜其上矣。墨子書其字多作兀。因誤作不。寫者遂移至宜字之上耳。

鑿井城上。

樾謹按城上無鑿井之理。城上當作城內。卽上文穿井城內之事。

必以堅杖爲夫。

樾謹按夫當從畢讀爲趺。杖乃材字之誤。言必以材之堅者爲頡臤之趺也。備高臨篇。杖大方一方一尺。備穴篇。兩杖合而爲之輜。杖並當作材。

兩軸三輪。備高臨。

樾謹按旣爲兩軸。不得三輪。三當爲四。古三四字皆積畫。因而致誤。

煙資吾池。備梯。

櫨謹按王氏念孫讀煙爲堙是也。惟資字尙未得其義。資當讀爲茨。淮南子秦族篇。茨其所決而高之。高注曰。茨。積土填滿之也。是茨與堙同義。古茨字或作資。爾雅釋草篇。茨。蒺藜。釋文。茨本作資。是也。墨子書作資者。卽資字而省艸耳。說文土部。垆。以土增大道上。茨與垆通。

### 高廣如行城之法。

櫨謹按上文皆言行城。而此卽云高廣如行城之法。義不可通。疑高廣上脫雜樓兩字。上文云。守爲行城。雜樓相見。以環其中。以適廣狹爲度。然則行城也。雜樓也。本有二事。故云相見。相見卽相閒也。備城門篇。見一寸。畢云。見疑閒字。是其例也。上文旣言行城之法。此繼言雜樓。故省其文曰。雜樓高廣如行城之法。

### 中鑿夫之爲道臂。臂長至桓。備穴。

櫨謹按此當作中鑿之爲道。夫長若干尺。臂長至桓。夫字誤移在上。遂脫其尺數。臂字又誤疊。皆不可通。下文曰。夫長丈。臂長六尺。備城門篇。雜守篇並云。夫長丈二尺。臂長六尺。故知此文亦並言夫長臂長。而傳寫脫去也。桓疑垣字之誤。

### 什大容二什以上到三十。

櫨謹按什十並斗字之誤。斗大容二斗以上到三斗。猶下文云。大容一斗以上至二斗也。凡斗字誤作

什者王氏已訂正此又誤作十則未及。


以盆盛醢置穴中。

櫨謹按醢疑醢之壞字下文又曰及以泔泔疑油之壞字。

令有力四人下上之勿難。備蝦蟆傳。

櫨謹按難乃離字之誤。備城門篇突一旁以二橐守之勿離。備穴篇令一善射之者佐一人皆勿離。並其證。

敵引哭而去。

櫨謹按哭當作師。說文巾部師古文作形與哭相似。故師誤爲哭也。王氏念孫謂墨子多古字然所引如所染篇之高尙賢篇之佚非儒篇之苟皆未甚塙。若此率字則真古文也。故爲表出之。

壇高八尺堂密八迎敵祠。

櫨謹按密字無義疑當作突。說文穴部突深也。謂堂深八尺也不言尺者蒙上而省。突密相似因誤爲密矣。下密字並同。它書深字無作突者亦古字也。

設守門三人掌右閤二人掌左閤四人掌閉百甲坐之。

櫨謹按左右人數不應有異疑三人是二人之誤。蓋門之啓閉皆四人守之啓則有左右之分故曰二

人掌右闔，二人掌左闔，及閉則無左右之分，故止曰四人掌閉也。百甲坐之，百乃皆字之誤，言守門者皆甲而坐也。

移中中處，澤急而奏之。

櫓謹按畢云澤當爲擇，是也。惟未解奏字之義。史記蕭相國世家索隱曰：奏者趨向之也。擇急而奏之，謂有急則趨向也。

死士爲倉英之旗。旗幟

櫓謹按倉英之旗，乃青色旗。倉英卽滄浪也。在水爲滄浪，在竹爲蒼筤，並是一義。此又作倉英者，英音古音如央，故與浪同聲。

城上舉旗，備具之官致財物之，足而下旗。

櫓謹按下之字衍文。本作足而下旗，蓋城上舉旗，則備具之官各致其財物，既足而後下旗也。之字卽足字之誤而複者，當刪。

牲格內廣二十五步，外廣十步，表以地形爲度。

櫓謹按表乃表字之誤。備穴篇：鑿廣三尺，表二尺。王氏念孫訂表爲表之誤，正與此同。謹令信人守衛之，謹密爲故。號令

櫪謹按故猶事也。言務以謹密爲事也。備梯篇以靜爲故。備穴篇以急爲故。義與此同。畢屬下讀。失之。乃傳城。

櫪謹按乃傳當作及傳。字之誤也。上云敵去邑百以上。此云及傳城。其事正相次。傳卽蛾傳之傳。備蛾傳篇曰。遂以傳城是也。畢不能訂正。而屬上謹密爲故讀之。解曰。必有故乃傳用也。殊不可通。及窮巷閒無人之處。

櫪謹按閒上脫幽字。幽閒二字連文。明鬼篇作幽澗毋人。澗卽閒之段字。天志篇作幽門無人。門卽閒之壞字。王氏念孫已訂正。

縣各上其縣中豪傑。若謀士居大夫。

櫪謹按居乃若字之誤。若謀士若大夫。猶言或謀士或大夫也。秦爵有大夫。有官大夫。有公大夫。有五大夫。是民間賜爵至大夫者多矣。上不能悉知。故使縣各上其名也。上文關內侯五大夫公乘之名。悉如秦制。則此所謂大夫者。非必如周官之大夫也。

客射以書無得譽。

櫪謹按譽當作舉。字之誤也。下文曰禁無得舉矢書。

望舉一垂入境。舉二垂狎郭。舉三垂入。舉四垂狎城。舉五垂。

樾謹按王氏引之於舉一垂上。補見冠二字。於舉四垂上。補郭字。均當從之。惟以垂字爲表字之誤。非也。垂者郵之壞字。郵卽表也。禮記郊特牲篇有郵表嘏。鄭君說此未明。阮氏元挈經室集有釋一篇。稍近之。然亦有未盡者。郵表嘏蓋一物也。古者於疆界之地立木爲表。綴物於上。若旌旗之旒。謂之郵表。嘏。郵與旒通。嘏與綴通。鄭君引詩爲下國嘏郵。今長發篇作綴旒。是知郵嘏卽綴旒也。以其用而言。所以表識也。以其制而言。若綴旒然。此郵表嘏所以名也。凡置郵表嘏之處。必在邊境。因於其地置舍。使傳送文書者居焉。其始亦名之曰郵表嘏。後從省而止曰郵。說文邑部。郵。境上行書舍是也。凡置郵表嘏。必於兩道歧出之處。因而凡兩道歧出之處。卽以爲名。其始亦曰郵表嘏。後從省而止曰嘏。說文田部。嘏。兩陌閒道是也。郵嘏之名。既有專歸。於是從省止稱表。而郵表嘏之名湮。其義晦矣。墨子書多古言。雜守篇守表者三人。更立捶表而望。捶表卽郵表也。郵誤爲垂。後人妄加手旁耳。重言之曰郵表。單言之則或曰表。或曰郵。皆古人之常語也。王氏竟改爲表。雖於義未失。而古語亡矣。又按狎郭狎城兩狎字。並當作甲。後人不達。而加犬旁也。甲者會也。詩大明篇。會朝清明。毛傳曰。會甲也。是甲與會聲近而義通。甲郭者會于郭外也。甲城者會于城外也。此言甲郭甲城。雜守篇言郭會城會。文異而義同。其罪射。

樾謹按射疑射字之誤。畢云射謂貫耳。然古不名貫耳爲射。殆非也。

凡有司不使去牽吏民聞誓令。

樾謹按去乃士字之誤。

升食終歲三十六石。參食終歲二十四石。食終歲十八石。五食終歲十四石。升。六食終歲十二石。升。食。五升。參食。食。參升。四食。食。二升半。五食。食。二升。六食。食。一升大半。雜守

樾謹按升食當爲斗食。畢已疑及之。而未敢決。今以下文推之。則升爲斗字之誤無疑也。日食一斗。則終歲三十六石矣。下云升食食五升。則終歲十八石。兩數不同者。上所說是常數。下所說是圍城之中。民食不足。減去其半之數也。參食者參分斗而日食其二也。故終歲二十四石也。句下脫四字。當據下文補。四食者四分斗而日食其二也。故終歲十八石也。五食者五分斗而食其二。則每日食四升。終歲當食十四石四斗。今作終歲十四石升。蓋誤斗爲升。又脫四字耳。盧疑是十四石五升。于數不合。非也。六食者六分斗而食其二也。故終歲十二石也。其下依前數而各減其半。斗食者每日一斗。今則爲五升矣。參食者每日六升大半。今爲參升小半矣。不言小半者。傳寫脫去也。下文言六食食一升大半。則此必言食參升小半可知。蓋參食本食六升大半。而減之爲三升小半。猶六食本食三升小半。而減之爲一升大半也。無小半二字。卽於數不足矣。四食本食五升。故減爲二升半。五食本食四升。故減爲二升。其數甚明。畢氏王氏皆未見及。故具說之。



必爲疑人。令往來行夜者射之。謀其疏者。

樾謹按疑人。蓋束草爲人形。望之如人。故曰疑人。謀其疏者。謀乃誅字之誤。



## 諸子平議卷十二

### 荀子一

君子博學而日參省乎己勸學、

樾謹按省乎二字後人所加也。荀子原文蓋作君子博學而日參己參者驗也。史記禮書曰參是豈無堅革利兵哉。索隱曰參者驗也。管子君臣篇曰若望參表。尹注曰參表謂立表所以參驗曲直。是參有參驗之義。君子博學而日參驗之於己故知明而行無過也。後人不得參字之義妄據論語三省吾身之文增省乎二字陋矣。大戴記勸學篇作君子博學如日參己焉。如而古通用無省乎二字可據以訂正。

干越夷貉之子

樾謹按楊倞注曰干越猶言吳越。盧氏文弼本從元刻改正文干越爲于越。注文吳越爲於越。劉氏台拱補注王氏念孫讀書雜誌並糾盧本之誤。今按盧刻誠非而楊注原文謂猶言吳越亦恐不然。干與越並言則干亦國名。管子內業篇昔者吳干戰未亂不得入軍門。國子撻其齒遂入爲干國多則干與吳且爲敵國非卽吳明矣。尹知章注管子以干爲江邊地非是。辨見管子字本作邗說文邑部邗國也。

今屬臨淮從邑干聲。一曰邗本屬吳。蓋邗古國名。後爲吳邑。哀九年左傳。吳城邗是也。古書言干越者。則當從國名之本訓。不得因其後爲吳邑而卽訓爲吳也。

神莫大於化道。福莫長於無禍。

樾謹按上引詩云。神之聽之。介爾景福。此文神字福字。卽本詩文也。今本此二句提行屬下節。非是。假舟楫者非能水也。

樾謹按能當讀爲耐。漢書食貨志。能風與旱。鼂錯傳。其性能寒。趙充國傳。漢馬不能冬。師古注並曰。能讀曰耐。此文能字。正與彼同。

故不問而告謂之傲。

樾謹按論語季氏篇。言未及之而言謂之躁。釋文曰。魯讀躁爲傲。荀子此文。蓋本魯論。下文曰。故未可與言而言謂之傲。可與言而不言謂之隱。不觀氣色而言謂之瞽。皆與論語同。惟變躁爲傲。可證也。傲卽躁之段字。不問而告。未可與言而言。皆失之躁。非失之傲也。魯論之說。今不可得而詳。以意度之。殆亦段傲爲躁。自古文論語出。得其本字。遂謂魯論讀躁爲傲。實不然也。躁字義長。傲字義短。魯之經師。豈不知此。而改躁爲傲乎。

故誦數以貫之。

樾謹按誦數猶誦說也。詩擊鼓篇與子成說。毛傳曰說數也。說爲數。故數亦爲說。禮記儒行篇遽數之不能終其物。正義曰數說也。荀子王霸篇曰不足數於大君子之前。仲尼篇曰固易足稱乎大君子之門哉。稱與數文異而義同。凡稱說必一一數之。故即謂之數。誦數以貫之。猶云誦說以貫之。與下句思索以通之一律。誦數思索皆兩字并列。楊注云使習禮樂詩書之數以貫穿之。非是。隱十一年穀梁傳。植言同時也。累數皆至也。范注曰累數總言之也。言即說也。

及其致好之也。目好之五色耳好之五聲口好之五味心利之有天下。

樾謹按楊注曰致極也。謂不學極恣其性欲不可禁也。又云或曰學成之後必受榮貴故能盡其欲也。二說並非是。上文云使目非是無欲見也使耳非是無欲聞也使口非是無欲言也使心非是無欲慮也。皆言君子爲學之道。及至其三字直接上文安得云謂不學者乎。若云學成榮貴義更粗矣。古之字於字通用。大戴禮事父母篇曰養之內不養於外則是越之也。養之外不養於內則是疏之也。之內之外即於內於外也。廣雅釋言曰諸之也。又曰諸於也。則之與於義固得通矣。此文四之字並猶於也。目好於五色耳好於五聲口好於五味心利於有天下言所得於學者深。佗物不足以尚之也。下文曰是故權利不能傾也羣衆不能移也天下不能蕩也生乎由是死乎由是正申明此數句之誼。足徵楊注之非矣。

天見其明。地見其光。君子貴其全也。

樾謹按兩見字並當作貴。蓋貴字漫漶止存其下半之貝。因誤爲見耳。光與廣通。說見王氏讀書雜誌。言天貴其明。地貴其廣。君子貴其全。貴誤作見。則與君子句不一律。失荀子語意矣。

勇膽猛戾。則輔之以道順。脩身

樾謹按道順二字不可通。順當讀爲訓。古順訓字通用。國語周語能導訓諸侯者。史記魯世家訓作順。此文道順正與彼同道順卽導訓也。楊注曰。此性多不順。故以道順輔之。非是。

愚款端慤。則合之以禮樂。通之以思索。

樾謹按自血氣剛強則柔之以調和。以下八句。文法皆同。此獨多通之以思索五字。與上文不一律。據韓詩外傳。無此五字。當爲衍文。楊注曰。愚款端慤多無潤色。故合之以禮樂。不及思索之說。是其所見本未衍也。

事亂君而通。不如事窮君而順焉。

樾謹按顧氏千里曰。窮順二字互錯。此不然也。荀子之意。以爲事亂君則不順矣。事窮君則不通矣。然與其事亂君而通。不如事窮君而順。正上文身勞而心安爲之利少而義多爲之之意。若從顧校。則全失其旨矣。王氏采其說入雜誌補誤也。

饒樂之事。則佞兌而不曲。

樾謹按不字衍文。涉下不慤不錄而衍。曲者委曲也。言遇饒樂之事。必委曲以取之也。因衍不字。楊注曰。不曲謂直取之。誤矣。

行而俯項。非擊戾也。

樾謹按楊注曰。擊戾謂項曲。戾不能仰者也。擊戾猶言了戾也。此說擊戾之義未明。擊戾者拂戾也。考工記弓人和弓。轂摩。鄭注曰。轂拂也。擊與轂通。郭仲奇碑。鷹俯電轂。轂卽擊字也。則有鈞無上。可以爲君子者矣。

樾謹按有鈞無上。謂但有與之齊等。無更在其上者也。故謂之君子。楊注非。不窮窮而通者積焉。

樾謹按楊注以不窮窮謂惠恤鰥寡。非也。窮通以賢不肖言。孔晁注周書常訓篇曰。窮謂不肖之人。是也不窮窮者。不強人以所不知。不能中庸所謂矜不能也。若以窮爲鰥寡。則通者豈不鰥寡之謂乎。非十二子篇曰。聰明聖知。不以窮人。卽可說此文不窮窮之義。人有此三行。雖有大過。天其不遂乎。

樾謹按人有此三行。則君子矣。小過或有之。安有大過乎。過當爲禍。漢書公孫宏傳。雖陽與善。後竟報

其過史記過作禍。是過與禍通。遂成也。言雖有大禍。天必不成之也。楊注曰。若不幸而有過。天亦祐之矣。此固不宜有大災也。大災二字。正可以釋正文之大過。楊不知過爲禍之段字。故不得其解耳。

鉤有須。不苟。

樾謹按楊注云未詳。或曰卽丁子有尾也。丁之曲者爲鉤。須與尾皆毛類。此亦曲說。不可從。鉤疑媼之段字。說文女部。媼。媼也。媼無須。而謂之有須。故曰說之難持者也。惠氏棟校本引大元經。婦人噠鉤。爲說。謂鉤音拘。與須音相近。噠鉤者。須出乎口也。按大元迎次四。裳有衣襦。男子目珠。婦人噠鉤。范望及溫公集注。並無婦人須出乎口之說。且謂鉤與須音近。則噠鉤卽噠須也。以說此文。是爲須有須矣。豈可通乎。今讀鉤爲媼。亦卽惠氏之意。而說似較安。

盜跖吟口。

樾謹按楊注曰。吟口。吟咏長在人口也。此說殊爲迂曲。又曰。說苑作盜跖囚貪。然韓詩外傳亦作吟口。則又似不誤也。吟蓋黔之段字。黔口卽黔喙。周易說卦傳。爲黔喙之屬。釋文引鄭注曰。謂虎豹之屬。貪冒之類。然則盜跖黔口。乃以虎豹擬之。正論篇所謂禽獸行虎狼貪也。

君子易知而難狎。

樾謹按韓詩外傳。作易和而難狎。字之誤也。知者接也。墨子經篇曰。知。接也。古謂相交。接曰知。故後漢



書宋宏傳。貧賤之交不可忘。羣書治要作貧賤之知。是知有交接之義。易知而難狎。謂易接而難狎也。詩芄蘭篇首章曰。能不我知。次章曰。能不我甲。毛傳訓甲爲狎。蓋首章言不與我交接。次章言不與我狎習也。說詳羣經平議。荀子以知狎對文。正本乎詩。韓嬰不達此旨。改知爲和。失之矣。王氏念孫謂當從外傳。非也。

### 以義變應

樾謹按。變讀爲辯。周易文言曰。由辯之不早辯也。釋文曰。辯荀作變。禮記禮運篇。大夫死宗廟謂之變。鄭注曰。變當爲辯。是變與辯古通。辯之言徧也。儀禮鄉飲酒禮。衆賓辯有脯醢。燕禮。大夫辯受酬。鄭注並云。今文辯作徧。是其證也。變與辯通。則亦可借爲徧。以義變應者。以義徧應也。下文引詩曰。左之左之。君子宜之。右之右之。君子有之。此言君子之能以義屈伸變應也。左宜右有。正以義徧應之謂。楊注曰。以義隨變而應。增字以成其說。失其旨矣。君道篇曰。並遇變應而不窮。變與並對文。可知變之爲徧也。致士篇。臨事接民而以義變應。義與此同。

人汙而修之者。非案汙而修之之謂也。

樾謹按。修當讀爲滌。周官司尊彝職曰。凡酒修酌。鄭注曰。修讀如滌濯之滌。是其證也。滌從條聲。條從攸聲。修亦從攸聲。聲同之字。故得通用。楊注曰。人有汙穢之行。將修爲善。失之矣。荀子書每以修與汙

對文並當讀爲滌。

不誠則不獨，不獨則不形。

樾謹按上文云：致誠則無它事矣。唯仁之爲守，唯義之爲行，所謂獨者，卽無它事之謂。唯仁唯義，故無它事。無它事是謂獨，故曰不誠則不獨，不獨則不形。言不能誠實，則不能專一於內，不能專一，則不能形見於外。楊氏未達獨字之旨，故所解均未得也。

唯利所在，無所不傾。

樾謹按文選孫子荊詩：傾城遠追送。李善注：傾猶盡也。無所不傾，卽無所不盡。楊注謂傾意求之，非是。夫貧賤者，則求柔之。

樾謹按注不釋求字。禮記曲禮篇曰：君子行禮，不求變俗。鄭注曰：求猶務也。求柔之，猶言務柔之矣。是非仁人之情也。

樾謹按仁字衍文也。上文云：夫富貴者則類傲之，夫貧賤者則求柔之。蓋言遇富貴者率傲慢之，遇貧賤者務柔屈之。此非人情也。正與上文人之所惡者，吾亦惡之相應。上文泛言人，則此文亦不當言仁人。後人因下云是姦人，將以盜名於晦世者也，故於上句加仁字，以對下姦字，而不知其義之非耳。巨涂則讓，小涂則殆。榮辱。

樾謹按楊注曰殆近也。凡行前遠而後近，故近者亦後之義。謂行於道涂，大道並行則讓之，小道可單行則後之。此說於殆字之義甚爲迂曲，且與下文雖欲不謹，文氣亦不貫。楊注非也。讓當讀爲擾攘之攘。說文女部，孃煩擾也。經典無孃字，多以攘爲之。禮記曲禮篇鄭注曰：攘古讓字。故此又以讓爲之也。文選舞賦：擾攘就駕。李善引埤蒼曰：攘疾行貌。巨涂人所共行，故擾攘而不止。小涂人所罕由，故危殆而不安。是涂無巨小，皆不可不謹。故下文曰：雖欲不謹，若云不使也。

辯而不說者爭也。  
樾謹按楊注曰：不說，不爲人所稱說，或讀爲悅。二義皆非。是淮南子似真篇：辨者不能說也。高誘注曰：說，釋也。斯得之矣。辯而不說，謂辯而人不解說，由其好與人爭，而不能委曲以曉人也。  
重死持義而不撓。

樾謹按此本作重死而持義不撓。故楊注曰：雖重愛其死，而執節持義，不撓曲以苟生也。是楊氏所據本而字在持義之上。  
肱於沙而思水，則無逮矣。

樾謹按楊注曰：肱與祛同。方言曰：祛，去也。謂失水去在沙上也。然失水在沙上，而曰去於沙，甚爲不詞。楊注非也。肱當作陸。文選吳都賦曰：陸以九疑。注曰：陸，闌也。因山谷以遮獸也。陸於沙義亦同。此言遮

關於沙而思水則無及矣。下云挂於患而欲謹則無益矣。陸於沙挂於患文義一律。成則必不得其所好必遇其所惡焉。

樾謹按楊注曰雖使姦詐得成亦必有禍無福其說非也。尙書皋陶謨篇簫韶九成鄭注曰成猶終也。古謂終爲成言終則必不得其所好必遇其所惡焉。下文於君子曰成則必得其所好必不遇其所惡焉。並以其終竟言之。臣道篇曰成於尊君安國彊國篇曰道德之威成乎安彊暴察之威成乎危弱狂妄之威成乎滅亡諸成字並當訓終。然而人力爲此而寡爲彼何也。

樾謹按力乃多字之誤多與寡對文成義下同。

堯禹者非生而具者也夫起於變故成乎脩脩之爲待盡而後備者也。

樾謹按脩之二字衍文也。起於變故成乎脩爲二語相對成文下文曰非孰脩爲之君子莫之能知也。正以脩爲二字連文可證。

約者有筐篋之藏然而行不敢有輿馬。

樾謹按楊注曰約儉嗇也。旣云儉嗇則不敢有輿馬固無足怪不必更用然而字作轉矣。楊注非也。淮南子主術篇所守甚約高注曰約要也。漢書禮樂志治本約師古曰約讀曰要是約與要一聲之轉。古

亦通用。約者，猶云要者。孝經：先王有至德要道。疏引殷仲文曰：以一管衆爲要。蓋物之藏於筐篋者，必是貴重之物。視上文所云：餘刀布有困窮爲尤要矣。故特以要者言之。非儉嗇之謂也。

然後使慤祿多少厚薄之稱。

櫛謹按：慤當作穀。孟子：滕文公篇：穀祿不平。趙注曰：穀所以爲祿也。此文言穀祿，正與彼同。作慤者，聲之誤也。楊注曰：慤，實也。以本字讀之，失其旨矣。王霸篇曰：心好利而穀祿莫厚焉。此穀祿二字見於本書者。

子弓短，非相。

櫛謹按：楊注曰：子弓，蓋仲弓也。此說是也。又曰：言子者，著其爲師也。則恐不然。仲弓稱子弓，猶季路稱子路耳。子路也，子弓也。其字也。曰季曰仲，至五十而加以伯仲也。

仁義功名，善於後世。

櫛謹按：善乃蓋字之誤。隸書蓋字或作盖。見北海相景君銘。善字或作𠂔。見張遷碑。兩形相似而誤。今世俗之亂君、鄉曲之僂子。

櫛謹按：下文云：中君羞以爲臣，則此不應言君。且與婦人莫不願得以爲夫，處士莫不願得以爲士，及東平有司，戮乎大市諸語，皆不合。疑本作世俗之亂民，傳寫誤耳。

今夫猩猩形笑亦二足而毛也。

樾謹按形笑二字甚爲不詞。注云形笑者能言笑也。望文生義未足爲據。笑疑當作狀。傳寫者失耳。旁但存犬字而俗書笑字亦或從犬。後人以形犬二字難通。因猩猩能笑遂改作笑字耳。毛上當有無字。上文云然則人之所以爲人者非特二足無毛也。下文云故人之所以爲人者非特以其二足而無毛也。則此文亦當作無毛明矣。

守法數之有司極禮而褫。

樾謹按極禮而褫文不可通。疑禮字衍文也。極而褫三字爲句。上文云文久而息節族久而絕。此云極而褫正與久而息久而絕一律。楊注曰褫解也。有司世世相承守禮之法數。至於極久亦下脫也。是楊氏所見本尙未衍禮字。故云至於極久亦下脫。是極下無禮字也。所云守禮之法數者此禮字乃楊氏增出以解法數之誼。非正文有禮字也。今作極禮而褫卽因注文而衍。

欲觀聖王之跡則於其粲然者矣。後王是也。

樾謹按楊注曰後王近時之王也。又引司馬遷曰法後王者以其近已而俗相類。議卑而易行也。此自得荀子之意。劉氏台拱曰後王謂文武也。楊注非。汪氏中曰史記引法後王蓋如賦詩之斷章耳。此注承其誤。名爲解荀子而實汨之。王氏念孫曰後王二字本篇一見不苟篇一見儒效篇二見王制篇一

見正名篇三見。成相篇一見。皆指文武而言。楊注皆誤。此三君之說。皆有意爲荀子補弊扶偏。而實非其雅意也。據下文云。彼後王者。天下之君也。舍後王而道上古。譬之是猶舍己之君而事人之君也。然則荀子生於周末。以文武爲後王可也。若漢人則必以漢高祖爲後王。唐人則必以唐太祖太宗爲後王。設於漢唐之世。而言三代之制。是所謂舍己之君而事人之君矣。豈其必以文武爲後王乎。蓋孟子言法先王。而荀子言法後王。亦猶孟子言性善。而荀子言性惡。各成其是。初不相謀。比而同之。斯惑矣。呂氏春秋察今篇曰。上胡不法先王之治。非不賢也。爲其不可得而法。又曰。世易時移。變法宜矣。譬之若良醫。病萬變。藥亦萬變。病變而藥不變。鄉之壽民。今爲殤子矣。蓋當時之論。固多如此。其後李斯相秦。廢先王之法。一用秦制。後人遂以爲荀卿罪。不知此固時爲之也。後人不達此義。於數千年後。欲胥先王之道而復之。而卒不可復。吾恐其適爲秦人笑矣。

妄人者。門庭之閒。猶可誣欺也。而況於千世之上乎。

樾謹按。可字衍文。涉上文猶可欺也而衍。誣乃挾字之誤。挾字右旁之夾。與巫相似。故誤也。上言衆人乃受欺者。此言妄人乃欺人者。若云猶可誣欺。則與衆人之可欺者同矣。且誣欺二字連文。亦爲不倫。韓詩外傳作彼詐人者。門庭之閒猶挾欺。而況乎千歲之上乎。可據以訂正。

傳者久則論略。近則論詳。

樾謹按兩論字皆俞字之誤。俞讀爲愈。榮辱篇清之而俞濁者口也。衆之而俞瘠者交也。楊注曰。俞讀爲愈。是也。俞誤作命。因誤作論矣。韓詩外傳正作久則愈略。近則愈詳。可據訂。

黨學者。

樾謹按楊注曰。黨親比也。於義未合。方言曰。黨曉哲。知也。楚謂之黨。或曰曉。齊宋之間謂之哲。郭注曰。黨黨朗也。解寤貌。然則黨學者。猶言曉學者。蓋法先王順禮義以曉學者也。荀卿居楚久。故楚言耳。

遠舉則病繆。近世則病備。善者於是閒也。亦必遠舉而不繆。近世而不備。

樾謹按世字當作舉。遠舉近舉相對爲文。楊注曰。遠舉上世之事。則患繆妄。下舉近世之事。則患備鄙。蓋因正文有兩舉字。故注亦云。然也不曰近舉下世。而曰下舉近世者。避不詞耳。今作近世者。卽涉注文而誤。

然而口舌之均。瞻唯則節。

樾謹按之猶則也。僖九年左傳曰。東略之不知。西則否矣。晉語曰。華則榮矣。實之不知。之亦則也。互文耳。說本王氏釋詞。口舌之均。瞻唯則節。相對成文。詩皇皇者華篇。毛傳曰。均調也。言雖上不足以順明主。下不足以和齊百姓。然而口舌則調均。瞻唯則中節。故下文云。足以爲奇偉偃却之屬也。瞻字疑諾字之誤。凡從言之字。亦得從口。如詠之爲咏。讀之爲嘖。是也。俗書諾字或作喏。因誤爲瞻矣。



喬字崑瑱，非十二子。

樾謹按楊注曰：喬與譌同，字未詳。或曰：字大也。今按讀喬爲譌是矣。訓字爲大，則與譌誼不倫。字當讀爲訐。說文言部：訐，詭譎也。然則喬字猶言譌詭矣。

以爲仲尼子游爲茲厚於後世。

樾謹按楊注曰：仲尼子游爲此言，垂德厚於後世，則爲茲厚三字，於文未足，殆非也。厚猶重也。戰國策秦策曰：其於敵邑之王甚厚。注曰：厚，重也。爲茲厚於後世者，茲卽指子思孟子而言。蓋荀子之意，謂仲尼子游之道，不待子思孟子而重，而世俗不知，以爲仲尼子游因此而後得重於後世，故曰：是則子思孟軻之罪也。

成名況乎諸侯，莫不願以爲臣。

樾謹按楊注讀諸侯莫不願以爲臣作一句，則成名況乎四字，文不成義。又載或說：以況乎屬下句，則成名二字，更不成義，皆非也。此當以成名況乎諸侯爲句。成與盛通。周易繫辭傳：成象之謂乾。蜀才本成作盛。史記封禪書：日主祠成山。漢書郊祀志成作盛。然則成名猶盛名也。況者賜也。言以盛名爲諸侯賜也。大賢所至，莫不以爲榮幸。若受其賜，然漢書灌夫傳：將軍適官，幸臨況魏其侯，卽此況字之義，爲詐而巧。

樾謹按爲與僞通。爲詐卽僞詐也。管子兵法篇不可數則僞詐不敢嚮。幼官篇作爲詐不敢鄉。正與此同。楊注曰巧於爲詐非是。

察辯而操僻。淫大而用之。

樾謹按楊注讀察辯而操僻淫爲句。誤也。當以察辯而操僻五字爲句。大略篇亦云。察辯而操僻。是其證。大讀爲汰。淫汰連文。仲尼篇曰。若是其險。汙淫汰也。是其證。之者乏之壞字。襄十四年左傳曰。既神乏祀。釋文曰。本或作之祀。蓋之乏形似。故易誤耳。淫汰而用之。與察辯而操僻相對成文。此文自知而無法。勇而無憚。至利足而迷。負石而隊。凡七句。語皆一律。而總之曰。是天下之所弃也。楊以大而用之四字爲句。而釋之曰。以前數事爲大而用之。則上下文氣隔矣。

樂富貴者也。

樾謹按楊注曰。樂其道也。夫樂富貴。豈得爲樂其道。正文樂字。疑涉注文而誤。下云。羞獨富者也。以獨富爲羞。必不以富貴爲樂。今雖不知爲何字之誤。大要是不慕富貴之意。故注以樂道說之也。

其冠進。

樾謹按楊注曰。進謂冠在前也。以冠在前爲進。不詞甚矣。進讀爲峻。峻高也。言其冠高也。下云。其衣逢。注曰。逢大也。於冠言高。於衣言大。義正相類。進峻音近。故得通用。禮記祭統篇。百官進徹之。鄭注曰。進

當爲餒然則峻之爲進猶餒之爲進矣。

慘然。

樾謹按漢書敘傳：侈侈公主，師古曰：侈侈，好貌。侈卽侈之段字。嚴威儼恪，成人之道，非所以事親，故子弟之容，必侈侈然好也。楊注曰：侈然特尊長之貌。爾雅曰：侈，恃也。失之迂曲。

盡盡然。

樾謹按楊注曰：極視盡物之貌。望文生訓，非其旨也。盡盡猶津津也。莊子庚桑楚篇曰：津津乎猶有忍也。此作盡盡者，聲近故段用耳。周官大司徒職曰：其民黑而津。釋文云：津本作盡。然則津津之爲盡盡，猶津之爲盡矣。

倏然見管仲之能足以託國也。仲尼

樾謹按說文見部，覩，暫見也。目部，睽，暫視貌。二字音義俱近。倏卽其段字也。倏然者暫見之謂。暫見而卽知其足以託國，是以謂之大知。楊注曰：倏，妥也。失之。

武王誅二。

樾謹按楊注引史記武王斬紂與妲己，又引尸子武王親射惡來之口，親斫殷紂之頸。然皆不足以爲二。所謂誅二者，殆卽孟子所稱誅紂伐奄與。

求善處大重。理任大事。擅寵於萬乘之國。必無後患之術。莫若好同之。

樾謹按。理字衍文也。處大重。任大事。相對皆蒙善字爲義。楊注曰。大重謂大位也。不釋理字之義。知楊氏作注時。尙無理字也。理字蓋卽重字之誤而衍者。

以事君則必通。以爲仁則必聖。

樾謹按。仁當作人。言以事君則必通達。以爲人則必聖知也。楊注曰。仁。仁人。失之矣。

是猶伏而哂天。

樾謹按。楊注曰。哂與舐同。伏而舐天。愈益遠也。然舐天二字。甚爲無誼。人豈有能舐天者乎。以此爲喻。近於戲矣。疑荀子原文作伏而眡天。眡卽古視字也。伏而視天。則不可見。故曰說必不行也。眡誤爲舐。傳寫者又改爲哂耳。

必蚤正以待之也。儒效

樾謹按。必字衍文也。下文孝弟以化之也。與此句相對。下無必字。則此亦當無必字矣。蚤字無義。疑脩字之誤。脩字闕壞。止存右旁之各。故誤爲蚤耳。榮辱篇曰。脩正治辨矣。非十二子篇曰。脩正者也。富國篇曰。必先脩正其在我者。王霸篇曰。內不脩正其所以有。皆以脩正二字連文。可以爲證。新序引此。作布正。布隸書或作帑。亦與脩字左旁相似。

圖回天下於掌上。

樾謹按楊注曰。圖。謀也。回。轉也。言圖謀運轉天下之事。如在掌上也。然圖謀運轉。兩義不倫。恐非其旨。圖者。圖之誤字。廣雅釋詁。圖。圓也。圓。回。猶圓轉也。淮南原道篇曰。圓者常轉。是其義也。圖回天下於掌上。言天下之大。可圓轉於掌上也。隸書圖字。或作圖。或作圖。皆與圖字相似。學者多見圖。少見圖。因誤爲圖耳。

分分兮其有終始也。

樾謹按分當讀爲份。說文人部。份。文質備也。從人分聲。論語曰。文質份份。分分即份份也。省偏旁耳。楊注曰。事各當其分。即無雜亂。故能有終始。分扶問反。然各當其分。豈可謂之分分乎。不詞甚矣。君子篇。分然各以其誠通。義亦同此。

樂樂兮其執道不殆也。

樾謹按楊氏不釋樂樂之誼。蓋即以本字讀之。然樂樂字經傳尠見。王霸篇曰。樾然扶持心國。楊注曰。樾讀爲落。石貌也。此云樂樂兮。彼云樾然。文異義同。老子曰。落落如石。樂樂猶落落也。以其執道不殆。故以石形容之。

遂選馬而進。

樾謹按楊注曰選簡擇也。然荀子之意。方言周公之不戒。若馬必簡擇。則非其義矣。詩猗嗟篇曰。舞則選兮。毛傳曰。選。齊也。此選字亦當訓齊。車攻篇曰。我馬既同。傳曰。同。齊也。然則選馬而進。蓋戎事齊力之義。非簡擇之謂。下文曰。與固馬選矣。誼亦同此。猶言我車既攻。我馬既同也。若以選爲簡擇。則選馬可通。馬選不可通矣。

厭旦於牧之野。

樾謹按楊注曰。厭。掩也。夜掩於旦。謂未明以前也。然未明以前謂之厭旦。於古無徵。且以文義論之。上云朝食於戚。莫宿於百泉。則此文旦下亦當有一字。今止云厭旦於牧之野。文義殊未足也。厭旦當作旦厭。厭讀爲壓。彊國篇。如牆厭之。注曰。厭讀爲壓。此文厭字。正與彼同。旦壓於牧之野。與上文朝食莫宿。文義一律。成十六年左傳。楚晨壓晉軍而陳。此云旦厭。猶彼云晨壓矣。

弓調矢直矣。而不能以射遠中微。則非羿也。

樾謹按此本作及遠中微。故楊注曰。善射者。既能及遠。又中微細之物也。及遠二字。卽本正文。又王霸篇曰。故人主欲得善射。射遠中微。則莫若羿。猛門矣。楊注曰。射及遠中微細之物。是其所據本。亦作及遠中微。注文射字。包及遠中微二意。讀者不察。謂注文作射及遠。則正文必是射遠。於是盡改爲射遠中微。非荀子之舊矣。君道篇曰。人主欲得善射。射遠中微者。縣賞爵重賞以招致之。韓詩外傳四引作

及遠中微。可據以訂正。而外傳五引儒效篇文。亦作射遠中微。疑後人依誤本荀子改之。隨其長子。

樾謹按長子猶鉅子也。莊子天下篇釋文引向秀曰。墨家號其道理成者爲鉅子。若儒家之碩儒。長與鉅義同。鉅子長子。蓋當時有此稱。隨其長子謂奉一先生以爲師。從而附和之也。楊注曰。長子謂君之世子也。殊非其義。

事其便辟。舉其上客。

樾謹按王氏讀舉爲與。是也。解爲交其上客。則非是。此蒙事字爲文。猶言事其便辟及其上客耳。然而明不能齊法教之所不及。聞見之所未至。則知不能類也。

樾謹按楊注斷明不能齊爲句。解曰。雖有大體。其所見之明。猶未能齊。言行使無纖介之差。此失其讀也。齊讀爲濟。然而以下十八字。作一句讀。言法教所及。聞見所至。則明足以及之。而不能濟其法教所未及。聞見所未至也。所以然者。由其知不能類也。學者誤謂明不能齊。知不能類。相對成文。遂以齊字斷句。失之矣。韓詩外傳正作明不能濟法教之所不及。聞見之所未至。無知不能類句。

用大儒則百里之地。久而後三年。天下爲一。諸侯爲臣。

樾謹按楊注斷久字爲句。則而後三年句。不成文義。此當以久而後三年五字爲句。言姑舉其久者言。

之。則以三年爲期。若速則或一年或二年。卽可以一天下而臣諸侯矣。韓詩外傳作久而三年。無後字。



## 諸子平議卷十二

### 荀子二

若是則大事殆乎弛，小事殆乎遂，主制、

樾謹按說文走部遂亡也。小事殆乎遂，謂近乎亡失也。正論篇國雖不安，不至於廢易遂亡，以遂亡連文，此古義之幸存者。楊曰遂，因循也，乃不得其義而曲爲之說。

成侯嗣公聚斂計數之君也，未及取民也。子產取民者也，未及爲政也。

樾謹按楊注以取民爲得民心，於義甚晦，殆非也。老子曰故取天下者常以無事，河上公注曰取治也。

此取字亦當訓治，取民言治民也。

人之城守，人之出戰，而我以力勝之也。

樾謹按出當爲士字之譌也。古書士出二字，每每相混。史記五帝紀稱以出，集解引徐廣曰出一作士。淮南子繆稱篇其出之誠也，新序雜事篇出作士，並其證也。守必以城，戰必以士，人之城守，人之士戰，正相對成文，士譌爲出，義不可通矣。

是以大者之所以反削也。

樾謹按上以字衍文。是大者之所以反削也。與上文是彊者之所以反弱也。正相對。

諸侯莫不懷交接怨。而不忘其敵。

樾謹按楊注曰。諸侯皆欲相連結怨國。而不忘與之爲敵。是於怨字絕句。又曰。本多作壞交接。言壞其與已交接之道也。則又於接字絕句。二說皆未安。王氏念孫謂當從後說。非也。疑怨字當在交接二字之上。本作諸侯莫不懷怨交接。而不忘其敵。懷怨交接。猶云匿怨而友其人也。故不忘其敵。傳寫奪怨字。而誤補之接字之下耳。

案謹募選閱材技之士。

樾謹按募乃纂字之譌。毛詩猗嗟篇。舞則選兮。韓詩作舞則纂兮。是纂與選聲近義同。故此以連文。纂選皆具也。說文人部。僕具也。食部。纂具食也。選與僕並從巽聲。纂與纂並從算聲。於義得通。閱亦具也。說文門部。閱具數于門中也。小爾雅廣詁。閱具也。是纂選閱三字同義。古書往往有之。襄三十一年左傳。繕完葺牆。繕完葺一義也。楚語蓄聚積實。蓄聚積一義也。並其例也。案謹纂選閱材技之士。實言之。止是具材技之士耳。纂誤爲募。楊注曰。募招也。非古義矣。管子心術篇。纂選者。所以等事也。今本皆作募選。誤與此同。說詳管子。

宰爵知賓客祭祀饗食犧牲之牢數。

樾謹按楊注曰宰膳宰爵主掌也饗食饗宴也周禮膳夫之屬有庖人獸人皆掌犧牲一曰爵官爵也言膳宰之官爵掌犧牲之事者也此二說皆未安以爵爲主掌則旣言主掌不必更言知矣以爵爲官爵則下文司徒司馬何獨不言爵乎今以下文例之曰司徒知百宗城郭立器之數司馬知師旅甲兵乘白之數上二字皆官名則宰爵二字亦官名也周官天官序官鄭注曰宰主也然則宰爵者主爵也漢書百官公卿表主爵中尉秦官掌列侯秦官之有主爵殆本於古之宰爵乎其所以掌爲列侯故賓客祭祀饗食犧牲之牢數無不與知考主爵中尉所屬有掌畜令丞正合古制矣學者徒以周官之膳宰說此文遂失其解

### 脩探清

樾謹按探乃塚字之誤方言曰塚秦晉之間謂之塚是也清者說文广部厠清也急就篇屏厠清澗糞土壤字亦作圉玉篇口部圉圉也蓋墟墓之間清澗之處皆穢惡所積聚故必以時修治之也楊注非

是非功名之所就也非存亡安危之所墮也

樾謹按墮字義不可通當作隨字之誤也隨從也言非存亡安危之所從也

偃然案兵無動以觀夫暴國之相卒也

樾謹按卒當作粹。國語晉語戎夏交粹。韋注曰粹交對也。彼云交粹。此云相粹。義正同。

案然脩仁義。伉隆高正法。則選賢良養百姓。

樾謹按然衍字。案乃語詞。上文云案平政教。審節奏。砥礪百姓。與此文一律。可證。

非特以爲淫泰夸麗之聲富國。

樾謹按聲字衍文也。荀子原文蓋作非特以爲淫泰夸麗也。因也字誤作之。後人妄加聲字耳。下文云。

非特所以爲淫泰也。句法與此同。是其證。

守時力民。進時長功。和濟百姓。使人不偷。是將率之事也。

樾謹按此言足天下之道。前後皆言農事。而此云是將率之事。楊注曰。將率猶主領也。若今宰守。此曲爲之說。未爲得也。蓋古之爲將率者。其平時卽州長黨正之官。周官州長職。若國作民而師田行役之事。則帥而致之。掌其戒令與其賞罰。鄭注曰。掌其戒令賞罰。則是於軍因爲帥。帥賈疏曰。云因爲帥帥者。若衆屬軍吏。別有軍吏掌之。何得還自掌之。故知因爲帥帥也。但在鄉爲州長。已管其民。在軍還領已民爲帥帥。卽是因內政寄軍令也。又黨正職注曰。亦於軍因爲旅帥。族師職注曰。亦於軍因爲卒長。以是推之。閭胥卽爲兩司馬。比長卽爲伍長。夏官序官疏曰。閭胥以下。雖不言因爲。義可知是也。此云將率。卽指州長黨正之屬。從其在軍之名而稱之曰將率。正見內政軍令之可通。楊注未達斯旨。

垂事養民。

檇謹按垂猶委也。說文女部。媿。媿也。垂之爲委。猶媿之爲媿也。爾雅釋言。誣。誣也。孫炎曰。楚人曰誣。秦人曰誣。是誣誣疊韻二字義同。垂之與委。猶誣之與媿也。垂事養民者。委事養民也。言委置其事以養民也。下文曰。進事長功。輕非譽而恬失民。正與此垂事養民相反。又曰。垂事養譽不可。句以遂功而忘民亦不可。垂事者。卽所謂垂事養民也。遂功者。卽所謂進事長功。輕非譽而恬失民也。然則垂事之義可見矣。楊注訓垂爲下。非是。

則和調累解。

檇謹按楊注曰。累解。嬰累解釋也。然累解與和調皆二字平列。訓爲嬰累解釋。非其義矣。儒效篇曰。解果其冠。楊注引說苑蟹螺者宜禾爲證。竊謂累解與蟹螺一也。彼從虫而此否者。書有繁簡耳。蟹螺到爲累解。猶和調亦可云調和也。說苑以蟹螺汚邪對文。則蟹螺之義。殆猶平正矣。凡主相臣下百吏之俗。

檇謹按俗當爲屬。聲近而譌也。下文又曰。凡主相臣下百吏之屬。可證俗字之譌。楊氏不據以訂正。而曰俗謂風俗失之。

須孰盡察。

樾謹按須字無義。乃順字之誤。禮論篇曰。非順孰脩爲之。君子莫之能知也。亦以順孰連文。是其證。順與須形近而誤。楊注非。

境內之聚也。保固視可。

樾謹按楊讀保固視可四字爲句。解爲保其險固。視其可進。王氏念孫非之。謂可字衍文。視字當屬下。午其軍取其將若撥糴。然彊國篇亦有視可司閒之文。舊說恐未可改。

午其衆取其將若撥糴。

樾謹按楊注曰。周禮籩人職云。朝食之籩。其實糴。糴鄭云。糴熬麥。今河閒以北菴種麥賣之名曰糴。據鄭之說。糴麥之牙糴也。至脆弱。故以喻之。若撥糴如以手撥糴也。糴音豐。楊氏此注。合先後鄭二說爲一。又臆造牙糴之說。先後鄭均無此義。未知所據。不可從也。古義每存乎聲。糴旣音豐。即可讀爲豐。尙書顧命篇。敷坐豐席。枚氏傳曰。豐莞。正義曰。釋草云。莞苻離。郭璞曰。今之西方人呼蒲爲莞。用之爲席也。王肅亦云。豐席莞。然則豐者蒲也。蒲之爲物。至脆弱。故以手撥之至易也。字本宜作豐。從麥旁作糴。乃古文段借字。楊泥本字爲說。故失之。

彼得之。不足以藥傷補敗。

樾謹按藥當讀爲瘰。說文疒部。瘰治也。或作療。古書每以藥爲之。大雅板篇。不可救藥。韓詩外傳作不

可救療。毛用段字。韓用正字耳。藥傷卽療傷也。楊注曰。藥猶醫也。雖得其義。未得其字。

是猶好聲色而恬無耳目也。王霸。

樾謹按恬當作媾。字之誤也。爾雅釋言。視。媾也。釋文引李巡孫炎注並曰。人面媾然也。是媾然爲人面之貌。故詩何人斯篇有視面目。毛傳曰。視。媾也。鄭箋曰。媾然有面目。是其義也。媾無耳目。猶言媾然無耳目。學者多見恬。少見媾。因誤媾爲恬。楊注卽訓爲安然。失之矣。

此夫過舉顛步而覺跌千里者夫。

樾謹按楊注曰。言此歧路。第過舉半步。則知差而哭。況跌千里者乎。然如注義。則以跌千里者夫爲句。不詞甚矣。覺當爲覺。玉篇引聲類曰。覺。誤也。廣雅釋詁同。覺訓誤。正與楊注跌訓差。其義相近。言此歧路第過舉顛步。而其覺跌乃至千里。故可悲也。自覺誤爲覺。而義不可明矣。

若夫貫日而治平。

樾謹按上文云。若夫貫日而治詳。君道篇云。併耳目之樂而親。自貫日而治詳。兩文相同。此文平字。疑亦當作詳。蓋段羊爲詳。又誤羊爲平耳。楊注非。

以非所取於民而巧。

樾謹按非所猶非時也。文十三年公羊傳。往黨衛侯會公于沓。何休解詁曰。黨。所也。所猶時也。以非時。

取於民而巧，言以非時取民，而巧爲之名也。

佻其期日，而利其巧任。

樾謹按：巧任與期日對文。楊注曰：巧任，巧者之任，非其義也。莊子秋水篇曰：任土之所勞，釋文引李注曰：任，能也。然則巧任猶巧能也。言佻緩其期日，而其巧能者，則豐厚其氣稟以利之，百工乃忠信而不桀矣。

是狂生者也。狂生者不胥時而落。君道

樾謹按：狂卽隍之假字。說文土部：隍，草木忘生也。從之在土上。讀若皇。狂，說文作𢇛，本從隍聲。故義得通。狂生蓋以草木爲比。故云不胥時而落。落亦以草木言也。臣道篇：迷亂狂生，義同。楊彼注曰：迷亂其君，使生狂也。未得其義。韓詩外傳作枉生，枉亦隍之假字。

善顯設人者也。

樾謹按：設者大也。考工記桃氏曰：中其莖，設其後。鄭注曰：從中以卻稍大之也。賈疏曰：後鄭意訓設爲大。故易繫辭曰：益長裕而不設。鄭注曰：設，大也。是設有大誼。顯設猶云顯大。

重味而成珍備。

樾謹按：珍備二字無義。此本作重味而備珍怪。正論篇：食飲則重太牢而備珍怪，是其證也。因涉上句



重色而成文章，誤衍成字，遂倒備珍爲珍備，而臆刪怪字矣。韓詩外傳作重色而成文，累味而備珍。上句無章字，下句無怪字，然成文備珍，正本荀子，可據以訂正。

今人主有六患。

樾謹按下文使賢者爲之，則與不肖者規之，使知者慮之，則與愚者論之，使脩士行之，則與汙邪之人疑之，止可云三患，不可云六患。六疑大字之誤，學者誤以下文一句爲一患，故臆改爲六，不知合二句方成一患，若止是使賢者爲之，知者慮之，脩士行之，非患也。

循乎道之人，汙邪之賊也。

樾謹按彙書治要無乎字，當從之。循乃脩字之誤。盧校云：元刻循作脩是也。脩道與汙邪相反。上文曰：使脩士行之，則與汙邪之人疑之，亦以脩與汙邪對，是其證。

欲得善馭速致遠者，一日而千里。

樾謹按盧校云：善馭下，俗閒本有及字。王氏念孫據王霸篇：欲得善馭，及速致遠，則莫若王良造父矣。謂有及字者是，不知此與彼文不同。彼無一日而千里五字，故有及速二字。此云一日而千里，則及速不待言矣。荀子原文，不獨無及字，并無速字。儒效篇曰：輿固馬選矣，而不能以致遠，一日而千里，則非造父也。亦言一日千里，而無及速之文，可證也。俗本據王霸篇誤加及速二字，宋呂錢本無及字而有

速字則刪之未盡者耳。

倜然乃舉太公於州人而用之。

樾謹按州人當從韓詩外傳作舟人。太公身爲漁父而釣於渭濱。故言舟人也。舟州古字通。卿相輔佐人主之基杖也。

樾謹按基杖二字義不可通。基當爲綦。儀禮士喪禮。組綦繫于踵。鄭注曰。綦履係也。所以拘止履也。漢書楊雄傳。履綦槍以爲綦。外戚傳。思君兮履綦。綦也杖也。皆人所以行者。故以爲喻。

然而應薄扞患足以持社稷。

樾謹按薄之言迫也。僖二十三年左傳。薄而觀之。文十二年傳。薄之河。杜注並曰。薄迫也。然則應薄猶應迫也。言有偏迫者足以應之也。臣道篇曰。應卒遇變。卒與薄義相近。

推類接譽。臣道。

樾謹按楊注曰。推其比類。接其聲譽。此未得接譽二字之義也。下句曰。以應無方。接其聲譽。豈遂足以應無方乎。譽當讀爲豫。昭二年左傳。宣子譽之。孟子梁惠王篇。引作豫。梁惠王篇。一游一豫。昭二年注。引作譽。是古字譽與豫通也。大略篇曰。先事慮事謂之接。先患慮患謂之豫。卽此文接譽之義。爪牙之士施則仇讎不作。

樾謹按莊子秋水篇是謂謝施。釋文引司馬注曰：施用也。淮南子原道篇：施之無窮。高誘注亦曰：施用也。爪牙之士施猶曰爪牙之士用。楊注曰：施謂展其材也。訓施爲展而以展其材足成之。迂矣。曉然以至道而無不調和也。

樾謹按然字衍文。當作曉。以至道而無不調和也。言事暴君者當以至道曉之也。楊注曰：曉然明喻之貌。曉然以至道甚爲不詞。蓋楊氏所見已衍然字。以德復君而化之大忠也。

樾謹按韓詩外傳復作覆。當從之。以德覆君謂其德甚大。君德在其覆冒之中。故足以化之。下文曰：若周公之於成王也可謂大忠矣。是大忠之名。非周公不足當也。楊氏不知復與覆通而訓復爲報。謂以德行之事報白於君。然則如次忠之以德調君而補之者豈不以德行報白乎。且但報白而已又何足以化之乎。

故君子安禮樂利謹慎而無鬪怒。

樾謹按樂利當爲和樂。和樂與安禮相對成文。安禮和樂承上禮樂而言。謹慎而無鬪怒承上謹慎鬪怒而言。因和字譌作利。又涉上文謹慎利也。疑利字屬謹慎言。遂移置樂字之下。使安禮樂利謹慎兩句相對而文義俱達矣。

衡聽顯幽重明退姦進良之術致士、

樾謹按楊注曰衡平也。謂不偏聽也。下文云。凡流言流說流事流謀流譽流愬。不官而衡至者。君子慎之。注曰。衡讀爲橫。楊氏於前後兩衡字異訓。殆失之矣。衡聽之衡。亦當讀爲橫。蓋彼以衡至。故亦以衡聽也。古橫衡同字。詩衡門篇。釋文曰。衡古文橫字。是其證也。漢書王莽傳。昔帝堯橫被四表。魏志文帝紀。引獻帝傳曰。廣被四表。是橫廣音近義通。流言之屬。一時而並至。故曰橫至。猶曰大至矣。莫不明通方起。以尙盡矣。

樾謹按楊注曰。尙與上同。上盡謂盡忠於上也。然盡忠於上而曰上盡。甚爲不詞。盡當讀爲進。列子天瑞篇。終進乎不知也。張湛注曰。進當爲盡。是其證也。漢書高帝紀。主進。顏師古注曰。進字本作盡。又作贐。音皆同耳。古字段借。故轉而爲進。然則以盡爲進。猶以進爲贐矣。爾雅釋詁。盡進也。盡從盡聲。則盡亦進也。尙盡猶言上進。忠言忠說忠事忠謀忠譽忠愬。皆願進於上。故曰莫不明通方起以上進矣。楊氏知尙之爲上。而不知盡之爲進。於古人段借之道。未盡得也。

水深則回。葉落糞本。弟子通利則思師。

樾謹按葉落下當有則字。此以上二句喻下一句。若無則字。句法不一律矣。盧校曰。宋本作水深而回。樹落則糞本。今從元刻。其實宋本是也。古書每以而則互用。孟子告子篇。人有雞犬放。則知求之。有放

心而不知求。墨子明鬼篇。非父則母。非兄而姒。史記繆布傳。與楚則漢破。與漢而楚破。皆其證也。宋本上句用而字。下二句用則字。必荀子之原文。乃反不之從。何歟。

延則若莫邪之長刃。嬰之者斷。兌則若莫邪之利鋒。當之者潰。講兵。

樾謹按楊注曰。兌猶聚也。與隊同。謂聚之使短。新序作銳。則若莫邪之利鋒也。盧校曰。延。韓詩外傳作延居。兌作銳居。延讀延表之延。謂衡布。兌讀爲銳。謂直擣。外傳兩居字。與下文圓居一例。可知注未是矣。今按楊訓兌爲聚。不如盧說之長。惟依外傳延居銳居爲說。則非也。延則若莫邪之長刃。兌則若莫邪之利鋒。與上文聚則成卒。散則成列。句法一律。不得有居字。下文云。圓居而方止。此自以圓居方止。相對成義。外傳因圓居之文。改作方居以對之。遂於此文延下銳下。各衍居字。盧氏據以說荀子。誤矣。延之言長也。故若長刃。銳之言利也。故若利鋒。以文義論。亦不當有居字。

故仁人用國日明。

樾謹按楊注曰。日益明察。非也。明之言盛也。淮南子說林篇曰。長而愈明。高注曰。明猶盛也。禮記明堂位正義曰。明堂盛貌。然則明之訓盛。蓋古誼也。國日明。猶言國日盛矣。

負服矢五十个。

樾謹按盧校曰。元刻作負矢。無服字。與漢書同。然服字實不可無。服者箠之段字。說文竹部。箠。箠矢箠。

也。經傳通以服爲之。詩采薇篇。象弭魚服。國語齊語。服無矢。皆是也。負服矢五十個者。盛矢五十個於服而負之也。若但云負矢。則矢無服不可負。若云負矢服。則疑五十個以服計矣。故曰負服矢五十個。古人之辭。所以簡而明也。漢書奪服字。元刻從之。非是。

置戈其上。

樾謹按此承負服矢五十個而言。所謂其上者。矢服之上也。蓋負矢服於背。而荷戈於肩。戈之上半。適在矢服之上。故曰置戈其上也。楊注不解服字之義。故于此句。亦失其解。而曰置戈於身之上。不可通矣。

日中而趨百里。

樾謹按日中者。自旦至於日中。蓋半日而趨百里也。楊注謂一日之中。則但云日趨百里足矣。有遇之者。若以焦熬投石焉。

樾謹按楊注曰。猶以焦熬之物投石也。然以投石爲喻。不必言焦熬之物。注義未安。上文云。以桀詐堯。譬之。若以卵投石。以指撓沸。此文以焦熬投石。疑有奪誤。當云以指焦熬。以卵投石。焦讀爲樵。廣雅釋詁曰。樵。撓也。說文火部。熬。乾煎也。然則以指樵熬。其義猶以指撓沸也。故招近募選。

樾謹按楊注曰近當爲延是也招延二字同義則募選二字亦必同義募乃纂字之誤纂選皆具也說詳王制篇楊注曰募選謂以財召之而選擇可者非是

鞀如金石

樾謹按史記禮書作堅如金石故楊注訓鞀爲堅貌卽引史記爲證然鞀之訓堅貌諸書皆無明文殆非也說文鞀有二其一見革部爲正篆其一見鼓部爲磬篆之古文磬鼓聲也故文選上林賦鏗鎗闐鞀李善注曰鏗鎗鍾聲也闐鞀鼓聲也此文鞀如金石當以聲言不當以貌言謂扣之而其聲鞀然如金石也必以鼓聲相況者鼓是革所爲上云蛟革犀兕以爲甲則亦革所爲也正見其屬辭之密史記作堅自與荀子異不得并爲一談也

而順暴悍勇力之屬爲之化而愿

樾謹按楊注曰順從也謂好從暴悍勇力之人皆化而愿慤也然此句與下二句本一律多一順字則不詞矣而順當作順而順而猶從而也順而暴悍勇力之屬爲之化而愿旁辟曲私之屬爲之化而公矜糾收繚之屬爲之化而調皆承上文所存者神所爲者化而言性惡篇曰順是故爭奪生而辭讓亡焉順是故殘賊生而忠信亡焉順是故淫亂生而禮義文理亡焉諸順字並與此同猶言順是而暴悍勇力之屬皆爲之化焉因順而譌爲而順文義遂不可通或乃疑其有闕文矣

已綦三年，然後民可信也。

樾謹按楊注曰：已，過也。過一綦之後，至於三年，然後新歸之民可信，其義甚爲迂曲，疑非也。荀子書多用綦字作窮極之義，此綦字蓋亦綦字之誤。已綦三年，猶云已極三年也。宥坐篇：綦三年而百姓往矣，可證此文之譌。正論篇：期臭味，注曰：期當爲綦，得之矣。

敵中則奪，繼國、

樾謹按楊注曰：敵人得中道則奪其國，一曰：中，擊也。然此以民情言，不以敵國言。楊注非是。敵當讀爲適。古字通用。論語：里仁爲美，無適也。釋文曰：鄭本作敵。禮記：玉藻篇：敵者不在。釋文曰：敵本作適，並其證也。上文言刼則致畏，羸則敖上，執拘則最，得閒則散，並就其一偏者而言之。此云敵中，謂適乎其中也。旣不用道德之威，而用暴察之威，適乎其中，則反失其所以爲暴察矣。故曰：適中則奪。下文曰：非刼之以形勢，非振之以誅殺，則無以有其下，正承此文而言，足見楊注之非。

楚人則乃有襄賁開陽，以臨吾左。

樾謹按乃疑又字之誤。上已云：巨楚縣吾前，故此云楚人，則又有襄賁開陽以臨吾左。

是一國作謀，則三國必起而乘我。

樾謹按三國乃二國之誤。上文止有楚、燕、魏三國，若依此文，則是四國矣。故知其誤也。



如是則齊必斷而爲四，三國若假城耳。

樾謹按楊注曰：三國分齊，則斷爲四，謂楚取其二，魏燕各取其一也。又曰：言齊如三國之寄城，不久當歸之也。然楚雖當齊之二面，要是一國，不當分爲二。楊注非也。四字疑衍文，當云齊必斷而爲三，其下句則云國若假城耳。言齊之國若假人之城，不久當歸之也。古四字作三，與三字混，疑三譌作三，後人校正作三，傳寫者遂並存四三兩字。楊氏不能是正，以四字屬上讀，三字屬下讀，而兩句俱不可通矣。乃能使說已者使耳。

樾謹按下使字當訓從，爾雅釋詁：使，從也。所謂廣大乎舜禹也。

樾謹按盧校曰：此句或疑當在疆殆中國句下。王氏念孫曰：此汪說也。汪直移此句於上文疆殆中國下，是也。今按上文威彊乎湯武，廣大乎舜禹，相對爲文，是於湯武言威彊，舜禹言廣大。若威動海內，疆殆中國下，接此所謂廣大乎舜禹也，則文義錯雜矣。汪說非也。此所謂句當移在是地徧天下也句下。試以上文例之，上文曰：是乃使讎人役也。此所謂威彊乎湯武也。此文曰：是地徧天下也。此所謂廣大乎舜禹也。文法正相準。威動海內，疆殆中國二句，又承威彊乎湯武句，以起下文。言威彊不言廣大者，舉一以包其一耳。

霸者之善著焉。可以時託也。

樾謹按託乃記字之譌。言霸者之善。所以明著者。以其可以時記也。下文云王者之功。不可勝。日志也。正王者敬日。霸者敬時之意。記志義同。記譌作託。則時託與日志不倫矣。又按不可勝下。據楊注當有數字。王氏讀書雜誌已及之。日志也上。亦當有可以二字。與可以時記也一例。王氏未及。

夫義者內節於人。而外節於萬物者也。

樾謹按節猶適也。呂氏春秋重己篇。故聖人必先適欲。高注曰。適猶節也。然則節亦猶適矣。管子禁藏篇。故聖人之制事也。能節宮室。適車輿。以實藏。是節與適同義。下文曰。上安於主。而下調於民者也。訓節爲適。則與調安相近。楊注曰。節謂限禁也。非是。

# 諸子平議卷十四

## 荀子三

天行有常天論

樾謹按爾雅釋宮行道也。天行有常，卽天道有常。楊注曰：天自有常行之道，則道字反爲增出矣。養略而動罕，則天不能使之全。

樾謹按楊注曰：罕，希也。動罕言怠惰也。然上文云：養備而動時，則天不能病，備與略義正相對。時與罕則不倫矣。罕疑並字之誤。並卽今逆字。說文干部：並，不順也。辵部：逆，迎也。是逆爲送逆字，其順逆字本作並也。養略而動並，正與養備而動時相對成義。

所志於天者

樾謹按禮記緇衣篇曰：爲上可望而知也，爲下可述而志也。鄭注曰：志猶知也。所志於天者，卽所知於天者。下文志於地，志於四時，志於陰陽，並同。此卽承上文知其所爲，知其所不爲而言。楊訓志爲認識，非。

詩曰：何恤人之言兮，此之謂也。

樾謹按何恤上本有禮義之不愆五字。而今奪之。文選答客難篇傳曰。天不爲人之惡寒而輟其冬。地不爲人之惡險而輟其廣。君子不爲小人之句句而易其行。天有常度。地有常形。君子有常行。君子道其常。小人計其功。詩云。禮義之不愆。何恤人之言。李善注曰。皆孫卿子文。是其證也。正名篇引此詩曰。禮義之不愆兮。何恤人之言兮。亦其證也。

楚王後車千乘。非知也。君子啜菽飲水。非愚也。是節然也。

樾謹按節猶適也。說詳彊國篇。是節然也。猶曰是其適然者也。劉氏台拱引正名篇。節遇謂之命釋之。節遇之節。亦當訓適。適與之遇。所謂命也。楊注並非。又大略篇。湯旱而禱曰。政不節與。節亦適也。謂不調適。

故君子敬其在己者。

樾謹按敬當爲苟。說文苟部。苟。自急救也。經典通作亟。爾雅釋詁。亟。疾也。釋文曰。字又作苟。是也。君子苟其在己者。猶云君子急其在己者。正與小人錯其在己者相對成義。學者罕見苟字。因誤爲敬耳。

星隊木鳴。國人皆恐。

樾謹按木不能鳴。或因風而鳴。人亦不恐。而此云然者。蓋古有社鳴之說。文選運命論。里社鳴而聖人出。李善注引春秋潛潭巴曰。里社明。此里有聖人出其响。百姓歸。天辟亡。明與鳴古字通。所謂社鳴者。

社必樹其土所宜木，故古文社從木作禘。社鳴實卽其木鳴也。古人蓋甚畏之，故荀子以星隊木鳴並言也。

水行者表深。

樾謹按：水行當作行水。行水者表深，與下文治民者表道一律。孟子離婁篇：如智者若禹之行水也，此行水二字之證。

故至賢疇四海，湯武是也。正論。

樾謹按：楊注曰：疇，四海謂以四海爲疇域。或曰：疇與籌同，計度也。此二義皆非。是疇者保也。國語：楚語，臣能自壽也。韋注曰：壽，保也。晏子雜篇：賴君之賜，得以壽三族。壽三族卽保三族也。管子霸言篇：國在危亡而能壽者，明聖也。能壽卽能保也。此文作疇者，古字通耳。說文：土部，塿，保也。凡作疇作壽，皆塿之段字。

譬之是猶偃巫跛匡，大自以爲有知也。

樾謹按：大字乃而字之譌，而大篆文相倡，因而致誤。注云：猶巫尪，大自以爲神異，則曲爲之說矣。溝中之瘠也，則未足與及王者之制也。

樾謹按：此文當在東海之樂下。荀子原文：蓋云：語曰：淺不足與測深，愚不足以謀知，坎井之醴，不可與

語東海之樂，溝中之瘠，未足與及王者之制，此之謂也。坎井之蠶，二句所謂淺不足與測深也。溝中之瘠，二句所謂愚不足以謀知也。傳寫誤到在上，又衍兩也字，一則字。

天下有聖而在後者，則天下不離。

樾謹按：後下當有子字。下文云：聖不在後子，而在三公，則天下如歸。楊注曰：後子，嗣子，謂丹朱商均三公宰相，謂舜禹。此說是也。荀子之意，謂傳賢與傳子同。天下有聖而在後子，則傳之子可也。聖不在後子，而在三公，則傳之賢可也。故兩言天下厭然，與鄉無以異也。以堯繼堯，夫又何變之有矣。正見傳賢傳子之不異也。乃自此文奪子字，而其義不顯。楊氏遂疑後三句爲重出矣。

持老養衰，猶有善於是者，與不老者休也。

樾謹按：此當作猶有善與是者，不與不讀爲否。傳寫誤倒，在與下。楊注曰：不老，老也。或曰：衍不字，並非。故作者不祥，學者受其殃，非者有慶。

樾謹按：此謂作世俗之說者不祥，學者從而傳述之，必受其殃，能非而闢之，則有慶也。下文引詩曰：下民之孽，匪降自天，噂沓背憎，職競由人。可見荀子之意，深疾世俗之說，故爲此言。楊注未得其旨，故盜不竊，賊不刺。

樾謹按：楊注曰：盜賊通名，分而言之，則私竊謂之盜，劫殺謂之賊。此蓋以刺爲刺殺之刺，實非然也。漢

書郊祀志。刺六經中作王制。師古注曰。刺。采取之也。又丙吉傳。至公車刺取。注曰。刺。謂探候之也。然則刺者。探取之義。盜不竊。賊不刺。變文以成句耳。非有異義也。

是何也。則求利之詭緩。而犯分之差大也。

樾謹按。楊注曰。詭。詐也。求利詭詐之心。緩也。其義甚迂曲。詭。疑說字之誤。言古者民生富厚。求利之說。在所緩也。詭。說形似致誤。楊注非。

金舌弊口。猶將無益也。

樾謹按。楊注曰。金舌以金爲舌。金舌弊口。以喻不言也。金或讀爲噤。然上文云。今子宋子。不能解人之惡。侮而務說人以勿辱也。豈不過甚矣哉。則金舌弊口。謂說人。非謂不言。楊注非也。此文當作金口弊舌。金讀爲噤。說文口部。噤。口急也。弊。讀爲敝。言雖說之。至於口噤舌敝。猶無益也。戰國策。秦策。舌敝耳聾。此可證敝舌之義。今作金舌弊口。義不可通。據楊注引法言。金口而木舌。又似本作金口者。豈爲後人改竄故歟。

將恐得傷其體也。

樾謹按。得字無義。疑復字之誤。復者反也。猶曰。將恐反傷其體也。言子宋子之說。非徒無益於人。或反以傷其體耳。

祭齊大羹而飽庶羞禮論

槪謹按楊注曰齊讀爲濟此因大戴記而誤也齊當爲濟禮記樂記篇鄭注曰齊讀爲濟是也文二年左傳濟僖公杜注曰濟升也然則濟大羹者升大羹也正與上文尙玄尊先黍稷一律下文云豆之先大羹也是其義也大戴記禮三本篇作濟疑卽濟之壞字史記禮書濟下有先字疑史公原文作先大羹後人因大戴之文妄增濟字耳

利爵之不醺也

槪謹按楊注曰醺盡也謂祭祀畢告利成利成之時其爵不卒奠于筵前也此說殊未盡其義利者謂佐食也利爵不醺蓋據大夫饋尸之禮有司徹篇利洗爵獻于尸尸酢獻祝祝受祭酒啐酒奠之是其事也利既獻尸尸卒爵酢利利又獻祝祝受奠之不卒示祭事畢也說詳羣經平議

大昏之未發齊也

槪謹按齊當讀爲醺發猶致也昏禮父親醺子而命之迎未發醺者未致醺也亦詳羣經平議大路之素未集也

槪謹按楊注曰未集不集丹漆也則但言素而其義已足矣不必言未集且未集二字義亦未足楊注非也未字當爲本末之末素未是一事素集是一事蓋一本作末一本作集傳寫誤合之而因改未爲



未以曲成其義。非荀子原文也。末者辟之段字。上文絲末。楊注曰。末與辟同。禮記曰。君羔辟虎犢。鄭云。覆苓也。然則大路之素末。亦卽素辟耳。大戴記禮三本篇作素幘。幘與辟同。荀子作末之本。與大戴合。集者幘之段字。集音轉而爲就。詩小旻篇。是用不集。韓詩作是用不就。是也。故得讀爲幘。爾雅釋訓。幘謂之帳。釋文曰。幘本或作幘。是幘字或從周聲。山海經中山經。暴山其獸多麋鹿。麋就。郭注曰。就。雕也。然則以就爲幘。猶以就爲雕矣。史記禮書正作素幘。荀子作就之本。與史記合。

### 本末相順

樾謹按。順讀爲巡。禮記祭義篇。終始相巡。此云本末相巡。其義正同。順巡並從川聲。故得段用。文理情用。相爲內外表裏。並行而雜。

樾謹按。雜讀爲市。古雜與市通。呂氏春秋園道篇。園周復雜。注曰。雜猶市也。淮南子詮言篇。以數雜之。壽憂天下之亂。注曰。雜。市也。人生子。從子至亥爲一市。然則並行而雜。言並行而周市也。楊注曰。情文代勝。並行相雜。猶未達段借之指。

絀續聽息之時。則夫忠臣孝子。亦知其閔已。

樾謹按。楊注曰。言此時知其必至於憂閔也。文義迂曲。殆非也。爾雅釋詁。閔。病也。詩柏舟篇。覯閔既多。鴟鴞篇。鸛子之閔斯。毛傳並曰。閔。病也。亦知其閔已。猶言亦知其病已。病謂疾甚也。儀禮既夕記注曰。

疾甚曰病。

一朝而喪其嚴親。

樾謹按禮記大傳篇收族故宗廟嚴鄭注曰嚴猶尊也嚴親即尊親嚴謂君親謂父母。

芻豢稻粱酒醴餽鬻魚肉菽藿酒漿。

樾謹按酒漿當爲水漿王氏念孫謂涉上酒醴而誤是也魚肉二字當在餽鬻二字之上蓋芻豢稻粱酒醴魚肉屬吉餽鬻菽藿水漿屬凶方與上下文一律今魚肉字誤倒在餽鬻下則吉凶不倫矣楊注曰餽鬻菽藿喪者之食疑楊氏所見本尙未倒故以餽鬻菽藿連文也當據以訂正。

故如死如生如存如亡終始一也。

樾謹按如死如生如存如亡義不可通當作事死如生事亡如存上兩如字誤也篇末云哀夫敬夫事死如事生事亡如事存可知此文之譌當據以訂正。

棺槨其額象版蓋斯象拂也。

樾謹按板者車輶也漢書景帝紀令長吏二千石車朱兩輶千石至六百石朱左輶應劭曰車耳反出所以爲之藩屏翳塵泥也廣雅釋器曰輶謂之輶版與輶通楊注說版字未了又云斯未詳象衍字象旣爲衍字則斯拂連文楊云拂卽蒨也然則斯與拂必同類之物爾雅釋器云輿革前謂之輶後謂

之弗。報字從艮聲。與斤聲相近。故垠從艮聲。或體作圻。從斤聲。是其例也。斯疑靳字之誤。靳之本義爲當膺。而古或借爲報。廣雅釋器。弼輶謂之靳。王氏疏證。亦云未詳。不知弼輶之靳。卽輿革前謂之報也。惟其在前。故繫於輶也。此以版蓋靳拂並言。版卽輶也。在車旁。蓋者車蓋也。在車上。靳在前。拂在後。其所說至爲詳備矣。靳字本當作輶。而借用靳。亦猶齒本字本當作斷。而太元密次八。琢齒依齲。則借用齲。齲者齧也。非齒本也。艮斤聲近。故字得通耳。乃靳又誤作斯。則其義遂不可見矣。

其銘誄繫世。敬傳其名也。

樾謹按周官小史職曰。奠世繫。辨昭穆。鄭司農云。繫世謂帝繫。世本之屬。是也。以帝繫解繫字。世本解世字。則繫也。世也。自是二事。與銘誄相對。楊注未得。

彼君子者。固有爲民父母之說焉。

樾謹按子字衍文也。此本說君之喪。所以三年之故。故引詩而釋之曰。彼君者。固有爲民父母之說焉。下文云。父能生之。不能養之。母能食之。不能教誨之。君者。已能食之矣。又善教誨之者也。下言君者。則此文亦當作君者。涉上愷悌君子之文而衍子字耳。

毋利舉爵。

樾謹按特牲饋食禮。主人主婦賓長三獻之後。長兄弟衆賓長。又行加爵之禮。然後利洗散獻于尸。鄭

注謂以利待尸。禮將終。宜一進酒。然則利之獻尸。非祭之正。故以祭禮將終。始行之也。此云毋利舉爵。蓋以主人爲重。猶言不使利代舉爵耳。故下云主人有尊。如或觴之。楊注曰。當云無舉利爵。卽上文云利爵之不醮也。如此則與下意不貫矣。

帶甲嬰韜。歌於行伍。使人心傷。樂論。

樾謹按。歌於行伍。何以使人心傷。義不可通。傷當爲惕。荀子書多用惕字。脩身篇曰。加惕悍而不順。注引韓侍郎云。惕與蕩同字。作心邊易。謂放蕩兇悍也。又榮辱篇曰。惕悍僇暴。注亦云。惕與蕩同。歌於行伍。則使人心傷。爲之動蕩。故曰使人心惕。惕傷形似。因致譌耳。

君子明樂。乃其德也。亂世惡善。不此聽也。

樾謹按。自窮本極變樂之情也。至弟子勉學。無所營也。十八句皆有韻之文。獨德字不入韻。當必有誤。荀子原文。疑作乃斯聽也。斯與此文異義。同乃斯聽也。與不此聽也。反復相明。古人用韻。不避重複。如采芾首章。連用二獫狁之故句。正月一章。連用二自口字。十月之交首章。連用二而微字。車螯三章。連用二庶幾字。文王有聲首章。連用二有聲字。召旻卒章。連用二百里字。並其例也。後人以兩句不得疊用聽字。因改上句爲乃其德也。不特於韻不諧。而亦失其義矣。

埧簾翁博

樾謹按翁當爲滂。文選江賦曰：氣滂渤以霧杳。翁博猶滂渤也。博與渤亦一聲之轉。琴婦好。

樾謹按賦篇蠶賦曰：此夫身女好而頭馬首者與。注云：女好柔婉也。婦好當與女好同。亦柔婉之意。

兩疑則惑矣。解蔽

樾謹按兩讀如兩政之兩。桓十八年左傳：並后匹嫡。兩政耦國。是兩與匹耦義同。疑讀如疑妻疑適之疑。管子君臣篇內有疑妻之妾。此宮亂也。庶有疑適之子。此家亂也。朝有疑相之臣。此國亂也。字亦作擬。韓子說疑篇：孽有擬適之子。配有擬妻之妾。廷有擬相之臣。臣有擬主之寵。此四者國之所危也。意與管子同。天下之道一而已矣。有與之相敵者是爲兩。有與之相亂者是爲疑。兩焉疑焉。惑從此起。故曰兩疑則惑矣。楊注曰：兩疑謂不知一於正道。而疑蔽者爲是。若然。則疑卽惑也。於義複矣。又曰：一本作兩則疑惑矣。此不得其解而誤乙其文也。

心不使焉。則白黑在前。而目不見。雷鼓在側。而耳不聞。況於使者乎。

樾謹按下使字乃蔽字之誤。白黑之形。雷鼓之聲。尙且不見不聞。況於蔽者乎。此承上文蔽於一曲而言。下文欲爲蔽惡爲蔽諸句。又承此而極言之。故篇名解蔽也。因涉心不使焉句而誤作使。旣云心不使焉。又云況於使者乎。文不可通。楊曲爲之說。非是。

故爲蔽。

樾謹按宋呂夏卿錢佃本並如是。故猶胡也。墨子尙賢中篇。故不察尙賢爲政之本也。下文作胡不察尙賢爲政之本也。是故與胡同。管子侈靡篇。公將有行。故不送公。亦以故爲胡。故爲蔽。猶云胡爲蔽。胡之言何也。乃設爲問辭。下文欲爲蔽惡爲蔽云云。乃歷數以應之也。元刻涉注文而誤作數爲蔽。盧氏從之。非。

昔賓孟之蔽者。亂家是也。

樾謹按楊注曰。賓孟。周景王之佞臣。欲立王子朝者。亂家謂亂周之家事。使庶孽爭位也。此注殊誤。下文歷數墨子諸人之蔽。全與賓孟無涉。此二語上無所承。下無所應。殊爲不倫。據上文云。昔人君之蔽者。夏桀殷紂是也。下乃極言唐軼奚齊之蔽。而終以成湯文王之不蔽者。明不蔽之福。又云。昔人臣之蔽者。唐軼奚齊是也。下乃極言唐軼奚齊之蔽。而終以鮑叔寧戚諸人之不蔽者。明不蔽之福。此文云。昔賓孟之蔽者。亂家是也。下乃歷舉墨子諸人之蔽。而終以孔子之不蔽者。明不蔽之福。三段相對成文。則賓孟之蔽句。正與上文人君之蔽。人臣之蔽相對。所云賓孟。殆非周之賓孟。且非人名也。孟當讀爲萌。孟與明古音相近。故孟可爲萌。猶孟豬之爲明都。孟津之爲盟津也。呂氏春秋高義篇。載墨子之言曰。若越王聽吾言。用吾道。翟度身而衣。量腹而食。比於賓萌。未敢求仕。高注曰。賓。客也。萌。民也。所謂賓萌。

者。蓋當時有此稱。戰國時。遊士往來諸侯之國。謂之賓萌。若下文墨子。宋子。慎子。申子。惠子。莊子。皆其人矣。然則上言人君之蔽。人臣之蔽。此言賓萌之蔽。文正相對。人君之蔽。人臣之蔽。止舉兩人。故可曰夏桀殷紂是也。唐鞅奚齊是也。賓萌之蔽。則所舉人多。不可并列。故曰亂家是也。亂家包下文諸子而言。上文云亂國之君。亂家之人。又曰亂國之君非之上。亂家之人非之下。此亂家二字之證也。賓萌之稱。佗書罕見。而字又段孟爲萌。適與周賓孟之名同。其義益晦矣。

宋子蔽於欲而不知得。

樾謹按古得德字通用。周易上九。君子得輿。釋文曰。得京作德。論語泰伯篇。民無得而稱焉。季氏篇。戒之在得。釋文並云。得本作德。是其證也。蔽於欲而不知德。正與下句慎子蔽於法而不知賢一律。注謂不知得欲之道。失之。

以其不可道之心取人。則必合於不道人。而不知合於道人。

樾謹按知字衍文也。下文云。以其可道之心取人。則合於道人。而不合於不道人。正與此文相對。彼云不合。而不云不知合。則此文亦無知字明矣。

夫何以知。

樾謹按楊注曰。問何道以知道人也。此注甚誤。夫何以知。與下文何患不知相對。蓋言心不知道。則將

與不道人論道人必至妬賢善矣。夫何以知。心知道則與道人論非道必能懲姦去惡矣。何患不知。此兩知字與知道之知不同。當讀爲智。夫何以知。猶言夫何能智也。楊注以爲問辭失之甚矣。曰心知道然後可道。

樾謹按曰字衍文也。心知道然後可道。與上文心不知道則不可道而可非道相對成文。皆承故心不可以不知道而言。因上句夫何以知。楊注誤以爲問辭。後人遂以此數句爲答辭。妄加曰字矣。有人也不能此三技而可使治三官。曰精於道者也。精於物者也。

樾謹按精於物上疑當有非字。言此人不能三技而可治三官者。精於道。非精於物也。精於物。若農精於田。賈精於市。工精於器是也。精於道則君子是也。下文云。精於物者以物物。精於道者兼物物。故君子一於道而以贊稽物。可證其義。今本奪非字。則精於道者也。精於物者也。兩語平列。而其義違矣。其爲人也。善射以好思。

樾謹按楊注曰。清靜思其射之妙。然凡射者必心手相得。方可求中。非徒思之而已。且其下文曰。耳目之欲接。則敗其思。蚊蚋之聲聞。則挫其精。無一字及射。然則楊注非也。此射字乃射策射覆之射。漢書藝文志。善龜家。有隨曲射匿五十卷。射匿疑卽射覆。覆而匿之人所不知。以意縣揣而期其中。此射之義也。呂氏春秋重言篇。載成公賈說荊莊王曰。有鳥止于南方之阜。三年不動。不飛不鳴。是何鳥也。王



射之曰。有鳥止於南方之阜。其三年不動。將以定志意也。其不飛。將以長羽翼也。其不鳴。將以覽民則也。然則古人設爲度辭隱語。而使人意度之。皆謂之射。此云善射以好思。卽謂此也。非真援弓而射之也。

### 故濁明外景。清明內景。

樾謹按。大戴記曾子天圓篇。參嘗聞之。夫子曰。天道曰圓。地道曰方。方曰幽而圓曰明。明者吐氣者也。是故外景。幽者含氣者也。是故內景。故火曰外景。而金水內景。荀子濁明外景。清明內景之說。卽孔子之緒言也。楊注所說。未盡其旨。

### 見植林以爲後人也。

樾謹按。上文見寢石以爲伏虎也。伏與寢義相應。此云後人。則與植林不相應矣。植林豈必在後乎。疑荀子原文本作立人。立與植正相應。下文曰。俯見其影。以爲伏鬼也。印視其髮。以爲立魅也。亦以伏立對文。可證也。今作後人者。疑涉上文誤立爲伏。又誤伏爲後耳。

### 而無所疑止之。

樾謹按。詩桑柔篇。靡所止疑。傳曰。疑。定也。疑。訓定。故與止同義。此云疑止。猶詩云止疑。荀子傳詩。故用詩義耳。楊注云。疑或爲凝。非是。

其所以貫理焉。雖億萬已不足以泱萬物之變。

樾謹按已猶終也。言終不足以泱萬物之變也。詩葛藟篇終遠兄弟。傳曰已相遠矣。箋云今已遠棄族親。是傳箋並訓終爲已。僖二十四年左傳婦怨無終。杜注曰終猶已也。故已亦猶終也。

案彊鉗而利口。

樾謹按太元元瑩篇。箝知休咎。范望注曰箝求也。鬼谷子有飛箝篇。其文曰以飛箝之辭鉤其所好以箝求之。此范望注所本。鉗猶箝也。彊鉗謂彊求也。楊注以鉗入口釋之。非是。

憂戚之無益於幾也。

樾謹按幾者事之微也。無益於幾卽無益於事。憂戚之而仍於事無益。則爲君子所不取矣。楊注謂憂戚亦不能近道。是訓幾爲近。又增出道字。非其旨也。

正利而爲謂之事。正義而爲謂之行。正名。

樾謹按廣韻正。正當也。正利而爲正義而爲。猶文四年左傳曰當官而行也。楊注以正道釋之。非是。聲音清濁調竿奇聲以耳異。

樾謹按楊注曰調竿謂調和笙竿之聲也。然笙竿之聲而獨言竿。義不可通。楊又引或說謂竿八音之首。曲說也。調竿疑當爲調笑字之誤也。孟子告子篇曰則已談笑而道之。調笑與談笑文異而誼同。

玉篇廣韻並曰談戲調也。蓋談與調一聲之轉耳。笑字形似因而致誤。楊注非也。然而徵知必將待天官之當簿其類然後可也。

樾謹按楊注曰天官耳目也。疑此文及注並有奪誤。上文云然則何緣而以同異曰。緣天官注曰天官耳目鼻口心體也。是天官本兼此六者而言。此何以獨言耳目乎。疑天官乃五官之誤。上云心有徵知。此當云然而徵知必將待五官之當簿其類。注當云五官耳目鼻口體也。所以不數心者。徵知卽心也。下文云五官簿之而不知心徵之而無說。卽承此文而言。可知天官爲五官之譌。因五官譌爲天官。而注又有闕文遂不可讀。

有時而欲徧舉之。故謂之鳥獸。鳥獸也者大別名也。

樾謹按上文云故萬物雖衆有時而欲徧舉之。故謂之物。物也者大其名也。既有大共大別之不同。而上云徧舉之。此亦云徧舉之不可通矣。疑此徧字乃徧字之誤。上云徧舉之乃普徧之義。故曰大共名也。此云徧舉之乃一徧之義。故曰大別名也。徧與徧形似因而致誤。

說不行則白道而冥窮。

樾謹按楊注曰白道明道也。冥幽隱也。冥窮謂遯而窮處也。其說冥窮之義甚爲迂曲。窮當讀爲躬。白道而冥躬者明白其道而幽隱其身也。古窮與躬通用。論語鄉黨篇鞠躬如也。儀禮聘禮鄭注作鞠躬。

是其證矣。

吐而不奪，利而不流。

樾謹按楊注曰：吐而不奪，謂吐論而人不能奪，此說非也。吐當爲咄，形似而誤。從土從出之字，隸書每互相亂。若敷從出，而今譌作敷；𠂔從出，而今譌作𠂔。是也。咄者，咄之段字，從口從言之字，古或相通。若詠之爲咏，諧之爲諧，吟之爲吟，嘖之爲讀，是也。咄而不奪，利而不流，二句相對，言雖困咄而不可刼奪。雖通利而不至流蕩也。上文於聖人之辨，說曰：說行則天下正，說不行則白道而冥躬。此於士君子之辨，說曰：咄而不奪，利而不流，咄謂說不行，利謂說行，其文正相配也。

欲不待可得而求者，從所可。

樾謹按待字衍文也。當作欲不可得而求者，從所可。楊注曰：凡人之情欲，雖未可得以有欲之意，及至求之時，則從其所可得也。注不釋待字，故知爲衍文矣。

欲不待可得，所受乎天也。求者從所可，受乎心也。

樾謹按待字亦衍文也。受乎心也，上當有所字。所受乎心，與所受乎天，正相對。下文亦以所受乎天，所受乎心並言，則此文有所字明矣。當據補。

所受乎天之一欲，制於所受乎心之多，固難類所受乎天也。

樾謹按楊注曰。此一節未詳。或曰。當爲所受乎天之一欲。制於所受乎心之計。其餘皆衍字也。一欲。大凡人之情欲也。言所受乎天之大欲。皆制節於所受心之計度。今按或說甚晦。義不可通。此文當云。所受乎天之一。所受乎心之多。固難類也。所受乎天。所受乎心。卽承上文而言。一與多正相對。所受乎天之一。言天之與人有定也。所受乎心之多。言人之心無窮也。固難類也。猶言固不可同耳。

輕煖平簟。

樾謹按平乃席名。故與簟並言。說文艸部。蒻。蒲子可以爲平席。釋名釋牀帳曰。蒲平。以蒲作之。其體平也。並可爲證。

乘軒戴綬。其與無足無以異。

樾謹按無足謂刑者也。乘軒戴綬而行。榮之至矣。然實與無足者之矜卓而行。無以異也。無足與乘軒相應。盧曰。無足當謂貧人之本不足者。未得其義。



## 諸子平議卷十五

### 荀子四

合於犯分亂理而歸於暴性惡

樾謹按犯分當作犯文。此本以文理相對。上文曰：順是故淫亂生而禮義文理亡焉。下文曰：合於文理而歸於治，並其證也。合於犯文亂理，與合於文理正相對成義。今作犯分，則與下文不合矣。當由後人習聞犯分，罕聞犯文，而誤改之耳。

今人飢見長而不敢先食者，將有所讓也。

樾謹按注不釋長字，蓋以爲尊長也。然下文云：勞而不敢求息者，將有所代也。無爲尊長任勞之文，則此句長字亦非謂尊長也。長讀爲稯，爾雅釋言：稯，糧也。詩崧高篇：以峙其稯。鄭箋曰：稯，糧也。見稯而不敢先食，與下文勞而不敢求息，意正相配。若作見長，則轉與下意不倫矣。

故聖人之所以同於衆，其不異於衆者性也。

樾謹按同於衆，卽不異於衆也。於文複矣。據下文云：所以異而過衆者僞也。疑此文亦當作所以同於衆而不過於衆者性也。而譌作其過譌作異，而詞意俱不可通矣。

若是則兄弟相拂奪矣。

樾謹按楊注曰拂達戾也。或曰拂字從木旁弗擊也。達戾之訓既得之矣。讀拂爲拂義轉迂曲。說文拂過擊也。拂自可訓擊。何必改爲拂乎。拂者農器也。施之於此。非所安矣。又按說文色部艱慍怒色也。此拂字疑艱之段音。言兄弟必艱然爭奪也。

衆者暴寡而譁之。

樾謹按楊注曰衆者陵暴於寡而誼譁之。然上文云彊者害弱而奪之。譁與奪義不倫矣。禮記曲禮篇爲國君華之。鄭注曰華中裂之。此文譁字當讀爲華而從中裂之訓。陵暴於寡而分裂之。與害弱而奪之者無異也。

不然。今塗之人者。皆內可以知父子之義。外可以知君臣之正。

樾謹按不然二字當在今字之下。今不然三字爲句。上文云。今不然人之性惡。是其例也。

若佚之以繩。

樾謹按楊注曰佚猶引也。然佚無引義。恐不可從。佚當讀爲秩。秩之言次也。序也。僖三十一年公羊傳天子秩而祭之。何休注曰秩者隨其大小尊卑高下所宜。故字亦通作程。尙書堯典平秩東作。平秩南訛。平秩西成。史記五帝本紀秩皆作程。段氏玉裁以說文載趨字皆讀若詩秩秩大猷爲證。是程與秩



聲義俱相近。秩之以繩，猶程之以繩也。致仕篇曰：程者物之準也。是其義也。

其舉事多悔。

樾謹按：多悔，義不可通。盧從元刻作悔，是也。詩生民篇：庶無罪悔。鄭箋曰：無有罪過，是過謂之悔也。襄二十九年公羊傳：尙速有悔於予身。何休解詁曰：悔咎，是咎謂之悔也。多悔猶云多過多咎耳。其本字當作悔。悔乃段借字。詩十月之交篇：亦孔之瘳。釋文曰：瘳本作悔。

上不循於亂世之君，下不俗於亂世之民。

樾謹按：楊注曰：循，順從也。俗，謂從其俗也。然以從其俗爲俗，義不可通。俗乃鉛字之誤。荀子書屢用鉛字。榮辱篇曰：鉛之重之。又曰：反鉛察之，而愈可好也。禮論篇曰：則必反鉛過故鄉。注並曰：鉛與沿同。循也是鉛循同。上不循於亂世之君，下不鉛於亂世之民。兩句一律。鉛俗字形相似，傳寫者因而致誤耳。

莫敢犯大上之禁。君子。

樾謹按：楊注曰：大讀爲太。太上至尊之號，其說非也。此當作莫敢犯上之大禁，傳寫到之耳。下文云：皆知夫犯上之禁，不可以爲安也，不言犯大上之禁，可知此文之誤矣。

故莫不服罪而請。

樾謹按楊注謂自請刑戮非也。請當讀爲情。成相篇明其請。注曰。請當爲情。禮論篇情文俱盡。史記禮書情作請。徐廣曰。古情字或段借作請。是其證也。情實也。莫不服罪而情猶莫不服罪而實也。言服罪而不敢虛誕也。論語所謂則民莫敢不用情也。楊注以本字釋之。誤矣。成相篇曰。下不欺上。皆以情言。明若日。卽此情字之義。

政令致明而化易如神。

樾謹按易當讀爲施。詩皇矣篇施于孫子。鄭箋曰。施猶易也。故施易二字古通用。何人斯篇我心易也。釋文曰。易。韓詩作施。是其證也。化易如神者。化施如神也。正與上句威行如流一律。論知所貴。則知所養矣。事知所利。則動知所出矣。

樾謹按四句相對成文。下句不應多動字。注亦不及動字之誼。則動字衍文也。忠者敦愼此者也。

樾謹按楊注曰。愼讀爲順。人臣能厚順此五者。則爲忠也。然厚與順誼不倫。其說非是。敦愼當作敦慕。儒效篇曰。敦慕焉君子也。王氏引之曰。敦慕皆勉也。爾雅曰。敦。勉也。又曰。愼。勉也。釋文。愼亦作慕。是敦慕並爲勉。此文疑本作忠者敦愼此者也。敦愼與敦慕文異而義同。言人臣能勉此。則爲忠也。說文心部。愼。勉也。是愼其本字。慕其段字。此用本字作愼。因譌爲愼矣。

請成相成相、

樾謹按楊解篇名引或曰成功在相故作成相三章。盧云成相之義非謂成功在相也。禮記治亂以相。相乃樂器。所謂春牘又古者瞽必有相。審此篇章節。卽後世彈詞之祖。篇首稱如瞽無相何。僂義已明矣。首句請成相。言請奏此曲也。漢藝文志成相雜辭十一篇。惜不傳。大約託於瞽矇諷誦之詞。亦古詩之流。今按盧說是也。惟引治亂以相及瞽必有相以釋相字。則皆失之。樂器多矣。何獨舉春牘爲言。旣以爲樂器。又以爲瞽必有相。義又兩歧矣。此相字卽春不相之相。禮記曲禮篇鄰有喪。春不相。鄭注曰。相謂送杵聲。蓋古人於勞役之事。必爲歌謳以相勸勉。亦舉大木者呼邪許之比。其樂曲卽謂之相。請成相者。請成此曲也。漢志有成相雜辭。足徵古有此體。王氏引之。必以盧說爲謬。何也。

請布基慎聖人

樾謹按人字不入韻。疑有誤。當作慎聽之。聖與聽音近而譌。尙書無逸篇此厥不聽。漢石經作不聖。秦泰山碑皇帝躬聽。史記作躬聖。並其證也。聽譌作聖。則聖之二字不成義。後人因改爲聖人矣。請布基慎聽之。欲人慎聽其言。下文云。請牧基賢者思。欲賢者思其言。義正同也。慎聽之三字。本禮記仲尼燕居篇。

尊主安國尙賢義

樾謹按義讀爲儀。儀亦賢也。尙書大誥篇民獻有十夫。枚傳訓獻爲賢。大傳作民儀有十夫。廣雅釋言曰儀賢也。尙賢儀言崇尙賢者也。作義者古字通用。

武王善之。封之於宋。立其祖。

樾謹按楊注曰立其祖使祭祀不絕也。左傳曰宋祖帝乙。此說未得祖字之義。說文示部祖始廟也。蓋祖之本義爲廟。故尙書甘誓曰用命賞于祖。弗用命戮于社。考工記匠人曰左祖右社。並以祖社對文。猶言廟社也。鄭康成注考工記曰祖宗廟得其義矣。封之於宋立其祖言封之於宋而立其宗廟也。今人但知有爾雅祖王父也之訓。而說文祖始廟也之訓。遂爲所奪。古誼之湮久矣。

讒人罔極。險陂傾側。此之疑。

樾謹按爾雅釋言疑戾也。郭注曰戾止也。疑者亦止。儀禮鄉射禮賓升西階上疑立。鄭注曰疑止也。是疑有止義。其字蓋𣦵之假借。說文匕部𣦵定也。定故爲止。今說文譌作未定而疑之訓止。遂不可曉矣。讒人罔極。險陂傾側。此之疑。承上文堯在萬世如見之而言。此之疑者。此之止也。言堯明見萬世。雖險陂傾側之徒。莫不由此而止也。楊注言當疑此讒人陂險。則與上意不貫矣。

身讓卞。隋舉牟光。

樾謹按舉當讀爲與。古舉與字通。周官師氏職曰王舉則從。鄭注曰故書舉爲與。史記呂后紀蒼天舉

直。徐廣曰。舉一作與。是其證也。此文本云。身讓卞隋與牟光。作舉者。段字耳。中不上達。

樾謹按中當讀爲忠。言忠誠之士。不能上達也。古中忠通用。漢張遷碑。中饗於朝。魏橫海將軍呂君碑。君以中勇。並段中爲忠。國語周語曰。考中度衷爲忠。蓋中衷忠三字。義並通耳。

孰公長父之難。厲王流于麇。

樾謹按楊注曰。孰或爲郭。盧曰。古郭號字通。郭公長父。卽呂氏春秋當染篇之號公長父。作郭爲是。之難二字。當屬下爲七字句。王氏念孫曰。之是也。言難厲王者。是此人也。今按之難厲王流于麇。七字爲句。義終未安。此篇之例。雖以兩三字句。一七字句。一四字句。一七字句。爲一節。然古人之文。變動不居。如云治之道。美不老。君子由之。倭以好。下以教。誨子弟。上以事祖考。此節詞意明白。無奪文譌字。其弟四句六字。其弟七句五字。豈能以子弟二字屬下爲七字句乎。然則此文以郭公長父之難六字爲句。厲王流于麇五字爲句。於義較安。不必拘泥字數。轉致不通也。

欲衷對。言不從。

樾謹按此篇之例。首句必入韻。而此句對字。與下文從凶。江不協。王氏念孫因改欲衷對爲欲剖衷。此臆說也。對字實不誤。但當在衷字上。對讀爲遂。爾雅釋言。對。遂也。詩皇矣篇。以對于天下。江漢篇。對揚

王休蕩篇流言以對。毛傳並曰對遂也。又禮記祭義篇對揚以辟之。鄭注亦曰對遂也。蓋對遂音近。以聲相訓耳。欲對衷者欲遂衷也。言欲遂其衷忱而無如言之不從也。今本作欲衷對者。因淺人不知對之爲遂。而疑對衷二字無義。因到其文。楊氏卽據以爲說曰。欲誠意以對失之矣。

君法儀禁不爲

樾謹按楊注曰。爲君之法儀。在自禁止不爲惡。然禁不爲惡。而止曰禁不爲。則辭不達矣。注義非也。君法儀之儀。當讀爲俄。說文人部。俄行頃也。詩賓之初筵篇。側弁之俄。鄭箋曰。俄。頃貌。廣雅釋詁曰。俄。袤也。是俄有頃邪之義。管子書或段義爲之。明法解曰。雖有大義。主無從知之。故明法曰。俊衆譽多。外內朋黨。雖有大姦。其蔽主多矣。以大姦爲大義。是其證也。義儀古通用。義可爲俄。故儀亦可爲俄。君法儀。與上文君法明相對。上云君法明。論有常。此云君法儀。禁不爲。言君法明盛。則其論有常。君法傾邪。則當禁之。使不爲也。蓋此皆蒙上文臣下職而言。所陳皆臣道也。楊注因上文君論有五約以明之。句妄舉五節以當之。而以君法明爲其一。所舉又不相連屬。更有佗文以閒之。殆不足據也。

請牧祺明有基

樾謹按上文云。請牧基。賢者思此文。亦當作請牧基明有祺。傳寫者誤到基祺兩字耳。楊注曰。請牧治吉祥之事。在明其所有之基業也。則所見本已倒矣。

潛潛淑淑賦

樾謹按楊注曰。潛潛思慮昏亂也。淑淑未詳。或曰美也。然淑淑訓美。則與潛潛不倫矣。淑當讀爲跼。文選長笛賦。跼跼攢仄。注曰。跼跼迫蹙兒。海賦。葩萼跼跼。注曰。跼跼蹙聚也。跼跼之誼。亦猶是耳。

印印兮天下之咸蹇也。

樾謹按楊注曰。雲高而不雨。則天下皆蹇難也。此注非是。蹇當讀爲撻。方言。撻取也。雲行雨施。澤被天下。天下皆有取也。故曰印印兮天下之咸撻也。下文德厚而不捐。卽承此而言。若如楊注。則與下意不貫矣。

冬伏而夏游。

樾謹按下文云。食桑而吐絲。前亂而後治。此文游字。獨不入韻。疑滋字之誤。呂氏春秋明理篇曰。草木庫小不滋。注曰。滋亦長也。冬伏而夏滋。言冬伏而夏長也。楊以化而出釋游字。誼亦迂曲。非獨於韻不協也。

喜溼而惡雨。

樾謹按注曰。溼謂浴其種。既生之後。則惡雨也。其說甚得荀子之意。蓋此句與上文夏生而惡暑相對。生於夏。宜不惡暑矣。而蠶則惡暑。其種必浴。有似喜溼者。宜不惡雨矣。而蠶則惡雨。此兩而字。正明其

性之異也。太平御覽資產部引作疾溼而惡雨。蓋後人疑蠶性惡溼，不得言喜溼，故妄改之。言疾溼又言惡雨，辭複而意淺，非荀子原文也。王氏念孫反據御覽以訂正荀子，誤矣。

簪以爲父。

樾謹按簪當爲鑕。禮記喪大記用雜金鑕。正義曰：鑕，釘也。釘與簪形質皆同，磨之琢之，而後成簪。方其未成簪之時，則簪亦一鑕而已矣。故曰鑕以爲父。作簪者，段字耳。若是首簪之簪，則與簪全不相涉。楊注謂言此者，欲狀其形失之迂矣。盧氏謂簪當爲鑕，所以琢簪之線孔者也。簪賴以成形，故曰爲父。此尤曲說。簪所賴以成形者，豈特一鑕之功乎？王氏載之讀書雜誌，誤矣。

聖人其手時幾將矣。

樾謹按楊注曰：將，送也。去也。言戰國之時，世事已去，不可復治也。如此則與上意不貫。上文曰：千歲必反，古之常也。弟子勉學，天不忘也。是荀子之意，謂亂極必反，非謂世事已去，不可復治也。此二句乃望之之辭，言聖人於此亦拱手而待之耳。所謂千歲必反者，此時殆將然矣。楊注非。

念彼遠方，何其塞矣。

樾謹按楊注曰：遠方，猶大道也。然以遠方爲大道，其義未安。此章蓋亦遺春申君者。下文仁人絀約，暴人衍矣。諸句其意實譏楚也，不敢斥言楚國，故姑託遠方言之。若謂彼遠方之國有如此耳，此荀卿之



危行言孫也。

不敬交。大略、

樾謹按上句不時宜注曰時謂得時宜謂合宜是二字平列下句不驢欣亦二字平列則此文不敬交疑不敬文之誤勸學篇曰禮之敬文也注曰禮有周旋揖讓之敬車服等級之文也禮論篇曰事生不忠厚不敬文謂之野送死不忠厚不敬文謂之瘠注曰敬文恭敬有文飾是荀子書屢言敬文性惡篇曰不如齊魯之孝具敬父者何也注曰敬父當爲敬文此敬文誤爲敬父猶彼敬文誤爲敬父楊氏於此無注其所據本必未誤敬文二字本書屢見故不說也

舜曰維子從欲而治

樾謹按此卽所謂不思而得不勉而中從容中道聖人也孔子七十而從心所欲不踰矩可釋此文從欲之義故下文曰禮之生爲賢人以下至庶民也非爲成聖也楊氏誤據古文尙書爲說乃曰引之以喻禮能成聖亦猶舜賴皋陶也失之矣

奉妒昧者謂之交謫

樾謹按交讀爲狡禮記樂記篇血氣狡憤釋文曰狡本作交是交狡古通用狡與謫同義下文曰交謫之人妒昧之臣是交謫與妒昧皆兩字平列楊注曰交通於謫詐之人失之矣

有法者以法行，無法者以類舉。

樾謹按古所謂類，卽今所謂例。史記屈原賈生傳，吾將以爲類。正義曰：類，例也。

非目益明也，眸而見之也。

樾謹按楊注曰：眸，謂以眸子審視之也。此說未安。以眸子審視，豈可但謂之眸乎？眸當讀爲睇。說文目部：睇，低目視也。從目，冒聲。與牟聲相近。釋名釋首飾曰：牟，冒也。眸之與睇，猶牟之與冒矣。說文又有瞽，篆曰：低目謹視也。從目，攷聲。亦與牟聲相近。荀子成相篇：身讓卞，隋舉牟光。卽莊子大宗師篇之務光也。是其例矣。

冢卿不脩幣。

樾謹按上云：士不通財貨。楊注曰：不得貿遷如商賈也。此云冢卿不脩幣。注曰：謂不脩財幣，販息之也。然則與士之不通貨財，何以異乎？據韓詩外傳：作冢卿不脩幣施。疑此文奪施字。幣乃敝字之誤。施當爲柁。古同聲段借字也。柁卽今籬字。一切經音義十四云：籬，柁同力支反。引通俗文云：柴垣曰柁。木垣曰柁。說文木部：柁，落也。冢卿不脩敝柁，謂籬落敝壞不修葺之也。與下文大夫不爲場園，正同一意。皆不與民爭利之義。

不知而問堯舜，無有而求天府。

樾謹按楊注曰。好問則無不知。故可比堯舜。知無而求之。是有天府之富。蓋楊讀不知而問無有而求絕句。故其解如此。實非荀子意也。不知而問之堯舜。無有而求之天府。語意本連屬。下文先王之道。則堯舜已。六武之博。則天府已。乃自解堯舜天府之義也。使謂不知而問。卽是堯舜。無有而求。卽是天府。下文贅矣。故知楊注非也。六武當從盧說爲六藝之誤。何謂堯舜。先王之道是也。問者問此而已。非必眞起堯舜而問之也。何謂天府。六藝之博是也。求者求此而已。非必眞入天府而求之也。臨患難而不忘細席之言。

樾謹按郝氏懿行曰。細席恐茵席之譌。蓋茵借爲細。細又譌爲細耳。王氏念孫載之讀書雜誌。洵塙見矣。楊注引尸子臨大事不忘昔席之言。昔亦茵之譌。荀子作細席者。其原文是細席也。尸子作昔席者。其原文是茵席也。兩文雖異而實同。郝王均未見及。

#### 雨小漢故潛

樾謹按楊注曰。未詳。又引或曰。言漢者本因雨小水濫觴而成。至其盛也。乃溢爲潛矣。其說迂曲。不可從。漢字疑衍文。雨小故潛者。爾雅釋言曰。潛。深也。言雨小故入地深也。下文云。夫盡小者大。積微者著。是其義矣。

國將興必貴師而重傅。貴師而重傅。則法度存。

樾謹按下文云國將衰必賤師而輕傅賤師而輕傅則人有快人有快則法度壞據此則貴師而重傅下疑有闕文

古者匹夫五十而士

樾謹按楊注曰禮四十而士五十而後爵此云五十而士恐誤或曰爲卿士是二說皆非也下文云天子諸侯子十九而冠注曰先於臣下一年也然則四十而士猶二十而冠皆是論其常五十而士猶十九而冠皆是言其異也禮所謂四十始仕五十命爲大夫者蓋指卿大夫元士之適子而言此明言匹夫則殆謂鄉之俊士選士矣禮記王制篇正義曰鄉人既卑節級升之故爲選士俊士至於造士若王子與公卿之子本位既尊不須積漸學業既成卽爲造士以是言之古人於世族子弟及民間秀士自有區別故其始仕有十年之差也荀子不直曰古者五十而士必加匹夫二字明與下文天子諸侯子相對知十九而冠爲天子諸侯子之制則知五十而士爲匹夫之制不必疑其與禮經不合矣

移而從所仕

樾謹按楊注曰仕與事同事所能也義甚迂曲仕疑任字之誤莊子秋水篇任士之所勞釋文引李注曰任能也然則移而從所任者移而從所能也於義較捷矣

詩曰瞻彼日月悠悠我思道之云遠曷云能來子曰伊稽首不其有來乎宥坐

樾謹按楊注曰有所不來者爲上失其道而人散也若施德化使下人稽首歸向雖道遠能無來乎如注義則伊稽首三字甚爲不詞殆非也首當讀爲道周書芮良夫篇予小臣良夫稽道羣書治要作稽首是首道古通用彼文稽道當爲稽首此文稽首當爲稽道皆古文假借字也尙書堯典曰若稽古正義引鄭注曰稽同也禮記儒行篇古人與稽鄭注曰稽猶合也合亦同也稽道猶同道也伊者語詞猶維也詩言道之云遠曷云能來孔子言道苟同則雖遠而亦來故曰伊稽道不其有來乎蓋借詩言而反之若唐棣之詩矣

吳子胥不磔姑蘇東門外乎

樾謹按楊注曰磔車裂也然子胥不被車裂之刑楊注非是漢書景帝紀改磔曰棄市師古注曰磔謂張其尸也當從此訓

夫遇不遇者時也賢不肖者材也君子博學深謀不過時者多矣由是觀之不過世者衆矣

樾謹按由是觀之四字當在君子博學深謀句上

從命則親危不從命則親安孝子不從命乃衷子道

樾謹按衷與忠通言孝子之不從命乃其忠也下文從命則親辱不從命則親榮孝子不從命乃義從命則禽獸不從命則脩飾孝子不從命乃敬忠與義敬正一律作衷者段字耳國語楚語又能齊肅衷

正。周禮春官序官鄭注。引作中正。孝經中心藏之釋文。中本亦作忠。蓋衷中忠三字同聲而通用。楊注曰。衷。善也。未得假借之旨。

今女衣服既盛。顏色充盈。天下且孰寫諫女矣。

樾謹按楊注曰。告之畢。又呼其名。丁寧之也。此說非是。下文孔子曰。志之。吾語女。此由字當在孔子曰之下。由志之三字連文。上文孔子曰。由志之。吾語女。雖有國士之力。不能自舉其身。亦以由志之三字連文。可證孔子曰下必當有由字也。韓詩外傳正作孔子曰。由志之。吾語汝。

奮於言者華。奮於行者伐。

樾謹按韓詩外傳作慎於言者不譁。慎於行者不伐。當從之。華。卽譁之省文。兩奮字皆春字之誤。乃古文慎字也。春誤爲奮。則奮於言行。不能謂之不華不伐矣。於是又刪去兩不字耳。楊氏據誤本作注。非也。

夫魚鼈鼃鼃。猶以淵爲淺。而堀其中。鷹鳶猶以山爲卑。而增巢其上。

法行。

樾謹按堀下當有穴字。堀穴其中。增巢其上。相對爲文。晏子春秋諫篇。古者嘗有處檜巢窟穴。亦以窟穴對檜巢。是其證也。大戴記曾子疾病篇。作鷹鵠以山爲卑。而曾巢其上。魚鼈鼃鼃。以淵爲淺。而歷穴其中。歷穴卽堀穴也。春秋文十年。次于厥貉。公羊作屈貉。然則以歷爲堀。猶以厥爲屈也。荀子此文。本

於曾子。彼作歷穴。此作堀穴。乃古書以聲音假借之常例。若無穴字。則文爲不備矣。交而不見敬者。吾必不長也。

樾謹按楊注以不長爲不長厚。非也。以上下文例之。不仁故不見愛。不信故不見信。若不長厚與不見敬。則不倫矣。且不長厚而曰不長。亦近不詞。不長者無所長也。子道篇。色知而有能者。小人也。韓詩外傳。能作長。是不長猶不能也。吾無所能。宜其不見敬矣。

然則夫章甫絢屨紳而措笏者。此賢乎。哀公。

樾謹按此當作比。說文白部。皆俱詞也。從比從白。徐鍇繫傳曰。比皆也。是比有皆義。比賢乎。猶言皆賢乎。大戴禮保傅篇。於是比選天下端士。漢書賈誼傳。比作皆。是其證矣。此文亦見大戴記哀公問五義篇。作此皆賢乎。蓋比誤爲此。後人又增皆字耳。

不知選賢人善士託其身焉以爲己憂。

樾謹按此十五字爲一句。廣雅釋詁。爲。瘵也。爲有瘵義。故左傳有疾不可爲之文。爲己憂者。瘵己憂也。得賢人善士以託其身。則可瘵己之憂。而庸人不知也。故曰不知選賢人善士託其身焉以爲己憂。楊注曰。不知託賢。但自憂而已。則失其義。

是故其事大辨乎天地。明察乎日月。

樾謹按大字絕句是故其事大與上文大道者相應。明字衍文。辨乎天地。察乎日月。二語相對。說詳羣經平議大戴記。

兩驂列兩服入廐。

樾謹按楊注曰。列與裂同。謂外馬擘裂。中馬牽引而入廐。是以七字作一句。殆非也。兩驂裂者。兩驂斷鞅而去也。兩驂在外。故得自絕而去。於是止存兩服馬還入廐中矣。故曰兩驂列。句兩服入廐。

聞之曰無越踰不見士。堯問。

樾謹按楊注曰。周公聞之古也。越踰謂過一日也。然則荀子原文當作聞之無越日不見士。楊注原文當作越日謂過一日也。今衍踰字者。涉下文楊注有越踰字而誤衍也。既衍踰字。則越踰日之文甚爲不辭。乃以日字爲日字之誤。而移置聞之二字之下。遂成今本之誤。盧梭云。宋本曰作日。此則其舊迹之猶未盡泯者也。

人人皆以我爲越踰好士。然故士至。

樾謹按踰字亦衍文也。人人皆以我爲越好士者。越之言過也。人人皆以我爲過於好士也。然故士至者。然故卽是故也。說見王氏經傳釋詞。大略篇曰。然故民不困財。亦以然故連文。是其證也。楊注曰。人不知則以爲越踰。然士亦以禮貌之故而至也。此由不達然故之義。故爲抑揚其辭。至越踰連文。則以



踰字釋越字。注家往往有此例。非以正文有踰字也。而正文踰字之衍。卽因此矣。



## 諸子平議卷十六

列子

謂之生化形色智力消息者非也。天瑞

樾謹按謂當作爲。古書謂爲通用。說詳王氏引之經傳釋詞。上文云。自生自化自形自色自智自力自消自息。故此云。爲之生化形色智力消息者非也。張湛注上文云。皆自爾耳。豈有尸而爲之者哉。正得其義。

九變者究也。乃復變而爲一。

樾謹按上變字衍文。本作九者究也。乃復變而爲一。因涉上文一變七變而誤爲九變。則於詞贅矣。

頤輅食醯。頤輅生乎食醯。黃輓食醯。黃輓生乎九獸。

樾謹按頤輅食醯黃輓食醯八字。皆衍文。莊子至樂篇。止作頤輅生乎食醯。黃輓生乎九獸。無此八字。而欲恆其生。畫其終。惑於數也。

樾謹按畫者止也。論語雍也篇。今女畫。孔注曰。畫。止也。畫其終者。止之使不終也。上文云。生者理之必終者也。然則生固不可得而常。終固不可得而止矣。而欲恆其生。畫其終。故曰惑也。張注曰。畫。亡也。疑

本作畫止也。以形似而誤。呂氏春秋本味篇。道者以彼在己。今誤作止彼在己。與此正可互證。殷敬順釋文曰。畫一作盡。此乃字誤。盧氏文昭羣書拾補謂張本作盡。注云盡也。非是。

故吾知其不相若矣。

樾謹按。吾下脫安字。上云死之與生。一往一反。故云安知其不相若。言死生一致也。下云吾又安知營。而求生非惑乎。正承此而言。若作知其不相若。則於語意大背矣。淺人見下兩言安知句。末並用乎字。而此是矣字。疑其不協。遂妄刪安字。不知矣猶乎也。語有輕重耳。古書多以矣字代乎字。說詳王氏經傳釋詞。

食不知所以。

樾謹按。莊子知北遊篇。作食不知所味。

沒其先居之財。

樾謹按。居猶蓄也。謂其先所蓄積之財也。論語公冶長篇。臧文仲居蔡。皇侃義疏曰。居猶畜也。是其義。盜陰陽之和。以成若生。載若形。

樾謹按。載亦成也。尙書皋陶謨篇。乃賡載歌曰。枚傳載成也。是其義。

養正命。黃帝。

樾謹按正當爲生。古字生與性通。周官大司徒職辨五地之物生。杜子春讀生爲性。是其例也。列子原文本作養生命。蓋段生爲性。因誤爲正耳。張注曰。正當爲性。雖得其字。而古字亡矣。

其國無師長。自然而已。

樾謹按釋文帥或作師。當從之。周官太宰職以九兩繫邦國之民。二曰長以貴得民。三曰師以賢得民。此師長二字之義。其國無師長。見其無貴賤無賢愚也。若作帥長。則止是無貴賤耳。於義轉有所不盡矣。盧重元本。正作師長。

至人潛行不空。

樾謹按張注曰。不空者實有也。至人動止不以實有爲閔者也。其說甚爲迂曲。釋文曰。空一本作窒。當從之。莊子達生篇。正作不窒。夫得是而窮之者。焉得爲正焉。

樾謹按爲正當作而止。字之誤也。止與正字形相似。爲古文作𠄎。與而亦相似。襄十四年左傳。射爲禮乎。太平御覽工藝部。引作射而禮乎。孟子滕文公篇。方里而井。論語顏淵篇正義。引作方里爲井。並其證也。莊子達生篇述此文曰。夫得是而窮之者。物焉得而止焉。可據以訂正。

其神無卻。

樾謹按釋文曰。卻。閑也。閑。乃閒字之誤。謂閒隙也。卻。與隙通。莊子知北遊篇。若白駒之過卻。釋文曰。卻。本作隙。是也。故卻有閒隙之義。禮記曲禮篇。相見於卻地曰會。鄭注曰。卻。閑也。莊子養生主篇。批大卻。德充符篇。使日夜無卻。釋文引崔李云。卻。閑也。並可爲證。

口所偏肥。晉國黜之。

樾謹按釋文曰。肥。皮美反。說文字林。並作廐。又作圯。皆毀也。字從其省。然說文無廐字。戶部。廐。廐也。廐與毀義近。是廐爲廐字之誤。張注曰。音鄙。肥。薄也。疑本作肥。音鄙。薄也。蓋謂讀如鄙。薄之鄙耳。廐字孫恆。音符鄙切。與張讀正合。廐省作肥。故釋文曰。字從其省也。秦氏恩復校刻盧重元本。以廐爲胞字之誤。夫胞字何得訓毀。於義難通。蓋誤讀張注作肥。薄也。故爲此說。今正其字爲廐。其義爲毀。其音爲鄙。則皆得之矣。秦說非也。

潛於牖北聽之。

樾謹按牖北。卽室中矣。禾生子伯宿於田。更商丘開之舍。必當在其室中。商丘開安得更於牖北聽之。牖北疑當作北牖。所謂向也。詩七月篇。毛傳曰。向北出牖也。是也。二子在室中。商丘開於北牖外聽之。正合事理。古者士庶人之室。皆有北牖。說詳羣經平議。

衆昉同疑子華。昉令豫肉食衣帛之次。

樾謹按張注曰。昉始也。釋文曰。昉或作放。古字放與方通。尙書堯典篇。方命圯族。漢書傳喜傳王商傳。並作放命圯族。是其證也。廣雅釋詁。方始也。然則昉者俗字。放者段字。實卽方始之方耳。

吾誠之無二心。

樾謹按爾雅釋詁。誠信也。吾誠之。卽吾信之也。下文唯恐誠之之不至。卽唯恐信之之不至也。太平御覽引此文。改誠爲信。意雖是而非古義矣。

用志不分。乃疑於神。

樾謹按疑道藏本作凝。盧重元本亦作凝。莊子同。然此字實當作疑。卽所謂驚猶鬼神也。上文孔子曰。吾以子爲鬼也。察子則人也。亦可爲乃疑於神之證。管子形勢篇。無廣者疑。神解篇曰。以規矩爲方圓。則成。以尺寸量長短。則得。以法數治民則安。故事不廣於理者。其成若神。此正用志不分。乃疑於神之謂也。說互詳莊子。

丈人曰。汝逢衣徒也。亦何知問是乎。脩汝所以。而後載言其上。

樾謹按張注曰。脩治也。言治汝所用仁義之術。反於自然之道。然後可載此言於身上也。殊於義未得。味丈人之言。其輕儒術甚矣。豈復使治其術乎。故必增出反於自然一語。則非本文所有矣。今按脩者脩除也。周官典祀職。帥其屬而脩除。鄭注曰。脩除芟掃之。是其義也。又司尊彝職。脩酌。司農注曰。以水

洗勺而酌也。以水洗勺謂之脩。亦脩除之義。此文脩汝所以言汝故所以者。宜脩除之。然後可載吾言於其上也。

吾與汝無其文。未既其實。而固得道與。

樾謹按無當作毋。毋讀爲貫。蓋貫毋本一字也。爾雅釋詁。貫。習也。毋其文。言習其文也。黃帝篇。吾與若玩其文也久矣。而未達其實。釋文曰。玩。五貫反。習也。然則此作毋。彼作玩。聲近而義同。因毋字誤作毋。後人遂以無字易之。而義不可通矣。盧重元本作既其文。未既其實。則據莊子改之。非列子之舊。列子入涕泣沾衾。

樾謹按衾當作衿。卽襟字也。莊子應帝王篇。正作泣涕沾襟。

罪乎不誣不止。

樾謹按罪當讀爲臯。說文山部作臯。云山貌。是也。釋文云。罪本作萌。盧重元本亦作萌。乃後人據莊子改之。萌乃罪之誤字。說詳莊子。

是殆見吾衡氣幾也。鯢旋之潘爲淵。止水之潘爲淵。流水之潘爲淵。濫水之潘爲淵。沃水之潘爲淵。汙水之潘爲淵。雍水之潘爲淵。汙水之潘爲淵。汙水之潘爲淵。肥水之潘爲淵。是爲九淵焉。嘗又與來。

樾謹按上文云。是殆見吾杜德幾也。嘗又與來。又曰。是殆見吾善者幾也。嘗又與來。然則此文是殆見



吾衡氣幾也。下卽言嘗又與來。方與上文一律。乃於中間羅列九淵。殊爲無謂。疑此五十八字。乃它處之錯簡。莊子應帝王篇。止列首三句。而總之曰。淵有九名。此處三焉。正以其與本篇文義無關。故略之耳。然可證莊子所見本。已與今同。蓋古書之錯誤久矣。

夫漿人特爲食羹之貨。無多餘之贏。

樾謹按無字衍文。釋文曰。一本無無字。是也。張注曰。所貨者羹食。所利者盈餘而已。則張本亦無無字。淺人妄加也。若云無多餘之贏。則下不必更言其爲利也薄矣。盧重元本無無字。莊子列御寇篇亦無無字。當據刪。

舍者迎將。家公執席。妻執巾櫛。

樾謹按者字衍文。盧重元本無者字。是也。舍與舍者不同。下云。舍者避席。又云。舍者與之爭席矣。皆謂同居逆旅者。此云舍。則謂逆旅主人也。主逆旅者卽謂之舍。猶典市者卽謂之市。主農者卽謂之田。禮記王制篇注曰。市。典市者。月令篇注曰。田。主農之官。是其例也。今涉下文而誤衍者字。則與下兩言舍者無別矣。莊子寓言篇已誤。當據盧本刪。

王之嬪御。臆惡而不可親。周穆王。

樾謹按臆當作羶。言臭惡而不可親也。廣雅釋器。羶。臭也。

終身不著其術。故世莫傳焉。

樾謹按。故盧重元本作固。固與故通。此古本也。張湛本竟改作故。轉非古書之舊。此者八徵形所接也。

樾謹按。當作此八者。形所接也。與下文此六者神所交也相對。

其陰陽之審度。故一寒一暑。

樾謹按。審度二字。傳寫誤倒。本作其陰陽之度審。下句云。其昏明之分察。故一晝一夜。度與分對。審與察對。以是明之。

吾今得之。彼直真夢者矣。

樾謹按。此本作彼直真夢矣。者字衍文。盧重元本無者字。

常甘以爲苦。

樾謹按。常道藏本作嘗。然常嘗古通用。禮記少儀篇。馬不常秣。釋文曰。常本亦作嘗。爾雅釋詁。嘗。祭也。釋文曰。嘗字又作常。並其證也。列子原文。借常爲嘗。道藏本易以本字。轉非古書之舊矣。

榮汝之糧。不若過歸也。

樾謹按。張湛盧重元注。並曰。榮。棄也。訓榮爲棄。不知何據。殆非也。榮者對實而言。榮猶華也。爾雅釋草。

曰木謂之華。草謂之榮。不榮而實者謂之秀。榮而不實者謂之莢。是其義也。古人之詞。凡無實者謂之華。後漢書馬融傳注曰。華譽。虛譽也。訓華爲虛。則榮亦可爲虛矣。榮汝之糧。言其虛費而無實用也。漢書楊雄傳。四皓采榮於南山。師古曰。榮者聲名也。蓋榮與實對。故亦可訓名。以草木言之。則榮實也。以人事言之。則名實也。虛實也。其義固得通矣。

予昔給若。

樾謹按昔當爲皆。字之誤也。

不治而不亂。仲尼

樾謹按此本作不治而自亂。亂治也。謂不治而自治也。正與下文不言而自信。不化而自行。文義一律。後人不達亂字之義。改爲不亂。失之矣。張注曰。不以治治之。故不可亂也。是其所據本已誤。盧本同。

夫回能仁而不能反。

樾謹按反字無義。疑刃字之誤。俗書刃字作及。故誤爲反耳。刃與忍通。詩將仲子篇毛傳。彊忍之木。抑篤鄭箋。柔忍之木。釋文並云。忍本作刃。是其證也。能仁而不能刃。卽能仁而不能忍。正與下文賜能辨而不能訥。由能勇而不能怯。師能莊而不能同一律。淮南子人間篇亦載此事曰。仁能仁且忍。辨且訥。勇且怯。字正作忍。是其明證。張注曰。反變也。是其所據本已誤矣。盧本同。

雖然子列子亦微焉。

樾謹按微猶昧也。周易屯象傳天造草昧正義引董遇曰昧微物繫辭傳知微知彰文選西京賦注引舊注曰知微謂幽昧是微謂之微二字義通子列子亦微焉猶曰子列子亦昧焉故張注曰亦自不知其數。

衍衍然若專直而在雄者。

樾謹按釋文曰在一本作存當從之莊子天下篇施存雄而無術亦有存雄之文可以爲證。無言與不言無知與不知亦言亦知。

樾謹按與猶爲也上云用無言爲言亦言無知爲知亦知故此云無言爲不言無知爲不知亦言亦知蓋承上文而更進一義也上文用爲字此文用與字文異而義不異古書多有此例管子戒篇自妾之身之不爲人持接也尹知章注曰爲猶與也然則與亦猶爲也說詳王氏經傳釋詞人之游也觀其所見我之游也觀之所變。

樾謹按觀之所變盧重元本作觀其所變然之卽其也呂氏春秋音初篇之子是必大吉高誘訓之爲其是也孟子公孫丑篇皆悅而願爲之氓矣周官載師注引作皆悅而願爲其民矣是之其同義上言觀其所見下言觀之所變文異義同古書多有此例盧本作其乃不達古書義例而改之。

羣才備也。而無相位者。

榘謹按位當作洩。洩臨也。言無相臨者也。周官肆師職。凡師甸用牲于社宗。則爲位。注曰。故書位爲洩。是位與洩古字通。

臣之力能折春螽之股。堪秋蟬之翼。

榘謹按堪當讀爲戡。說文戈部。戡刺也。春螽之股細。故言折。見能折而斷之也。秋蟬之翼薄。故言戡。見能刺而破之也。作堪者。段字耳。尙書西伯旣戡黎。爾雅釋詁。注引作堪。此古字通用之證。張注曰。堪猶勝也。則螽股亦可言堪。不見古人文字之密矣。

孤犢未嘗有母。非孤犢也。

榘謹按有母下。當更疊有母二字。本云孤犢未嘗有母。有母非孤犢也。莊子天下篇釋文引李云。駒生有母。言孤則無母。孤稱立則母名去也。此可證有母非孤犢之義。因古書遇重字多省不書。但於字下作二畫識之。故傳寫脫去耳。

堯還宮召舜。因禪以天下。舜不辭而受之。

榘謹按辭通作詞。釋名釋典藝曰。詞。嗣也。故辭亦通作嗣。尙書大誥。辭其考我民。辭卽嗣也。顧命篇。恐不獲誓言嗣。嗣卽辭也。說詳羣經平議。蓋辭籀文作嗣。本與嗣同聲。故得通用。堯典篇。舜讓于德弗

嗣而此云舜不辭而受之。然則古本堯典作弗辭也。所謂舜讓于德者。讓當爲攘。禮記曲禮篇注曰。攘古讓字。然則古本堯典必作舜攘于德也。攘者取也。尙書微子篇枚傳曰。自來而取曰攘。舜無得天下之心。而天下自來。是其取天下也。以德取之也。正所謂自來而取曰攘也。故曰舜攘于德弗辭。下文無帝堯申命之文。而卽紀元日受終之事。然則舜之不辭審矣。賴列子此言。可以見尙書之古義。余作羣經平議。未見及此。故具說之。

唯默而得之。而性成之者得之。

樾謹按。而性成之。當作性而成之。湯問篇曰。默而得之。性而成之。是其證。帝怒流於西極。失羣聖之居。湯問。

樾謹按。盧重元本作帝恐流於西極。失羣仙聖之居。當從之。五山之根。無所運著。其流於西極。勢使然耳。何怒之有。蓋涉下文帝憑怒而誤。又仙聖字。上下文三見。可證此作羣聖之非矣。至西極字。亦疑有誤。五山隨波上下往還。安知其必流於西極也。下文云。岱輿員嶠二山。流於北極。可證其不必西流矣。西極似當作四極。

終髮北之北。有溟海者天池也。

樾謹按。釋文曰。一本無髮字。當從之。終北。國名。下文曰。禹之治水土也。迷而失塗。謬之一國。濱北海之

北其國名曰終北。是也。終北之北。謂在其國之北。今衍髮字者。蓋後人據莊子逍遙遊篇加之。不知彼自言窮髮之北。此自言終北之北。兩文不同。若據彼以增此。則既言終髮北。又言之北。文義複沓矣。其民孳阜亡數。有喜樂。亡衰老哀苦。

樾謹按孳阜二字疑當在喜樂之上。其民亡數。有孳阜喜樂。亡衰老哀苦。蓋以衰老對孳阜。哀苦對喜樂。

臣恐彼國之不可知之也。

樾謹按張注曰。此國自不可得往耳。然則不可知之者。不可得往也。呂氏春秋審應篇。其在於民而君弗知。高注曰。知猶得也。是其義下文云。伯牙所念。鍾子期必得之。得猶知也。知與得義相近。一兒以日初出遠。而日中時近也。

樾謹按兒下當有曰我二字。方與上句一律。

同請扁鵲求治。

樾謹按既言請。又言求。於義複矣。請乃詣字之誤。詣至也。言至扁鵲之所而求治也。故下文曰。二人辭歸。

柱指鉤弦。三年不成章。

樾謹按盧重元本鈎作鈞。當從之。張注曰。按指調弦。三年不能成曲。是其所據本亦作鈞。故以調弦釋之。國語周語。細鈞有鍾無鐻。韋注曰。鈞。調也。

汝何蚩而三招予。

樾謹按說文手部。招。手呼也。黑卯之子不見來丹之以劍擊已。但見其舉手若相招然。故曰汝何蚩而三招予。釋文云。一本作拈。此乃字誤。不當曲爲之說。

仲尼之德。不出諸侯之下。而同於陳蔡。力命。

樾謹按同乃困字之誤。楊朱篇作圍於陳蔡。亦困字之誤。盧重元本皆作困。北宮子之寐久矣。一言而能寤。易怛也哉。

樾謹按怛當讀爲旦。詩氓篇。信誓旦旦。說文心部。引作信誓旦旦。旦。即怛之或體。是旦旦古通用也。人之寐者。至平旦則寤矣。北宮子久寐而忽寤。故曰易旦也哉。釋文音當割反。未得其讀。或作悟。則後人不達而臆改之。

仲父之病疾矣。

樾謹按疾盧重元本作病。當從之。莊子徐無鬼篇同。年兄弟也。言兄弟也。才兄弟也。貌兄弟也。



樾謹按言字無義。當從釋文作訾。管子君臣上篇。吏嗇夫盡有訾程事律。卽此訾字之義。官秩貴賤。必視訾程爲準。訾兄弟也。正與下文貴賤父子也相應。殷敬順不達訾字之義。而以爲當作貲財字。則下當言貧富。不當言貴賤矣。

至人居若死。動若械。

樾謹按械字無義。釋文曰。本又作戒。實皆駭之段字也。周官大僕。始駟戒鼓。故書戒爲駭。列子原文。蓋亦段戒爲駭。而寫者又從木作械耳。居若死。動若駭。卽處女脫兔之意。自全也。自亡也。自喪也。

樾謹按自亡也三字。疑爲衍文。上文云。唯亡所量。亡所不量。則全而亡喪。亦非知全。亦非知喪。皆以全喪對言。此云自全也。自喪也。文義已足。增出自亡也三字。則與上文不合矣。蓋涉上有三亡字而誤衍此句。不知上三亡字。皆有無之無。非喪亡之亡也。

若實名貧。僞名富。楊朱。

樾謹按此下當有實名賤。僞名貴二句。上文曰。凡爲名者必廉。廉斯貧。爲名者必讓。讓斯賤。故此引管仲陳氏事。證爲實名則貧賤。爲僞名則富貴也。

當身之娛。非所去也。

樾謹按當身乃當生之誤。下云死後之名，非所取也。當生與死後正相對。下文云且趣當生，奚遑死後，是其證。

雖殊方偏國，非齊土之所產育者，無不必致之。

樾謹按下文云雖山川阻險，塗逕修遠，無不必之，則此文當云無不必致，誤衍之字。

賓客在庭者，日百住。

樾謹按住當爲數，聲之誤也。黃帝篇，漚鳥之至者，百住而不止。張注曰住當作數，是其證矣。此篇慮重元本作住，則是誤字。

一國之人受其施者，相與賦而藏之。

樾謹按賦者，計口出錢也。周官大宰職鄭注曰賦口率出泉也。漢書食貨志師古注曰賦謂計口發財，是其義矣。藏猶言葬也。禮記檀弓篇葬也者藏也，故葬與藏義得相通。周易繫辭傳葬之中野，漢書劉向傳引作藏之中野，藏卽藏字也。端木叔死無瘞埋之資，故受其施者相與賦錢而葬之也。

雖毀之不知，雖稱之弗知。

樾謹按上文言舜禹周孔，曰雖稱之弗知，雖賞之不知，則此言桀紂宜云雖毀之不知，雖罰之弗知，毀之對稱之言，罰之對賞之言，方與下文彼四聖雖美之所歸，彼二凶雖惡之所歸，文義相應，稱之賞之。

是美之所歸也。毀之罰之。是惡之所歸也。今涉上文而亦作稱之。義不可通矣。

物非我有也。既有。不得不去之。

樾謹按。按不得不去之。當作不得而去之。故下文曰。雖不去物。不可有其物也。今作不得不去。與下文不合矣。蓋涉上文既生。不得不全之。故誤而爲不。

彊食靡角。說符。

樾謹按。靡讀爲摩。莊子馬蹄篇。喜則交頸相摩。釋文引李云。摩也。是靡與摩義通。靡角之靡。卽交頸相摩之靡。謂以角相摩也。

故不班白語道失。而況行之乎。

樾謹按。上文曰。色盛者驕。力盛者奮。未可以語道也。然則色力方盛之人。不可以語道。必待班白之人。方可語之。若不班白而語道。未有不失者矣。所謂不班白語道失也。張注謂色力既衰。方欲言道。悟之已晚。言之猶未能得。而況行之乎。核之本文。與上文義皆不合。

忠信錯吾軀於波流。而吾不敢用私。

樾謹按。忠信字。涉上句而衍。

白公不得已。遂死於浴室。

樾謹按已字乃也字之誤。淮南子道應篇作白公不得也。呂氏春秋精諭篇作白公弗得也。並其證也。張注曰不知言之所謂。遂便作亂。故及於難。正解不得之義。

今趙氏之德行無所施於積。

樾謹按施衍字。蓋卽於字之誤而複者。呂氏春秋慎大篇亦有此文。正無施字。

臣有所與共擔纏薪菜者。

樾謹按張注曰共同也。此說失之。其乃供之段字。釋文曰一作供是也。蓋擔纏薪菜皆此人供之耳。擔纏薪菜是兩事。擔纏者負荷什物。薪菜者以給炊也。纏乃纏字之誤。周易坎上六係用徽纏。馬融曰徽纏索也。說本王氏念孫淮南子雜志菜當爲采。古字通用。

爵高者人妒之。官大者主惡之。祿厚者怨逮之。

樾謹按淮南子道應篇作祿厚者怨處之。是也。怨處之謂怨讎之所處也。猶曰爲怨府也。處與妒惡爲韻。若作逮則失其韻矣。蓋由淺人不達處字之義而臆改。

王亟封我矣。吾不受也。

樾謹按張注訓亟爲急。非也。亟者數也。言王數封我。而吾不受也。下文城市患其亟也。注曰亟數也。此亦當與同訓。

盡取其衣裝車牛步而去。

樾謹按此當作盡取其衣裝車馬牛缺步而去。呂氏春秋必已篇作求其車馬則與之。求其衣被則與之。牛缺出而去。是其證也。出卽步字之誤耳。此文脫馬字缺字。遂以車牛連文。失之矣。利出者實及。怨往者害來。

樾謹按及乃反字之誤。出與反猶往與來。相對成文。孟子曰。出乎爾者反乎爾者也。其鄰人遽而伐之。

樾謹按鄰字衍文也。上云人有枯梧樹者。此云其人卽此人也。上下文所云鄰父。謂此人之鄰也。豈得又就鄰人言之。而謂此人爲鄰人乎。下文其人乃不悅曰。亦無鄰字。可證此鄰字之衍。



# 諸子平議卷十七

莊子一

蜩與學鳩笑之曰。逍遙遊。

樾謹按釋文曰。學本或作鸞。音預。據文選江文通雜體詩。鸞斯蒿下飛。李善注。卽以莊子此文說之。又引司馬彪曰。鸞鳩。小鳥。毛萇詩傳曰。鸞斯鶉居。鶉居。鶉鳥也。音豫。然則李氏所據本。固作鸞不作學也。今釋文引司馬云。學鳩。小鳩也。此經後人竄改。非其原文矣。

時則不至。而控於地而已矣。

樾謹按王氏引之經傳釋詞曰。則猶或也。引史記陳丞相世家則恐後悔爲證。此文則字亦當訓或。蓋其決起而飛。槍榆枋也。有時能至。有時不能至。至則集于榆枋。不至則投於地。故曰時或不至。而控於地也。

奚以之九萬里而南爲。

樾謹按南上本有圖字。上文曰。而後乃今將圖南。故此卽承上文言也。文選注正作奚以之九萬里而圖南爲。

之二蟲又何知。

樾謹按郭象注曰：二蟲謂鵬蜩也。此恐失之。二蟲當謂蜩與鸞鳩。下文曰：奚以知其然也。朝菌不知晦朔，蟪蛄不知春秋，是所謂不知者，謂小不足以知大也。然則此云之二蟲又何知？其謂蜩鳩二蟲明矣。楚之南有冥靈者，以五百歲爲春，五百歲爲秋。上古有大椿者，以八千歲爲春，八千歲爲秋。而彭祖乃今以久特聞。

樾謹按彭祖人名也。然則冥靈大椿亦人名也。猶上文朝菌不知晦朔，蟪蛄不知春秋，蟪蛄蟲名也。而高誘注淮南道應篇曰：朝菌，朝生暮死之蟲，則亦蟲名也。蓋論大年小年，當以有血氣之屬言之。故論小者則以蟲言，朝菌也，蟪蛄也。蟲之中尤爲小年者也。論大者則以人言，冥靈也，大椿也。彭祖也。人之中尤爲大年者也。若雜以草木，則不倫矣。大椿疑本作大春，以八千歲爲春，故以大春名之。漢有井大春，或卽取之。此後人誤解爲木名，遂加木旁作椿耳。據釋文：冥靈之冥，亦或作模，卽其例也。冥字不必從木，則春字亦何必從木乎？潘尼以木槿說朝菌，司馬彪又以木槿說大椿，幾乎無大小之辨，足知其不然矣。

湯之問棘也是已。

樾謹按釋文：棘，李云湯時賢人。此說得之矣。又引簡文云：一曰湯廣大也，棘狹小也。則以湯棘爲厲名。



是始未讀列子者。湯之問棘。見列子湯問篇。上文所說鯢鵬及冥靈大椿。皆本是篇。故以此結之。明所言之有徵也。

吾將爲賓乎。

樾謹按此本作吾將爲賓乎。與上吾將爲名乎相對成文。吾將爲名乎。名者實之賓也。其意已足。吾將爲賓乎。當連下文讀之。其文曰。吾將爲賓乎。鷦鷯巢於深林。不過一枝。偃鼠飲河。不過滿腹。歸休乎君。予無所用天下爲。蓋無所用天下。則以實而言。又不足爲矣。故云吾將爲賓乎。呂氏春秋求人篇載許由之言曰。爲天下之不治與。而既已治矣。自爲與。啁噍巢於林。不過一枝。偃鼠飲於河。不過滿腹。歸已君乎。惡用天下。其文與此大略相同。彼云爲天下之不治與。卽此云吾將爲名乎。彼云自爲與。卽此云吾將爲賓乎。實與賓形似。又涉上句實之賓也而誤。不可以不正。若如今本則爲賓。卽是爲名。兩文複矣。

非不鳴然大也。

樾謹按釋文。鳴本亦作号。崔作謬。然說文号。部。号。痛聲也。鳴。謬。說文所無。蓋皆号之俗體。施之於此。義不可通。文選謝靈運初發都詩。李善注引此文作枵。當從之。爾雅釋天。元枵。虛也。虛則有大義。故曰枵然大也。釋文引李云。号然。虛大貌。是固以枵字之義說之。

宋人有善爲不龜手之藥者。

樾謹按釋文引司馬云。文拆如龜文也。又云。如龜皴縮也。義皆未安。向云拘圻也。郭注亦云能令手不拘圻。然則龜字宜卽讀如拘。蓋龜有𠂔音。後漢西域傳。龜茲讀曰𠂔慈。是也。古𠂔音與區同。故亦得讀如拘矣。拘之言拘皴也。不龜者不拘皴也。龜文之說雖非。皴縮之說則是。但不必以如龜爲說耳。

嗒焉似喪其耦。齊物論。

樾謹按喪其耦。卽下文所謂吾喪我也。郭注曰。若失其配匹。未合喪我之義。司馬云。耦身也。此說得之。然云身與神爲耦。則非也。耦當讀爲寓。寓寄也。神寄於身。故謂身爲寓。夫大塊噫氣。其名爲風。

樾謹按大塊者地也。塊乃由之或體。說文土部。由。塊也。蓋卽中庸所謂一撮土之多者。積而至於廣大。則成地矣。故以地爲大塊也。司馬云。大朴之貌。郭注曰。大塊者無物也。並失其義。此本說地籟。然則大塊非地而何。

小知閒閒。

樾謹按廣雅釋詁。閒。視也。小知閒閒。當從此義。謂好觀察人也。釋文曰。有所閒別。非是。故爲是舉。堯與楹。厲與西施。恢恠憭怪。道通爲一。

樾謹按釋文引司馬彪說以筵爲屋梁。楹爲屋柱。故郭注曰。筵橫而楹縱。然說文艸部。筵。莖也。屋梁之說。初非本義。漢書東方朔傳。以筵撞鍾。文選答客難篇。筵作筵。李善注引說苑曰。建天下之鳴鐘。撞之以筵。豈能發其音聲哉。筵與筵通。是古書言筵者謂其小也。筵與楹。以大小言。厲與西施。以好醜言。舊說非是。

而其子又以文之綸終。

樾謹按釋文綸音倫。崔云。琴瑟絃也。然以文之絃終。其義未安。郭注曰。昭文之子。又乃終文之緒。則是訓綸爲緒。今以文義求之。上文曰。彼非所明而明之。故以堅白之昧終。之昧與之綸。必相對爲文。周易繫辭傳。故能彌綸天地之道。京房注曰。綸。知也。淮南子說山篇。以小明大。以近論遠。高誘注曰。論。知也。古字綸與論通。淮南與明對言。則綸亦明也。以文之綸終。謂以文之所知者終。卽是以文之明終。蓋彼非所明而明之。故以堅白之昧終。而昭文之子。又以文之明終。則仍是非所明而明矣。故下曰。終身無成也。郭注尙未達其旨。

有倫有義。

樾謹按釋文云。崔本作有倫有義。當從之。下文云。六合之外。聖人存而不論。六合之內。聖人論而不議。又曰。故分也者。有不分也。辯也者。有不辯也。彼所謂分辯。卽此有分有辯。然則彼所謂論議。卽此有論

有議矣。

瞿鵠子問乎長梧子曰。吾聞之夫子。

樾謹按。瞿鵠子必七十子之後人所稱。聞之夫子。謂聞之孔子也。下文長梧子曰。是黃帝之所聽熒也。而丘也何足以知之。丘卽是孔子名。因瞿鵠子述孔子之言。故曰丘也何足以知之也。而讀者不達其意。誤以丘也爲長梧子自稱其名。故釋文云。長梧子。崔云名丘。此大不然。下文云丘也。與女皆夢也。予謂女夢亦夢也。夫子者長梧子自謂也。旣云丘與女皆夢。又云予亦夢。則安得卽以丘爲長梧子之名乎。

技經肯綮之未嘗。養生主。

樾謹按。郭注曰。技之妙也。常遊刃於空。未嘗經槩於微礙也。是以技經爲技之所經。殊不成義。技經肯綮四字。必當平列。釋文曰。肯。說文作冃。字林同。著骨肉也。一曰。骨無肉也。綮。司馬云。猶結處也。是肯綮並就牛身言。技經亦當同之。技疑枝字之誤。素問三部九候論。治其經絡。王注引靈樞經曰。經脈爲裏支。而橫者爲絡。古字枝與支通。枝謂枝脈。經謂經脈。枝經猶言經絡也。經絡相連之處。亦必有礙於游刃。庖丁惟因其固然。故未嘗礙也。

族庖月更刀。折也。

樾謹按郭注曰：中骨而折刀也。此於文義未合。上文云：良庖歲更刀，割也；割以用刀言，則折亦以用刀言。折謂折骨，非謂刀折也。哀元年左傳曰：無折骨。

指窮於爲薪，火傳也，不知其盡也。

樾謹按郭注曰：爲薪猶前薪也。前薪以指，指盡前薪之理，故火傳而不滅。此說殊未明了，且爲之訓前亦未知何義。郭注非也。廣雅釋詁：取，爲也。然則爲亦猶取也。指窮於爲薪者，指窮於取薪也。以指取薪而然之，則有所不給矣。若聽火之自傳，則忽然而不知其薪之盡也。郭得其讀，未得其義。釋文引崔云：薪火，燔火也，則并失其讀矣。

是以人惡有其美也。人閒世。

樾謹按釋文：惡音烏路反，非也。美惡相對爲文，當讀如本字。有者育字之誤。釋文云：崔本作育，云賣也。說文貝部：賣，簡也。讀若育。此育字卽賣之段字。經傳每以鬻爲之，鬻亦音育也。以人惡育其美，謂以人之惡鬻己之美也。

是皆脩其身以下偃拊人之民。

樾謹按下字衍文。脩其身以偃拊人之民，不當有下字。涉下文以下拂其上者也，因而誤衍耳。大多政法而不諱。

樾謹按政字絕句。大多政者。郭注所謂當理無二而張三條以政之也。法而不諫四字爲句。列禦寇篇形諫成光釋文曰。諫便僻也。此諫字義與彼同。謂有法度而不便僻也。李訓安崔訓聞諫並失其義。聽止於耳。心止於符。氣也者。虛而待物者也。

樾謹按上文云。無聽之以耳。而聽之以心。無聽之以心。而聽之以氣。此文聽止於耳。當作耳止於聽。傳寫誤倒也。乃申說無聽之以耳之義。言耳之爲用。止於聽而已。故無聽之以耳也。心止於符。乃申說無聽之以心之義。言心之用。止於符而已。故無聽之以心也。符之言合也。言與物合也。與物合則非虛而待物之謂矣。氣也者。虛而待物者也。乃申說氣字。明當聽以氣也。郭注曰。遺耳目。去心意。而符氣性之自得。此虛以待物者也。誤以符氣二字連讀。不特失其義。且不成句矣。

瞻彼闔者。虛室生白。吉祥止止。

樾謹按止止連文。於義無取。淮南子俶真篇。作虛室生白。吉祥止也。疑此文下止字。亦也字之誤。唐盧重元注列子天瑞篇曰。虛室生白。吉祥止耳。亦可證止止連文之誤。

妄則其信之也莫。

樾謹按郭注曰。莫然疑之。此說非也。莫然疑之。不可但謂之莫。且旣云信之。又何云疑乎。莫者無也。猶曰莫信之也。不曰妄則莫信之。而曰妄則其信之也莫。取與上下句法一律耳。

始乎諒，常卒乎鄙。

樾謹按：諒與鄙，文不相對。上文云：始乎陽，常卒乎陰；始乎治，常卒乎亂；陰陽治亂，皆相對，而諒鄙不相對。諒疑諸字之誤。諸讀爲都，爾雅釋地：宋有孟諸。史記夏本紀作明都，是其例也。始乎都，常卒乎鄙，都鄙正相對。因字通作諸，又誤作諒，遂失其旨矣。淮南子詮言篇曰：故始於都者，常大於鄙，卽本莊子可據以訂正。彼文大字乃卒字之誤。說見王氏念孫讀書雜誌。

故忿設無由，巧言偏辭。

樾謹按：由，用也。經傳由字訓用者，不可枚舉。此當以九字爲句。設疑說字之誤。大戴記子張問入官篇：且夫忿數者，獄之所由生也。忿數與忿說同。禮記儒行篇：邊數之不能終其物，正義曰：數說也。是其證也。忿怒之說，無所用其巧言偏辭。故曰：忿說無由，巧言偏辭。無由卽無用也。下文：獸死不擇音，卽申明此句之義。無用巧言偏辭，所謂不擇音也。郭氏不知由之訓用，乃曰：夫忿怒之作，無他由也。常由巧言過實，偏辭失當，是讀故忿設無由五字爲句。巧言偏辭上，必更有一由字，於義方足。是可知其非矣。過度益也。

樾謹按：益當讀爲溢。言過其度則溢矣。上文曰：夫兩喜必多溢美之言，兩怒必多溢惡之言，是其義惡成不及改。

樾謹按不及改極言其速也。改且不及速可知矣。上句曰美成在久。此云惡成不及改。文不一律。而義相準。言美成之久而惡成之速也。正見惡易而美難。郭注未達其旨。

其可以爲舟者旁十數。

樾謹按旁讀爲方。古字通用。尙書皋陶謨篇。方施象刑惟明。新序節士篇。方作旁。甫刑篇。方告無辜于上。論衡變動篇。方作旁。並其證也。在宥篇。出入無旁。卽出入無方。此本書段旁爲方之證。詩正月篇。民今方殆。鄭箋云。方。且也。其可以爲舟者方十數。言可以爲舟者且十數也。釋文引崔曰。旁。旁枝也。蓋不知旁爲方段字。故語詞而誤以爲實義矣。

大枝折。小枝泄。

樾謹按釋文引崔云。泄洩同。然洩字之義。於此無取。殆非也。泄當讀爲拙。荀子非相篇。接人則用拙。楊注曰。拙。牽引也。小枝拙。謂見牽引也。詩七月篇。取彼斧斨。以伐遠揚。卽此所云大枝折也。又曰。猗彼女桑。卽此所云小枝拙也。鄭箋云。女桑。少枝。少枝卽小枝。猗乃倚之段字。說文手部。倚。偏引也。是與拙同義。說詳羣經平議。

故解之以牛之白額者。與豚之亢鼻者。與人有痔病者。不可以適河。

樾謹按郭注曰。巫祝解除。棄此三者。必妙選駢具。然後敢用。此說於故解之三字。殊不可通。上云。宋有



荆氏者。宜楸柏桑。司馬云。荆氏地名也。疑此文解字。亦是地名。蓋各舉其地所有之事爲說也。僖十五年左傳。賂秦伯以河外列城五。東盡虢略。南及華山。內及解梁城。杜預注。解梁城曰。河東解縣。此所云解。卽其地矣。解地近河。故相傳以牛之白類者。豚之亢鼻者。人有痔病者。爲不可以適河也。鳳兮鳳兮。何如德之衰也。

樾謹按。如而古通用。此如字當讀爲而。而卽爾也。蓋指鳳而言。郭注以何如連讀。非是。

彼爲己。以其知得其心。以其心得其常心。

德充符

樾謹按。以其知得其心。句。以其心得其常心。句。兩句相對。彼爲己三字。總冒此兩句。郭讀彼爲己。以其知爲句。得其心。以其心爲句。而以其常心四字屬下讀。失之。

受命於地。唯松柏獨也。在冬夏青青。

樾謹按。在疑正字之誤。受命於地。唯松柏獨也正。與下文受命於天。唯舜獨也正。兩文相對。舜爲大聖。其正之義易見。故不煩申說。松柏則二木耳。其正之義難見。故必著冬夏青青一句以明之。莊子行文。錯綜變化。未可以後世之文法繩之也。學者不達而臆改爲在。失之矣。

彼何賓賓以學子爲。

樾謹按。賓賓之義。釋文引司馬云。恭貌。張云。猶賢賢也。崔云。有所親疎也。簡文云。好名貌。皆望文生義。

未達古訓。賓賓猶頻頻也。漢書司馬相如傳。仁頻并閭。顏注曰。頻字或作賓。是其例也。詩桑柔篇。國步斯頻。說文目部。作國步斯賸。書禹貢篇。海濱廣斥。漢書地理志。作海瀕廣渴。是皆賓聲頻聲相通之證。廣雅釋訓。頻頻比也。楊子法言學行篇。頻頻之黨。甚於鸚斯。皆可說此賓賓之義。

彼且斬以淑詭幻怪之名聞。

樾謹按淑與詭。語意不倫。淑詭當讀爲弔詭。齊物論篇。其名爲弔詭。正與此同。弔作淑者。古字通用。哀十六年左傳。旻天不弔。周官大祝職。先鄭注。引作閔。天不淑。是其證矣。

適見狔子食於其死母者。少焉胸若皆棄之而走。

樾謹按胸若猶胸然也。徐無鬼篇。衆狙見之。恂然棄而走。此云胸若。彼云恂然。文異義同。胸恂並寥之段字。說文兮部。寥。驚辭也。從兮句聲。胸恂亦從句聲。故得通用。釋文引司馬曰。驚貌得之矣。胸若皆棄之而走。言狔子皆驚而走也。蓋始焉不知其爲死母。就之而食。少焉覺其死。故皆驚走也。胸若二字。以其子言。不以其母言。釋文又引崔云。目動也。謂死母目動。然則其母不死。與下意不合矣。下文云。不見已焉爾。不得類焉爾。郭注曰。夫生者以才德爲類。死而才德去矣。故生者以失類而走也。若從崔說。死母之目尙動。是其才德未去。何爲以失類而走乎。

若然者。過而弗悔。當而不自得也。大宗師。

櫪謹按過者謂於事有所過失也。當者謂行之而當也。在衆人之情於事有所過失則悔矣。行之而當則自以爲得矣。眞人不然。故曰過而弗悔。當而不自得也。正文明言過。郭注謂全當而無過失之。是之謂不以心捐道。不以人助天。

櫪謹按捐字誤。釋文云。郭作捐。崔云。或作楫。所以行舟也。其義彌不可通。疑皆借字之誤。借卽背字。故郭注曰。眞人知用心則背道。助天則傷生。是郭所據本。正作借也。

古之眞人其狀義而不朋。

櫪謹按郭注曰。與物同宜。而非朋黨。是訓義爲宜。朋爲黨。望文生訓。殊爲失之。此言其狀。豈言其德乎。義當讀爲峨。峨與義並從我聲。故得通用。天道篇而狀義然。義然卽峨然也。朋讀爲嘲。易復彖辭。朋來无咎。漢書五行志。引作嘲來無咎。是也。其狀峨而不嘲者。言其狀峨然高大。而不崩壞也。廣雅釋詁。峨高也。釋訓。峨峨高也。高與大義相近。故文選西京賦。神山峨峨。薛綜注曰。峨峨高大也。天道篇義然。卽可以此說之。郭不知義爲峨之段字。於此文則訓爲宜。於彼文則曰踳跂自持之貌。皆就本字爲說。失之。

與乎其觚而不堅也。

櫪謹按郭注曰。常遊於獨。而非固守。是讀觚爲孤。然與不堅之義。殊不相應。釋文引崔云。觚。稜也。亦與

不堅之義不應殆皆非也。養生主篇技經胷絜之未嘗而況大軻乎。釋文引崔云。繫結骨疑此軻字。卽彼軻字。骨之繫結。是至堅者也。軻而不堅。是謂真人。崔不知軻軻之同字。故前後異訓耳。厲乎其似世乎。

樾謹按郭注曰。至人無厲。與世同行。故若厲也。此注殊不可通。且如注意。當云世乎其似厲。不當反言其似世也。今按世乃泰之段字。荀子榮辱篇。橋泄者人之殃也。劉氏台拱補注曰。橋泄卽驕泰之異文。荀子他篇或作汰。或作怵。或作泰。皆同漏泄之泄。古多與外大害敗爲韻。亦讀如泰也。又引賈子簡泄不可以得士爲證。然則以世爲泰。猶以泄爲泰也。猛厲與驕泰其義相應。釋文曰。厲。崔本作廣。廣大亦與泰義相應。泰亦大也。若以本字讀之。而曰似世。則皆不可通矣。

以德爲循。

樾謹按釋文曰。循本亦作修。兩得。然下文曰。以德爲循者。言其與有足者至於仁也。則自以作循爲是。說文彳部。循。順行也。故曰。與有足者至於仁。若修字。則無義矣。蓋字相似而誤。陸氏以爲兩得。非。夫藏舟於壑。藏山於澤。謂之固矣。然而夜半有力者負之而走。昧者不知也。

樾謹按山非可藏於澤。且亦非有力者所能負之而走。其義難通。山疑當讀爲汕。爾雅釋器。翼謂之汕。詩南有嘉魚篇。毛傳曰。汕。汕櫓也。箋云。今之撩罟也。藏舟藏汕。疑皆以漁者言。恐爲人所竊。故藏之。乃

世俗常有之事。故莊子以爲喻耳。

在太極之先而不爲高。

樾謹按。下云。在六極之下。而不爲深。則此當云。在太極之上。方與高義相應。今作在太極之先。則不與高義相應。而轉與下文。先天天地生而不爲久。其義相複矣。周易繫辭傳曰。易有太極。釋文曰。太極。天也。然則莊子原文。疑本作在太極之上。猶云在天之上也。後來說周易者。皆以太極謂天地未分之前。於是疑太極當以先後言。不當以上下言。乃改太極之上爲太極之先。而於義不可通矣。淮南子覽冥篇曰。引類於太極之上。

已外生矣。而後能朝徹。

樾謹按。爾雅釋詁。朝。早也。朝徹。猶早達也。郭注曰。豁然無滯。見機而作。斯朝徹也。正得其義。釋文引李。云。不崇朝而遠徹。則當爲不朝徹矣。

俄而子輿有病。子祀往問之曰。偉哉。夫造物者將以子爲此拘拘也。

樾謹按。此當作子來有病。下文曰。俄而子來有病。當作子輿有病。何以明之。淮南子精神篇曰。子求行年五十有四。而病偃僂。脊管高于頂。膈下迫頤。兩脾在上。燭營指天。匍匐自闕於井曰。偉哉。造化者其以我爲此拘拘邪。卽本莊子之文。而作子求。求者來字之誤。尙書呂刑篇。惟貨惟來。馬融本來作求。是

其例也。釋文引崔譔云：淮南作子永行年五十四，而病偃僂。抱朴子博喻篇亦云：子永歎天倫之偉，永亦求字之誤也。若是，子輿則與求與永絕不相似，無緣致誤。故知此文本作子來，與下文傳寫互易矣。子因以求時夜。

樾謹按釋文云：一本無求字，當從之。下云：浸假而化，予之右臂以爲彈，子因以求鵲炙，蓋以彈求鵲，乃可爲炙。故曰因以求鵲炙。若鷄則自能時夜，既化予之左臂以爲鷄，則因以時夜可矣。又何求焉？求字卽涉下句而衍。

相造乎水者，穿池而養給；相造乎道者，無事而生定。

樾謹按定疑足字之誤。穿池而養給，無事而生足，兩句一律，給亦足也。足與定字形相似而誤。管子中匡篇功定以得天與失天，其人事一也。今本定誤作足，與此正可互證。

鑿萬物而不爲義。

樾謹按鑿卽說文鑿字，其或體作鑿。古或以齊爲之。周官醢人職：五齊七醢，七菹三醢，是也。鑿與菹醢爲同類之物。鑿萬物，猶云菹醢萬物。故天道篇云：鑿萬物而不爲戾。郭於此無注。彼注云：變而相雜，故曰鑿。是訓鑿爲雜也。蓋鑿合衆味而成。釋名釋飲食曰：齋，濟也。與諸味相濟成也。故有相雜之義。列禦寇篇使人輕乎貴老而鑿其所患。釋文曰：鑿，亂也。亂與雜義同。然云雜萬物而不爲戾，則義有未安矣。

知北遊篇。若儒墨者。師故以是非相釐也。此則當訓爲雜。蓋儒墨兩家。是非蠱起。故雜也。郭訓爲和。義雖相通。然言固各有當矣。

日中始何以語女。應帝王。

樾謹按釋文引李云。日中始。人姓名。賢者也。此恐不然。中始。人名。日猶云日者也。謂日者中始何以語女也。文七年左傳。日衛不睦。襄二十六年傳。日其過此也。昭七年傳。日君以夫公孫段爲能任其事。十六年傳。日起請夫環。並與此日字同義。李以日中始三字爲人姓名。失之矣。崔本無日字。何問之不豫也。

樾謹按爾雅釋詁。豫。厭也。楚辭惜誦篇。行婞直而不豫兮。王逸注亦曰。豫。厭也。是豫之訓厭。乃是古義。無名人深怪天根之多問。故曰何問之不豫。猶云何許子之不憚煩也。簡文云。豫悅也。殊失其義。汝又何帛以治天下。感予之心爲。

樾謹按帛未詳何字。釋文曰。徐音藝。又魚例反。司馬云。法也。一本作寢。以諸說參考之。疑帛乃臬字之誤。故有魚例反之音。而司馬訓法。亦卽臬之義也。然字雖是臬。而義則非臬。當讀爲寢。寢本從臬聲。古文以聲爲主。故或止作臬也。一本作寢者。破段字而爲正字耳。一切經音義引通俗文曰。夢語謂之寢。無名人蓋謂天根所問皆夢語也。故曰。女又何寢以治天下。感予之心爲。

有人於此。響疾彊梁物徹。疏明學道不勸。

樾謹按釋文引崔云。所在疾彊梁之人也。則字當爲響疾。又引李云。敏疾如響也。簡文云。如響應聲之疾。則字當爲響疾。疑莊子原文本作鄉。故各以意讀之耳。文選羽獵賦。響習如神。善注曰。響習。疾也。響與響同。習與忽同。然則響自有疾義。響疾連文。響亦疾也。自以作響爲長矣。惟自來讀者。皆以響疾彊梁爲句。物徹疏明爲句。殊不可通。此當於徹字勸字絕句。物讀爲勿。古字通用。尙書立政篇。時則勿有間之。論衡譴告篇。作時則物有間之。是也。天道篇。中心物愷。釋文曰。物本亦作勿。此物勿通用。見於本書者。徹去也。響疾彊梁物徹者。言響疾彊梁而勿去也。與疏明學道不勸。相對爲文。皆以六字爲一句。因學者不知物爲勿之段字。故失其讀矣。

萌乎不震不正。

樾謹按列子黃帝篇。作罪乎不誨不止。當從之。罪讀爲罪。說文山部作辜。云山貌。是也。誨卽震之異文。不誨不止者。不動不止也。故以辜乎形容之。言與山同也。今罪誤作萌。正誤作止。失其義矣。據釋文。則崔本作不誨不止。與列子同。可據以訂正。

子之先生不齊。

樾謹按下文郭注曰。無往不平。混然一之。以管闕天者。莫見其涯。故似不齊。張湛注列子黃帝篇。引向



秀注同。然則向郭皆讀齊如本字。釋文音側皆反。非是。

吾鄉示之以太沖莫勝。

樾謹按勝當讀爲朕。勝本從朕聲。故得通用。莫朕者。無朕也。言無朕兆也。郭注曰。居太沖之極。浩然泊心。而元同萬方。故勝負莫得厝其閒也。此泥本字爲說。未達段借之旨。列子黃帝篇。正作向吾示之以太沖莫朕。張湛引向秀注曰。居太沖之極。皓然泊心。元周萬方。莫見其迹。郭注正竊用向說。但以不達段借之旨。改其末四字耳。

鯢桓之審爲淵。止水之審爲淵。流水之審爲淵。淵有九名。此處三焉。

樾謹按審。司馬云當爲蟠。蟠聚也。崔本作滯。云回流所鍾之域也。今以字義求之。則實當爲瀖。說文水部。瀖。大波也。從水旡聲。作滯者。字之省。司馬彪讀爲蟠。誤也。郭本作審。則失其字矣。又按列子黃帝篇云。鯢旋之潘爲淵。止水之潘爲淵。流水之潘爲淵。濫水之潘爲淵。沃水之潘爲淵。洊水之潘爲淵。雍水之潘爲淵。汧水之潘爲淵。肥水之潘爲淵。是爲九淵焉。九淵全列。然於上下文殊不相屬。疑爲它處之錯簡。莊子所見已然。雖不敢徑去。而實非本篇文義所繫。故聊舉其三耳。



## 諸子平議卷十八

### 莊子二

駢拇枝指，出乎性哉，而侈於德。附贅縣疣，出乎形哉，而侈於性。駢拇、

樾謹按：性之言，生也。駢拇枝指，生而已然者也。故曰：出乎性。附贅縣疣，成形之後，而始有者也。故曰：出乎形。德者，所以生者也。天地篇曰：物得以生，謂之德。是也。駢拇枝指，出乎性，而以德言之，則侈矣。附贅縣疣，出乎形，而以性言之，則侈矣。崔云：德猶容也。司馬云：性，人之本體也。混性與德與形而一之，殊失其旨。

而離朱是已。

樾謹按：而如古通用。而離朱是已，猶云如離朱是已。下文而師曠而曾史而楊墨，並同。彼正正者，不失其性命之情。

樾謹按：上正字，乃至字之誤。上文云：故此皆多駢旁枝之道，非天下之至正也。此云彼至正者，不失其性命之情。兩文相承，今誤作正正義，不可通。郭曲爲之說，非是。

今世之仁人，蒿目而憂世之患。

樾謹按司馬云蒿亂也。郭注曰兼愛之迹可尙則天下之目亂矣以可尙之迹蒿令有患而遂憂之此爲陷人於難而後拯之也是以蒿目二字爲句解爲亂天下之目義殊未安蒿乃隳之段字玉篇目部隳庚鞠切目明又望也是隳爲望視之貌仁人之憂天下必爲之隳然遠望故曰隳目而憂世之患隳與蒿古音相近故得通用詩靈臺篇白鳥鷺鷥孟子梁惠王篇作鶴鶴文選景福殿賦作隳隳然則蒿之通作隳猶鷺之通作鶴與隳矣周易文言傳確乎其不可拔說文土部曰塙堅不可拔也卽本易義是確與塙通亦其例也

自虞氏招仁義以撓天下也

樾謹按國語周語好盡言以招人過韋注曰招舉也舊音曰招音翹漢書陳勝傳贊招八州而朝同列鄧展曰招舉也蘇林曰招音翹此文招字亦當訓舉而讀爲翹言舉仁義以撓天下也郭注曰故當而無傷者非仁義之招也然而天下奔馳棄我殉彼以失其常然是讀如本字然以仁義招人不得反云招仁義可知其非矣

雖有義臺路寢馬蹄

樾謹按義徐音儀當從之周官肆師職鄭注曰古者書儀但爲義是義卽古儀字也儀臺猶言容臺淮南子覽冥篇容臺振而掩覆高注曰容臺行禮容之臺儀與容異名同實蓋是行禮儀之臺故曰儀臺

也。

燒之剔之刻之雒之。

樾謹按司馬彪解雒之曰。謂羈雒其頭也。是以雒爲絡之段字。然下文連之以羈羈。乃始言羈絡之事。此恐非也。雒疑當爲烙。說文火部新附有烙字。曰灼也。今官馬以火烙其皮毛爲識。卽其事矣。

夫赫胥氏之時。

樾謹按釋文引司馬云。赫胥氏上古帝王也。此爲允當。又曰。一云有赫然之德。使民胥附。故曰赫胥。蓋炎帝也。此望文生訓。殊不足據。炎帝卽神農也。胥。籒篇旣云赫胥氏。又云神農氏。其非一人明矣。赫胥疑卽列子書所稱華胥氏。華與赫一聲之轉耳。廣雅釋器。赫赤也。而古人名赤者多字華。羊舌赤字伯華。公西赤字子華。是也。是華亦赤也。赤謂之赫。亦謂之華。可證赫胥之卽華胥矣。

然則鄉之所謂知者。不乃爲大盜積者也。胥。

樾謹按不字衍文。此卽上文而斷之。不當作疑詞。下文曰。故嘗試論之。世俗所謂知者。有不爲大盜積者乎。所謂聖者。有不爲大盜守者乎。則因此文而推論之。用者乎作問詞。宜有不字矣。此文不字。卽涉下文而衍。

故田成子有乎盜賊之名。而身處堯舜之安。小國不敢非。大國不敢誅。十二世有齊國。

樾謹按釋文曰自敬仲至莊子九世知齊政自太公和至威王三世爲齊侯故云十二世此說非也本文是說田成子不當追從敬仲數起疑莊子原文本作世世有齊國言自田成子之後世有齊國也古書遇重字止於字下作二字以識之應作世二有齊國傳寫者誤倒之則爲二世有齊國於是其文不可通而從田成子追數至敬仲適得十二世遂臆加十字於其上耳

脣竭則齒寒

樾謹按此竭字當讀爲竭其尾之竭說文豕篆說解曰竭其尾故謂之豕是也蓋竭之本義爲負舉竭其尾卽舉其尾也此云脣竭者謂反舉其脣以向上故遂於大盜揭諸侯竊仁義并斗斛權衡符璽之利者

樾謹按此二十一字作一句讀蓋揭諸侯竊仁義云云皆大盜之利也人苟逐於大盜之利則必軒冕弗能勸斧鉞弗能禁如下文所云矣郭注曰重賞罰以禁盜然大盜者又逐而竊之則反爲盜用矣是誤以逐屬大盜言失其旨并失其讀

人大喜邪毗於陽大怒邪毗於陰在宵

樾謹按釋文毗如字司馬云助也一云并也然下文云陰陽并毗四時不至寒暑之和不成則訓助已不可通訓并更爲失之矣此毗字當讀爲毗劉暴樂之毗爾雅釋詁毗劉暴樂也合言之則曰毗劉分

言之則或止曰劉詩桑柔篇。採其劉是也。或止曰毗。此言毗於陽毗於陰是也。暴樂毛傳作爆燦。鄭箋云。採之則爆燦而疏。然則爆燦猶剝落也。喜屬陽。怒屬陰。故大喜則傷陽。大怒則傷陰。毗陰毗陽。言傷陰陽之和也。故四時不至。寒暑之和不成。若從司馬訓毗爲助。則下三句不貫矣。淮南子原道篇。人大怒破陰。大喜墜陽。與此同義。

其動也縣而天。

樾謹按釋文曰。向本無而字。當從之。郭注曰。動之則係天而踊躍也。以係天釋縣天。疑其所據本亦無而字也。而與天篆文相似。而即天字之誤而衍者。

故賢者伏處大山嵯巖之下。

樾謹按釋文大山音泰。亦如字。當以讀如字爲是。此泛言山之大者。不必東嶽泰山也。嵯當爲湛。文選封禪文。湛恩厖鴻。李注曰。湛深也。湛巖猶深巖。因其以山巖言。故變從水者而從山耳。山言其大。巖言其深。義正相應。學者不達其義。而音大爲泰。失之矣。田子方篇。其神經乎大山而無介入乎淵泉而不濡。釋文大音泰。失與此同。文選風賦。緣泰山之阿。古詩。冉冉孤生竹。結根泰山阿。夫風之所緣。竹之所生。非必泰山也。其原文應並作大山。泛言山之大者。後人誤讀爲泰。并改作泰耳。

吾未知聖知之不爲桁楊桎梏也。仁義之不爲桎梏鑿柄也。焉知曾史之不爲桎跖嚙矢也。

樾謹按。嚆矢未詳何物。向云矢之鳴者也。則因其字從口而爲之說。崔本作蒿。云蕭蒿可以爲箭。此更曲說。未聞矢以蒿爲之也。釋文稱或作矯。矯揉也。疑古本如此。說文矢部。矯。揉箭箝也。漢書嚴安傳有矯箭控弦之語。正可以說此文。蓋摺也。柄也。矢也。皆物也。接之鑿之矯之。則皆人也。接字見說文木部。云續木也。是凡接續字本當作接。摺者析楊之楔也。柄者桎。桎之孔也。言聖知爲析楊接其摺。仁義爲桎。桎鑿其柄。曾史爲桀。跖矯其矢也。淮南子有大者爲柱。梁小者爲接。摺之說。鄭康成注考工記。有調其鑿柄之說。則誤以接摺鑿柄爲皆二字連文。自漢世已然。釋文所引諸說。宜其皆誤矣。

禍及止蟲。

樾謹按。止蟲卽豸蟲也。爾雅釋蟲。有足謂之蟲。無足謂之豸。是也。史記五帝紀。鳥獸蟲蛾。正義曰。蛾音豸。直起反。直起之音。與止相近。宣十七年左傳。庶有豸乎。豸卽止也。此云禍及止蟲。止卽豸也。吐爾聰明。

樾謹按。吐當作杜。言杜塞其聰明也。

有大物者。不可以物。物而不物。故能物物。

樾謹按。郭斷不可以物物五字爲句。失其讀矣。此當讀不可以物爲句。物而不物爲句。聖汝適復之撓撓以游無端。



樾謹按郭於撓撓下出注曰撓撓自動也提挈萬物使復歸自動之性卽無爲之至也此未得其解爾雅釋詁適往也然則適復猶往復也撓撓亂也廣雅釋詁撓亂也重言之則爲撓撓矣適復之撓撓此世俗之人所以不能獨往獨來也惟大人則提挈其適復之撓撓者而與之共游於無端故曰挈汝適復之撓撓以游無端二句本止一句郭失其解并失其讀矣

應於禮而不諱

樾謹按諱讀爲遠遠諱並從韋聲故廣雅釋詁曰諱避也韋昭注周語晉語並曰遠避也是二字聲近義通應於禮而不諱卽不遠也郭注曰自然應禮非由忌諱則失之迂曲矣

夫子曰夫道覆載萬物者也天地

樾謹按此與下節並冠以夫子曰釋文引司馬云莊子也一云老子也然下文有云夫子問于老聃曰則夫子非老子明矣據下老子答辭曰子告若而所不能聞與而所不能言則問老聃者自是孔子故釋文曰夫子仲尼也以後例前則此兩夫子曰亦是孔子之言矣

君子明於此十者則韜乎其心之大也

樾謹按郭注曰心大故事無不容也此未得事字之義事心猶立心也言其立心之大也禮記郊特牲篇鄭注曰事猶立也釋名釋言語曰事傳也傳立也並其證也如郭注則是心足以容事而非事心矣

呂氏春秋論人篇。事心乎自然之塗。亦以事心連文。義與此同。足證郭注之誤。方且爲緒使。

樾謹按。緒使疑本作使緒。故郭注曰。將興後世事役之端。以事役字釋使字。以端字釋緒字也。下句曰。方且爲物絃。使緒物絃。兩文相對。言爲事作端緒。爲物作絃束也。若作緒使。不特意不可通。且與下句不倫矣。

雖然。願先生之言其風也。

樾謹按。風當讀爲凡。猶云言其大凡也。風本從凡聲。故得通用。汝將固驚邪。

樾謹按。固讀爲胡。胡固並從古聲。故得通用。汝將胡驚邪。言汝與真渾沌遇。則不驚也。郭注曰。故與世同波而不自失。則雖遊於世俗。而泯然無迹。豈必使汝驚哉。正得其意。古書胡字。或以故字爲之。管子侈靡篇。公將有行。故不送公。墨子尚賢中篇。故不察尚賢爲政之本也。皆以故爲胡之證。禮記哀公問篇。鄭注曰。固猶故也。然則以固爲胡。猶以故爲胡矣。

而今也以天下惑。予雖有所嚮。不可得也。

樾謹按。祈字無義。司馬云。祈求也。則但云予雖祈嚮足矣。郭注云。雖我有求嚮至道之情。則又增出情。

字殆皆非也。祈疑所字之誤。言天下皆惑。予雖有所嚮往。不可得也。祈所字形相似。故誤耳。下同。以二缶鍾惑。而所適不得矣。

樾謹按二缶鍾之文。未知何義。釋文云。缶應作垂。鍾應作踵。言垂脚空中。必不得有之適也。此於莊子之意不合。所適謂所之也。郭注曰。各自信據。故不知所之是也。如陸氏說。則以適爲適意之適。當云不得其適。不當云所適不得也。今按鍾當作踵。而二則一字之誤。缶則企字之誤。企下從止。缶字俗作缶。其下亦從止。兩形相似。因致誤耳。文選歎逝賦注。引字林曰。企。舉踵也。一切經音義十五。引通俗文曰。舉踵曰企。然則企踵猶舉踵也。人一企踵。不過步武之間耳。然以一企踵惑。則已不得其所適矣。故下云而今也以天下惑。予雖有所嚮。其庸可得邪。以天下惑。極言其地之大。以一企踵惑。極言其地之小也。上文二人惑則勞而不至。惑者勝也。而今也以天下惑。予雖有所嚮。不可得也。以天下對二人言。則以人之多寡言。此以天下對一企踵言。則以地之廣狹言。一企踵誤爲二缶鍾。則不得其義矣。

明於天。通於聖。六通四辟於帝王之德者。天道。

樾謹按上文天道帝道聖道並列。此云明於天。承天道而言。通於聖。承聖道而言。六通四辟於帝王之德。承帝道而言。曰六曰四。極言其無所不通。無所不辟也。天下篇六通四辟。小大精粗。其運無乎不在。是其義也。釋文以六氣四方說之。則非言帝王之德矣。

因任已明而原省次之。

樾謹按郭注曰物各自任則罪責除也此未得其義下文云原省已明而是非次之是非已明而賞罰次之然則此時尙未有是非未有賞罰又何罪責之有乎今按省之言省察也原與省同義晏子春秋問下篇春省耕而補不足者謂之遊管子戒篇作春出原農事之不本者謂之遊是原省義同也蓋既因物而任之又從而原省之於是其是非可得而賞罰可加矣

賓禮樂

樾謹按賓當讀爲賓謂擯斥禮樂也與上句退仁義一律郭注曰以性情爲主也則以本字讀之其義轉迂達生篇曰賓於鄉里遂於州部此卽假賓爲擯之證

世人以形色名聲爲足以得彼之情夫形色名聲果不足以得彼之情則知者不言言者不知而世豈識之哉

樾謹按果不足以得彼之情句衍不字莊子之意謂形色名聲果足以得彼之情則所恃乎得情者莫如言矣而知者不言言者不知世又何從識之哉正見得彼之情不在形色名聲也此二十七字本一氣相屬妄增不字則語意隔絕果字則字上下相應之妙全失矣達生篇世之人以爲養形足以存生而養形果不足以存生則世奚足爲哉亦衍不字而如古通用如養形果足以存生則世奚足爲哉兩

句一氣。今衍不字。則亦隔絕矣。凡此皆淺人拘泥字句者所妄加。不達莊子文法也。

孰隆施是天運、

樾謹按此承上雲雨而言。隆當作降。謂降施此雲雨也。書大傳。降谷。鄭注曰。隆讀如麗降之降。蓋隆從降聲。古音本同。荀子天論篇。隆禮尊賢而王。韓詩外傳。隆作降。齊策。歲八月。降雨下。風俗通。義祀典篇。降作隆。是古字通用之證。

天有六極五常。

樾謹按六極五常。疑卽洪範之五福六極也。常與祥古字通。儀禮士虞禮記。薦此常事。鄭注曰。古文常爲祥。是其證也。說文示部。祥。福也。然則五常卽五福也。下文曰。九洛之事。治成德備。其卽謂禹所受之洛書九類乎。

一死一生。一債一起。所常無窮。而一不可待。

樾謹按一不可待者。皆不可待也。大戴記衛將軍文子篇。則一諸侯之相也。盧注曰。一。皆也。荀子勸學篇。一可以爲法則。君子篇。一皆善也。謂之聖。楊注曰。一。皆也。是一有皆義。郭注曰。不能待之以一。與語意未合。

今而夫子亦取先王已陳芻狗。取弟子遊居寢臥其下。

越謹按上取字如字。下取字當讀爲聚。周易萃象傳聚以正也。釋文曰聚。荀作取。漢書五行志內取玆。師古曰取讀如禮記聚麀之聚。是聚取古通用。

故西施病心而顰其里。其里之醜人見而美之。歸亦捧心而顰其里。其里之富人見之。堅閉門而不出。貧人見之。挈妻子而去之走。

越謹按兩其里字皆不當疊。病心而顰。捧心而顰。文義甚明。若作顰其里。則不可通矣。皆涉下句而衍。外無正而不行。

越謹按正乃匹字之誤。禮記緇衣篇唯君子能好其正。鄭注曰正當爲匹。字之誤也。是其例矣。此云中無主而不止。外無匹而不行。與宣三年公羊傳自內出者無匹不行。自外至者無主不止。文義相似。自外至者無主不止。故此言中無主而不止也。自內出者無匹不行。故此言外無匹而不行也。因匹誤爲正。郭注遂以正己爲說。殊非其義。則陽篇自外入者有主而不執。由中出者有正而不距。正亦當爲匹。誤與此同。

夫白鵲之相視。眸子不運而風化。蟲雄鳴於上風。雌應於下風而化。

越謹按而化一本作而風化。當從之。郭注曰鵲以眸子相視。蟲以鳴聲相應。俱不待合而便生子。故曰風化。是郭所據本。兩句皆作風化。故總釋之如此也。

故曰夫恬淡寂寞虛無無爲此天地之平而道德之質也。刻意。

樾謹按質當讀爲至。史記蘇秦傳趙得講於魏至公子延索隱曰至當爲質。謂以公子延爲質也是至質古通用。至可爲質。質亦可爲至矣。道德之質卽道德之至也。天道篇曰夫虛靜恬淡寂寞無爲者天地之平而道德之至。文與此同。而字正作至是其明證。

故曰聖人休焉則平易矣。

樾謹按休焉二字傳寫誤倒。此本作故曰聖人休焉休則平易矣。天道篇故帝王聖人休焉休則虛與此文法相似可據訂正。

滑欲於俗思以求致其明。繕性。

樾謹按釋文滑音骨亂也。崔云治也。此當從崔說爲長。上文繕性於俗學以求復其初。崔注繕亦訓治蓋二句一義。繕也滑也皆治也。故曰求復其初求致其明。若訓滑爲亂則與求字之義不貫矣。滑得訓治者滑猶汨也。說文水部汨治水也是其義也。玉篇手部汨亦滑字。然則滑之與汨猶滑之與汨矣。禮樂偏行則天下亂矣。

樾謹按郭注曰以一體之所履一志之所樂行之天下則一方得而萬方失也是偏爲一偏之偏。故郭以一體一志說之。釋文作偏而音遍非是。

心與心識知而不足以定天下。

樾謹按識知二字連文。詩曰：不識不知，是識知同義。故連言之曰識知也。心與心識知而不足以定天下，明必不識不知而後可言定也。諸家皆斷識字爲句，非是。向本作職，尤非。

人卒九州穀食之所生，舟車之所通，人處一焉。秋水

樾謹按人卒二字，未詳何義。司馬訓卒爲衆，崔訓卒爲盡，皆不可通。且下云人處一焉，則此不當以人言。人卒疑大率二字之誤。人閒世篇：率然拊之，釋文曰：率或作卒。是率卒形似易誤之證。率誤爲卒，因改大爲人以合之。據至樂篇：人卒聞之，盜跖篇：人卒未有不與名就利者，是人卒之文。本書所有，然施之于此，不可通矣。大率者，總計之辭。上云：計四海之在天地之間也。又云：計中國之在海內，計與大率其義正同。

梁麗可以衝城。

樾謹按司馬云：梁麗，小船也。崔云：屋棟也。然小船與屋棟，皆非所以衝城。詩皇矣篇：與爾臨衝。毛傳曰：臨，臨車也。衝，衝車也。正義曰：兵書有作臨車衝車之法。墨子有備衝之篇。知臨衝俱是車也。然則此云可以衝城，其爲是車明矣。徐無鬼篇：君亦必無陳鶴列於麗譙之間。郭注曰：麗譙，高樓也。司馬曰：麗譙，樓觀名也。此所云梁麗，疑是車之有樓者。若左傳所稱樓車矣。文選辨亡論：衝棚息於朔野。李善注曰：



字略作輻。樓也可爲衝車有樓之證。

於是逡巡而卻。告之海曰。夫千里之遠。不足以舉其大。千仞之高。不足以極其深。

樾謹按海字當在曰夫二字之下。

故曰忠諫不聽。蹲循勿爭。至樂。

樾謹按郭注曰。唯中庸之德爲然。此不知何義。殆不得其旨而妄說也。蹲循當讀爲逡巡。古書逡巡字。或作逡遁。漢鄭固碑。逡遁退讓是也。此又作蹲循者。據外物篇師弟子而踰於鯀水。釋文引字林云。踰古蹲字。然則蹲循者踰循也。漢碑作逡遁。莊子書作蹲循。字異而音義同矣。忠諫不聽。蹲循勿爭。謂人主不聽忠諫。則爲人臣者當逡巡而退。勿與之爭也。下文曰。故夫子胥爭之。以殘其形。言子胥事不聽忠諫之君。而必欲與之爭。故殘其形也。學者不達蹲循之義。遂失其解。并莊子引古語以起下文。其意亦不顯矣。

若果養乎。子果歡乎。

樾謹按養當讀爲恙。爾雅釋詁。恙。憂也。若果恙乎。子果歡乎。恙與歡對。猶憂與樂對也。言若之死非憂。予之生非樂也。恙與養古字通。詩二子乘舟篇。中心養養。傳訓養爲憂。卽本雅詁矣。司馬本養作暮。乃字之誤。

胡蝶胥也。

樾謹按釋文曰胡蝶胥也。一名胥也。此失其義。當屬下句讀之。本云胡蝶胥也。化而爲蟲。與下文鵲掇千日爲鳥。兩文相對。千日爲鳥。言其久也。胥也。化而爲蟲。言其速也。列子天瑞篇釋文曰。胥。少也。謂少時也。得其義矣。

人又反入於機。

樾謹按又作當久。字之誤也。久者老也。上文黃軫生乎九猷。釋文引李注曰。九宜爲久。久。老也。是其義也。人久反入於機者。言人老復入於機也。列子天瑞篇。正作人久入於機。用志不分。乃凝於神。達生。

樾謹按凝當作疑。下文梓慶削木爲鐻。鐻成。見者驚猶鬼神。卽此所謂乃疑於神也。列子黃帝篇。正作疑。張湛注曰。意專則與神相似者也。可據以訂正。

覆卻萬方。陳乎前而不得入其舍。

樾謹按萬下脫物字。此本以覆卻萬物爲句。方陳乎前而不得入其舍爲句。方者並也。方之本義爲兩舟相並。故方有並義。荀子致仕篇。莫不通。方起以尙盡矣。楊注曰。方起並起。漢書楊雄傳。雖方征僞與僂僂。兮。師古注曰。方謂並行也。皆其證也。方陳乎前。謂萬物並陳乎前也。今上句脫物字。而以方字

屬上讀。則所謂陳前者。果何指歟。郭注曰。覆卻雖多。而猶不以經懷。是其所據本有物字。蓋正文是萬物。故以多言。若如今本作萬方。當以廣大言。不當以多言也。列子黃帝篇。正作覆卻萬物。方陳乎前而不得入其舍。可據以訂正。

有張毅者。高門縣薄。無不走也。

樾謹按。無不走也。語意未明。司馬云。走至也。言無不至。門奉貴富也。亦殊迂曲。走乃趣之壞字。文選幽通賦。李善注引此文曰。有張毅者。高門縣薄。無不趣義也。字正作趣。但衍義字耳。呂氏春秋必已篇曰。張毅好恭。門閭帷薄。聚居衆無不趨。高誘注曰。過之必趨。淮南子人閒篇曰。張毅好恭。過宮室廊廟必趨。見門閭聚衆必下。廝徒馬圉。皆與伉禮。然不終其壽。內熱而死。其義更明。莊子文不備。故學者莫得其解耳。

沈有履。竈有髻。

樾謹按。司馬云。沈水汙泥也。則當與水有罔象等句相次。不當與竈有髻相次也。沈當爲熉。熉從甚聲。沈從尤聲。兩音相近。詩蕩篇。其命匪謚。說文心部引作天命匪忱。常棣篇。和樂且湛。禮記中庸篇引作和樂且耽。並其證也。熉之通作沈。猶謚之通作忱。湛之通作耽矣。白華篇。卽烘於熉。毛傳曰。熉竈也。是熉竈同類。故以熉有履。竈有髻。並言之耳。鄭裨謚字竈。謚卽熉之段字。漢書古今人表作裨湛。湛亦熉。

之段字。李善注文選鄒陽上吳王書曰。滿今沈字。又注答賓戲曰。滿古沈字。然則以沈爲燬。卽以滿爲燬也。

若夫以鳥養養鳥者。宜棲之深林。浮之江湖。食之以委蛇。

樾謹按委蛇未詳何物。李云。大鳥食蛇。然未聞養鳥者必食之以蛇也。司馬云。委蛇。泥鰌。此亦臆說。今按至樂篇云。夫以鳥養養鳥者。宜棲之深林。遊之壇陸。浮之江湖。食之鰌鰒。隨行列而止。委蛇而處。然則此文宜亦當云食之以鰌鰒。委蛇而處。傳寫有闕文耳。且云委蛇而處。方與下句則平陸而已矣。文氣相屬。若無而處二字。下句便不貫矣。

一上一下。以和爲量。山木。

樾謹按此本作一下一上。以和爲量。上與量爲韻。今作一上一下。失其韻矣。古書往往倒文以協韻。後人不知而誤改者甚多。秋水篇。無東無西。始於元冥。反於大通。亦後人所改。莊子原文。本作無西無東。與通爲韻也。王氏念孫已訂正矣。

尊則議。

樾謹按議當讀爲俄。詩賓之初筵篇。側弁之俄。鄭箋云。俄。傾貌。尊則俄。謂崇高必傾側也。古書俄字。或以義爲之。說見王氏經義述聞。尙書立政篇。亦或以議爲之。管子法禁篇。法制不議。則民不相私。議亦

俄也。謂法制不傾衰也。又或以儀爲之。荀子成相篇。君法儀。禁不爲。儀亦俄也。謂君法傾衰。則當禁使不爲也。

吾敬鬼尊賢。親而行之。無須臾離居。然不免於患。

樾謹按。崔譔本無離字。而以居字連上句讀。當從之。呂氏春秋慎人篇。胼胝不居。高誘訓居爲止。無須臾居者。無須臾止也。正與上句行字相對成義。學者不達居字之旨。而習於中庸不可須臾離之文。遂妄加離字。而居字屬下讀。失之矣。下文居得行而不名處。亦以居與行對言。郭注曰。居然自得此行。非是。

王獨不見夫騰猿乎。其得枿梓豫章也。攬蔓其枝。而王長其閒。

樾謹按。郭注曰。遭時得地。則申其長技。是讀長爲長短之長。然於本文之義。殊爲未合。司馬云。兩枝相去長遠也。則就樹本言。義更非矣。此當就猿而言。謂猿得枿梓豫章。則率其屬居其上。而自爲君長也。故曰王長其閒。釋文。王往況反。長丁亮反。頗得其讀。

人貌而天虛。緣而葆真。清而容物。田子方。

樾謹按。郭注以人貌而天四字爲句。殆失其讀也。此當以人貌而天虛爲句。人貌天虛相對成義。緣而葆真爲句。與清而容物相對成義。虛者孔竅也。淮南子汜論篇。若循虛而出入。高注曰。虛孔竅也。訓孔

竅故亦訓心。假真篇虛室生白。注曰。虛心也。太元斷初一曰。斷心滅斧。失初一曰。刺虛滅刃。滅刃與滅斧同。刺虛與斷心同。故穀初一曰。懷威滿虛。猶言滿心也。說詳太元經。此云人貌而天虛。卽人貌而天心。言其貌則人。其心則天也。學者不達虛字之義。誤屬下讀。則人貌而天句。文義不完。下兩句本相儷者。亦參差不齊矣。養生主篇。緣督以爲經。釋文引李云。緣順也。緣而葆真者。順而葆真也。上綴虛字。亦爲無義。

諸大夫蹵然曰。先君王也。

樾謹按。先君下疑奪命字。此本作先君命王也。故下文曰。先君之命王其無它。

文王觀於國。則列士壞植散羣。

樾謹按。司馬云。植。行列也。散羣。言不養徒衆也。一云。植者。疆界頭造屋以待諫者也。此兩說並未得植字之義。宣二年左傳。華元爲植。杜注曰。植。將主也。列士必先有主。而後得有徒衆。故欲散其羣。必先壞其植也。植之訓主。說詳羣經平議。

楚王與凡君坐。少焉。楚王左右曰。凡亡者三。

樾謹按。楚王左右言凡亡者三人也。郭注曰。言有三亡徵也。非是。

若正汝形。一汝視。天和將至。攝汝知。一汝度。神將來舍。知北遊。

樾謹按一汝度當作正汝度。蓋此四句變文以成辭。其實一義也。攝汝知卽一汝視之意。所視者專一。故所知者收攝矣。正汝度卽正汝形之意。度猶形也。淮南子道應篇。文子道原篇。並作正汝度。可據以訂正。

是天地之委形也。

樾謹按司馬云。委。積也。於義未合。國策齊策。願委之於子。高注曰。委。付也。成二年左傳。王使委于三吏。杜注曰。委。屬也。天地之委形。謂天地所付屬之形也。下三委字並同。

邀於此者。

樾謹按說文無邀字。彳部。微。循也。卽今邀字也。又曰。循。行順也。然則邀亦順也。邀於此者。猶言順於此者。郭注曰。人生而遇此道。是以遇訓邀。義旣迂曲。且于古訓無徵。殆失之矣。

神農隱几擁杖而起。

樾謹按旣言擁杖而起。不當言隱几。疑隱几字涉上文神農隱几闔戶晝瞑而衍。

光曜問乎無有曰。夫子有乎。其無有乎。光曜不得問。而孰視其狀貌。

樾謹按淮南子道應篇。光曜不得問。上有無有弗應也。五字當從之。惟無有弗應。故光曜不得問也。此脫五字。則義不備。





# 諸子平議卷十九

## 莊子三

夫春氣發而百草生。正得秋而萬寶成。庚桑楚。

樾謹按得字疑衍文。莊子原文蓋作正秋而萬寶成。周易說卦傳兌正秋也。萬物之所說也。正義曰。正秋而萬物皆說成也。卽本莊子之義。是其證也。得字蓋涉下句夫春與秋豈無得而然哉。因而誤衍。春氣發而百草生。正秋而萬寶成。文義已足。不必加此一字。與上句相儷偶也。

函車之獸介而離山。

樾謹按方言獸無偶曰介。一本作分。非。

抱汝生。

樾謹按釋名釋姿容曰抱保也。相親保也。是抱與保義通。抱汝生卽保汝生。郭注曰無攬乎其生之外也。猶泥抱字爲說未達假借之旨。

夫外韞者不可繁而捉。將內捷。內韞者不可繆而捉。將外捷。

樾謹按郭於此無注。而注下文曰雖繁手以執之。綢繆以持之。弗能止也。則訓繁爲繁手。殆不可通矣。

繁疑繁字之誤。繁俗作繖。漢書司馬相如傳。名家苛察繖繞。如淳曰。繖繞猶纏繞也。此以繁而捉。繖而捉。並言。繁謂繁繞。繖謂綱繖。廣雅釋詁。繁與綱繖。並訓纏。是其義一也。繁繁形似。因而致誤耳。

終日噪而隘不嘔。

樾謹按。釋文嘔本作嘔。徐音憂。當從之。老子終日號而不嘔。傳奕本作歔。即嘔之異文也。楊子太元經。夷次三曰。柔嬰兒于號三日不嘔。二宋陸王本皆如是。蓋以嘔與柔爲韻。可知楊子所見老莊皆作嘔也。

終日握而手不挽。

樾謹按。說文無挽字。角部觥。角觥曲也。疑卽此挽字。以角言則從角。以手言則從手。變觥爲挽。字之所由。以孳乳浸多也。終日握而手不挽。謂手不拳曲也。崔云。挽寄也。殊非其義。

夫至人者。相與交食乎地。而交樂乎天。

樾謹按。郭注曰。自其無心。皆與物共。釋文引崔云。交俱也。李云。共也。是皆未解交字之義。徐無鬼篇曰。吾與之邀樂於天。吾與之邀食於地。與此文異義同。交卽邀也。古字止作微。文二年左傳。寡君願微福於周公魯公。此云邀食乎地。邀樂乎天。語意正相似。作邀者後出字。作交者假借字。詩桑扈篇。彼交匪傲。漢書五行志作匪傲匪傲。卽其例矣。

不可內於靈臺

樾謹按不可上當有萬惡二字。上文云若是而萬惡至者皆天也。而非人也。不足以滑成。其文已足。萬惡不可內於靈臺。則又起下意。下文云靈臺者有持而不知其所持。而不可持者也。皆承此言之。讀者不詳文義。誤謂不可內於靈臺與不足以滑成兩句相屬。故刪萬惡二字耳。文選廣絕交論李善注引此文正作萬惡不可內於靈臺。

券外者志乎期費

樾謹按郭注曰有益無益期欲損己以爲物也。則旣言志又言期於義複矣。釋文曰期卒也。費耗也。卒有所費耗也。然志乎卒耗於義亦不可通。今按荀子書每用綦字爲窮極之義。王霸篇曰欲綦色耳。欲綦聲。楊倞注曰綦極也。亦或作期。議兵篇曰已綦三年。然後民可信也。宥坐篇曰綦三年而百姓往矣。是期與綦通。期費者極費也。費謂財用也。呂氏春秋安死篇非愛其費也。高注曰費財也。期費之義與綦色綦聲相近。彼謂窮極其聲色此謂窮極其財用也。故下文曰志乎期費者惟賈人也。與物且者其身之不能容焉能容人。

樾謹按且卽苟且之且。詩東門之枌篇穀旦于差。韓詩旦作且。云苟且也是重言爲苟且。單言爲且也。上文與物窮者。郭注曰窮謂終始。是窮爲窮極之義。苟且與窮極義正相反也。釋文曰且始也。非是。

孰知有無死生之一守者。吾與之爲友。

樾謹按一守者一道也。道字古讀若守。故與守通。知北游篇大馬曰。子巧與有道與。曰。臣有守也。守卽道字。達生篇仲尼曰。子巧乎。有道邪。曰。我有道也。是其明證。說本王氏念孫。道者德之欽也。

樾謹按說文广部。廡陳與服于庭也。小爾雅廣詁。廡陳也。此欽字卽廡之段字。蓋所以生者爲德。而陳列之卽爲道。故曰德之廡也。漢書哀帝紀注。引李斐曰。陳道也。是其義矣。

介者侈畫外非譽也。

樾謹按郭注曰。畫所以飾容貌也。別者之貌。旣以虧殘。則不復以好醜在懷。故侈而棄之。然云外非譽。似不當以容貌言。崔云。侈畫不拘法度也。當從之。漢書司馬相如傳。侈以陸離。師古注曰。侈自放縱也。卽此侈字之義。桓六年穀梁傳。以其畫我。公羊傳作化我。何休注曰。行過無禮謂之化。卽此畫字之義。蓋人旣別足。不自顧惜。非譽皆所不計。故不拘法度也。

下之質執飽而止。是狸德也。徐無鬼。

樾謹按廣雅釋獸。狸。貓也。貓之捕鼠。飽而止矣。故曰是狸德也。秋水篇曰。騏驥驪騮。一日而馳千里。捕鼠不如狸狴。此本書以狸爲貓之證。御覽引尸子曰。使牛捕鼠。不如貓狴之捷。莊子言狸狴。尸子言貓。

狽。一也。釋文曰：狸，德謂貪如狐狸也，未得其義。

察士無凌諄之事，則不樂。

樾謹按：禮記鄉飲酒篇，愁以時察。鄭注曰：察，猶察察，嚴殺之貌也。老子：俗人察察。河上公注曰：察，察急且疾也。然則察有嚴急之意，故以凌諄爲樂。李云：察，識也。則與上文知士複矣。

枯槁之士宿名。

樾謹按：宿讀爲縮。國語楚語：縮於財，用則匱。戰國策：縮劍將自誅。韋昭高誘注並曰：縮，取也。枯槁之士，縮名，猶言取名也。釋文曰：宿，積久也。于義未安。又引王云：其所寢宿，唯名而已。更爲迂曲，由不知宿爲縮之段字耳。

農夫無草萊之事，則不比。商賈無市井之事，則不比。

樾謹按：比，通作庀。周官遂師疏云：周禮之內云比者，先鄭皆爲庀，是也。國語魯語：子將庀季氏之政焉。又曰：夜庀其家事。韋注並曰：庀，治也。農夫惟治草萊之事，故無草萊之事，則不庀。商賈惟治市井之事，故無市井之事，則不庀也。郭注曰：能同則事同，所以比。是以本字讀之，非是。

其求唐子也，而未始出域，有遺類矣。

樾謹按：有遺類矣，當連下夫字爲句。有遺類矣夫，與襄二十四年左傳：有令德也夫，有令名也夫，句法

相似。類謂種類也。詩裳裳者華序。棄賢者之類。正義曰。類謂種類是也。求亡子而不出城。則其亡子不可得。必無遺類矣。故曰有遺類矣。夫反言以明之也。郭注失其讀。所說未得。

夫楚人寄而謫闇者。

樾謹按。夫字當屬上有遺類矣。爲句。謫當讀謫。方言。謫。怒也。廣雅釋詁。謫。責也。楚人寄而謫闇者。謂寄居人家而怒責其闇者也。與下文夜半於無人之時而與舟人鬪。均此楚人之事。皆喻其自以爲是也。郭注曰。俱寄止而不能自投於高地。於義殊不可通。

王射之。敏給搏捷矢。

樾謹按。郭於敏給下出注曰。敏。疾也。給。續括也。是以敏給屬王言。殆非也。敏給二字同義。後漢書酈炎傳。言論給捷。李賢注曰。給。敏也。是其證也。故國語晉語曰。知羊舌職之聰敏肅給也。使佐之。荀子性惡篇曰。齊給便敏而無類。並以敏給對言。然則郭以給爲續括。非古義矣。敏給當以狙言。謂狙性敏給。能搏捷矢也。捷讀爲接。爾雅釋詁。捷也。是捷與接聲近義通。莊十二年左氏經文。宋萬弑其君捷。僖三十二年鄭伯捷卒。文十六年。晉人納捷菑于邾。公羊捷並作接。人閒世篇。必將乘人而鬪其捷。釋文曰。捷本作接。此捷接通用。見於本書者。搏捷矢。卽搏接矢。謂以手搏而接其矢也。郭注曰。捷速也。夫矢自無不速。又何必言捷乎。

故足之於地也踐，雖踐，恃其所不蹶而後善博也。

樾謹按兩踐字，並當作淺，或字之誤，或古通用也。足之於地，止取容足而已，故曰足之於地也淺。然容足之外，雖皆無用之地，而不可廢也，故曰雖淺，恃其所不蹶而後善博也。外物篇曰：夫地非不廣且大也，人之所用容足耳。然則廁足而墊之致黃泉，人尚有利用乎？卽此義也。下文曰：人之知也少，雖少，恃其所不知而後知天之所謂也，少與淺文義相近，若作踐則不可通矣。

舊國舊都，望之暢然。雖使丘陵草木之繒，入之者十九，猶之暢然。況見見聞聞者也，則陽、

樾謹按繒字，司馬云：盛也。郭云：合也。於義俱通。入之者十九，釋文曰：謂見十識九也。此未得其義。入者，謂入於丘陵草木所掩蔽之中也。入之者十九，則其出於外而可望見者，止十之一耳。而猶覺暢然喜悅，故繼之曰：況見見聞聞者也。郭曰：見所嘗見，聞所嘗聞，而猶暢然，則於況見見聞聞句，不復可通，遂增益之曰：況體其體用其性也。於莊子本義不合矣。

以十仞之臺，縣衆聞者也。

樾謹按此承見見聞聞而言，以十仞之臺，而縣於衆人耳目之間，此人所共見共聞者，非猶夫丘陵草木之繒入之者十九也。其爲暢然可知矣。郭注曰：衆之所習，雖危猶聞，此誤讀聞爲閑，於義殊不可通。蓋由不解上文，故於此亦失其旨。

築十仞之城。城者既十仞矣。則又壞之。

樾謹按。下十字疑七字之誤。城者既七仞。則雖未十仞。而去十仞不遠矣。故壞之爲可惜。若既十仞。則直謂之已成可耳。不當言既十仞也。下文曰。今兵不起七年矣。此王之基也。明是以七仞喻七年。其爲字誤無疑。

故鹵莽其性者。欲惡之孽。爲性萑葦兼葭。始萌以扶吾形。尋擢吾性。

樾謹按。爲性萑葦兼葭六字爲句。郭於萑葦下出注云。萑葦害禾稷。欲惡傷正性。此失其讀也。始萌以扶吾形。尋擢吾性。尋與始相對爲義。尋之言寢尋也。漢書郊祀志。寢尋於泰山矣。晉灼曰。尋。遂往之意也。始萌以扶吾形。言其始若足以扶助吾形也。尋擢吾性。言寢尋既久。則拔擢吾性也。郭解扶吾形曰。形扶疎。則神氣傷。亦爲失之。

至齊見辜人焉。

樾謹按。釋文曰。辜。罪也。李云。謂應死人也。此失其義。辜。謂辜磔也。周官掌戮。殺王之親者辜之。鄭注曰。辜之言枯也。謂磔之。是其義也。漢書景帝紀。改磔曰棄市。師古曰。磔。謂張其尸也。是古之辜磔人者。必張其尸於市。故柏矩推而強之。解朝服而幕之也。

子乎子乎。



樾謹按子乎子乎。乃歎辭也。詩綱繆篇。子兮子兮。毛傳曰。子兮者。嗟茲也。管子小稱篇。嗟茲乎。聖人之言長乎哉。說苑貴德篇曰。嗟茲乎。我窮必矣。並以嗟茲爲歎辭。說詳王氏引之經義述聞。此云子乎子乎。正與子兮子兮同義。子當讀爲噉。釋文不爲子字作音。蓋失其義久矣。

匿爲物而愚不識。

樾謹按下文大爲難而罪不敢重爲任而罰不勝。遠其塗而誅不至。曰罪曰罰曰誅。皆謂加之以刑也。此曰愚。則與下文不一律矣。釋文曰。愚。一本作遇。遇疑過字之誤。廣雅釋詁曰。過。責也。因其不識而責之。是謂過不識。呂氏春秋適威篇曰。煩爲教而過不識。數爲令而非不從。巨爲危而罪不敢重爲任而罰不勝。與此文義相似。而正作過不識。高誘注訓過爲責。可據以訂此文之誤。過誤爲遇。又臆改爲愚耳。

是故丘山積卑而爲高。江河合水而爲大。

樾謹按水乃小字之誤。卑高小大相對爲文。

陰陽相照相蓋相治。

樾謹按蓋當讀爲害。爾雅釋言。蓋。割裂也。釋文曰。蓋。舍人本作害。是蓋害古字通。陰陽或相害。或相治。猶下句云。四時相代相生相殺也。

季真之莫爲接子之或使

樾謹按尙書微子篇殷其勿或亂正四方。多士篇時子乃或言枚傳竝曰或有也。禮記祭義篇庶或饗之。孟子公孫丑篇夫旣或治之。鄭趙注並曰或有也。此云季真之莫爲接子之或使或與莫爲對文。莫無也。或有也。周易益上九莫益之或擊之亦以莫或相對。

木與木相摩則然。外物、

樾謹按淮南子原道篇亦云兩木相摩而然。然兩木相摩未見其然。下句云金與火相守則流。疑此句亦當作木與火。下文云水中有火乃焚大槐。又云利害相摩生火甚多。衆人焚和月固不勝火。是此章多言火益知此文之當爲木與火矣。蓋木金二物皆畏火故舉以爲言見火之爲害大也。

相結以隱

樾謹按李云隱病患也。然病患非所以相結。郭注曰隱括進之謂也。然隱括所以正曲木亦非所以相結也。隱當訓爲私。呂氏春秋園道篇分定則下不相隱。高注曰隱私也。文選赭白馬賦恩隱周渥。李善引國語注曰隱私也。相結以隱謂相結以恩私舊說皆非。

天之穿之日夜無降

樾謹按降當作瘡。卽癰之籀文。素問宣明五氣篇膀胱不利爲癰。又五常政大論篇其病癰閼日夜無

瘁。謂不癰闕也。

官事果乎衆宜。

樾謹按論語子路篇行必果。皇侃義疏曰。果成也。衆有所宜。而後官事以成。故曰官事果乎衆宜。

彼視三釜三千鍾。如鸛雀蚊虻相過乎前也。

寓言。

樾謹按雀字衍文也。釋文云。元嘉本作如鸛蚊。無虻字。則陸氏所據本。尙未衍雀字。故元嘉本作鸛蚊。陸氏但言其無虻字。不言其無雀字也。惟鸛與蚊虻。一鳥一蟲。取喻不倫。王云。謂取大小相懸。以喻三釜三千鍾之多少。此不然也。夫至人之視物。一映而已。豈屑屑於三釜三千鍾之多寡。而必分別其爲鸛爲蚊乎。今按釋文云。鸛本作觀。疑是古本如此。其文蓋曰。彼視三釜三千鍾。如觀蚊虻相過乎前也。淮南子俶真篇。毀譽之於己。猶蚊虻之一過也。義與此同。因觀誤作鸛。則鸛蚊虻三字不倫。乃有刪一虻字。使蚊與鸛兩文相稱者。元嘉本是也。又有增一雀字。使鸛雀與蚊虻兩文相稱者。今本是也。皆非莊子之舊矣。

越人三世弑其君。王子搜患之。讓王。

樾謹按釋文云。搜。淮南子作翳。然翳之前無三世弑君之事。史記越世家索隱。以搜爲翳之子。無顯。據竹書紀年。翳爲其子所弑。越人殺其子。立無余。又見弑而立無顯。是無顯以前。三君皆不善終。則王子

搜是無顛之異名無疑矣。淮南子蓋傳聞之誤。當據索隱訂正。

顏闔對曰。恐聽者謬而遣使者罪。不若審之。

樾謹按上者字衍文。恐聽謬而遣使者罪。恐其以誤聽得罪也。聽即使者聽之。非聽者一人。使者一人也。呂氏春秋貴生篇。正作恐聽繆而遣使者罪。

夫生者豈特隨侯之重哉。

樾謹按隨侯下當有珠字。若無珠字。文義不足。呂氏春秋貴生篇。作夫生豈特隨侯珠之重也哉。當據補。

子綦爲我延之以三旌之位。

樾謹按綦字衍文。此昭王自與司馬子綦言。當稱子。不當稱子綦。

不能自勝則從神無惡乎。

樾謹按釋文曰。不能自勝則從絕句。此讀是也。又曰。一讀至神字絕句。則失之。呂氏春秋審爲篇。亦載此事。作不能自勝則縱之。神無惡乎。文子下德篇。淮南子道應篇。并疊從之二字作從之從之。則從神之不當連讀明矣。又按從呂氏春秋作縱。則當讀子用反。而釋文無音。亦失之。不能自勝而強不從者。此之謂重傷。

樾謹按重傷猶再傷也。不能自勝，則已傷矣。又強制之而不使縱，是再傷也。故曰此之謂重傷。呂氏春秋審爲篇高誘注曰：重讀復重之重是也。釋文音直用反。非是。

天寒既至，霜雪既降，吾是以知松柏之茂也。

樾謹按天乃大字之誤。國語魯語：大寒降，韋昭注曰：謂季冬建丑之月，大寒之後也。若作天寒既至，失其義矣。呂氏春秋慎人篇亦載此事，正作大寒。

道德於此則窮通，爲寒暑風雨之序矣。

樾謹按德當作得。呂氏春秋慎人篇作道德於此，則窮達一也。爲寒暑風雨之序矣。疑此文窮通下亦當有一也二字，而今奪之。

時祀盡敬而不祈喜。

樾謹按喜當作禧。爾雅釋詁：禧，福也。不祈禧者，不祈福也。呂氏春秋誠廉篇作時祀盡敬而不祈福也，與此字異義同。

樂與政爲正，樂與治爲治。

樾謹按呂氏春秋誠廉篇作樂正與爲正，樂治與爲治。疑此文亦當同。傳寫誤倒，子之罪大極重。盜跖。

樾謹按極當作殛。爾雅釋言。殛。誅也。言罪大而誅重也。極。殛古字通。書洪範篇。殛則殛死。多士篇。大罰殛之。僖二十八年左傳。明神殛之。昭七年傳。昔堯殛鯀于羽山。釋文並曰。殛本作極。卽將疏戚無倫。貴賤無義。長幼無序。五紀六位。將何以爲別乎。

樾謹按五紀。司馬云。歲月日星辰厯數。然與疏戚貴賤長幼之義不相應。殆非也。今按五紀卽五倫也。六位卽六紀也。白虎通三綱六紀篇曰。六紀者。謂諸父兄弟族人諸舅師長朋友也。此皆所以爲疏戚貴賤長幼之別。不曰五倫而曰五紀。不曰六紀而曰六位。古人之語異耳。家語八官篇。羣僕之倫也。王肅注曰。倫。紀也。然則倫紀得通稱矣。

孔子不見母。

樾謹按孔子無不見母事。疑仲子之誤。卽謂避兄離母之陳仲子也。下句匡子不見父。釋文云。案此事見孟子。不知兩事並見孟子也。

十步一人。千里不留行。說劍、

樾謹按十步之內。輒殺一人。則歷千里之遠。所殺多矣。而劍鋒不缺。所當無撓者。是謂十步一人。千里不留行。極言其劍之利也。行以劍言。非以人言。下文所謂行以秋冬是也。司馬云。十步與一人相擊。輒殺之。故千里不留於行也。未得其義。

今日試使士敦劍。

樾謹按詩閟宮篇。敦商之旅。鄭箋云。敦。治也。然則敦劍猶治劍。司馬云。敦。斷也。試使用劍相擊斷截也。失之迂曲。

曩者先生有緒言而去。漁父。

樾謹按楚辭九章。款秋冬之緒風。王注曰。緒。餘也。讓王篇曰。其緒餘以爲國家。是緒與餘同義。緒言者。餘言也。先生之言。未畢而去。是有不盡之言。故曰緒言。釋文曰。猶先言也。非是。

今者已得過也。若天幸然。

樾謹按釋文曰。過。或作遇。當從之。讓王篇。君過而遺先生食。釋文。過本亦作遇。是二字形近易誤也。過字義不可通。釋文謂得過失也。則失之迂曲矣。

闔胡嘗視其良。旣爲秋柏之實矣。列御寇

樾謹按釋文曰。良者良人。謂緩也。此與下句之義不屬。又云。良或作琅。冢也。此說近之。琅猶壙也。壙。塚本壘韻字。應帝王篇。以處壙琅之野。是也。故壙亦得謂之琅。管子度地篇。郭外爲之十閭。閭與琅同。外物篇。胞有重閭。郭注曰。閭。空曠也。其義亦相近。

自是有德者以不知也。而況有道者乎。

樾謹按自是二字絕句。若緩之自美其儒是自是也。有德者已不知有此。有道者更無論矣。故曰有德者以不知也。而況有道者乎。以讀爲已。郭注所說殊未明了。

歸精神乎無始。而甘冥乎無何有之鄉。

樾謹按釋文冥如字。又云本亦作瞑。又音眠。當從之。瞑眠古今字。文選養生論達旦不瞑。李善注曰。瞑古眠字是也。甘瞑卽甘眠。徐無鬼篇孫叔敖甘寢秉羽而郢人投兵。司馬云言叔敖願安寢恬臥。以養德于廟堂之上。折衝于千里之外。此云甘瞑。彼云甘寢。其義一也。並謂安寢恬臥也。釋文讀冥如字。失之。淮南子似真篇曰。甘瞑于溷濶之域。卽本之此。

槁項黃馘者。

樾謹按馘者俘馘也。非所施於此。馘疑瘕之段字。說文尸部。瘕頭痛也。黃瘕謂頭痛而色黃。

宵人之離外刑者。

樾謹按郭注曰。不由明坦之塗者。謂之宵人。釋文引王注云。非明正之徒。謂之宵夜之人也。皆望文生義。未爲瑯詰。宵人猶小人也。禮記學記篇宵雅肄三。鄭注曰。宵之言小也。習小雅之三。謂鹿鳴四牡皇皇者華也。然則宵人爲小人。猶宵雅爲小雅矣。字亦作宵。方言曰。宵小也。史記太史公自序。申呂宵矣。徐廣曰。宵音瘠。瘠猶衰微。義亦相近。文選江文通雜體詩。宵人重恩光。李善注。引春秋演孔圖曰。宵人



之世多飢寒。宋均曰。宵猶小也。此說得之。

故有貌愿而益。

樾謹按。益當作溢。溢之言驕溢也。荀子不苟篇。以驕溢人是也。謹愿與驕溢。義正相反。有堅而縵。有緩而鈇。

樾謹按。縵者慢之段字。鈇者悍之段字。堅強而又惰慢。紆緩而又桀悍。故爲情貌相反也。醉之以酒。而觀其側。

樾謹按。釋文曰。側。不正也。一云。謂醉者喜傾側冠也。王云。側。謂凡爲不正也。然上文觀其忠觀其敬云。云。所觀者皆舉美德言之。此獨觀其不正。則不倫矣。諸說皆非也。其云側。或作則。當從之。則者法則也。國語周語曰。威儀有則。既醉之後。威儀反反。威儀化化。是無則矣。故曰醉之以酒。而觀其則。周書官人篇。作醉之酒。以觀其恭。與此文語意相近。大戴記文王官人篇。作醉之以觀。其不失也。不失卽謂不失法則也。

賊莫大乎德有心。而心有睫。

樾謹按。郭注曰。役心於眉睫之間。則僞已甚矣。然正文言心有睫。非役心於眉睫之謂。郭注非也。心有睫。謂以心爲睫也。人於目之所不接。而以意度之。謂其如是。是心有睫也。聖人不逆詐。不意不信。豈如

是乎。故曰賊莫大乎德有心，而心有睫。下文曰：及其有睫也，而內視。內視而敗矣。然則心有睫，正內視之謂。內視者，非謂收視返聽也。謂不以目視而以心視也。後世儒者執一理以斷天下事，近乎心有睫矣。

天下多得一察焉以自好天下。

樾謹按郭注斷天下多得一爲句，釋文曰：得一，偏得一術。王氏念孫謂天下多得一察焉以自好，當作一句讀。一察謂察其一端，而不知其全體。今按郭讀文不成義。當從王讀。惟以一察爲察其一端，義亦未安。察當讀爲際，一際猶一邊也。廣雅釋詁：際邊並訓方。是際與邊同義。得其一際，卽得其一邊。正不知全體之謂。察際並從祭聲。古音相同，故得通用耳。下文云：不該不徧，一曲之士也。一際與一曲，其義相近。

爲之大過，已之大順。

樾謹按已讀爲以，順讀爲馴。古字並通，以用也。以之大馴，謂用之太習熟也。

名山三百，支川三千。

樾謹按名山當作名川，字之誤也。名川支川，猶言大水小水。下文曰：禹親自操橈耜而九雜天下之川，可見此文專以川言，不當言山也。若但言支川而不言名川，則是舉流而遺其原，於文爲不備矣。襄十

一年左傳曰。名山名川。是山川並得名。學者多見名山。尠見名川。故誤改之耳。呂氏春秋有始覽篇。淮南子墜形篇。並曰名川六百。

雖然。墨子真天下之好也。

樾謹按。真天下之好。謂其真好天下也。卽所謂墨子兼愛也。下文曰。將求之不得也。雖枯槁不舍也。此求字卽心誠求之之求。求之不得。雖枯槁不舍。卽所謂磨頂放踵。利天下爲之也。郭注未得。龜長於蛇。

樾謹按。此卽莫大於秋豪之末。而大山爲小之意。司馬云。蛇形雖長。而命不久。龜形雖短。而命甚長。則不以形言。而以壽言。真爲龜長蛇短矣。殊非其旨。

惠施曰。以其知。與人之辯。特與天下之辯者爲怪。此其柢也。

樾謹按。與人之辯。義不可通。蓋涉下句天下之辯者。而衍之字。柢與氏通。史記秦始皇紀。大氏盡畔秦吏。正義曰。氏猶略也。此其柢也。猶云此其略也。上文卯有毛鷄三足以下。皆是。



## 諸子平議卷二十

商子

無宿治。則邪官不及爲私利於民。而百官之情不相稽。則農有餘日。邪官不及爲私利於民。則農不敵。農不敵而有餘日。則草必墾矣。舉令

樾謹按此當作無宿治。則邪官不及爲私利於民。而百官之情不相稽。邪官不及爲私利於民。則農不敵。百官之情不相稽。則農有餘日。農不敵而有餘日。則草必墾矣。傳寫有奪誤耳。

信則臣不敢爲邪。

樾謹按臣當作官。因官誤作宦。又誤作臣耳。下文申說此文曰。上信而官不敢爲邪。可證臣字之誤。民無所於食則必農。

樾謹按民字衍文也。上云。則辟淫游食之民。無所於食。此云。無所於食則必農。兩文相承。若有民字。必并有辟淫游食之五字。於文方足。今無此五字。故知亦無民字也。下文云。壹山澤則惡農慢惰倍欲之。民無所於食。無所於食。則必農。文與此同。可證矣。施氏先秦諸子本。正無民字。當據以訂正。

愛子情民不窳。

樾謹按此承上文而言。亦當作愛子不惰食。惰民不窳。因有兩惰字。寫者於上惰字下。卽接寫民不窳。遂并誤刪上不字耳。

農不能喜酣爽。

樾謹按詩采芑篇。路車有爽。毛傳曰。爽。赤貌。字亦作輦。輦彼洛矣篇。韎韐有爽。白虎通爵篇引作韎韐有輦。是也。輦爲赤貌。此以酣輦連文。蓋謂酒醉面而赤矣。

則誅愚亂農。

樾謹按誅通作朱。莊子庚桑楚篇。人謂我朱愚。卽此文誅愚矣。太元童次七。修侏侏。范望注曰。侏侏。無所知也。義與愚近。作誅作朱。並侏之段字。說文金部。鍾也。亦聲。近而義通。

官屬少徵不煩。

樾謹按徵上當補則字。方與通篇文法一律。

姦民無主。則爲姦不勉。爲姦不勉。則姦民無樸。本姦民無樸。則農民不敗。

樾謹按勉當爲免。言爲姦者不得免也。樸之言樸屬也。考工記鄭注曰。樸屬猶附著。堅固貌也。字通作僕。詩既醉篇。景命有僕。毛傳曰。僕。附也。姦民無樸。謂姦民無所附屬也。本字衍文。因讀者誤以樸爲根株。故衍本字耳。鄭案本於姦民無樸下有樸根株也四字。此乃舊解之誤入正文者。本字之衍。職此之

由。

皆作壹而得官爵。農戰

樾謹按皆作壹而得官爵。當作皆從壹孔而得官爵。下云民見上利之從壹空出也。則作壹上利之從壹孔出。卽承此文而言。下云則作壹。乃始言其效。然則此文不得云作壹明矣。

要靡事商賈爲技藝。皆以避農戰。具備國之危也。民以此爲教者。其國必削。

樾謹按具備國之危也。六字乃衍文。下云要靡事商賈爲技藝。皆以避農戰。民以此爲教。則粟焉得無少。而兵焉得無弱也。兩文大略相同。而無此六字。故知此亦不當有矣。

技藝之足以距口也。

樾謹按距字無義。乃𪔐字之誤。莊子人閒世篇釋文引李云。𪔐食也。崔云。字或作互。或作𪔐。然則𪔐卽𪔐之俗字。足以𪔐口。卽足以𪔐口也。

國作一歲者十歲強。作一十歲者百歲強。修一百歲者千歲強。

樾謹按作之一字。於文未明。第三句作修。又不一律。且十歲強。百歲強。並無一字。而云作一十歲者。修一百歲者。此兩一字亦殊嫌贅設矣。反覆求之。乃知此文承上句是以聖人作壹搏之也。而言本云國作壹。一歲者十歲強。作壹。十歲者百歲強。作壹。百歲者千歲強。乃極言作壹之效也。讀者誤謂壹一同

字。而於作壹一歲句。刪去壹字。於下兩句又誤以壹十歲壹百歲連讀。改壹爲一。末句作字。又誤爲修。於是其義全失矣。本篇作壹字屢見。此文四言作壹。乃一篇之大指也。傳寫錯誤。亟宜訂正。

煩言飾辭而章無用。

樾謹按章乃竟字之誤。竟猶終也。言終歸無用也。

興兵而伐必取。必能有之。去強。

樾謹按取下當疊取字。蓋有取而不能有者矣。故曰取必能有之也。斬令篇作兵出必取。取必能有之。當據補。

國好力日以難攻。好言日以易攻。

樾謹按兩日字乃曰字之誤。說民篇。國好力日以難攻。國好言日以易攻。文與此同。可據以訂正。治國能富者貧。令貧者富。則國多力。

樾謹按此當作治國能令貧者富。富者貧。今本傳寫誤倒。則能富者貧句。文義不足矣。且據上文云。貧者使以刑則富。富者使以賞則貧。是貧者句。宜在富者之前也。說民篇。治國之舉。貴令貧者富。富者貧。與此正同。可據訂。

舉口數生者著。死民者削。



樾謹按民字衍文。此蓋言舉戶口之數。生者則著之。死者則削之也。襄二十七年左傳。仲尼使舉是禮也。釋文引沈注曰。舉謂紀錄之也。此舉字義與彼同。境內篇云。四境之內。丈夫女子皆有名於上者。著死者削。則又奪生字。當作生者著死者削。可與此文互訂。

輕者不止。則重者無從至矣。說民。

樾謹按至當作止。上文云。行刑重其輕者。輕者不生。則重者無從至矣。蓋謂民且不敢犯輕罪。自不敢犯重罪。故重者不至。卽去強篇所謂輕者不生。重者不來也。此云行刑重其重者。輕其輕者。輕者不止。則重者無從止矣。蓋謂民既敢於犯輕罪。亦必敢於犯重罪。故重者無從止也。乃涉上文而亦誤作至字。則與商子之意大謬矣。

國敵者必王。

樾謹按國下當補無字。去強篇作國無敵者強。強必王。可證。

故王者刑於九而賞出一。

樾謹按此當作刑於九而賞於一。去強篇曰。王者刑九賞一。強國刑七賞三。削國刑五賞五。是刑九賞一。乃刑多賞少之意。非如農戰篇所云。利從壹孔出也。不當作出一明矣。下云。民之所欲萬。而利之所出一。與此義本不相蒙。今作賞出一。蓋涉下文而誤。

山林居什一。藪澤居什一。谿谷流水居什一。都邑蹊道居什四。算地。

樾謹按都邑蹊道下有闕文。今據來民篇補云。都邑蹊道居什一。惡田居什一。良田居什四。非生之常也。而爲之者名也。

樾謹按生性古通用。此生字當讀爲性。上文曰。求名失性之常。

故民生則計利。死則慮名。利之所出。不可不審也。

樾謹按名下當疊名字。蓋曰名利之所出。不可不審也。故下云利出於地。則民盡力。名出於戰。則民致死。正承此文而言。古書遇重文。止作二小畫識之。傳寫奪去耳。

故其農勉而戰戢也。

樾謹按此戢非戢止之義。當讀爲捷。詩鴛鴦篇。戢其左翼。釋文引韓詩曰。戢捷也。蓋戢與捷聲近而義同。下云戰戢則鄰危。若以本字讀之。義不可通矣。

故天地設而民生當此之時也。

樾謹按此乃下開塞篇之起語。開塞篇曰。天地設而民生之。當此之時也。民知其父而不知其母。首二語誤入此篇。於上下文皆不屬。當刪。

親則別。開塞。

樾謹按當作親親則別傳寫奪一親字。

親親者以私爲道也。而中正者使私無行也。

樾謹按中正當作立中。因立與正形近而誤。遂倒其文爲中正耳。上文曰。故賢者立中。設無私而民曰仁。此文承彼而言。則當爲立中。不當爲中正矣。且立中者。使私無行。與上文立君者使賢無用。兩文相對。益知今本之非。

故以愛王天下者并刑。力征諸侯者退德。

樾謹按并當讀爲屏。謂屏除之也。以愛則屏刑。以力則退德。兩文相對。作者段字。

故效於古者。先得而防。治於今者。前刑而法。

樾謹按得當爲德。德刑對文。作者古字通。

二者名實實易。

樾謹按賀者侔之段字。言其名相侔。其實則相易也。漢高彪碑。賀昔舊檀。亦是段賀爲侔。集韻曰。賀又音侔。

此吾以殺刑之反於德。而義合於暴也。

樾謹按殺乃效字之誤。此吾以效刑之反於德。猶言此吾以明刑之反於德也。荀子正論篇。故桀紂無

天下而湯武不弑君。由此效之也。楊倞注曰。效。明也。蓋古語如此。

事本不可不搏也。豈言、

樾謹按。事猶立也。言立本不可不搏也。禮記郊特牲篇。信事人也。鄭注曰。事猶立也。是其義矣。字亦作傳。周官大宰職。以任百官。鄭注曰。任猶傳也。釋文曰。傳側吏反。猶立也。賈疏曰。東齊人物立地中爲傳。故國者其搏力也。以富國強兵也。

樾謹按。國上有闕文。據上文云。夫聖人之治國也。能搏力。能殺力。下文云。治國者貴民一。則所闕者當是治字。

下修令而不時移。

樾謹按。令乃今字之誤。下修今。與上法古爲對文。下文曰。故聖人之爲國也。不法古。不修今。是其證。夫離朱見秋毫百步之外。而不能以明日易人。烏獲舉千鈞之重。而不能以多力易人。夫聖人之存體性。不可以易人。錯法、

樾謹按。易者延也。詩皇矣篇。鄭箋曰。施猶易也。延也。是易與延同義也。離朱之明目。烏獲之多力。聖人之體性。皆不能延及於他人之身。故曰不可易也。四戰之國。好舉與兵。以距四鄰者。國危。兵守、

樾謹按舉衍字蓋卽興字之誤而衍者

客不盡夷城客無從入

樾謹按上客字衍文城字當在不字之上其文曰城不盡夷客無從入與下文城盡夷客若有從入相對爲義夷平也

給從從之不洽而燠之使客無得以助攻備

樾謹按上從字下有闕文下從字當在不洽之下洽亦當爲給此文當云給從而口之不給從而燠之蓋承發梁撤屋而言所發之梁所撤之屋其材尙可作它用若其力有餘則取之而歸若其力不足則從而燠之無使爲敵用也給與不給以力之有餘不足言或兼時之緩急地之遠近也給洽古通用爾雅釋天大歲在未曰協洽童子逢盛碑作協給是也上作給正字下作洽段字上下文用字不同者古書往往有之至上句所闕字則不可以意補矣

行治曲斷以五里斷者王以十里斷者強宿治者削斬令

樾謹按曲字無義疑由字之誤言行治由乎斷也宿治者削上尙有日治者王夜治者強八字當據去強說民二篇補

農宏姦勝則國必削

樾謹按宏字義不可通。乃飢字之誤。史記司馬相如傳。微飢受訓。索隱曰。飢倦也。農飢姦勝。謂農夫倦殆而姦邪者勝也。凡從谷之字。隸變作余。故文選子虛賦。飢作飢。飢字闕壞。止存右旁余字。因誤爲宏矣。去強篇。農而姦勸。其兵弱。國必削至亡。亦以農姦對文成義。姦勸猶姦勝也。其而字乃更之壞字。更弱也。

授官子爵。出則祿不以功。是無當也。

樾謹按此本云。授官子爵。出祿不以功。則是無當也。傳寫者誤移則字於祿字之上。遂不可通。國富而不戰。偷生於內。六蟲必弱。

樾謹按此當作國富而不戰。毒輸於內。六蟲生必弱。去強篇云。國強而不戰。毒輸於內。禮樂蟲官生必削。與此文略同。可證也。因奪毒字。而輸又誤作偷。遂移下句生字於上。非其本文矣。

六蟲曰禮樂。曰詩書。曰修善。曰孝悌。曰誠信。曰貞廉。曰仁義。曰非兵。曰羞戰。國有十二者。上無使農戰。必貧至削。

樾謹按上言六蟲。下言十二者。而中所列凡九事。於數皆不合。疑禮樂詩書孝悌當爲六事。本作曰禮。曰樂。曰詩。曰書。曰修善。曰孝。曰悌。曰誠信。曰貞廉。曰仁義。曰非兵。曰羞戰。故總之爲十二也。然則何以稱六蟲。曰六蟲二字乃衍文也。六蟲之文。見去強篇。其文曰。農商官三者。國之常官也。三官者生蟲官。

者六曰歲曰食曰玩曰好曰志曰行。此說六蟲最得。蓋歲也食也農之蟲也玩也好也商之蟲也志也行也官之蟲也去強篇又曰國有禮有樂有詩有書有善有修有孝有悌有廉有辯國有十者上無使戰必削至亡然則商子之意不以此爲六蟲明矣而去強篇又曰國用詩書禮樂孝弟善修治者敵至必削國不至必貧國不用八者治敵不敢至雖至必卻則又變十爲八農戰篇曰詩書禮樂善修仁廉辯慧國有十者上無使戰是其數雖亦爲十而所列十事又微有不同疑傳寫或增或減非必皆其本文所言之數各就其事言之耳實當從此文作十二者爲定且此言修善而彼分善修爲二於義亦未安也今定爲十二事而以六蟲二字爲衍文似得之矣

重刑少賞上愛民民死賞重賞輕刑上不愛民民不死賞

樾謹按死賞皆當作死上聲之誤也去強篇曰重罰輕賞則上愛民民死上重賞輕罰則上不愛民民不死上可證此文之誤

輕者不至重者不來

樾謹按不至乃不生之誤當據去強篇訂

罪重刑輕刑至事生

樾謹按此本作重重輕輕刑至事生亦當據去強篇訂

力生強，強生威，威生德，德生力。

樾謹按此皆蒙力生強而言。乃又云德生力，於義難通。據去強篇云：刑生力，力生強，強生威，威生德，德生於刑，亦與此文略生於力，與此文略同。惠卽德也。又據說民篇云：刑生力，力生強，強生威，威生德，德生於刑，亦與此文略同。刑卽力也。然則此文當作德生於力。

故不多惠言而剋其實。修機

樾謹按不字衍文也。多惠言而剋其實，乃口惠而實不至之意。故與數加嚴令而不致其刑相對爲文。行賞賤祿，不稱其功，則戰士不用。

樾謹按賤當作賦，形近而誤。漢書哀帝紀：皆以賦貧民。師古注曰：賦，給與也。

此其土之不足以生其民也。以有過秦民之不足以實其土也。來民

樾謹按有過上不當有以字衍文也。此蓋言韓魏之土不足生其民，秦民不足以實其土。二者相較，則韓魏土之不足，殆有甚焉。故曰有過秦民之不足以實其土也。

意民之情，其所欲者田宅也。而晉之無有也信，秦之有餘也必。如此而民不西者，秦士威而民苦也。

樾謹按信字必字絕句。承上言韓魏之土不足生其民，則其田宅之無有也信矣。秦之民不足實其土，則其田宅之有餘也必矣。故曰晉之無有也信，秦之有餘也必。



今秦之以強強者。

樾謹按上言三晉之所以弱者。此當言今秦之所以強者。奪所字衍強字。

天下有不服之國。則王以此春闢其農。夏食其食。秋取其刈。冬陳其寶。以大武搖其本。以廣文安其嗣。樾謹按闢當作達。寶當作葆。皆同聲段借字。陳當作凍。形近而誤也。此數語見周書大武篇。其文曰。四時一春達其農。二夏食其穀。三秋取其刈。四冬凍其葆。孔晁注曰。凍謂發露其葆聚。商君所說。卽本周書大武之文。故曰以大武搖其本也。又曰以廣文安其嗣。今周書無廣文篇。而文傳篇曰。文王受命之九年。時維暮春。在鄙。召太子發曰。嗚呼。我身老矣。吾語汝。我所保與我所守。傳之子孫。然則所謂以廣文安其嗣者。豈卽此篇乎。

而王何爲受爵而重復乎。

樾謹按受乃愛字之誤。愛爵而重復。見上文。有能用之。費此之半。

樾謹按上之字衍文。費此二字誤倒。當云有能用此費之半。萬乘之國。不敢蘇其兵中原。賞刑。

樾謹按荀子議兵篇。蘇刃者死。楊倞注曰。蘇讀爲僚。僚向也。謂相向格鬪者。此蘇字讀與彼同。

昔湯封於贊茅。

樾謹按隱十一年左傳而與鄭人蘇忿生之田。溫原絺樊隰城。櫟茅。杜注。櫟茅在修武縣北。此言湯封贊茅。卽其地也。漢書地理志。河南郡偃師戶鄉。殷湯所都。臣瓚曰。湯居亳。今濟陰縣是也。其地與修武不遠。皇甫謐帝王世紀。乃有三亳之說。而謂湯都在南亳。穀熟。穀熟故城。在今商丘縣。則去修武絕遠。與湯封贊茅之說。不可通矣。商子先秦古書。足可依據。湯都偃師。卽可以此爲證。故曰。贊茅岐周之粟。以賞天下之人。不人得一勝。

樾謹按勝讀爲升。古字通用。三輔黃圖曰。御宿園出粟。十五枚一勝。大梨如五勝。勝皆升之假字。周官之人。知而謂之。上者自免於罪。

樾謹按周當爲同。謂當爲謁。皆字之誤。

晉國之士。稽焉皆懼曰。

樾謹按稽猶同也。尙書堯典曰。若稽古。正義引鄭注曰。稽同也。禮記儒行篇。古人與稽。鄭注曰。稽猶合也。合與同義亦相近。稽焉皆懼。猶云同然皆懼也。

聖人非能通知萬物之要也。故其治國舉要。以致萬物。

樾謹按非能當作惟能。惟能知要。故能舉要。若作非能。不可通矣。斬令篇曰。聖君知物之要。故其治民。

有至要。足證此文非字之誤。

名尊地廣以至王者何故。名卑地削。以至於亡者。戰罷者也。畫策、

樾謹按何故下。奪戰勝者也四字。亡者下。奪何故二字。當云。名尊地廣以至王者何故。戰勝者也。名卑地削。以至於亡者何故。戰罷者也。如此則文義方備。下文云。不勝而王。不敗而亡者。自古及今。未嘗有也。即承此而言。

故與國而責之於兵。

樾謹按與乃舉字之誤。言舉一國之人。皆責之於兵也。

入其國。觀其治兵用者強。

樾謹按兵當作民。下云。奚以知民之見用者也。民之見戰也。如餓狼之見肉。則民用矣。正承此文而言。故知當作民用。

非其法亂也。非法不用也。

樾謹按下非字當作其。

國治或重。

樾謹按國下奪或重二字。重下奪亂字。當作國或重治。或重亂。下云。是謂重治。又云。是謂重亂。即承此。

而言下文云兵或重強或重弱正與此文一律可據訂正。

四境之內丈夫女子皆有名於上者著死者削境內。

櫛謹按此奪生字當作生者著死者削說見去強篇。

國封尉短兵千人。

櫛謹按封字衍文蓋卽尉字之誤而衍者下文兩言國尉分地可證。

吏自操及杖以上。

櫛謹按杖乃校字之誤上文曰軍爵自一級已下至小夫命曰校徒操出卽此所謂自操及校也彼文

出字疑當作士古書士出字多互誤。

故爵上造就爲簪褭就爲不更故爵爲大夫。

櫛謹按就爲簪褭下當補故爲簪褭四字故爵爲大夫當作故爵不更就爲大夫。

故爵大夫就爲公大夫就爲公乘就爲五大夫。

櫛謹按就爲公大夫下當補故爵公大夫五字就爲公乘下當補故爵公乘四字。

就爲大庶長故大庶長就爲左更故四更也就爲大良造。

櫛謹按此當在上文故爵五大夫之下大庶長之大並衍文也漢書百官公卿表爵一級曰公士二上

造三饗。四不更。五大夫。六官大夫。七公大夫。八公乘。九五大夫。十左庶長。十一右庶長。十二左更。十三中更。十四右更。十五少上造。十六大上造。十七駟車庶長。十八大庶長。十九關內侯。是大庶長之爵。尊於左更。乃云故大庶長就爲左更。不可通矣。故知大字衍文也。此庶長兼左右庶長而言。謂故爵五大夫者。就爲左右庶長也。左右庶長之上。卽是左更。故曰故庶長就爲左更。於文正合。其云故四更也就爲大良造。此四字乃三字之誤。古書三字。每誤作四。儀禮覲禮篇四享。鄭注曰。四當爲三。古書作三四。或皆積畫。字相似。由此誤也。周官內宰疏引鄭注曰。純四猓。四當爲三。古三四積畫。是以三誤爲四。然則三更之爲四更。亦猶三享之爲四享。三猓之爲四猓矣。三更者。并左更中更右更而數之也。由左更中更右更而上之。卽爲少上造大上造。故曰故三更也。就爲大良造。大良造卽大上造也。不言少良造者。或文不備。或大少良造亦猶左右庶長分之則爲二。合之則爲一耳。此書所言。與表皆合。足徵秦制之所自來。而傳寫譌奪。且多竄益。遂不可讀。

小夫死以上至大夫。

懋謹按小夫字。各本皆同。而施氏先秦諸子本作小失。非也。上云軍爵自一級已下至小夫。則當時自有小夫名目。孫氏星衍校本。反從施作失。誤矣。故國富於貧。治重強弱民。

樾謹按此有闕文。去強篇云：國富而貧治，曰重富。重富者強，當據補。農商官三者，國之常食官也。

樾謹按食衍字。

法明省，任力言息，治者國治，言息兵強。

樾謹按法明下奪治字。法明治省，任力言息，四字爲句。承上文治衆國亂言多兵弱而言，謂法明則治省，任力則言息也。治者國治，當作治省。國治省與者字形相似而誤耳。此又承法明治省任力言息而言，謂治省則國治，言息則兵強也。正與上文治衆國亂言多兵弱相對成義。民之所樂民強，民強而強之，兵重弱，故民之所樂民強，民強而弱之，民重強。

樾謹按此承上文政作民之所惡，民弱，政作民之所樂，民強而言。當云政作民之所惡，民弱，民弱而強之，兵重弱，政作民之所樂，民強，民強而弱之，兵重強。傳寫奪誤，遂不可讀。文中故字，卽政字之形近而誤者。

爲辯志者不貴，外內、

樾謹按志當讀爲智。上文云爲辯智者貴是也。列子湯問篇：女志彊而氣弱。張湛注曰：志謂心智。是志與智義亦得通。

民之內事莫善於農。

樾謹按善當作苦。上云民之外事莫難於戰，故輕法不可以使之。此云民之內事莫苦於農，故輕治不可以使之。蓋惟民以戰爲難，以農爲苦，故輕法輕治不可使之也。善與苦形近而誤耳。下云故農之用，力最苦，可證此文之誤。

法制不明而求明之行令也，不可得也。君臣

樾謹按下明字當爲民。古每段萌爲𡗗。史記三王世家加以姦巧邊萌。索隱曰：萌一作𡗗。漢書霍去病傳及厥衆萌。劉向傳：民萌何以勸勉。師古注並曰：萌與𡗗同。然則此文明字或亦當作萌。

深淵者，知千仞之深。禁使、

樾謹按上深字當作探。言探淵而知其深也。今誤作深淵者，則於文義未足矣。

今夫騶虞以相監，不可事合而利異者也。若使馬焉能言，則騶虞無所逃其惡矣。利異也。

樾謹按毛傳以騶虞爲義獸，而周官鍾師疏曰：今詩韓魯說騶虞天子掌鳥獸官，以此書證之，則韓魯說亦古義也。惟事合而利異，當作事合而利同。商君之意，蓋以騶虞兩職，事合利同，不可使之相監，恐其互相容隱也。故必馬能言，始無所逃惡。下文云：吏之與吏，利合而惡同也，是其明證也。馬焉之焉，當爲衍文，卽馬字之誤而衍者，或疑是說文焉鳥之本義，然焉之與馬，既非一類，合稱焉焉於古無徵，殆

不可用。

此其執正使污吏有資，而成其姦險。小人有資，而施其巧詐。慎法、

樾謹按：執當爲敎，乃古勢字也。執字絕句，正使二字屬下讀。

夫以法相治，以數相舉者，不能相益。訾言者不能相損。

樾謹按：以數相舉下，奪譽字。因譽舉字形相似，故傳寫誤奪之耳。下文云：民見相譽無益。又云：見訾言無損。正承此而言，故知當有譽字也。

明書年月日時定分、

樾謹按：日知錄謂古無一日分十二時之說。自漢以下，曆法漸密，於是以一日分爲十二時。不知始於何人，至今不廢。然此書已言年月日時，則六國時已有此說矣。意所謂時者，尙是平旦鷄鳴之屬，而非今之所謂十二時歟。管子立政篇，乃發使者致令以布憲之日蚤宴之時，亦言日兼言時。



## 諸子平議卷二十一

### 韓非子

今秦出號令而行賞罰，有功無功相事也。初見秦、

樾謹按事者治也。高誘注呂氏春秋淮南內篇屢見詩卷耳篇毛傳曰采采事采之也。正義引鄭志答張逸云事謂事事。一一用意之事。蓋事訓治。故一一用意謂之事也。此言有功無功相事。正一一用意之義。謂分別其有功無功不混淆也。秦策作不攻耳無相攻事也。與上下文義不屬。蓋後人不達事字之義而臆改其功與攻則古字通用。

令荆人得收亡國，聚散民，立社稷主，置宗廟，令率天下西面以與秦爲難。此固以失霸王之道一矣。

樾謹按秦策無稷字。讀廟字絕句是也。收亡國聚散民立社主置宗廟皆三字爲句。後人誤以令字上屬成四字句。遂于上句加稷字配之耳。置宗廟令義不可通。此言荆人置宗廟非言其置令也。古宗廟亦未聞有令足知其非矣。下文曰令魏氏反收亡國聚散民立社稷主置宗廟令此固以失霸王之道二矣。稷字亦衍文。令下亦當有率天下西面以與秦爲難十字。秦策闕此句。後人據以刪韓子而令字誤屬上讀。故得僅存耳。夫率天下以與秦爲難故失霸王之道。若惟是收亡國聚散民立社主置宗廟

則是魏之得猶未足以見秦之失也。然則此句不可闕。因一字之幸存。而全句轉可據補也。  
趙危而荆狐疑。

樾謹按秦策作趙危而荆孤。盧氏文昭羣書拾補。顧氏廣圻韓非子識誤。並謂當從之。然存韓篇云。趙氏破膽。荆人狐疑。則狐疑字不誤。盧顧說非。

下不能盡其民力。

樾謹按下當從秦策作上。惟以上言。故曰其民。若以下言。則但曰不能盡其力足矣。盧氏拾補反以策爲非。失之。上文曰號令不治。賞罰不信。此正上之所以不能盡民力。民力之不盡。其故在上不在下。當言上不能。不當言下不能也。

大王垂拱以須之。

樾謹按秦策作大王拱手以須。吳師道補曰。韓作須之。然則韓非異於國策者。但句末多之字。其拱手字必與國策同。若作垂拱以須之。則吳師道何以不及乎。此必後人所改。當依國策訂正。

不能剋之也。又不能反。運罷而去。

樾謹按運乃軍字之誤。上云大王又并軍而至。此云軍罷而去。文義正相應。蓋不能勝則宜退。既不能剋又不能反。故其軍至於罷病而後去也。軍誤作運。義不可通。顧氏識誤。斷運字爲句。謂反當作及。運

讀曰鍾。失之迂曲矣。  
外者天下皆比意甚固。

樾謹按皆字衍文。蓋卽比字之誤而複者。秦策作外者天下比志甚固。無皆字。

使人使荆。重幣用事之臣。明趙之所以欺秦者。與魏質以安其心。從韓而伐趙。趙雖與齊爲一。不足患也。  
二國事畢。則轉可以移書定也。存韓。

樾謹按轉字無義。趙用賢本作韓是也。此篇名存韓。本因秦貴臣之計。舉兵將伐韓。故爲是說。勸之釋韓而伐趙。趙齊事畢。而韓可移書定。正見韓之不必伐也。乃乾道本道藏本皆作轉。則字之誤久矣。趙本固多臆改。然亦當以文義求之。未必趙本皆非。古本皆是也。廬氏拾補顧氏識誤。並以則韓爲非。蓋以上文已云從韓而伐趙。此不必更言定韓耳。今按韓未聞其將伐趙。秦何得從韓以伐趙。且秦之伐趙。亦何必從韓。疑韓字是衍文。蓋旣使人使荆。又與魏質。則荆魏不與我爲難矣。於是從而伐趙。從而者。繼事之詞。明其事次第當如此。非從他國之謂也。後人不達其義。以爲旣言從。必有所從之國。而妄補韓字以實之。廬氏顧氏不知上韓字之衍。而疑下韓字之非。誤矣。又下文云。韓秦強弱在今年耳。各本皆同。顧氏謂韓當作轉。尤誤。

詔以韓客之所上書。書言韓子之未可舉。

樾謹按子字衍文也。韓非因聞貴臣之計，舉兵將伐韓，故上此書。言韓之未可舉也，誤衍子字，義不可通。乾道本道藏本皆同，惟趙用賢本無子字，亦當從之。

秦之有韓，若人之有腹心之病也。虛處則恢然若居濕地，著而不去，以極走則發矣。

樾謹按舊注讀虛處則恢然五字爲句，訓恢爲妨，謂喻秦虛心待韓，韓終爲妨，其說於文義未安。顧氏謂虛處平居也，則恢然若居濕地，著而不去，十一字爲句，恢苦也，以極走則發矣，走衍字，極困也，視舊讀爲長，然平居不得謂之虛處，且走與處對文，則走字非衍也。今按此當以虛處則恢然若居濕地爲句，虛乃衍字也。蓋卽處字之誤而複者，著而不去爲句，以極走則發矣爲句，極猶亟也。古字通用，荀子賦篇出入甚極，又曰反覆甚極，楊倞注並曰極讀爲亟，是其證也。此言腹心之病，附著不去，平居猶可亟走則發矣，亟走喻急也。舊注曰卒然而走，是正讀極爲亟也。下文今若有卒報之事，韓不可信也，報當讀爲赴疾之赴，禮記少儀篇毋報往，喪服小記篇報葬者報處，鄭注並曰報讀爲赴疾之赴，是也。若有卒報之事，與亟走之喻相應，顧氏訓極爲困而刪走字，未得其旨。

田明辜射難言

樾謹按舊注曰非罪爲辜，射而殺之，此曲說也。辜射卽辜磔，磔從石聲，與射聲相近，故得通用。辜磔本疊韻字，荀子正論篇斬斷枯磔，以枯爲辜，此云辜射，又以射爲磔，古書每無定字，學者當以聲求之矣。

周禮掌戮殺王之親者辜之注曰謂磔之田明辜射卽此刑也字又作砒史記李斯傳十公主砒死於杜索隱曰砒與磔同古今字異耳

是故大臣之祿雖大不得藉威城市愛臣

樾謹按威字衍文也藉當讀爲籍詩韓奕篇實畝實籍唐石經作實畝實籍是其例矣漢書武帝紀籍吏民馬師古注曰籍者總入籍錄而取之卽此籍字之義管子輕重甲篇桓公欲藉於室屋欲藉於萬民欲藉於六蓄欲藉於樹木與此正同言大臣之祿雖大而城市之地不得藉而取之也下云黨與雖衆不得臣士卒臣士卒與藉城市相對成文今涉上文是謂威淫及國家偏威而誤衍威字則文不成義矣舊注云市衆所聚恐其乘衆而生心也不解威字是舊本猶未衍也

虛則知實之情靜則知動者正主道

樾謹按下知字當作爲靜則爲動者正猶下文云不智而爲智者正也涉上句而誤作知於義不可通是以不言善應不約而善增言已應則執其契事已增則操其符

樾謹按道藏本趙用賢本不言下皆有而字當從之乾道本奪去則與下句不一律矣惟下句增字之義殊不可通兩增字疑皆會字之誤不言而善應語本老子不約而善會亦卽老子所謂善結無繩約而不可解也善會猶善結也會誤作會因又誤爲增耳

此數物者。險世之說也。而先王之法所簡也。有度、

樾謹按險世之說。本作險世所說。說讀爲悅。舊注曰。險世所說。邀取一時之利。先王所簡。必令百代常行。是其所據本未誤。

遠在千里外。不敢易其辭。勢在郎中。不敢蔽善飾非。

樾謹按勢當作替。國語楚語曰。居疑有替御之箴。注曰。替。近也。替在郎中。與遠在千里外。正相對成義。替勢形近而誤。或古字通也。

法不信則君行危矣。

樾謹按危讀爲詭。呂氏春秋淫辭篇。所言非所行也。所行非所言也。言行相詭。不祥莫大焉。與此意相近。蓋法不信。則君之所行。前後違反。故曰詭也。作危者。古字通耳。漢書天文志。司詭星出正西。史記天官書。詭作危。淮南子說林篇。尺寸雖齊。必有詭。文子上德篇。詭作危。並其證也。舊注曰。法不信。則後不可行。故君危也。此未達假借之旨。危當以君位言。不當以君行言。足知舊說之非矣。

明主之所導制其臣者。二柄而已矣。二柄、

樾謹按舊注訓導爲引。此未達古語也。導當爲道。道者由也。明主所道制其臣者。猶言明主所由制其臣者。古語每以道爲由。本書孤憤篇曰。法術之士。奚道得進。猶言奚由得進也。呂氏春秋貴因篇。孔子

道彌子瑕見釐夫人。猶言由彌子瑕見釐夫人也。晏子春秋諫上篇曰：楚平微導裔款以見景公。亦言由裔款以見景公。而其字作導。可證此文所導之卽所由矣。八姦篇云：凡人臣之所道成姦者有八術。義與此同。

故刼殺擁蔽之主。非失刑德而使臣用之。而不危亡者。則未嘗有也。

樾謹按失刑德而使臣用之。不當有非字。非衍文。

人主欲見。則羣臣之情態得其資矣。

樾謹按欲見當作見欲。與上文見惡見好一例。見惡見好。卽自見其所欲矣。下文曰：豎刁易牙。因君之欲以侵其君者也。正承此而言。主道篇曰：君無見其所欲。可證此文見欲之義。

上有所長。事乃不方。揚權。

樾謹按舊注曰：所長謂任材用物。皆得其宜。故事不一方而成。此失其旨也。上文曰：使雞司夜。令狸執鼠。皆用其能。上乃無事。然則上固不必有所長矣。上有所長。是失其爲上之道。事乃不方。猶言無方也。謂不得其方也。下文曰：矜而好能。下之所欺。辯惠好生。下因其材。上下易用。國故不治。皆承此而言。聽言之道。溶若甚醉。

樾謹按舊注曰：溶。閑漫之貌。下文勳之溶之。注亦曰：凡所舉勳。溶然閑暇。顧氏謂不見所出。今按溶若

甚醉。此溶字當爲容。言其容有似乎醉也。下文動之溶之。此溶字當爲溶。說文手部。溶。動溶也。動之溶之。即動之溶之也。動溶亦作動容。孟子盡心篇。動容周旋中禮者。是也。疑古本兩溶字。皆止作容。一爲容貌之容。一爲動容之容。傳寫增水旁。因失其義矣。

若天若地。是謂累解。

樾謹按累解乃疊韻字。古人常語也。荀子富國篇。則和調累解。累解與和調並言。可知其義。楊倞注。以爲嬰累解釋。非也。儒效篇。解果其冠。楊注引說苑蟹螺者。宜禾爲證。然則累解猶蟹螺矣。古語雖不盡可通。而累解二字平列。則塙然無疑。舊注曰。君用意如天地。則上因下考之累可解也。其失與楊倞注荀子同。

欲爲其地。必適其賜。

樾謹按呂氏春秋重己篇。故聖人必先適欲。高注曰。適猶節也。管子禁藏篇。故聖人之制事也。能節宮室適車輿以實藏。是適與節同義。必適其賜者。必節其賜也。舊注謂欲治其國。必令賜與適宜。失之。下操度量以割其下。

樾謹按此當作上操度量以割其下。舊注云。故上必當操度量以割斷其下也。是其所據本未誤。掘其根本。木乃不神。填其洶淵。毋使水清。



樾謹按顧氏以本字爲衍文。是也。下句洵字。蓋亦衍文。舊注云。淵者水之停積。水清鑒之者衆。不釋洵字。是舊本未衍也。上云。木數披。黨與乃離。此云。掘其根本。乃不神。填其淵。毋使水清。皆上句三字。下句四字。今衍本字洵字。非其舊也。至趙本作木枝數披。則更失之矣。

凡此八者。人臣之所以道成姦。世主所以壅劫。失其所有也。八姦。

樾謹按道字衍文也。所以成姦。所以壅劫。兩文相對。讀者見篇首云。凡人臣之所道成姦者。有八術。誤以道成姦三字連讀。故妄增入之。不知所道成姦。卽所由成姦也。義與所以同。此旣云所以。卽不得復有道字矣。

荀息伐虢之還反。處三年。興兵伐虞。又克之。十過。

樾謹按伐虢下脫克字。下云。又克之。正承此而言。呂氏春秋權勳篇。荀息伐虢。克之。還反伐虞。又克之。是其證。

其脩士不能以貨賂事人。恃其精潔。而更不能以枉法爲治。孤憤。

樾謹按其脩士三字。衍文也。上文云。其脩士且以精潔固身。其智士且以治辯進業。此云不能以貨賂事人。則總蒙脩士智士爲文。言其皆不能也。恃其精潔。當作恃其精潔治辯。因衍其脩士三字。則此文專屬脩士。遂刪去治辯二字耳。舊注云。智士不重說。似闕文也。是其所據本已誤。

其意有下也。然而不能已。說者因爲之飾其美。而少其不爲也。其心有高也。而實不能及。說者爲之舉其過。而見其惡。而多其不行也。說難。

樾謹按此兩文相對。言其意雖甚卑下。而有所不能已。則說者必爲之飾其美。反若以其不行而少之。如此乃見不能已之不足爲病矣。其意雖甚高尚。而有所不能及。則說者必爲之舉其過。而見其惡。反若以其不行而多之。如此乃見不能及之不足爲恥矣。不能已者。若犬馬聲色之好是也。爲之飾其美。若管子以是數者。爲不害霸是也。不能及者。若堯舜之道仁義之說是也。爲之舉其過。而見其惡。若陳賈謂仁智周公未能盡是也。舊注所說。皆未了。且此與上文彼有私急也。必以公義示而強之。本不相蒙。舊注必牽合爲說。宜其不可通矣。

此道所得親近不疑。而得盡辭也。

樾謹按上得字衍文也。道所當作所道。此所道親近不疑。猶曰此所由親近不疑。古書每以道爲由。說已見前矣。史記作此所以親近不疑。所道卽所以也。讀者不解道字。而誤倒之。又妄增入得字。遂至不可通矣。

夫有術者之爲人臣也。得效度數之言。上明主法。下困姦臣。以尊主安國者也。姦叔弑臣。

樾謹按得字衍文。此論有術者之爲人臣。其道如此。非論得不得也。蓋涉下文度數之言。得效於前而

衍。

從是觀之。則聖人之治國也。固有使人不得不愛我之道。而不恃人之以愛爲我也。

樾謹按。不得不愛我。當作不得不爲我。涉下句而誤耳。下文曰。恃吾不可不爲者安矣。不可不爲。卽不得不爲也。又曰。明主者使天下不得不爲己視。天下不得不爲己聽。此使人不得不爲我之義也。可據以訂正。

父之愛子也。猶可以而害也。

樾謹按。以字衍文也。可而卽可以也。墨子尙賢篇曰。使天下之爲善者。可而勸也。爲暴者。可而沮也。又曰。上可而利天。中可而利鬼。下可而利人。呂氏春秋功名篇曰。故當今之世。有仁人在焉。不可而不此務。有賢主不可而不此事。並其證也。此文本云。父之愛子也。猶可而害也。淺人不達古語。於而上又增入以字。則不可通矣。

託於犀車良馬之上。

樾謹按。漢書馮奉世傳注。引晉灼曰。犀。堅也。然則犀車良馬。卽堅車良馬。吳子應變篇曰。車堅馬良。是其義也。顧云。犀字未詳。偶失考耳。

民信其相。下不能其上。主愛信之。而弗能廢者。可亡也。亡微。

樾謹按民下脫不字。民不信其相。下不能其上。兩文相對。民所不信。下所不能。而人主弗能廢。故曰可亡也。

變徧而心急。

樾謹按變當讀爲辯。說文心部。辯。一曰急也。是與徧同義。作變者。聲近假借也。易文言傳。由辯之不早辯也。釋文曰。辯。荀作變。孟子告子篇。萬鍾則不辨禮義而受之。音義引丁音曰。辨本作變。皆其例矣。

故桃左春秋曰。備內。

樾謹按左疑兀字之誤。桃兀蓋卽檇兀之異文。楚之檇兀。亦有春秋之名。楚語申叔時所謂教之春秋是也。故謂之檇兀春秋矣。

少索資以事誣主。南面。

樾謹按誣字無義。疑誘字之誤。下文云。主誘而不察。因而多之。卽承此而言。蓋先少索資。而以事誘其主。主旣爲其所誘。乃因而多之也。

賞罰無紀。國雖大。兵弱者。地非其地。民非其民也。飾邪。

樾謹按此言賞罰無紀。則國雖大。而兵必弱。所以然者。由地非其地。民非其民也。文義本甚分明。顧氏讀國雖大。逗兵。句。謂與上文國雖小。富民雖寡。強一律。則兵之一字。殊不成義。而弱者二字。屬下讀。於

義亦未安矣。

今人臣多立其私智，以法爲非者，是邪以智過法立智，如是者禁。

樾謹按邪字衍文，是以智過法立智七字爲句，言自以其智過公法立私智也。舊注曰：以此思之，則知凡官之情，皆欲過公法立私智也，疑其所據本作是以知過法立智，故其解如此。然不說邪字，則猶未衍也。今衍邪字，於義難通。顧氏於前後文句讀一一訂正，而此句未了，由不知邪字之衍耳。明凌瀛初本作以邪爲智，與舊注不合，非是。

根者，書之所謂柢也。解老。

樾謹按根上當有直字。上文云：樹木有曼根，有直根。此云直根者，書之所謂柢也。柢也者，木之所以建生也。曼根者，木之所持生也。蓋承上文而分釋之。韓子之意，以老子所謂深根固柢者，根是曼根，柢是直根也。今奪直字，失其旨矣。

人無毛羽，不衣則不犯寒。

樾謹按犯寒上當有足以二字，言不衣則不足以犯寒也。下文曰：故聖人衣足以犯寒，是其證。

設炮烙喻老。

樾謹按段氏玉裁謂炮烙本作炮格。史記索隱引鄒誕云：烙一音閣。楊倞注荀子議兵篇云：烙音古責。

反觀鄒楊所音，皆是格字無疑。鄭康成注周禮牛人云：互若今屠家縣肉格。意紂所爲亦相似。段氏此說，洵足訂正向來傳寫之誤。惟炮格似有二義。荀子議兵篇：紂刳比干，囚箕子，爲炮格刑。楊注引列女傳曰：炮格爲膏銅柱，加之炭上，令有罪者行焉，輒墜火中。紂與妲己大笑。此則炮格爲淫刑以逞之事，是一義也。若此文云：紂爲肉圃，設炮格，登糟，醢酒池，則似爲飲食奢侈之事，別爲一義。蓋爲銅格，布火其下，欲食者於肉圃取肉，置格上炮而食之也。如此說，方與肉圃、糟醢酒池一類。且因爲象箸而至，此正見其由小至大。箕子所以畏其卒而怖其始也。若是炮格之刑，則不特與肉圃諸事不類，且與上文爲象箸事亦絕不相干矣。呂氏春秋過理篇曰：糟醢酒池，肉圃爲格。格卽炮格，不言炮格而直曰爲格，卽承肉圃之下，是於肉圃中爲格也。其爲炮肉之格明矣。高注曰：格以銅爲之，布火其下，以人置上，人爛墮火而死。夫糟醢酒池，肉圃皆是飲食之地，何故卽於其地炮炙人乎？蓋古書說炮格者，本有二義，當各依本書說之。學者但知有前一義，不知有後一義，古事之失傳久矣。故冬耕之稼，后稷不能羨也。

樾謹按羨當作美，字之誤也。下文曰：豐年大禾，臧獲不能惡也。美與惡相對。

秦武王令甘茂擇所欲爲於僕與行事。說林上、

樾謹按事字衍文也。下文曰：公佩僕璽而爲行事，是僕與行爲官名。言佩僕之璽而爲行之事也。讀者

誤以行事連讀，遂於此文亦增事字矣。

子巧於相隄馬，而拙於任在腫膝，而不任拙於腫膝。

說林下

樾謹按此乾道本也。文錯誤不可讀。各本皆作子巧於相隄馬，而拙於任在腫膝。顧氏識誤從之。然上文云：夫隄馬也者，舉後而任前。腫膝不可任也。是任膝者馬也，非相馬者也。安得云巧於相隄馬，拙於任腫膝乎？疑韓子原文本作子巧於相隄馬，而拙於在腫膝。在者察也。蓋徒知其爲隄馬，而不能察知其腫膝之不可任，是巧於相隄馬，拙於在腫膝也。乾道本在腫膝三字不誤，但在上又有任字，則因任與在形似，又涉上下文諸任字而誤衍耳。其下又有而不任拙於腫膝七字，全無意義，則卽上句之複文。傳寫又錯誤，當刪去無疑。乃各本皆作而拙於任腫膝，則徒知乾道本之誤，而以意刪改之，仍無當也。君曰：我愛之信。答曰：臣亦愛臣之信。

樾謹按上信字衍文也。君曰：我愛之之者，指鼎而言。君固愛鼎，不愛信也。涉下句而衍信字，則義不可通。

因攢而縫，用人。

樾謹按攢字無義，當作簪。荀子賦篇：簪以爲父。楊倞注曰：簪形似箴而大，是簪亦箴類。故曰：因簪而縫也。說文金部：鑠，可以綴箸物者。簪卽鑠之段字，亦或作攢。周易豫九四：朋盍簪。京作攢，是也。古本韓子

當亦作攢傳寫因誤爲攢矣。

厚賞之使人爲賁諸也。婦人之拾蠶。漁者之握鱣。是以效之。內儲說上七術。

懃謹按是以效之當作以是效之。效者明也。是卽指婦人漁者而言。謂厚賞之下可使人人爲賁諸。以婦人之拾蠶。漁者之握鱣明之也。下文云。鱣似蛇。蠶似蠋。人見蛇則驚駭。見蠋則毛起。然而婦人拾蠶。漁者握鱣。利之所在。則忘其所惡。皆爲孟賁。是其義也。荀子正論篇。故桀紂無天下。而湯武不弑君。由此效之也。楊注曰。效。明也。與此文句法正同。今誤作是以效之。舊注曰。此得利忘難之效也。失其解矣。臣請使王遇之遇。

懃謹按上遇字當作與上文云。王何不試與之遇乎。故此云。臣請使王與之遇。乾道本作遇之遇。傳寫誤耳。道藏本改下遇字爲乃字。屬下讀。趙本并刪乃字。均非其舊。行刑重其輕者。輕者不至。重者不來。

懃謹按不至當作不生。言犯輕罪者不得生。則自無重罪也。商子去強篇曰。輕者不生。重者不來。是其證。

采金之禁。得而輒辜磔於市甚衆。壅離其水也。

懃謹按此言辜磔其人。而棄尸於水。水之中流。爲積尸壅遏。遂至分流。是謂壅離其水。極言辜磔者之



多也。舊注云：又設防禁遮擁，令人離其水也。據下文云：夫罪莫重辜磔於市，猶不止者，不必得也。又曰：故不必得也。則雖辜磔，竊金不止，知必死，則天下不爲也。並無設禁遮擁，令人離水之義。且設禁遮擁，令人離水，而猶竊金不止，則是設禁之未善，與下文不必得及知必死之意，不相應矣。顧曰：離讀爲離，此亦不得其解，而強爲之辭。

哀公懼，自將衆輒救火者。

樾謹按：輒當爲趣。者字衍文。上文云：魯人燒積澤，所謂火田也。哀公實親在其閒，及火南倚，將燒國，故哀公懼，自將衆趣救火也。趣誤作輒，蓋以形似之。故又因下文三言救火者，而亦衍者字，於是其義愈晦，并輒字之誤，莫之能正矣。

因詐逐所愛者，令走王知之。

樾謹按：此本作令王知之。走字衍文也。舊注於上經云：佯逐所愛，令君知而不疑，令君知卽令王知也。可證舊本之無走字。

昭侯以察左右之臣，不割。

樾謹按：割字涉注文割，不誠而衍。顧氏已訂正矣。臣藏本作誠。顧謂誠不句絕，不否同字，此說非也。誠不當作不誠。注云：割，爪不誠，則其所見本未倒也。下文云：子之以此知左右之不誠信。注云：僞報有

白馬者是不誠信。正與此一律。

靖郭君相齊。與故人久語。則故人富。內儲說下六微。

樾謹按北齊書顏之推傳。觀我生賦。祇夜語之見忌。寧懷刷之足恃。皆本此書。疑古本韓子久語作夕語。古人朝見謂之朝。夕見謂之夕。

公叔相韓而有攻齊。

樾謹按爾雅釋詁。攻。善也。有讀爲又。相韓而有攻齊。謂相韓而又善齊也。下文云。翟璜。魏王之臣也。而善於韓。其義相同。藏本趙本改攻作功。失之。

犀首與張壽爲怨。陳需新入。不善犀首。

樾謹按入字衍文也。上文云。季辛與爰驚相怨。司馬喜新與季辛惡。與此條情事相同。文法亦一律。此云陳需新不善犀首。猶彼云司馬喜新與季辛惡也。

能爲之諸侯乎。

樾謹按爲字衍文也。能之諸侯乎。言能適諸侯乎。左傳作能行乎。是其證也。

被王衣。

樾謹按王當作玉。三國志魏文帝紀注云。舜承堯禪。被珍裘。玉衣猶云珍裘矣。古人於美好之物。皆曰

玉食言玉食。衣言玉衣。其義同也。此與下文之握玉環。本同作玉。後人不解而臆改耳。

先問鄒之豪傑良臣。辯智果敢之士。盡與姓名。樾謹按與當作舉。周官師氏。王舉則從。注曰。故書舉爲與。是其例也。襄二十七年左傳。仲尼使舉是禮也。釋文引沈云。舉謂記錄之也。然則盡舉姓名。爲悉記錄其姓名矣。

晉國之辭仕託者國之鍾。外儲說左上。

樾謹按乾道本託誤作記。當從道藏本訂正。趙用賢本託下有慕字。則由誤讀下文而衍也。下文曰。晉國之辭仕託。慕叔向者。國之鍾矣。此於託字絕句。仕謂仕者。託謂託者。襄二十七年左傳。衛子鮮出奔晉。託於木門。終身不仕。然則古人自有仕與託之兩途。凡託於諸侯者。君必有以養之。觀孟子可見。故曰辭仕託。蓋仕可辭。託亦可辭也。慕叔向者。自爲句。後人不達託字之義。誤以託慕連讀。遂於此文亦增入慕字耳。又鍾字無義。疑古本止作垂。莊子逍遙遊篇。其翼若垂天之雲。崔譔曰。垂猶邊也。其大如天。一面雲也。然則國之垂。猶云國之一面。與上文中牟之民。弃田圃而隨文學者。邑之半。文義一律。國之垂。猶邑之半。垂亦半也。今加金作鍾。則不可通矣。

請無以此爲稽也。

樾謹按稽字無義。疑當作指。漢書河間獻王德傳。文約指明。注云。指謂意之所趨。若人以手指物也。字

亦作旨。孟子告子篇。頗問其旨。是也。齊桓伐蔡。意在蔡姬。故管仲請無以此爲指也。稽從旨聲。故得通借。禮記王制篇。有旨無簡不聽。卽尙書呂刑篇。有稽無簡不聽之異文。然則稽旨通用。古有徵矣。道藏本改稽爲規。非是。

傷者之母立泣。

樾謹按立字不當有。蓋卽泣字之誤而衍者。

趙主父令工施鈎梯。而緣播吾刻踈人迹其上。

樾謹按踈當作踈。卽迹字也。迹。籀文作速。此變作踈。亦猶迹之變作跡矣。古本韓子當作刻人踈其上。寫者依今字作迹。而踈字失不刪去。遂誤倒在人字之上。又誤其字作踈也。

以馬爲不進。盡釋車而走。

樾謹按韓子古本當作以馬爲不盡。句釋車而走。不盡卽不進也。列子天瑞篇。終進乎不知也。張湛注曰。進當爲盡。是進與盡古通用。詩文王篇毛傳。訓薰爲進。師古注漢書高帝紀曰。進字本作賁。又作贐。皆其例也。寫者依本字作進。而又失刪盡字。遂并失其讀矣。

曰信名。信名則羣臣守職。

樾謹按曰。信名之下。當有信義信事四字。蓋文公問安信。箕鄭告以信名信義信事。下乃一一申之也。

今奪之則文不備。

跼危引之而逃之門下室中。外儲說左、

樾謹按舊注曰。跼者行步危。故曰跼危。此曲說也。危乃跪之省文。古謂跼足者爲跼跪。內儲說下篇。門者跼跪請曰。是其證也。晏子春秋雜上篇。刖跪擊其馬而反之。孫氏星衍曰。跪。足也。此說得之。秦韓攻魏。昭卯西說而秦韓罷。

樾謹按昭卯疑當作明卯。卽孟卯也。顯學篇云。魏任孟卯之辨。是也。又作芒卯。難三篇云。孰與曩之孟嘗芒卯。是也。明孟芒古音俱同。孟卯之爲明卯。猶孟津之爲盟津。芒卯之爲明卯。猶民厖之爲民萌。今作昭者。蓋與明形似義同。因而致誤。

吾父獨冬不失袴。

樾謹按舊注曰。別足者不衣袴。雖終其冬夏。無所損失也。疑其所據本作終不失袴。故曰。雖終其冬夏。無所損失。今涉注文有冬字。而誤終作冬。則不可通矣。別者既不衣袴。何有冬夏之別。安得獨於冬言不失歟。當據注訂正。

墾草仞邑。

樾謹按仞當作剏。謂剏造其邑也。作仞者字之誤。舊注曰。仞。入也。所食之邑。能入其租稅也。訓仞爲入。

未詳其義。新序載此事。正作羶邑。當據以訂正。

發廩粟以賦衆貧。散府餘財以賜孤寡。外儲說右上、

樾謹按。餘字衍文。散府財與發廩粟相對爲文。不當有餘字。涉下文倉無陳粟。府無餘財而衍。

謳乎其已乎。苞乎其往歸田成子乎。

樾謹按。已字當作芑。昭十二年左傳。我有圃。生之杞乎。從我者子乎。與此歌文義相似。史記田敬仲世家載此歌曰。姬乎采芑。歸乎田成子。字正作芑。惟此本以謳苞爲韻。芑子爲韻。史記作歸乎田成子。歸與謳則非韻矣。當以此爲正。

左右有樂子者。

樾謹按。樂子卽蘭子也。樂與蘭音近。說文門部。闌。妄入宮掖也。讀若闌。卽其例也。列子說符篇。宋有蘭子者。釋文曰。凡人物不知生出者。謂之蘭也。是蘭子之蘭。卽闌之引伸義。故此書以樂爲之矣。慎而言也。人且知女。

樾謹按。知當作和。字之誤也。此云慎而言也。人且和女。慎而行也。人且隨女。和與隨相爲韻。下文云。而有知見也。人且匿女。而無知見也。人且意女。女有知也。人且臧女。女無知也。人且行女。匿與意。臧與行。亦相爲韻也。若作人且知女。則首句失其韻矣。

左右引王之說之曰。先告客以爲德。

樾謹按。引當作以。曰當作日。皆字之誤也。隸書以字或作臥。因誤爲引矣。蓋因客說宣王。宣王說而大息。故左右以王之說之曰。先告客以爲德也。

吾適勢與民相收。若是吾適不愛。而民因不爲我用也。故遂絕愛道也。外儲說右。

樾謹按。道藏本作吾釋勢與民相收。當從之。上文云。彼民所以爲我用者。非以吾愛之爲我用者也。以吾勢之爲我用者也。是言君民之間。本是以勢相制。若釋勢而用愛。則吾適有不愛。民遂不爲我用矣。故不如絕愛道爲得也。文義本甚分明。因釋適聲近。又涉下句有適字。故乾道本誤爲適勢。顧氏謂適勢適愛相對。非是。

五苑之草著。

樾謹按。著字衍文也。蓋涉下文今發五苑之蔬草者。而於草下衍者字。又因草字及下蔬菜字。皆從艸。遂又誤者爲著耳。舊注曰。謂草木著地而生也。殊爲曲說。

造父方櫛。得有子父乘車過者。

樾謹按。得當作見。因古得字作尋。故得與見二字。往往相混。史記趙世家。踰年歷歲。未得一城。趙策得作見。留侯世家。果見穀城山下黃石。漢書見作得。並其證也。趙本改得爲時。非是。顧氏疑得上有闕文。

亦失之。

延陵卓子乘蒼龍挑文之乘。

樾謹按挑當讀爲翟。下文一曰延陵卓子乘蒼龍與翟文之乘。注云。馬有翟之文。是也。挑從兆聲。與翟聲相近。故翟通作挑。尙書顧命篇。王乃洮頹水。鄭讀洮爲濯。詩大東篇。佻佻公子。韓詩佻作耀。爾雅釋魚。蜃小者珧。衆家本珧作濯。並其例也。舊注不知挑卽翟之段字。而訓爲雕飾之誤矣。矜僞不長。蓋虛不久。雖一。

樾謹按矜字無義。乃務字之誤。言務爲詐僞。不可以長也。管子小稱篇作務僞不久。蓋虛不長。是其證。是子言分謗也。

樾謹按此當作是邠子之言。非分謗也。益謗也。今脫六字。則文義不明。下文云。故曰邠子之言。非分謗也。益謗也。正與此應。可以據補。

且蹇叔處干而干亡。雖二。

樾謹按干卽虞也。莊子刻意篇曰。夫有干越之劍。釋文引司馬云。干。吳也。荀子勸學篇曰。干越夷貉之子。楊倞注曰。干越猶言吳越。淮南子原道篇曰。干越生葛絺。高誘注。亦曰。干。吳也。是吳有干名。而虞與吳古同聲而通用。桓十年左傳正義曰。譜云。虞。姬姓也。武王克商。封虞仲之庶孫。以爲虞仲之後。處中。



國爲西吳。後世謂之虞公。然則虞之始封。本爲西吳。蓋以別於荆蠻之吳。因春秋經傳皆作虞。而西吳之名廢矣。漢書地理志。河東郡大陽。吳山在西。上有吳城。周武王封太伯後於此。是爲虞公。夫虞之故城。謂之吳城。是虞卽吳也。吳得稱干。則虞亦得稱干。蹇叔處干卽處虞也。顧云未詳。故具論之。

伊尹自以爲宰干湯。百里奚自以爲廝干穆公。

櫟謹按兩以字皆衍文。自由也。言由爲宰以干湯。由爲廝以干穆公也。難一曰。故伊尹以中國爲亂道。爲宰干湯。百里奚以秦爲亂道。爲廝干穆公。道亦由也。與此一律。

且夫物衆而智寡。寡不勝衆。智不足以徧知物。故則因物以治物。下衆而上寡。寡不勝衆者。言君不足以徧知臣也。故因人以知人。難三。

櫟謹按故則因物以治物。故則二字無義。趙本刪則字。當從之。惟此文有從舊注廝入者。韓子原文當云。且夫物衆而智寡。寡不勝衆。故因物以治物。下衆而上寡。寡不勝衆。故因人以知人。舊注於上句寡不勝衆云。言智不足以徧知物也。於下句寡不勝衆云。言君不足以徧知臣也。傳寫誤入正文。而又有錯誤。遂參差而不可讀矣。

賢智未足以服衆。而勢位足以侑賢者也。難勢。

櫟謹按侑乃詘字之誤。詘字闕壞而爲出字。又因誤爲侑也。上文云。賢人而詘於不肖者。則權輕位卑。

也。此卽勢位足以誦賢者之說。趙用賢本作任賢者，乃不得其字而臆改，不可從也。夫勢者非能必使賢者用已，而不肖者不用已也。

樾謹按兩已字皆當作人已之已，卽以勢而言。勢者人人得而用之，不能使賢者用我，而不肖者不用我也。顧云已字當有誤，未詳。由不達古人語意耳。

若吾所言，謂人之所得勢也而已矣。

樾謹按勢當作設。上文云：此自然之勢也。非人之所得設也。故此曰：若吾所言，謂人之所得設也而已矣。設誤作勢，文不可通。顧氏因疑有缺文，非是。

先王有幸臣之意，然有大傷臣之實。問四

樾謹按先王當作先生，卽謂堂谿公也。堂谿公諷韓子舍全遂之道，而肆危殆之行，故曰先生有幸臣之意。幸臣猶愛臣也。呂氏春秋至忠篇：王必幸臣與臣之母是也。韓子自謂不忍嚮貪鄙之爲，不敢傷仁智之行。若從堂谿公之言，則仁智之行傷矣。故曰：然有大傷臣之實。此有字當讀爲又。

晉伯陽秦顓頊衛僑如說疑。

樾謹按伯陽乃舜七友之一。晉字衍文。顧氏譌誤已及之矣。惟顓頊晉人而係之秦，僑如魯人而係之衛，爲不可曉。且其人亦非如下文所云伏死窟穴者也。據下文云：若夫齊田恆、宋子罕、魯季孫意如、晉

僑如、衛子南勁、鄭太宰欣、楚白公、周單荼、燕子之。此九人者之爲其臣也。皆朋黨比周以事其君云云。疑魯季孫意如晉僑如當作晉顓頊魯僑如而傳寫誤入上文。又誤移晉字於伯陽之上。遂妄竄入秦字耳。

此六人臣之弑其君者也。

樾謹按上文自田成子以下凡八人。不得言六。六疑亦字之誤。承上文舜偁堯禹偁舜湯放桀武王伐紂而言。故云亦也。

若夫轉身法易位全衆傳國最其病也。

樾謹按法字衍文。傳當爲傳。上所謂破國殺身者。以國君死社稷而言也。故曰尙皆賢主也。此所謂轉身易位全衆傳國者。則晉靜公齊康公之類是矣。以其不能死而反見屈於臣。故曰最其病也。趙本改傳爲傳。正得其字。惟不知法字之衍而刪去身字。失之矣。

名之所以成城池之所以廣者。詭使。

樾謹按顧云池當作地。是也。惟城地連文。近於不辭。城疑衍文。名之所以成。地之所以廣。兩文相對。不當有城字。蓋卽成字之誤而衍者。

狐蟲爲順辭於前者。

樾謹按蟲乃蠱字之誤。春秋蟲牢。春秋繁露竹林篇作蠱牢。卽其例矣。狐蠱二字連文。見僖十五年左傳。

而士卒之逃事狀匿。附託有威之門。以避僞賦。

樾謹按狀匿卽藏匿也。狀與壯通。考工記臬氏。凡鑄金之狀。故書狀作壯。是也。壯與莊通。漢書古今人表。柳壯。檀弓作柳莊。是也。而藏字說文所無。古書多以臧爲之。臧莊聲近。狀通作壯。壯又通作莊。則亦可通作臧矣。

是故決賢不肖。愚知之美。六反。

樾謹按美乃筴字之誤。上文云。嚴愛之筴。亦可決矣。此云。決賢不肖。愚知之筴。其文義正相似。作美者。形近而誤耳。趙本改美爲分。未得其字。

明君之法揆也。治賊非治所揆也。所揆也者。是治死人也。

樾謹按此當作明主之法也。揆賊非治所揆也。治所揆也者。是治死人也。方與下文刑盜非治所刑也。治所刑也者。是治胥靡也。文法一律。揆賊之揆。誤移在上句。因移下句治字以補之。義不可通矣。道藏本趙本但於所揆也者上加一治字。猶未盡得也。又按揆字未詳何義。據與刑盜對文。疑字當作殺。古字或以蔡爲之。尙書禹貢。二百里蔡。鄭注曰。蔡之言殺。是蔡殺聲近義通。說文米部。臣錯引左傳。蔡

叔。今作蔡蔡叔。亦其例也。蔡誤作葵。傳寫者又以意改爲揆耳。

慈母之於弱子也。愛不可爲前。八說、

樾謹按。愛不可爲前。猶言無前於此者。正見其愛之至也。舊注曰。不可先以愛養之。非是。

醫曰詭。八經、

樾謹按。醫字無義。趙本作緊。亦非也。醫當作翳。翳者蔽也。下文易功而賞。見罪而罰。而詭乃止矣。易乃見字之誤。說本顧氏識誤。見功見罪。是不翳也。不翳而詭。乃止。可證翳曰詭之義。

卽通以知其內。疏置以知其外。

樾謹按。疏置當作置疏。疏與邇對。今作疏置。則不對矣。下文曰。倒言以嘗所疑。論反以得陰姦。論反當作反論。反論與倒言相對。並傳寫誤也。

事大未必有實。舉則圖而委。效璽而請兵矣。五蠹、

樾謹按。舉則二字誤倒。道藏本作則舉。當從之。韓子原文。本作事大必有實。則舉圖而委。效璽而請矣。未字兵字。皆衍文也。言事大必有事大之實。非空言事大而已。舉圖而委。效璽而請。皆其實也。所謂舉圖而委者。謂舉地圖而委之大國。故下文曰。獻圖則地削也。所謂效璽而請者。謂收百官之璽。效之大國。而請大國發之也。故下文曰。效璽則名卑也。外儲說右云。王因收吏璽。自三百石以上。皆效之子之。

子之大重。此雖非以小事大。然效顰之事則同。效顰初非請兵。淺人不得其解。於請下增入兵字。殊失本指。而趙用賢本乃於上句委字之下。增地字以配之。謬矣。下文曰。救小未必有實。則起兵而敵大矣。未字亦衍文。謂救小必有救小之實。起兵敵大。是其實也。與此文正相對。因涉下文救小未必能存句。而衍未字。遂於事大。必有實句。亦增未字。淺人不詳文義。率意增益。往往如此。

故事私門而完解舍。解舍完則遠戰。遠戰則安。行貨賂而襲當塗者。則求得。求得則私。安私安則利之所在。安得勿就。

樾謹按解舍完三字。衍文也。事私門而完解舍。則遠戰。與行貨賂而襲當塗者。則求得。兩文相對。不當衍此三字也。求得則私。私乃利字之誤。遠戰則安。求得則利。與上文窮危相對。安對危言。利對窮言也。安私安則利之所在。當作安利之所在。上云窮危之所在也。民安得勿避。此云安利之所在。安得勿就。兩文亦相對。

其忠御者積於私門。

樾謹按忠讀爲串。詩皇矣篇。串夷載路。毛傳。串。習也。釋文曰。串本作患。是其證也。串御蓋謂近習進御者。趙本竟改作近御。失其字矣。

今夫與人相善也。無豐年旁入之利。而獨以完給者。非力則儉也。與人相善也。無饑饉疾疫禍罪之殃。獨

以貧窮者，非侈則墮也。顯學

樾謹按兩善字皆若字之誤，與人相若也。猶曰鈞是人也。俗書若字作若，善字作善，兩形相似而誤。不道仁義者，故不聽學者之言。

樾謹按者當作諸。古字通用。禮記郊特牲曰：或諸遠人乎。儀禮士虞禮注：引作或者遠人乎。是其證也。廣雅釋言：諸之也。不道仁義諸故，卽不道仁義之故。與不聽學者之言，兩句相對。諸之互用。古書多有禮記少儀篇：申之而拖諸臂。孟子滕文公篇：注諸海，注之江，皆是也。大戴記衛將軍文子篇：道者孝弟，說之以義，而觀諸體者，與諸並猶之也。然則此文者字，亦自可通，并不必破爲諸矣。顧氏以者字爲衍，而以故字屬下讀，則失其義。





# 諸子平議卷二十一

呂氏春秋一

乘鸞輅孟春紀

樾謹按鸞本作鸞。今作鸞者，後人依月令改之也。呂氏原文本作乘鸞輅。高誘注文本作鸞鳥在衡和在軾，鳴相應和。後世不能復致，鑄銅爲之，飾以金，謂之鸞輅也。蓋高意鑄銅象鸞鳥形，故其字從金從鸞省。若正文作鸞，則不必有鑄銅飾金之說矣。明劉如寵本正作乘鸞輅，是其所據本不誤。惟因正文是鸞字，疑注文不當以鸞鳥爲說，遂改注文鸞鳥在衡作鸞在鑣，則又失注意矣，不可從也。

還乃賞卿諸侯大夫於朝

樾謹按高注曰：三公至尊，坐而論道，不嫌不賞，故但言卿諸侯大夫者也。據此則卿上無公字。畢氏沉曰：舊本卿上衍公字，乃後人據月令增入，而不知其與注不合。其說是也。然呂氏原文實有公字。其上文云：天子親率三公九卿諸侯大夫以迎春於東郊。下文云：率三公九卿諸侯大夫躬耕帝籍田。又云：反執爵于大寢。三公九卿諸侯大夫皆御，並以三公九卿對言。則此文亦必當有公字矣。若謂三公至尊，不嫌不賞，則執爵大寢，三公至尊，亦何嫌不預而必及之乎？然則呂氏原文當與月令同，今奪公字。

者涉下文卿諸侯大夫九推而誤。高氏所據本已無公字。正高氏序所謂既有脫誤者也。不加是正而曲爲之說疏矣。

夫水之性清。土者扣之。故不得清。本生。

樾謹按高注曰。扣讀曰骨。濁也。此注必有錯誤。下文曰。人之性壽。物者扣之。故不得壽。注曰。扣。亂也。扣字既見於前。不應又注於後。疑此文物者扣之。本作物者滑之。高注扣讀曰骨。本作滑。讀曰骨。淮南原道篇。混混滑滑。高注曰。滑讀曰骨也。卽其例矣。骨。濁也。當作滑。濁也。滑滑與混混同。故有濁義。物也者所以養性也。非所以性養也。

樾謹按下句當作非以性養也。涉上句而衍所字。則義不可通。注文有所字。亦誤衍也。

三者國有一焉。無幸必亡。

樾謹按無幸必亡。乃到句也。言其國必亡。無可幸免也。高注未得其義。

一曙失之。終身不復得。重已。

樾謹按高注曰。曙。明日也。然一明日失之。文義未安。說文無曙字。日部。曙。旦明也。文選魏都賦注引作曙。蓋曙卽曙之俗體耳。一曙失之者。一旦失之也。旦明謂之曙。故旦卽謂之曙矣。

夫弗知慎者。是死生存亡。不可未始有別也。

櫛謹按此當作是死生存亡可不未始有別也。可不即可否也。死生存亡可不。皆兩字相對。後人不知不爲否之段字。故又加可字耳。序意篇曰。若此則是非不可無所遁矣。亦當作是非可不。其誤正與此同。

壽長至。常亦然。

櫛謹按常乃當字之誤。壽長至三字連讀。下文高注曰。推行仁義。壽長自至。

大庖不豆。費公。

櫛謹按高注曰。但調和五味。使神人享之而已。不復自列簠簋籩豆也。若然。則不簠不簋不籩。無不可言。何獨言不豆乎。豆當讀爲剗。廣雅釋詁曰。剗。裂也。玉篇曰。小裂也。大庖不剗。言大庖但調和五味。不親爲宰割之事。與上句大匠不斲一律。古無剗字。故段豆爲之。亦或段用脰字。後漢書馬融傳。脰完羝。王氏念孫讀脰爲剗。是也。

上丁命樂正入舞。仲春紀。

櫛謹按孟春已有命樂正入學習舞之文。故月令於仲春止言命樂正習舞。不言入學。從省也。此不云習舞而云入舞。文義不足。疑呂氏原文本作入學習舞。傳寫奪學習二字耳。下云中丁又命樂正入學習樂。又字承此而言。是則入學二字固不可省也。

耳雖欲聲，目雖欲色，鼻雖欲芬香，口雖欲滋味，害於生則止。在四官者不欲，利於生者則弗爲，貴生。

樾謹按高氏讀不欲利於生者，則弗爲九字爲句，而釋之曰：則不治此四官之欲。此注非也。不欲字當屬上讀，弗字疑衍文。當曰：在四官者不欲，句利於生者則爲，句言四官者雖不欲，而利於生則爲之，與上文耳目鼻口雖欲之，而害於生則止，正相對成誼。故其下曰：耳目鼻口不得擅行，必有所制。若如高注，謂不治四官之欲，則四官得以擅行，大失呂氏本意矣。當由誤衍弗字，故失其讀，並失其誼耳。本篇曰：是故聖人之於聲色滋味也，利於性則取之，害於性則舍之，義與此同。害於性則舍之，卽此所謂害於生則止也。利於性則取之，卽此所謂利於生則爲也。廣雅釋詁曰：取，爲也。然則取與爲字異而義同矣。

顏闔守閭，鹿布之衣，而自飯牛。

樾謹按鹿字乃麤字之誤。莊子讓王篇作顏闔守陋閭，苴布之衣，而自飯牛。釋文曰：苴音麤。本或作麤。故使莊王功迹著乎竹帛，傳乎後世。情欲。

樾謹按此下竟無一語，則文義未足。疑上文功雖成乎外，至豈不悲哉五十三字，當在此下。傳寫者誤移置於前耳。今訂正如左。

世人之事君者，皆以孫叔敖之遇荆莊王爲幸。自有道論之，則不然。此荆國之幸，荆莊王好周遊田獵，

馳騁弋射。歡樂無遺。盡傳其境內之勞與諸侯之憂於孫叔敖。孫叔敖日夜不息。不得以便生爲故。故使莊王功迹著乎竹帛。傳乎後世。功雖成乎外。而生虧乎內。耳不可以聽。目不可以視。口不可以食。胃中大擾。妄言想見。臨死之上。顛倒驚懼。不知所爲。用心如此。豈不悲哉。

中行寅染於黃藉秦高彊當染。

樾謹按黃字衍文。蓋卽寅字之誤。而衍者。墨子所染篇無黃字。

不知要故也。不知要故。則所染不當。

樾謹按下句故字。涉上句而衍。當云不知要。則所染不當。墨子所染篇作不知要者。所染不當也。無故字。

帝王亦然。

樾謹按上文舜禹湯武皆帝王也。帝王之事。已見上文。何以又出此四字。下文所言孔子墨子。皆非帝王。與此不相應。且旣言帝王亦然。而下卽繼之曰。非獨國有染也。兩句亦不相屬。義殊可疑。據墨子所染篇云。非獨國有染也。士亦有染。疑此帝王爲衍文。王乃士字之誤。呂氏原文。本云士亦然。非獨國有染也。蓋卽用墨子之意。而倒其文耳。下文言孔子墨子事。而總之曰。此二十者。無爵位以顯人。無賞祿以利人。舉天下之顯榮者。必稱此二十也。士字正與此應。因士誤爲王。後人遂臆加帝字耳。

缶醢黃螭聚之有酸功名

樾謹按此當作缶醢黃有酸螭聚之有讀爲又言黃而又酸故螭聚之也高注曰黃美也黃故能致酸酸故無致螭可知有酸二字本在螭聚之上矣當據以訂正

行不異亂雖信今民猶無走

樾謹按高注曰行不異亂雖欲信利民無有歸走也然正文本無利字且旣行不異亂矣又何信利民之有高注非也信疑倍字之誤上云今之世至寒矣至熱矣而民無走者取則行鈞也此云行不異亂雖倍今民猶無走言雖寒熱加倍於今之世民猶無可走也倍信形似而誤知士篇視若是者倍反戰國策作若是者信反卽其例

及其天年先已

樾謹按及字無義呂氏原文當作終其天年終古文止作久故誤爲及耳孫氏星衍云御覽作反則又及之誤字

督聽則姦塞不皇

樾謹按皇讀爲惶謂姦邪閉塞不至惶惑也蜀志呂凱傳曰遠人惶惑是惶與惑同義字亦作遑後漢光武紀曰遑惑不知所之遑與皇古通用故此又作皇也高注曰姦軌塞斷於不皇皇暇也殊不成

義。

三王先教而後殺，故事莫功焉。

樾謹按高注曰：成王事之功，無過於三王。此未得功字之義。國語齊語：辨其功苦。韋注曰：功，牢也。管子小匡篇：辨其功苦。尹注曰：功，謂堅美。荀子王制篇：辨功苦。楊注曰：功，謂器之精好者。是古以堅美精好者爲功。本書誣徒篇曰：從師苦而欲學之功也。亦以功苦對文。此功字義與彼同。事莫功焉，猶曰事莫善焉。正與上下文德莫盛焉、兵莫彊焉同義。御覽引作功莫大焉，後人不知古義而妄改耳。

事心乎自然之塗，論人。

樾謹按高注曰：事，治也。於義未得。禮記郊特牲篇：信事人也。鄭注曰：事，猶立也。釋名釋言語曰：事，傳也。傳，立也。青徐人言立曰傳。然則事心乎自然之塗，猶曰立心乎自然之塗也。

哀之以驗其人。

樾謹按人當讀爲仁。言哀之以驗其仁愛之心也。高氏不知人爲仁之段字，乃曰人人可哀，不忍之也。斯曲說矣。

黃帝曰：帝無常處也。有處者乃無處也。以言不刑蹇。園道也。園道。

樾謹按刑蹇二字連文。刑蹇與形偃同。莊子山木篇曰：君無形偃。注曰：形偃，躓礙之謂。然則不刑蹇者。

不躡礙也。蓋引黃帝之言而釋之曰：帝無常處者，以言不躡礙也。是園道也。應同篇引商箴而釋之曰：以言禍福，人或召之也。慎大篇引周書而釋之曰：以言慎事也。文法並與此同。高注非是。

堯舜賢主也，皆以賢者爲後，不肖與其子孫，猶若立官必使之方。

樾謹按高注曰：以賢者爲後，謂禪位也。堯傳舜，舜傳禹，故曰不肖與其子孫也。方正不私邪之謂也。如高氏意，則謂堯舜傳賢而不傳子，猶立官之无私邪耳。大失呂氏之旨矣。本篇名曰園道，其大旨以爲主執園而臣處方。故上文曰：先王之立高官也，必使之方。此文立官必使之方，卽承上文而言。猶若者，猶然也。誣徒篇曰：雖不肖者，猶若勸之，蕩兵篇曰：中主猶若不能有其民，凡言猶若，並與猶然同義。此言堯舜不以天下傳之子孫，而其立官也，猶然必使之方。下文曰：今世之人主，皆欲世勿失矣，而與其子孫立官，不能使之方，以私欲亂之也。何哉？其所欲者之遠，而所知者之近也。此正見其與堯舜相反。堯舜不爲子孫計，而立官猶必使方。今世人主無不爲子孫計，而立官反不使方，故爲所欲遠而所知近也。又按高氏訓方爲正，亦未合。方與園對，下文曰：百官各處其職，治其事，所謂方也。正字之義，未足以盡之。

其性禮，其事視。孟夏紀

樾謹按畢氏沉曰：月令無此二句，此書前後亦無此例，當爲衍文。然既前後皆無此文，何由而衍？蓋五



行分配五常五事。自古有此說。竊疑呂氏原文。每紀皆有之。後人據月令刪去。而孟夏紀尙存此二語。則刪之未盡者耳。正可藉以考見呂氏之舊。未可反以爲衍也。

不疾學而能爲魁士名人者。未之嘗有也。勸學。

樾謹按高注曰。魁大之士。名德之人。其說名字之義未得。名亦大也。禮記禮器篇。因名山升中於天。鄭注曰。名猶大也。國語魯語。取名魚。韋注曰。名魚。大魚也。然則名人猶大人也。正與魁士一律。安死篇曰。又視名。巨大墓葬之厚者。此言魁士名人。猶彼言名巨大墓矣。高氏注戰國策秦策賂之一名都曰。名大也。然則名之爲大。高氏固有此訓矣。乃此注以爲名德之人。殊失其誼。

復過自用。不可證移。誣徒。

樾謹按高注訓證爲諫。則其字當作証。說文言部。証。諫也。戰國策齊策。士尉以証靖郭君。高注曰。証。諫也。本書知士篇亦誤作證。是其例矣。畢氏校本於知士篇已改作証。而此文猶未訂正。偶未照耳。見權親勢及有富厚者。

樾謹按親字衍文也。高注曰。見權勢及富厚者。可知正文本無親字。當據以訂正。人之情惡異於己者。此師徒相與造怨尤也。

樾謹按兩句傳寫互易。此師徒相與造怨尤也。與上文此師徒相與異心也。文義相屬。人之情惡異於

己者。與下文人之情不能親其所怨。不能譽其所惡。文義相屬。當乙正。故不能學者。遇師則不中。

樾謹按中讀爲忠。古字中忠通用。漢張遷碑。中饗於朝。魏橫海將軍呂君碑。君以中勇。並段中爲忠。是其證也。遇師則不中。言其事師不以忠誠也。高注以不中爲不正。非是。

嗜欲不辟。樂乃可務。大樂。

樾謹按辟讀爲僻。謂不邪僻也。高訓爲開。非是。

大樂君臣父子長少之所歡欣而說也。

樾謹按大疑夫字之誤。

先聖擇兩法一。

樾謹按高注曰。擇棄也。法用也。則擇乃釋字之誤。長見篇。視釋天下者釋躡。注亦訓釋爲棄。是其證。

世之人主多以珠玉戈劍爲寶。愈多而民愈怨。國人愈危。身愈危累。修樂。

樾謹按國人愈危句。衍人字。身愈危累句。衍危字。民愈怨。國愈危。身愈累。皆三字句。下文曰。故樂愈侈。而民愈鬱。國愈亂。主愈卑。亦皆三字句。是其例也。今誤衍人字危字。則不特句法參差。且國人卽民也。旣言民又言國人。於義複矣。

失樂之情。其樂不樂。

樾謹按高注曰。非正樂。故曰不樂也。此注未得古義。古無一字兩讀之說。禮樂之樂。哀樂之樂。其讀同耳。其樂不樂者。言其所爲音樂不足喜樂也。上文曰。以此爲樂。則不樂。又曰。凡古聖王之所爲貴樂者。爲其樂也。上樂字並禮樂字。下樂字並哀樂字。高氏以非正樂釋不樂。非其旨矣。

制乎嗜欲。制乎嗜欲無窮。則必失其天矣。

樾謹按。下制乎二字。衍文也。嗜欲無窮四字爲句。涉上句而衍制乎二字。則文不成義。

勝理以治身。則生全。以生全則壽長矣。適音。

樾謹按。下以字衍文。勝理以治身。則生全。生全則壽長矣。若作以生全。則文不成義。下文勝理以治國。則法立。法立則天下服矣。法立上無以字。是其證。

太小則志嫌。以嫌聽小。則耳不充。

樾謹按。高注曰。嫌聽。譬自嫌之嫌。此注必有誤。高注原文當作嫌。讀如自謙之謙。禮記大學篇。此之謂自謙。鄭注曰。謙讀爲慊。高意此嫌字與自謙之謙同。亦當讀爲慊。故云然也。孟子公孫丑篇。吾何慊乎哉。趙注曰。慊。少也。大學篇正義曰。慊。不滿之貌。太小則志慊。於義正合。以危聽清。則耳谿極。

樾謹按高注曰。谿虛極病也。殊不成義。谿疑飢字之誤。其左旁谷字。與谿字左旁谷字相似。因而致誤也。文選上林賦曰。與其窮極倦飢。郭注曰。窮極倦飢。疲憊者也。飢極義同。並有病義。

乃之阮淪之陰。古樂

樾謹按阮淪本作阮淪。阮讀若昆。說文繫傳。冒部。阮。代郡五阮關也。從冒元聲。讀若昆。是其證也。阮字讀與昆同。故即可借爲昆。淪者命之借字。阮淪卽昆命也。因淪誤作淪。而讀者又不知阮與昆古音相近。故莫得其旨。

有倅作爲鼗鼓鐘磬吹荅管壎篪韜椎鍾。

樾謹按吹字衍文也。下文云。或鼓鼗擊鐘。鐘磬吹荅展管篪。卽承此文而言。此言鼗鼓。不言鼓鼗。言鐘磬。不言擊鐘磬。則荅上不得有吹字明矣。蓋卽涉下文而衍。

周文王處岐。諸侯去殷三淫而翼文王。

樾謹按高氏解三淫爲剖比干之心。斷材士之股。列孕婦之胎。先識覽殺三不辜。注同。然竊謂殺三不辜。或如高氏之說。若此云三淫。恐注義尙有未安。且如注義。則三淫卽殺三不辜。使易其文曰。諸侯去殷殺三不辜而翼文王。其可通乎。三淫之文。殆必有誤。呂氏原文疑當作諸侯去殷王受而翼文王。王與三形似易誤。受誤作至。因又誤爲淫耳。

土潤溽暑。季夏紀。

械謹按暑字衍文也。高注曰。夏至後三十日大暑。節火王也。潤溽而濕重。又有時雨。然則潤溽下無暑字明矣。後人因注有大暑字。遂於正文闢入暑字。并禮記月令而亦誤矣。月令鄭注曰。潤溽謂塗溼也。是古本禮記無暑字。

以將陽氣。音律。

械謹按詩樛木篇。福履將之。箋云。將扶助也。以將陽氣者。以扶助陽氣也。說文手部。將扶也。將與將通。無留獄訟。以亟以故。

械謹按高注曰。亟疾故事。然以疾以事。義不可通。下以字乃爲字之誤。無留獄訟。以亟爲故。猶上文曰。無敢懈怠。以多爲務也。兩文正一律。

候人兮猗。音初。

械謹按文選吳都賦注。引此文無兮字。是也。猗卽兮字。不當並用。

涉漢梁敗。

械謹按左傳正義云。舊說皆言漢濱之人。以膠膠船。故得水而壞。此言梁敗者。天子造舟爲梁。舟敗卽梁敗也。畢校疑其互異。非是。

四面不出周郊。制樂、

樾謹按上文曰東西南北不出國郊。則此周郊亦國郊之誤。韓詩外傳正作四面不出國郊。

舍行七星。星一徙當七年。

樾謹按下文星字衍文也。舍行七星故一徙當七年。其中間不應有星字。

寒暑則不當。明理、

樾謹按寒暑上當有其字。方與上三句一律。

人民淫燂不固。

樾謹按下文云禽獸胎消不殖草木庠小不滋五穀萎敗不成。則此句是言男女不能生育。季夏紀禾稼不育乃多女災是也。高注曰不固不執正道失之。

有若山之楫。

樾謹按高注曰楫林木也。然楫之爲林木古訓無徵。楫疑攝字之誤。說文木部攝木葉搖白也。徐鍇曰謂木遇風而翻見葉背背多白故曰搖白也。氣之形狀若風之翻動木葉故曰有若山之攝。上文云有若水之波亦以水之播動者爲喻。義正一律。

有鬼投其隙。

樾謹按高注曰：陴，腳也。音楊子愛軒一毛之軒。然陴不訓腳，亦不音軒。音訓均有可疑。以下文有螟集其國例之，則陴字仍當從城上女牆之本義。說文自部：陴，城上女牆俾倪也。投其陴，集其國。文正一律高讀殆非。

攻伐之與救守一實也。振亂。

樾謹按高注曰：攻伐欲陷人，救守欲完人，其實一也。然其實一也，謂之一實，義似未安。一實當作一貫。知化篇曰：雖知之與勿知，一貫也。過理篇曰：亡國之主一貫。是呂氏書多用一貫字。此文實字，當亦貫字之誤耳。

自今單唇乾肺，禁寒。

樾謹按自今乃自令之誤。畢校已及之矣。單字高注訓盡，然唇無可盡之理。殆非也。單當讀爲燂，省不從火耳。後漢泗水王歙傳注：燂，灼也。然則燂唇者，灼唇也。與乾字同義。順民篇：焦唇乾肺。此言燂，猶彼言焦。

今不別其義與不義，而疾取救守，不義莫大焉。

樾謹按疾取救守，義不可通。疑疾下奪攻伐二字。當云：今不別其義與不義，而疾攻伐取救守，不義莫大焉。下文屢以攻伐救守對言，此可爲證。疾攻伐者，言深惡此攻伐之事也。安死篇曰：今多不先定其

是非而先疾鬪爭。此惑之大者也。疾攻伐與疾鬪爭同誼。呂氏之意。主乎攻伐而不取救守。故以疾攻伐取救守爲不義。振亂篇曰。今之世。學者多非乎攻伐。非攻伐而取救守。取救守則鄉之所謂長有道而息無道。賞有義而罰不義之術不行矣。文義與此相似。此云疾攻伐取救守。猶彼云非攻伐而取救守也。下文云。故大亂天下者。在於不論其義。而疾取救守。誤與此同。高注訓疾爲爭。其義迂曲矣。故取攻伐者不可非。

櫛謹按取者二字。衍文也。此文本云。故攻伐不可非。攻伐不可取。救守不可非。救守不可取。言攻伐與救守。皆有是有非也。第一句衍取字者。則與下三句不一律。而義亦不可通矣。救守不可取。

櫛謹按高注曰。於義當守當救。不可取而有之也。此注蓋有奪誤。當云。於義不當守。不當救。不可取而有之也。上文攻伐不可取。注曰。於義不可攻。不可伐。故不可取。是其例矣。惟高氏解取字爲取而有之。殊失其指。不可取與不可非對文。乃孔子奚取焉之取。非謂取而有之也。畢氏沅校本。不解前後文誼。又不知高注之奪誤。反疑此五字爲衍文。故具論之。

若令桀紂知必國亡身死。殄無後類。吾未知其厲爲無道之至於此也。吳王夫差智伯瑤。知必國爲巨墟。身爲刑戮。吾未知其爲不善無道侵奪之至於此也。晉厲知必死於匠麗氏。陳靈知必死於夏徵舒。宋康



知必死於溫，吾未知其爲不善之至於此也。

樾謹按此文凡言吾未知者三，惟末句不誤。第一句第二句皆有衍字，蓋此文皆承上文而言。上文曰：使夏桀殷紂無道至於此者幸也，使吳夫差智伯瑤侵奪至於此者幸也，使晉厲陳靈宋康不善至於此者幸也。據此，則第一句當云：吾未知其爲無道之至於此也。第二句當云：吾未知其爲侵奪之至於此也。今第一句衍厲字，第二句衍不善無道四字，則與上文不相應矣。

古之至兵，民之重令也。論威。

樾謹按古乃謂字之誤，涉下文故古之至兵句而誤也。謂之至兵四字爲句，乃結上之詞，當連上文讀之曰：凡軍欲其衆也，心欲其一也，三軍一心，則令可使無敵矣，令能無敵者，其兵之於天下也，亦無敵矣。謂之至兵，高氏本於此下出注曰：至兵，至德君之兵也，令無不化，故謂之至兵也。今誤移注文於民之重令也下，乃改注文至兵爲至重，而文義俱乖矣。民之重令也，本與下文重乎天下，貴乎天子，一氣相屬，今誤斷之，則文不成義，非高氏之舊，當訂正。

晉文公造五兩之士五乘。簡選。

樾謹按高注曰：兩，技也，以技訓兩，未知所出。疑呂氏原文作五能之士，古能字或段而爲之，不屈篇曰：施而治農夫者也。注曰：而能也，是本書段而爲能之證，而兩形似，因誤爲兩矣。

能審因而加勝則不可窮矣決勝

樾謹按此本作能審因而加則勝不可窮矣下云勝不可窮之謂神即承此言今則勝二字傳寫誤倒趙簡子有兩白騾而甚愛之陽城胥渠處廣門之官夜款門而謁曰主君之臣胥渠有疾醫教之曰得白騾之肝病則止不得則死愛士

樾謹按高注曰陽城姓胥渠名處猶病也廣門邑名也官小臣也此注殊誤當以陽城胥渠處廣門之官爲句官館古同字周易隨初九官有渝蜀才本官作館是其證也陽城胥渠處廣門之官者言陽城胥渠居於廣門之館也夜款門而謁者即陽城胥渠其曰主君之臣胥渠有疾乃胥渠自通於謁者之詞非他人代爲之請也故董安于曰諱胥渠也期吾君騾請卽刑也若他人代請則不得以此爲胥渠罪矣高氏不知官爲古館字而讀處字絕句訓處爲病古無此義又以款門者爲廣門之小臣益非當時事實

天子乃厲服厲飭李秋紀

樾謹按厲飭本作厲飭高注曰是月天子尙武乃服猛厲其所佩之飾以射禽也猛厲下脫之服廣三字本作乃服猛厲之服廣其所佩之飾以射禽也淮南子時則篇天子乃厲服廣飾高注曰天子尙武乃服猛厲之服廣其所佩之飾以射禽是其明證也廣字涉上文而誤作厲而注文又有脫字遂不可

復正矣。

於是翦其髮。酈其手。順民。

櫪謹按酈未詳何字。畢校云。李善注文選。應休璉與廣川長書。引此亦作酈。音酈。似當從磨得聲。善又注劉孝標辨命論。引此作磨。恐是磨字之誤。今按畢說是也。呂氏原文本作磨。後人音磨爲酈。遂并正文磨字亦誤加。旁而磨又誤作磨。於是其字益非矣。磨者櫪之段字。說文木部。櫪。櫪斲杙指也。韻會引繫傳曰。謂以木桺十指而縛之也。亦通作歷。莊子天地篇。罪人交臂歷指。是也。此云磨其手。於義正合。至精通篇。刃若新酈研。高注曰。酈。砥也。其字宜是磨字之誤。與此文全別。手豈可言砥乎。畢氏混而一之。非是。

上貢必適。

櫪謹按此本作貢士必適。禮記射義疏引書傳曰。古者諸侯之於天子也。三年一貢士。一適謂之好德。再適謂之賢賢。三適謂之有功。又云。貢士一不適。謂之過。再不適謂之敖。三不適謂之諫。然則貢士必適。謂文王貢士於紂。無不適也。士誤作上。又誤作上貢。而義不可通矣。

顏色愁悴不贍者。

櫪謹按愁悴卽憔悴也。說文禾部。秋从禾。𤇗省聲。籀文作穠。不省。火部。𤇗讀若焦。是秋與焦聲相近。漢

書律曆志曰。秋。鑿也。古誼卽存乎聲。秋之訓鑿。亦秋與焦聲近之證也。然則憔悴之爲愁悴。正古人同聲段借之例。

願一與吳徵天下之衷。今吳越之國。相與俱殘。士大夫履肝肺。同日而死。孤與吳王接頸交臂而償。此孤之大願也。

樾謹按。徵天下之衷句。衍下字。畢校已及矣。今吳越之國。當作令吳越之國。蓋言願令如此也。作今者誤。

客有爲寡人少來靜郭君乎。知士。

樾謹按。少字衍文。涉上文寡人少殊。不知此而誤。戰國策無少字。

故子路揜雉而復釋之。審已。

樾謹按。高注曰。不欲天物。故釋之。此未得呂氏之旨。下文曰。子列子常射中矣。請之於關尹子。關尹子曰。知子之所以中乎。答曰。弗知也。關尹子曰。未可。子路之釋雉。卽關尹子之意。蓋揜襲而取之。是未知所以取之也。猶射中而未知所以中也。雖足以得物。而於己未審。此子路之所以復釋之。而呂氏引以證審己之義者也。高注失之。

君之賂以欲岑鼎也。以免國也。

樾謹按此當作君之賂以岑鼎也。欲以免國也。欲字誤移在上句。則文不成義。畢曰。猶言賂以其所欲之岑鼎。曲說也。

今夫攻者祇厲五兵。侈衣美食。發且有日矣。所被伐者不樂。非或聞之也。神者先告也。精通

樾謹按侈衣美食四字。當在所被伐者下。言攻者將發。而所被伐者。雖侈衣美食而不樂也。

夫葬所愛所重。而以生者之所甚欲。其以安之也。若之何哉。節喪

樾謹按生者之所甚欲。謂利也。珠玉國寶之類。豈非生者之所甚欲乎。而以之徇葬。其必不能安也明矣。下文曰。民之於利也。犯流矢。蹈白刃。涉血墊肝。以求之。卽承此而言。高注曰。甚欲。欲厚葬也。則與下意不屬矣。

皆鄉里之所釜鬻者而逐之。安死。

樾謹按此句與上下文不屬。疑鄉里以下十字。乃後文撲擊遏奪下之錯簡。當云。君之不令民。父之不孝子。兄之不悌弟。皆憚耕稼採薪之勞。不官官人事而所美衣侈食之樂。智巧窮屈。無以爲之。於是乎聚羣多之徒。以深山廣澤林藪。撲擊遏奪鄉里之所釜鬻者而逐之。又視名臣大墓葬之厚者。求舍便居。以微拍之。如此則文義始順。戰國策秦策。蔡澤見逐於趙。而入韓魏。遇奪釜鬻於涂。此云撲擊遏奪鄉里之所釜鬻者而逐之。卽其事矣。若在上文。則義殊不可曉。

此言不知鄰類也。

樾謹按鄰字衍文也。此言不知類也。與孟子告子篇此之謂不知類文義正同。鄰類形似。因譌致衍耳。聽言篇曰。乃不知類矣。達鬱篇曰。不知類耳。並無鄰字。足徵此文之衍。

其所非。方其是也。其所是。方其所非也。

樾謹按兩方字。並乃字之誤。言所非乃其所是。所是乃其所非也。故曰是非未定。高氏不知方字之誤。而訓爲比。迂矣。

其主俗主也。不足與舉異寶。

樾謹按舉字衍文也。此當云其主俗主也。不足與今衍舉字者。古與舉二字通用。周官師氏職曰。王舉則從。故書舉爲與。史記呂后紀。蒼天舉直。徐廣曰。舉一作與。是其證也。疑此文與字本或作舉。傳寫誤合之。因爲不足與舉矣。高注訓舉爲謀。非是。

五員過於吳。

樾謹按此當作五員適於吳。涉上文過於荆而誤耳。上文云。因如吳過於荆。蓋紀其所經歷。故得言過。若吳則其所如也。不得言過矣。高注曰。過猶至也。當作適猶至也。莊子天地篇釋文。引司馬注曰。適至也。高氏訓適爲至。正與此同。足徵過字之誤。

天地至大矣。至衆矣。將奚不有爲也。而無以爲爲矣。而無以爲之。

樾謹按。而無以爲四字爲句。將奚不有爲也。而無以爲。言人皆有爲。而彼獨無爲也。爲矣。而無以爲之。言雖言爲。而仍無爲也。高氏讀而無以爲爲矣六字爲句。則上下文皆不成義。

搏杖而揖之。異用。

樾謹按。搏杖卽扶杖也。尊聲。夫聲相近。故義得通。釋名釋言語曰。扶。傳也。傳。近之也。是其例矣。

無發蓋藏。無起大衆。以固而閉。發蓋藏。起大衆。地氣且泄。仲冬紀

樾謹按。以固而閉。本作以固天閉地。地氣且泄。本作陽氣且泄。音律篇曰。黃鐘之月。土事無作。慎無發蓋。以固天閉地。陽氣且泄。是其證也。月令作以固而閉。地氣且泄。乃奪陽字。又誤天字爲而字耳。後人據月令以改此文。幸音律篇未改。尙可訂正。說詳羣經平議。

兼用六物。

樾謹按。上文秬稻必齊。麴蘖必時。湛醴必潔。水泉必香。陶器必良。火齊必得。正是六物。故月令正義曰。六物者。秬稻一。麴蘖二。湛醴三。水泉四。陶器五。火齊六也。其義明白。自可無疑。而高氏此注曰。六物。秬稻麴蘖水火也。則與上文不合。疑高注本曰。六物。秬稻。麴蘖。湛醴。水泉。陶器。火齊也。傳寫有奪文耳。人時灌之。則惡之。而日伐其根。至忠。

樾謹按日當作自字之誤也。此句自字與上句人字正相對。下文曰：夫惡聞忠言，乃自伐之精者也。卽承此言之。足徵日伐之當作自伐矣。

王大怒不說。

樾謹按大怒不說於文似複而非複也。說之言解也。詩氓篇猶可說也。鄭箋曰：說解也。禮記檀弓篇：天下其孰能說之。鄭注曰：說猶解也。然則大怒不說猶大怒不解耳。

殺身出生以徇之。忠廉

樾謹按高注曰：出猶去。去生必死也。然出生二字義甚迂曲。疑當作出身殺身以徇之。誠廉篇曰：此二士者皆出身棄生以立其意。亦以出身二字連文可證。

有妻之子而不可置妾之子。當務

樾謹按此當作有妻之子不可而置妾之子。乃後人不解古義而妄改之也。不可而者不可以也。本書每有此例。功名篇曰：故當今之世有仁人在焉不可而不此務。有賢主不可而不此事。不屈篇曰：惠子曰：若王之言則施不可而聽矣。用民篇曰：處次官執利勢不可而不察於此。凡言不可而者並與不可以同。

寬諄數犯我以義違我以禮。長見



櫛謹按犯我以義達我以禮。卽範我以義。圍我以禮。範圍作犯達。皆段借字。周易繫辭傳。範圍天地之化。釋文曰。範馬張王肅本作犯。圍本作達。是其證矣。

遭乎亂世。不爲苟在。誠廉。

櫛謹按在字無義。疑仕字之誤。

與其竝乎。周以漫吾身也。不若避之以潔吾行。

櫛謹按竝字無義。疑立字之誤。

公孫宏敬諾。不侵。

櫛謹按敬諾上本有曰字。傳寫奪之耳。戰國策正作公孫宏曰。敬諾。

良人請問十二紀。序意。

櫛謹按高注曰。良人。君子也。此訓未得。國語齊語曰。十連爲鄉。鄉有良人焉。韋注曰。賈侍中云。良人。鄉士也。昭謂良人。鄉大夫也。呂氏所稱良人。或亦此乎。

嘗得學黃帝之所以誨顓頊矣。爰有大圓在上。大矩在下。汝能法之。爲民父母。

櫛謹按大圓四語皆黃帝之言。爰卽曰字也。尙書洪範篇。土爰稼穡。史記宋世家作土曰稼穡。古爰曰通用。爰有卽曰有耳。

三者皆私設精。則智無由公。

樾謹按精之言甚也。呂氏之意。蓋謂目耳心三者。皆爲私設。至其甚。則智無由公矣。至忠篇曰。夫惡聞忠言。乃自伐之精者也。注曰。精猶甚。勿躬篇曰。夫自爲人官。自蔽之精者也。注曰。精甚。然則謂甚爲精。本書之恆言。畢氏疑精爲情。失之矣。

# 諸子平議卷二十三

## 呂氏春秋二

秦之陽華有始覽

樾謹按高注曰陽華在鳳翔或曰在華陰西當以華陰之說爲是陽華與華陰其實一地皆從華山得名主乎山而言之則爲華山之陰故縣名華陰主乎地而言之則華山當其陽故數名陽華漢書地理志大原郡陽曲應劭曰河千里一曲當其陽故曰陽曲陽華之名猶陽曲也周禮之楊紆爾雅之楊陁並陽華之段晉至周禮以楊紆爲冀州藪亦猶以潁滿爲荊州浸波澆爲豫州浸同屬傳寫之訛郭璞注爾雅謂在扶風汧縣西則混於雍州之弦蒲高誘注淮南子謂在馮翊池陽則混於周之焦護並非也說詳羣經平議

南方曰巨風

樾謹按李善注文選木元虛海賦王子淵洞簫賦潘安仁河陽縣作詩引此並作凱風今作巨者疑豈之壞字也禮記孔子閒居篇表記篇釋文並曰凱本作豈是豈凱古通用豈風卽凱風也豈字闕壞止存下半因譌爲巨耳

代火者必將水。天且先見水氣勝。水氣勝故其色尙黑。其事則水。水氣至而不知數備。將徙于土。應同。

樾謹按水氣勝故其色尙黑。其事則水。此十二字當爲衍文。乃淺人不察文理。以上文之例增入。而不知其不可通也。當呂氏箸此書時。秦猶未并天下。所謂尙黑者。果何代乎。呂氏之意。以爲周以火德王。至今七百有餘歲。則火氣之衰久矣。其中閒天已見水氣勝矣。但無人起而當之耳。故曰水氣至而不知數備。將徙于土。言後之有天下者。又當以土德王也。今增入故其色尙黑。其事則水二語。則與水氣至而不知。文不相屬矣。厥後秦始皇有天下。推五德之運。以爲水德之始。此由其時不韋已死故也。若不韋猶在朝用事。則必以爲水數已備。秦得土德矣。

其室培濕。聽言。

樾謹按淮南子齊俗篇。鑿培而遁之。高注曰。培。屋後牆也。此培字當從彼訓。其室培者。其室之牆也。濕讀爲墁。廣雅釋詁。墁。下也。其室培濕。謂其室牆卑下也。與下文其城郭庠。正同一律。若依本字讀之。則不可通矣。

列近則持諫。將衆則罷怯。務本。

樾謹按持諫二字。義不可通。疑持祿之誤。持祿。言保其祿也。管子明法篇。小臣持祿養交。不以官爲事。晏子春秋問篇。仕者持祿。游者養交。荀子臣道篇。偷合苟容。以持祿養交。皆古書言持祿之證。

武王欲及湯而不成。既足以王道矣。論大、

樾謹按既足以王道。文義未足。呂氏原文當作既足以王通達矣。務大篇曰。湯武欲繼禹而不成。既足以王通達矣。是其證也。荀子儒效篇。通達之屬。莫不從服。楊倞注曰。通達之屬。謂舟車所至。人力所通之處也。荀子書屢言通達之屬。蓋古有此語。呂氏亦循用之耳。通與道字形相似。史記天官書。氣來卑而循車通。漢書天文志作車道。是其形似易譌之證。此文通譌作道。又奪達字。以致文不成義。當據務大篇文訂正。

地大則有常祥。不庭岐母羣。抵天翟不周。

樾謹按高氏於天翟下注曰。皆獸名也。不周二字屬下句讀。注曰。不周山在翟。然下文云。山大則有虎豹熊蟻。水大則有蛟龍鼉黿鱉。山大水大。文正相對。不得有不周二字也。且山亦多矣。何獨舉不周山乎。不周二字當屬上。自常祥以至不周。皆山水名也。雖不盡可考。然即不周之爲山名。已可例其餘矣。若從高注以常祥之屬皆爲獸名。則與下文言山複矣。山者獸之窟穴。故舉獸類以明其大。若地之所有。固不獨獸矣。言地大而專舉獸類。非理也。高氏失其義。因失其讀。殆不可從。

人主有奮而好獨者。本味、

樾謹按奮猶矜也。奮而好獨者。矜而好獨也。荀子子道篇。奮於言者華。奮於行者伐。楊注曰。奮。振矜也。

故古書每以奮矜連文。荀子正名篇曰：有兼聽之明，而無奮矜之容。墨子所染篇曰：其友皆好矜奮，淮南說林篇曰：呂望使老者奮，項託使嬰兒矜。

湯曰：可對而爲乎。

樾謹按：對字衍文也。可而爲乎，猶曰：可以爲乎。本書多有此例。去私篇曰：南陽無令，其誰可而爲之，可而卽可以也。此因涉下文對曰而誤衍對字耳。

甘而不嘔。

樾謹按：嘔者味之厚也。言甘而不失之過厚也。古或段膿爲之。文選七發：甘脆肥膿。注曰：膿厚之味也。是矣。說文無嘔字。膿亦鹽之俗體。其訓爲腫血，非肥厚之義。然衣部：襪，衣厚貌。酉部：醲，厚酒也。衣厚謂之襪，酒厚謂之醲，然則味厚謂之嘔，正合六書之例。未可因說文所無而轉疑。見于呂氏書者爲譌字也。畢氏沉疑爲嘔字之誤，非是。

馬之美者，青龍之匹，遺風之乘。

樾謹按：此論果之美，而忽及馬之美，殊爲不倫。疑此當蒙上文所以致之爲句。馬之美三字，乃衍文也。當云：所以致之者，青龍之匹，遺風之乘，蓋果之美者，皆不可以致遠。時日稍久，則味變矣。故必有青龍之匹，遺風之乘，然後可以致之也。後人不得其義，疑此二句言馬，與上文言果者不屬，因加馬之美三

字。使自爲一類。而不悟與本篇之旨。全不相涉。且上句所以致之四字。亦無箸矣。道者止彼在己。

樾謹按止彼在己。誼不可通。止疑亡字之誤。亡彼在己。言不在彼而在己也。古書每以亡與在相對。荀子正論篇曰。然則鬪與不鬪。亡於辱之與不辱也。乃在於惡之與不惡也。正名篇曰。故治亂在於心之所可。亡於情之所欲。堯問篇曰。吾所以得三士者。亡於十人與三十人中。乃在百人與千人之中。淮南原道篇曰。聖亡乎治人。而在於得道。樂亡於富貴。而在於得和。並其例也。莊子田子方篇曰。其在彼邪。亡乎我。在我邪。亡乎彼。與此文亡彼在己。文法正同。亡譌作止。因失其旨矣。

聖人之見時。若步之與影。不可離。首時。

樾謹按見當作尋。尋。古得字。形與見相近。因譌爲見。史記趙世家。踰年歷歲。未得一城。趙策得作見。卽其例也。又按聖字疑衍文。呂氏之意。泛言人之得時。若步與影之不可離。非專言聖人也。涉下文聖人之所貴唯時。而誤衍聖字。

民之讐之。若性戎夷胡貉巴越之民。是以雖有厚賞嚴罰。弗能禁。義賞。

樾謹按性字衍文也。上文云。民之安之若性。此云民之讐之若戎夷胡貉巴越之民。雖句法參差。而意本相準。因涉上文而衍性字。則戎夷胡貉巴越之民八字贅矣。

賞重則民移之。

按謹按高注曰。移猶歸此。未得移字之義。禮記郊特牲篇。順成之方。其蜡乃通。以移民也。鄭注曰。移之言羨也。是移有羨義。賞重則民移之。言賞重則民欣羨之也。玉篇。遷。移也。移之爲羨。猶遷之爲移矣。各一則不設。長攻。

樾謹按廣雅釋詁。設。合也。尙書盤庚中篇。各設中于乃心。隸釋載漢石經。設作翕。爾雅釋詁。翕。合也。是設與翕。文異義同。各一則不設者。言各一則不合也。高注以爲不設攻戰。則增出攻戰字矣。遇時雨。天地也。

樾謹按地字衍文。遇時雨天也。與上文遇湯武天也。遇桀紂天也。一律。正呂氏引喻之旨也。地與也形相似。因譌致衍耳。

人有爲人妻者。人告其父母曰。嫁不必生也。衣器之物。可外藏之。以備不生。遇合。

樾謹按高注曰。不必生。謂終死。此解大誤。不必生者。謂不必生子也。古者婦人無子則出。蓋恐其以無子見出。故令外藏衣器以備之。而不知其適以盜竊見出也。高注大非其旨矣。淮南子汜論篇。宋人有嫁子者。告其子曰。嫁未必成也。有如出。不可不私藏。私藏而富。其於以復嫁易。大旨與此略同。故嫖母執乎黃帝。



樾謹按高注曰黃帝說之然執無說義此注非也詩執競篇釋文引韓詩曰執服也執乎黃帝者服乎黃帝也白虎通三綱六紀篇婦服也以禮屈服也後漢書皇后紀注曰婦服也明其服事於人也皆可以解此文執字之義下文黃帝曰厲女德而弗忘與女正而弗衰雖惡奚傷方見黃帝說之意若此文但言嫫母服事黃帝未以黃帝言也

客有進狀有惡其名言有惡狀

樾謹按客下涉下文而衍有字其下涉上文楚王怪其名句而衍名字句末狀字亦涉上文而衍呂氏原文本云客進句狀有惡句其言有惡句兩有字均讀爲又狀又惡其言又惡卽下文所謂惡足以駭人言足以喪國也因多衍字遂不可讀

一上一下以禾爲量必已

樾謹按以禾爲量殊爲無誼高氏引淮南繆稱篇禾三變之文以釋之亦曲說也禾當作和莊子山木篇一上一下以和爲量是其明證禾卽和之壞字

不衣芮溫

樾謹按高注曰芮絮也不解溫字殆卽以本字讀之非也溫讀爲緼禮記玉藻篇緼爲袍鄭注曰緼謂今續及舊絮也是芮緼義同

子不耕於東海。吾不耕於西海也。吾馬何得不食子之禾。

樾謹按。吾不二字。衍文也。子不耕於東海。耕於西海也。此也字。讀爲邪。古字通用。言東海西海。非皆子所耕邪。吾馬何得不食子之禾乎。淮南子人閒篇。作子耕於東海。至於西海。吾馬之失。安得不食子之苗。其義更明。後人不達古書語意。臆加吾不二字。使與上句相對。而文義不可通矣。

紛紛分分。慎大覽。

樾謹按。高注曰。紛紛。殺亂也。分分。恐懼也。然則分分當作忿忿。老子五十六章。解其分。王弼注曰。除爭原也。顧歡本分作忿。卽其例矣。

若告我曠夏。盡如詩。

樾謹按。上文民心積怨。皆曰上天弗恤。夏命其卒。是有韻之詞。卽所謂詩也。湯誓所稱時日曷喪。子及女偕亡。亦是韻語。蓋當時民俗歌謠。有此言。故湯以爲盡如詩也。高注訓詩爲志。於義轉迂。

親郭如夏。

樾謹按。高注曰。郭讀如衣。今兖州人謂殷氏皆曰衣。言桀民親殷如夏氏也。高氏此注。未得呂氏之意。蓋由正文錯誤耳。呂氏本文。當作親夏如郭。言湯之親夏民。無異於郭氏也。故下文卽繼之曰。此之謂至公。簡選篇曰。親殷如周。視人如己。彼言親殷如周。可知此當言親夏如郭矣。其文誤到。因失其義耳。

靖箕子之宮。

樾謹按靖讀爲旌。旌箕子之宮。與下句裴商容之間一律。靖從青聲。青從生聲。旌亦從生聲。故旌字段靖爲之。介立篇。東方有士焉。曰爰旌目。列子說符篇。文亦同。而後漢書張衡傳注。引列子作爰精目。然則旌爲靖。猶旌爲精矣。高注曰。清淨其宮以異之。非是。

士過者趨。車過者下。

樾謹按士過者趨。當作徒過者趨。徒與車相對成義。晏子春秋諫篇曰。載過者馳。步過者趨。文義正與此同。徒字或作辻。闕壤而止存士字。因誤爲士耳。

將斬岸堙谿以迎鐘。權勳。

樾謹按斬當爲鑿。說文金部。鑿。小鑿也。字亦作斬。文選海賦。壘陵轡而斬鑿。注曰。鑿與斬古字通。是鑿有鑿義。言岸之高者。則鑿鑿之也。若作斬岸。則無義矣。

弗聽有頃諫之。

樾謹按頃字衍文也。弗聽有諫之。有當讀爲又。言又諫之也。後人不知有爲又之段字。故妄加頃字耳。昌國君將五國之兵以攻齊。

樾謹按戰國燕策曰。於是遂以樂毅爲上將軍。與秦楚三晉合謀以伐齊。然則所謂五國者。秦楚三晉。

也。高注謂燕秦韓魏趙大誤。燕是本國，不當更數。燕策又曰：昌國君樂毅爲燕昭王合五國之兵，其語更明，可知五國之不數燕矣。

恩，恩乎其心之堅固也。下賢。

樾謹按：高氏訓恩爲明貌，然於下堅固義不相應，殆非也。恩，恩當作勿勿。禮記禮器篇祭義篇鄭注並曰：勿勿，猶勉勉也。大戴記曾子立事篇盧注同：勉勉之義，與堅固相應。今誤作恩恩者，因俗書恩字作忽，或省作勿，與勿字相似，因而致誤耳。

迷乎其志氣之遠也。

樾謹按：迷當讀爲彌。古字通用。左傳：彌子瑕。大戴禮：保傅篇作迷子瑕。周官：眡祲。七曰：彌。鄭注曰：故書彌作迷，並其證也。哀二十五年左傳：以肥之得備彌甥也。杜注曰：彌，遠也。文選：西京賦：彌望廣豫。薛綜注同：彌乎其志氣之遠，義正相應。若作迷，則不可通矣。

堪士不可以驕恣屈也。報更。

樾謹按：高氏讀堪爲湛，故曰：堪，樂也。然非呂氏意也。堪之言克也。字通作戡。爾雅釋詁：戡，克也。釋言：克，能也。然則堪士猶能士也。士之有能者，必不爲驕恣屈，故曰：不可以驕恣屈也。

其實人則甚不安之二者，臣爲大王無取焉。順說。

樾謹按則字衍文也。人字乃又字之誤。其實又甚不安。與上文其名又甚不榮相對。之字屬下句。之二者猶言此二者與莊子之二蟲文法相同。先識篇曰之二國者皆將亡。慎勢篇曰之二臣者甚相憎也。皆可爲證。

時不可必成。其人事則不廣。不廣。

樾謹按廣讀爲曠。古廣曠字通。荀子王霸篇。人主胡不廣焉。解蔽篇。則廣焉能弃之矣。楊注並曰。廣讀爲曠。列子湯問篇。不思高林廣澤。釋文曰。廣一本作曠。並其證也。無義篇曰。以義勸則無曠事矣。高注曰。曠廢也。此文廣字。誼與彼同。言時不可必成。而人事則不可廢也。下文曰。若是而猶不全也。其天邪。人事則盡之矣。正見人事不曠之意。此篇卽以不廣名篇。蓋欲人以人事自盡。毋自曠廢也。高氏不知廣之爲曠。而釋之曰。廣博也。則此二句之義不可通。而於名篇之意亦失之矣。

公子糾外物則固難。必雖然管子之慮近之矣。

樾謹按公子糾三字。涉上文而衍。高注曰。糾在外不可謂必得主。故曰固難。必則其所據本已衍。朝要甲子之期。而紂爲禽。貴因。

樾謹按此當作要期甲子之朝。而紂爲禽。高注曰。與諸侯要期以甲子之日。可證正文之本爲要期也。朝期二字形相似。又涉下文吾已令膠鬲以甲子之期報其主而誤耳。其下文曰。武王與周公旦明日。

早要期則弗得也。亦以要期二字連文。

孔子道彌子瑕見釐夫人。

畢氏引梁仲子曰：淮南泰族訓云：孔子欲行王道，東西南北七十說而無所偶，故因衛夫人彌子瑕而欲通其道。語義正合。此文似有脫誤。

樾謹按：梁氏誤以道字爲行道之道，故疑有脫誤。其實非也。道者由也。道彌子瑕見釐夫人者，由彌子瑕見釐夫人也。晏子春秋諫上篇曰：楚巫微導裔款以見景公。文法正與此同。道導古通用。

其時已與先王之法虧矣。察今、

樾謹按高注曰：虧，毀也。然如高注，則但當曰其時先王之法虧矣，不得曰其時已與也。虧當爲詭聲之誤耳。左傳齊公子無虧，史記齊世家作無詭。漢書古今人表亦作無詭。是其證也。詭之言異也。文選西京賦：豈不詭哉。海賦：詭色殊音。注並曰：詭，異也。其時已與先王之法詭矣。猶曰其時已與先王之法異矣。故其下曰：世易時移，變法宜矣。蓋先王之法，所以不可行者，非法之毀，乃時之異也。注以本字釋之，未得其旨。

而佞進今之世當之矣。觀世、

樾謹按而佞進三字，衍文也。謹聽篇無當據刪。

若是而擊可大彊，悔過。

樾謹按注云：一作若是而弗擊不可。大彊，此蓋校老之詞，誤入注文。然作若是而弗擊不可，較今本爲勝。當從之。惟大彊二字，義不可通。今按若是而弗擊不可，先軫之言已止於此。大彊二字屬下句，當作大臣彊請擊之。襄公不得已而許之，彊請與不得已，正相應。上文先軫言於襄公曰：秦師不可不擊也。臣請擊之。若此文猶言臣請擊之，則詞複矣。今本卽涉上文而誤。

都鄙有服，樂成。

樾謹按說文又部，段治也。從又從日，日事之制也。然則服事之服，字本作段。今經典皆作服，而段字廢矣。日爲事之制，故服亦爲制。都鄙有服者，都鄙有制也。襄三年左傳杜注曰：公卿大夫服不相踰，則誤以爲車服之服。此篇高注曰：服，法服也。然都鄙有法服，義不可通。疑高氏原文曰：服，法也。蓋服爲制，故亦爲法。淺人不知其義，妄加服字耳。

故聽無事治，事治之立也。人主賢也。

樾謹按聽無事治，謂聽愚民之言，必無事治也。上文曰：使鄭簡魯哀當民之誹訛也。而因遂弗用，則國必無功矣。子產孔子必無能矣，卽其義也。故又曰：事治之立也。人主賢也。高注殊未明了。

孔子見之，以細觀化遠也。察微。

樾謹按以細觀化遠也。甚爲無義。高注曰。見其始。知其終。故曰觀化遠也。亦曲說耳。觀下蓋脫大以近觀四字。化字當在遠字之下。而化上又脫通於二字。本作以細觀大以近觀遠。通於化也。何以明之。淮南子齊俗篇載此事曰。孔子之明。以小知大。以近知遠。通於論者也。故知此文當作以細觀大以近觀遠。說苑政理篇亦載此事曰。孔子可謂通於化矣。此文有化字。故知當作通於化也。與淮南子字異而句法同。

郈氏介其雞。季氏爲之金距。

樾謹按此當從左傳作季氏介其雞。郈氏爲之金距。蓋爲金距更甚於介其雞。故季氏不勝而怒也。因歸郈氏之宮而益其宅。

樾謹按歸讀爲壞。禮記緇衣篇。私惠不歸德。鄭注曰。歸或爲懷。古懷壞同聲。字亦通用。襄十四年左傳。王室之不壞。服虔本壞作懷。是其證也。歸可爲懷。故亦可爲壞矣。

以魯國恐不勝一季氏。況於三季同惡。

樾謹按高氏於同惡下出注云。同惡昭公。殆失其讀也。此當於三季絕句。言一季氏猶恐不勝。況於三季乎。同惡二字屬下。固相助爲句。同惡固相助。言同惡之人固相輔助也。昭十三年左傳曰。同惡相求。如市賈焉。卽其義也。惡如字。



將奮於說以取少主也。去者、

樾謹按高注曰：「少主，惠王也。」此說非是。據下文云：「人之老也，形益衰而智益盛。」今惠王之老也，形與智皆衰邪？然則惠王是時已老矣，非少主也。蓋因惠王年老，有漢景帝疑周亞夫非少主臣之意，故唐姑果以此言譖謝子耳。

未失其所以爲士一，而王以爲臣，失其所以爲士一，而王不以爲臣，則嚮之所謂士者乃士乎？正名。

樾謹按上文云：「雖見侮而不鬪，未失其四行也。」未失其四行者，是未失其所以爲士一矣。然則此文失其所以爲士一，上無所承，且於義亦不應有疑。呂氏原文本云：「未失其所以爲士一，而王不以爲臣，則嚮之所謂士者乃士乎？」今衍「十二字」，遂不可讀。

齊湣王周室之孟侯也。

樾謹按湣王二字，衍文也。齊周室之孟侯也，乃推始封之齊而言。若湣王時，周室衰微，儕於列國，久無此稱矣。下文曰：「太公之所以老也，桓公嘗以此霸矣。」皆承齊字而言。若此句是齊湣王，則下二句便不可通。高氏作注時，已衍湣王二字，故有山頭井底之譏，其實非也。

分地則速，無所匿遲也。審分覽。

樾謹按遲字，衍文也。上云「公作則遲」，有所匿其力也。此云「分地則速」，無所匿也。其文甚明，因涉上文而

衍遲字義不可通。高氏曲爲之說，非是。

奪其智能，多其教詔，而好自以。

樾謹按：奪當作奮，形似致誤也。奮猶矜也。說見前本味篇。奮其智能，謂矜其智能。今誤作奪，義不可通。夫說以智通，而實以過愧。

樾謹按：舊校云：過一作遇。此當以作遇者爲是。遇與愚古通用。詩巧言篇：遇犬獲之。釋文曰：遇，世讀作愚。莊子則陽篇：匿爲物而愚不識。釋文曰：愚本作遇。並其證也。愚字與上句智字正相對。玉篇：愧，惑也。然則遇愧猶愚惑也。說以智通而實以愚愧，與下文譽以高賢而充以卑下，贊以潔白而隨以汙德，任以公法而處以貪枉，用以勇敢而墮以罷怯，諸句一律。下兩字與上兩字義皆相反，因借遇爲愚，又誤遇爲過，而其義始晦矣。

莫人不能全，乃備能也。

樾謹按：莫人當爲真人，字之誤也。隸書真字作眞，莫字作莫，二形相似，故往往致誤。史記高祖功臣侯者表：甘泉戴侯莫搖。漢表莫搖作眞粘。新序雜事篇：黃帝學乎大眞。路史疏仡紀曰：大眞或作大莫，並其證也。真人不能全，乃備能也。蓋卽堯舜不偏物之意。高注不知莫字之誤，曲爲之說，大謬。故曰：天無形而萬物以成，君守。

樾謹按曰。乃昇字之誤。昇字闕壞。止存上半之曰。因誤爲日矣。下文至精無象而萬物以化。高注曰。說與昇天同。則其所據本正作故昇天無形。

故善爲君者無識。

樾謹按無識當爲無職。周官職方氏。脩華嶽碑作識方氏。是職與識古通用。善爲君者無職。其次無事。無職與無事義相近。若作無識。失其義矣。下文云。人主好以己爲。則守職者舍職而阿主之爲矣。然則善爲君者無職。正以此也。高氏不知識之當爲職。乃曰。物不可悉識。此曲說也。勿躬篇曰。人主知能不能之。可以君民也。則幽詭愚險之言。無不職矣。無不職者。無不識也。此借識爲職。彼借職爲識。正可互證。

故思慮自心傷也。智差自亡也。

樾謹按心字衍文。思慮自傷也。智差自亡也。兩句一律。注云。思慮勞精神而亂於心。故自傷也。正以自傷二字連文。可知本無心字。因涉注文亂於心句而誤衍耳。差讀爲睦。淮南子原道篇曰。偶睦智故。曲巧譎詐。此云智差。卽彼云偶睦智故也。故與思慮相對。注曰。差過也。用智過差。極其情欲。以自消亡。未得其義。

奮能自歟。其有處自狂也。

樾謹按此當作奮能自殛也。有處自狂也。與上句思慮自傷也。智差自亡也。兩句正一律也。字秦刻石文作𠄎。其字古鐘鼎文或止作𠄎。兩形微似。因而致誤。

謁孔子而進食。孔子佯爲不見之。任數。

樾謹按孔子佯爲不見之七字。當在上文選間食熟之上。呂氏本文蓋云。孔子望見顏回攫其甑中而食之。孔子佯爲不見之。選間食熟。謁孔子而進食。孔子起曰。今者夢見先君。食潔而後饋。今到其文。則義不可通。李善注文選君子行。因并刪此七字矣。

故善爲君者。矜服性命之情。而百官已治矣。勿躬。

樾謹按矜字義不可通。疑務字之誤。

不好淫學流說。知度。

樾謹按流說卽游說也。流游義得相通。漢書項籍傳。必居上游。注曰。游卽流也。韋元成傳。德盛而游廣。注曰。游亦流也。匡謬正俗曰。旂者旌旗之旂。訓與旋同。然則從旂從充之字。本得通用。荀子勸學篇。昔者瓠巴鼓瑟而流魚出聽。流魚卽游魚也。游說之爲流說。猶游魚之爲流魚矣。

蒙厚純樸。以事其上。

樾謹按蒙與厚同義。詩長發篇。爲下國駿龐。毛傳曰。龐。厚也。荀子榮辱篇。引作爲下國駿蒙。楊注曰。蒙。

讀爲厖厚也。此云蒙厚純樸。以事其上。蒙亦當讀爲厖。厖厚爲一義。純樸爲一義。以不知爲道。以柰何爲實。

樾謹按舊校云實一作寶。與淮南主術篇合。當從之。高注曰。以不知爲貴。因循長養。不戾自然之性。故以不可柰何爲實也。實亦寶字之誤。惟正文但言柰何。而注文增出不可。恐非其旨。柰何卽如何也。昭十二年公羊傳注曰。如猶柰也。是柰與如同義。旣以不知爲道。則遇事必曰如何如何。故以如何爲實也。孔子曰。不曰如之何如之何者。吾末如之何也已矣。可證此義。下文堯曰。若何而爲及日月之所燭。舜曰。若何而服四荒之外。禹曰。若何而治青北化九陽奇怪之屬。引三聖人言。皆有若何二字。若何卽柰何也。以柰何爲寶之義。呂氏自申明之如此。足見高注之非。



## 諸子平議卷二十四

呂氏春秋三

待其功而後知其舜也。是市人之知聖也。審應、

樾謹按上文云。未有功而知其聖也。是堯之知舜也。然則此文亦當云。待其功而後知其聖也。是市人之知舜也。聖舜二字。傳寫互易。

王射之。重言、

樾謹按高注曰。使王射不動不鳴何意也。是以王射之三字爲成公賈之言。殆非也。此三字當連下曰字爲句。王射之曰。有鳥止於南方之阜。其三年不動。將以定志意也。其不飛。將以長羽翼也。其不鳴。將以覽民則也。皆王射之言。若如高注。則曰字上又當有王字矣。

昔吾所亡者紡緇也。今子之衣禪緇也。以禪緇當紡緇。子豈不得哉。淫辭、

樾謹按紡與禪對。紡猶複也。紡字從方。方之本義爲兩舟相並。其字亦或作舫。衣之複者謂之紡。猶舟之並者謂之舫矣。故計其禪與紡。而因以爲得耳。

罪不善。善者故爲不畏。

樾謹按此本作罪不善善者故爲畏。故讀爲胡。墨子尙賢中篇。故不察尙賢爲政之本也。一本故作胡。下文曰。胡不察尙賢爲政之本也。是上文故字。乃胡之段字。管子侈靡篇。公將有行。故不送公。亦以故爲胡。並其證也。故爲畏。卽胡爲畏。言所罪者止是不善者。則善者胡爲畏也。後人不知故與胡通。而疑故爲畏三字。文不成義。遂臆加不字。失其旨矣。楊倞注荀子解蔽篇引論衡。正作善者胡爲畏。

以示諸民人。

樾謹按舊校云。民人一作良人。當從之。良人見序意篇。蓋當時有此名目。高彼注曰。君子也。非是。說見前。

豎子操蕉火而鉅。不屈。

樾謹按蕉當作焦。求人篇。十日出而焦火不息。是其證也。字亦作爇。舉難篇。爇火甚盛。蓋爇焦聲近通用。莊子逍遙遊篇。日月出矣。而爇火不息。釋文曰。爇本作焦。儀禮士喪禮。楚煇置于焦。注曰。焦。炬也。所以然火者也。禮記少儀篇。執燭抱焦。注曰。未爇曰焦。是其字本作焦。說文火部。焦所以然持火也。求人篇作焦者。從省。此篇作焦。則段字耳。

寡人寧以臧爲司徒。無用印。應言。

樾謹按高注曰。臧亦魏臣。此恐不然。若臧實有其人。則魏王已有爲司徒之人矣。何以下文又曰。願大



王之更以他人詔之也乎。此臧乃臧獲之臧。方言曰：荆淮海岱雜齊之間，罵奴曰臧，是也。寧以臧爲司徒，無用印，乃極言印之不可用。故下文起賈誼孟印曰：公甚賤於公之主也。蓋視之不如臧獲，賤之至矣。若臧亦魏臣，則何賤之有乎。

以絳傍安邑，令負牛書與秦，猶乃善牛也。印雖不肖，獨不如牛乎。

樾謹按：此當作令牛負書與秦。高注曰：言王使負牛持絳傍安邑之書，致之於秦。秦猶善牛，亦當作使牛負持。正文注文牛字，並當在負字之上。蓋言王以地與秦，則雖使一牛負持其書以往秦，猶將善視此牛也。故曰：印雖不肖，獨不如牛乎。今牛負字到義不可通。畢氏沉曰：負牛當亦是魏臣，在孟印之下誤矣。

令二輕臣也。令臣責印，雖賢固能乎。

樾謹按：令二兩字，義不可通。疑今王兩字之誤。言王令三將軍爲臣先曰：視印如身，是重臣也。今王輕臣也。令臣責印，雖賢固能乎。因涉上下文並有令字，故誤今爲令。因又誤王爲二耳。高注曰：二，疑也。臣見疑則不重矣。此注亦有誤。高注本云：輕疑也。臣見疑則不重矣。蓋高氏以疑訓輕，又以其義未足，故加下句以申明之。今作二疑也，乃後人以既誤之正文，改不誤之注文耳。又高氏於令臣責，下注曰：令秦責臣。此注亦誤。當云令臣責秦。言王既輕臣，日後秦復有隙，臣不能復責之也。今到其文曰：令秦責

臣則失其義矣。古書錯誤所在多有，學者宜悉心考正之。

又況於弱魏王之令乎？

樾謹按乎字衍文。又況於弱四字爲句，當連上文讀之曰：魏雖強，猶不能責。無責又況於弱。魏王之令四字，屬下文讀。當云：魏王之令孟卬爲司徒，以棄其責則拙也。今衍乎字，遂失其讀，并失其義。

中非獨弦也，而弦爲弓中之具也。具備、

樾謹按弓字衍文也。無弦則必不能中，故弦爲中之具。今衍弓字，則文不成義矣。

吾子胡不位之。離俗覽、

樾謹按之字衍文也。高注曰：何不位天子之位也。則所據本正作胡不位。

卻而自歿。

樾謹按歿當爲刎。一切經音義引字略曰：斷首曰刎。又曰：刎古文殳同。荀子彊國篇：是猶欲壽而殳頭也。楊倞注曰：殳當爲刎。蓋古無刎字，古人每借殳爲刎。此又作歿者，歿卽殳之或作體也。高義篇：歿頭乎王廷。歿亦當爲刎。

澹乎四海。上德、

樾謹按高注曰：澹，之也。之乃足字之誤。古書每以澹爲贍足之贍。漢書食貨志：司馬遷傳：東方朔傳：趙

充國傳師古注並曰澹古贍字是其證也。畢校本謂澹贍義同疑是安也之誤非是。

君利勢也。次官也。處次官執利勢不可而不察於此。川民

樾謹按次官二字義不可通疑當作大官蓋大誤作欠因誤作次矣。貴公篇曰夫相大官也處大官者不欲小察可以爲證。

知其能力之不足也則以爲繼矣以爲繼知則上又從而罪之。適威

樾謹按畢校云則以爲繼矣以爲繼知當作則難以爲繼矣難以爲繼脫兩難字下知字衍今按畢謂下知字衍是也謂脫兩難字非也爲當讀作僞古字通用知其能力之不足也則以僞繼矣以僞繼則上又從而罪之文義甚明莊子則陽篇亦有此文大略相同正作民知力竭則以僞繼之可證明此文之義。

子陽極也好嚴有過而折弓者恐必死遂應獬狗而弑子陽極也。

樾謹按子陽好嚴四字爲句中開不得有極也二字蓋涉下句而衍。

冬之德寒寒不信其地不剛地不剛則凍閉不開。黃信

樾謹按冬之德寒則凍閉不開固其所也何以反是不信之故此說殊不可通。孟冬紀曰孟冬行春令則凍閉不密疑此文開字亦密字之誤高注曰不開氣不通也其所據本已誤矣。

管仲可謂能因物矣。以辱爲榮。以窮爲通。雖失乎前。可謂後得之矣。物固不可全也。

樾謹按物固不可全也。六字與上文不屬。疑此篇之文止於可謂後得之矣。言管仲失乎前而得乎後。其意已足。物固不可全也。乃下舉難篇之起句。當云物固不可全也。以全舉人固難。物之情也。人傷堯以不慈之名。舜以卑父之號。禹以貪位之意。湯武以放弑之謀。五伯以侵奪之事。由此觀之。物豈可全哉。物豈可全。正與物不可全相應。傳寫者誤繫於上篇之尾耳。

故君子責人則以人。舉難。

樾謹按下人字當讀作仁。責人則以仁。與下文自責則以義。正相對。

疏賤者知。親習者不知。理無自然。自然而斷相過。

樾謹按理無自然下奪理無二字。蓋言疏賤者知。而親習者不知。此理之所無由然也。理之所無由然。而以之斷其孰爲相。則過矣。今奪二字。文義未足。

君道何如。利而物利章。恃君覽。

樾謹按章字衍文。物當爲勿。尙書立政篇。時則勿有間之。論衡譴告篇。作時則物有間之。莊子天道篇。中心物愷。釋文曰。物本亦作勿。是古字本通也。君道何如。利而勿利。言君人之道。宜何如乎。務在利民。而勿以自利而已。貴公篇曰。伯禽將行。請所以治魯。周公曰。利而勿利也。此可爲證。下文曰。德衰世亂。

然後天子利天下。國君利國。官長利官。此國之所以遞興遞廢也。亂難之所以時作也。然則君道以利而勿利爲貴。正呂氏此篇之旨矣。

謂子有志則然矣。謂子智則不然。

樾謹按。下然字衍文。不讀爲否。則然則否。相對爲文。後人不知不爲否之段字。故又加然字耳。戰國策正作謂子智則否。

今而後知吾先君周公之不若太公望封之知也。長利

樾謹按。太公望下不當有封字。涉下文太公望封於營丘而誤衍耳。

子嘗見兩蛟繞船能兩活者乎。知分

樾謹按。兩活無義。兩疑而字之誤。本在能字之上。其文曰。子嘗見兩蛟繞船而能活者乎。兩而形似。又涉上文兩蛟字而誤。後人因移之能字之下耳。

嬰且可以回而求福乎。子惟之矣。知分

樾謹按。高注曰。惟。宜也。義不可通。呂氏原文當作子推之矣。晏子春秋雜上篇曰。嬰且可以回而求福乎。曲刀鉤之。直兵推之。嬰不革矣。呂氏此文蓋即本晏子春秋而省其詞。子推之矣。即所謂直兵推之。晏子謂持直兵者曰。子推之矣。正見其勇於死義。若謂崔子曰。子惟之矣。轉失當時語氣矣。推與惟形。

似因而致誤耳。

四上之志。

樾謹按高注曰。四上謂君也。卿大夫士與君爲四。四者之中。君處其上。故曰四上之志。其說四上義甚迂迴。且下文所言。亦非君之志也。四上疑當作匹士。皆字之誤耳。禮記禮器篇。匹士太牢而祭。謂之饗。此匹士二字之證。下文云。爲之天下弗能禁矣。釋之天下弗能使矣。又云。生不足以使之。則利易足以使之矣。死不足以禁之。則害易足以禁之矣。正所謂匹夫不可奪志者。然則四上爲匹士之誤無疑也。寡人與仲父爲樂將幾之。達變。

樾謹按幾與旣通。周易歸妹六五。中孚六四。月幾望。釋文並曰。荀本幾作旣。旣之言終也。將旣之者。將終之也。畢氏疑是幾何。非是。

比獸之角。能以爲城。舉其尾。能以爲旌。行論。

樾謹按兩能字皆當讀爲而。

莫敢諫若非弗欲也。驕恣。

樾謹按此當作莫敢諫者。非弗欲也。言羣臣莫敢諫者。非不欲諫。乃未得進言之道耳。故下文曰。春居之所以欲之與人同。其所以入之與人異。今本者作若。以形似致誤耳。

其伯和修其行。好賢仁。而海內皆以來爲稽矣。開春。

樾謹按以爲二字衍文也。而海內皆來稽矣。與上文而鳳皇聖人皆來至矣。文法一律。稽之言同也。詩元鳥篇正義引尚書緯曰。若稽古帝堯。稽同也。鄭注堯典亦曰。稽同也。是稽有同義。故韓子主道篇曰。保吾所以往而稽同之。禮記儒行篇。古人與稽。鄭注曰。稽猶合也。合亦同也。海內皆來稽。言海內皆來同也。因衍以爲二字。高注乃曰。皆以來附爲稽遲失之矣。

先君必欲一見羣臣百姓也。天故使變水見之。

樾謹按天字誤。戰國魏策論衡死僞篇。並作夫。當從之。夫字屬上句讀。

弊生事精察賢。

樾謹按說苑政理篇。作弊性事情。當從之。爾雅釋詁。事。勤也。勤。勞也。然則事亦猶勞也。言弊其性。勞其情也。生與性。精與情。古字並通。

十人者其言不義也。期賢。

樾謹按其言當作言其。十人者言其不義也。謂言伐衛之不義。其卽指伐衛之事而言。

民相連而從之。審爲。

樾謹按高注曰。連結也。民相與結擔隨之。此說連字。未得其義。連當讀爲輦。周官鄉師注曰。故書輦作

連鄭司農曰連讀爲輦又巾車職曰連車組輓釋文曰連本亦作輦是連輦古通用管子海王篇行服連輅輦者亦段連爲輦是其證相連而從之者言相輦而從之也人挽車爲輦莊十二年左傳以乘車輦其母又襄十年傳輦重如役皆是莊子讓王篇亦載此事司馬彪曰連讀曰輦得之矣

與諸侯約爲高葆禱於王路疑似

樾謹按禱字不可通當讀爲塲說文土部塲保也連言之則曰保塲九章算術今有方塲塲是也塲塲卽保塲之異文此作葆禱者或古文段借或聲近而誤也王路者大路也廣雅釋詁王大也如大父母稱王父母鮪大者謂之王鮪皆其例也爲高葆禱於王路猶云爲高塲塲於大路御覽引此文葆作堡蓋易以今字無下四字則由不達而臆刪之

不可知則知無安君無樂親矣壹行

樾謹按下知字衍文不可知則無安君無樂親矣不當於則下更出知字上文曰不可知則君臣父子兄弟朋友夫妻之際敗矣是其例也

威利敵而憂苦民行可知者王威利無敵而以行不知者亡

樾謹按威利敵當作威利無敵上云故賢主必使其威利無敵故以禁則必止以勸則必爲此承上文而言不當云威利敵也蓋同是威利無敵而王與亡異則以所行者有可知有不可知耳今奪無字義



不可通。又按以行不知者亡。當作以行不可知者亡。可知不可知。相對爲文。下云。小弱而不可知。則強。大疑之。卽承此而言。本篇不可知之文。凡七見。無作不知者。

士義可知。故也。則期爲必矣。

樾謹按。故也二字。涉上文易知故也而衍。此言士之義苟可知。則必爲人所期會矣。不當有故也二字。故賢者所惡於物。無惡於無處。

樾謹按。王氏引之經義述聞曰。處之爲居爲止。常訓也。而又爲審度爲辨察。書傳具有其義。所引證凡七事。王說是也。此文云。無惡於無處者。謂無惡於無辨也。篇首先王所惡無惡於不可知。卽其義也。高注未得其旨。

北至人正之國。夏海之窮。求人。

樾謹按。高注曰。今正北極之國也。畢云。注首今正。與正文人正。不知孰是。今按皆誤字也。當作令正。淮南子時則篇。作北至令正之谷。是也。又按夏海當作夏晦。故高注曰。夏海。大冥也。淮南子正作夏晦。高注曰。夏。大也。晦。冥也。與此正同。海字雖亦有晦義。然使正文是海字。則高氏以夏海爲地名足矣。何必定訓爲大冥乎。

未死而言死不論。以雖知之。與勿知同。知化。

樾謹按論當作諭字之誤也。言未死而言死，則人不論也，不論謂不知也。以雖知之與勿知同，以讀爲已，已者已然也。一字爲句，言已然之後雖知之，與勿知同矣。篇末曰：夫患未至則不可告也，患既至雖知之無及矣。故夫差之知慙於子胥也，不若勿知正其義也。高注未明。

肉圃爲格，過理。

樾謹按高注曰：格以銅爲之，布火其下，以人置上，人爛墮火而死，笑之以爲樂。畢氏沅曰：炮格各書俱訛作炮烙，得此可以正之。今按畢說，本段氏玉裁詢足訂向來傳寫之誤。惟炮格似有二義。荀子議兵篇：紂剖比干，囚箕子爲炮格刑。此則淫刑以逞之事。如高氏所說是也。韓非子喻老篇云：紂爲肉圃，設炮格，登糟丘，臨酒池，則似爲飲食奢侈之事。蓋取肉置格上，炮而食之也。此云肉圃爲格，可知格卽在肉圃中，其爲飲食事無疑矣。高注非是，說詳韓非子。

雕柱而枯諸侯。

樾謹按此卽後世鞦韆之戲所自始。高注曰：雕畫高柱，施桔槔於其端，舉諸侯而上下之，所說正得其義。蓋此與上文糟丘酒池肉圃爲格，皆飲食遊戲之事。玉篇革部：鞦韆，繩戲也。

不可以直言，則過無道聞，而善無自至矣。壅塞。

樾謹按高氏解過無道聞曰：其過成以無道遠聞，此說迂曲，且與下句不一律。道之言由也，從也。過無

道聞言過無由聞與善無自至義同當賞篇曰民無道知天民以四時寒暑日月星辰之行知天又曰人臣亦無道知主人臣以賞罰爵祿之所加知主慎小篇曰輕小物則上無道知下下無道知上凡言無道者並猶言無由也高注失之

此戴氏之所以絕也

樾謹按此卽上文齊滅宋之事戴氏爲宋公族孟子書有戴盈之戴不勝韓非子內儲說有戴驩爲宋太宰蓋皆戴公之後世執國柄時人習見戴氏爲宋公族遂相沿以宋爲戴氏故曰此戴氏之所以絕也乃結上文齊攻宋事非別一事也高注未達此旨

凡說之行也道不智聽智從自非受是也

畢校本曰道謂有道也自字疑衍

樾謹按畢以自爲衍字是也以道爲有道則失之道者由也道不智聽智者由不智聽智也由不智聽智從非受是文義一律言說之所以得行者以人主能由不智而聽智從非而受是也從下衍自字者從與自同義疑一本作從一本作自而傳寫誤合之也畢以道字屬上句讀而釋爲有道失其旨矣然則子事非子之事也不苟

樾謹按子事非子之事言子所事者非子之事也下文今子爲非子之事是其誼矣畢氏疑上子字爲

衍文非是。

鍾況然有音自知、

樾謹按況讀爲鍾。說文金部。鍾。鐘聲也。此作況者。古字通用。尙書秦誓篇。我皇多有之。公羊傳作而況乎。我多有之。況之爲鍾。猶況之爲皇矣。

故復右主然之罪。而賜菌改官大夫。當賞、

樾謹按高注曰。復。反也。反其罪不復罪也。若然。獻公於右主然。僅不治其罪。而於菌改。則賜之官大夫之爵。未見其能用賞罰也。下文云。凡賞非以愛之也。罰非以惡之也。用觀歸也。所歸善。雖惡之。賞所歸不善。雖愛之。罰是。獻公必賞右主然。而罰菌改。於下文之義方合。疑右主然。菌改。傳寫互易。呂氏原文本作故復菌改之罪。而賜右主然官大夫。復之言報也。見周官宰夫職注。復菌改之罪。卽報困改之罪。說文牽部。報。當罪人也。卽此文復字之義也。後人見上文皆先言右主然。後言菌改。遂互易之。以順上文之序。然正文言復。而注文言不復。其義正相反。足知非呂氏之旨矣。且下云。賜守塞者人米二十石。夫守塞者。卽助右主然守塞之人也。故承賜右主然句而言。若如今本作菌改。則菌改乃內獻公者。何有守塞之人乎。是故賜守塞者。與賜右主然。兩文必相接。其傳寫之誤易。更可見矣。

養由基尹儒。皆六藝之人也。博志、

樾謹按明李瀚本六藝作文藝畢刻從之謂與下篇合其實非也養由基善射尹儒善御射與御皆六藝之事則作六藝爲是下貴當篇曰故賢主之時見文藝之人也非特具之而已也所以就大務也文藝亦當作六藝此承上善相人者而言亦藝術事也今作文藝者字之誤耳反據此以改上篇謬矣

賢良又有死之臣蒙耻似順

樾謹按又有死三字衍文也賢良之臣蒙耻文義甚明疑有死二字本在下文其文云今越人起師臣與之戰戰而敗敗而有死賢良盡死不死者不敢入於國蓋戰而敗敗而有死卽上文所謂戰請必敗敗請必死也有讀爲又敗而又死此謂完子自死也完子爲將而死則賢良莫敢不死其或不死亦必畏罪而不敢入國矣所以不敢入國正以主將先死之故若無此句但曰戰而敗則賢良之死者固死矣其不死者何不敢入之有未足以盡國中之賢良也有死二字驛入上文因并敗而二字刪去之矣至有死卽又死又有二字不當疊用蓋讀者因此有字讀當作又旁注又字因而致衍耳

小方大方之類也小馬大馬之類也別類

樾謹按小方大方義不可通方疑犬字之誤因篆文相似而誤也犬馬義正一例高氏無注以犬字不煩更釋也若作小方大方則不容無注矣

高陽應將爲室家匠對曰未可也別類

樾謹按此當於家字絕句。書梓材篇。若作室家。詩縣篇。俾立室家。皆以室家連文。此云將爲室家。亦猶是也。高氏於室字絕句云。家匠。家臣也。失之。

德行尊理。而差用巧衛。士容論。

樾謹按衛當作僇。乃段借字。或壞字也。哀二十四年左傳。是僇言也。正義引服虔曰。僇。僞不信也。然則巧僇猶云巧僞。高注謂差以巧媚自榮。衛非是。

竈突決。上棟焚。務大。

樾謹按此本作上焚棟。傳寫誤倒。諭大篇。作竈突決。則火上焚棟。是其證。

民農則其產復。其產復則重徙。上農。

樾謹按兩復字並當作後。字之誤也。後與厚古通用。釋名釋言語曰。厚。後也。莊子列禦寇篇注曰。靜而怯。乃厚其身耳。釋文曰。元嘉本厚作後。是其證也。民農則其產後。言民農則其產厚也。其產厚。故重徙矣。御覽兩後字並作厚。正得其義。但字仍當作後。以仍古書段借之舊。辯士篇曰。必厚其鞫。又曰。其鞫而後之。亦厚後通用之證。

農不敢行賈。不敢爲異事。

樾謹按此當以農不敢行賈爲句。言農恆爲農。不敢爲商也。行賈者商也。僖三十二年左傳。鄭商人弦

高杜注曰。商行賈也。高氏以農不敢行爲句。而釋之曰。守其疆畝。失之矣。不敢爲異事。亦以農言。若如高注以賈言。則非所謂野禁也。

奪之以水事。是謂籥。喪以繼樂。四鄰來虛。

樾謹按籥字義不可通。疑當作淪。莊子知北遊篇釋文。淪。潰也。淪卽淪之異文。奪之以水事。正與潰義相應。蓋淪變作滿。又省作蓄。又誤作籥耳。四鄰來虛。當作四鄰來虐。亦字之誤。虐與淪樂爲韻。若作虛。則失其韻矣。

子能以望爲突乎。子能藏其惡而揖之以陰乎。任地

樾謹按下文土處爲韻。淫風爲韻。堅均爲韻。糠疆爲韻。獨此二句無韻。疑突乃突字之誤。突與陰正爲韻。高注曰。望。容汗下也。突。理出豐高也。是以望爲突。猶以下爲高。然下文諸句並不從相反取義。不必定如高氏之說。且諸句之意。皆不甚可解。而韻則塙有可憑。突字之誤。殆無疑也。

人肥必以澤。

樾謹按高注曰。人肥則顏色潤澤。此大誤也。通篇皆言耕種事。不當此句獨言人之顏色。且此句與下文人耨必以旱。正相對。然則澤者。雨澤也。非謂顏色潤澤也。肥疑耜字之誤。上文曰。是以六尺之耜。所以成畝也。其耨八寸。所以成剛也。耨柄尺。此其度也。其耨六寸。所以閒稼也。以耜耨並言。則此文人耜

必以澤人耨必以旱亦承上而以耨耨並言可知矣耨謂耕也耨謂芸也言耕宜雨耘宜旱也耨字從目肥字從冂篆文相似又涉上文地可使肥而誤耳

寒則雕熱則脩辯土

樾謹按高注曰脩長也於義未得詩中谷有蓊篇曠其脩矣毛傳曰脩且乾也釋名釋飲食曰脩脩縮也乾燥而縮也熱則脩者言熱則乾縮也正與寒則雕同義

衡行必得縱行必術

樾謹按術讀爲遂春秋文十二年秦伯使術來聘左穀並同公羊作遂禮記學記篇術有序鄭注曰術當爲遂是術與遂古通用衡行必得縱行必遂言衡縱皆必順其性也

樹堯不欲專生而族居

樾謹按高注曰專獨也於誼未得專讀爲搏史記秦始皇紀搏心壹志索隱曰搏古專字周易繫辭傳其靜也專釋文曰專陸作搏昭二十一年左傳若琴瑟之專一釋文曰專本作搏是專與搏古同字而通用管子霸言篇不搏不聽又本篇夫搏國不在敦古尹注並曰搏聚也又內業篇搏氣如神注曰搏謂結聚也然則不欲專生者不欲聚生也與族居同義若訓專爲獨則與族居義反矣下文曰堯而專居則多死蓋以專生族居義同故省文言專居專居者聚居也猶族居也如高注則不可通矣



穗鉅而芳奪審時、

樾謹按高注曰。奪或作奮。非也。此當以作奪者爲是。奪者脫之本字。說文奮部。奪。手持隹失之也。故引申之爲脫失字。後人借作攷。而本義晦矣。後漢書李膺傳。豈可以漏奪名籍。苟安而已。漏奪卽今人言漏脫也。此文芳字。當讀爲房。房者柎也。山海經西山經。員葉而白柎。郭注曰。今江東呼草木子房爲柎是也。穗鉅而房奪。言穗雖大。而其房必脫落也。因借芳爲房。而後人又昧於奪之本義。遂不得其解。而誤以爲芳薌奮發。致有作奮之本。不可從也。

搏米而薄糠。

樾謹按搏之言圓也。考工記梓人。搏身而鴻。廬人。刺兵搏。弓人。紵而搏廉。鄭注並曰。搏。圓也。楚辭橘頌。篇圓果搏兮。王注曰。搏。圓也。楚人名圓爲搏。然則搏米而薄糠。與上文其粟圓而薄糠。文義正同。下文曰。大菽則圓。小菽則搏。亦以圓搏並言。

如此者不益。

樾謹按益字無誼。高注曰。益。息也。亦不可曉。益疑當作噍。方言曰。噍。噎也。秦晉或曰噍。又曰噎。然則不噍者。言食之不噎也。呂氏秦人。故言秦耳。舊校云。益一作蒜。蒜者菽之誤也。說文口部曰。蒜。籀文噍字。然則呂氏原文之作噍。固無疑矣。



## 諸子平議卷二十五

### 春秋繁露一

三者不得，則諸侯之得，殆貶矣。此楚靈所以稱子而討也。楚莊王。

榷謹按：楚靈稱子而討，疑若得之矣。然齊桓不予專地而封，晉文不予致王而朝，楚莊弗予專殺而討，以三君者之賢而不得焉，則凡諸侯之得之者，殆非所以爲褒而適所以爲貶也。故曰：諸侯之得，殆貶矣。明王道，焄本注曰：殆恐是不待，未達斯旨。

春秋之辭多所況，是文約而法明也。

榷謹按：況字絕句，言春秋之辭多以況譬而見，此其所以文約而法明也。凌氏曙注本讀是字絕句，失之。

人臣之行，貶主之位，亂國之臣，雖不篡殺，其罪皆宜死。

榷謹按：亂國之臣當作亂主之國，此蒙人臣之行爲文，五句一氣相屬。

春秋曰：晉伐鮮虞，奚惡乎晉而同夷狄也。

榷謹按：自此至是其所以窮也。當在竹林篇鄭伐許一節之前。彼文云：春秋曰：鄭伐許，奚惡於鄭而夷。

狄之也。中閒亦有問者曰云云。與此文一律。故知兩文必相次也。董子原書。當以春秋分十二世以爲三等節爲首篇。其篇名卽曰繁露。今書稱春秋繁露者。以首篇之名目其全書也。傳寫者誤取楚莊王及晉伐鮮虞二節。列于其前。遂以楚莊王題篇。并繁露之名而失之矣。然則楚莊王節宜在何處。曰此固不可考。然晉伐鮮虞節在竹林篇。則楚莊王節或亦當在竹林篇。蓋與晉伐鮮虞節本相次也。今本竹林篇逢丑父及鄭伐許兩節相次。古本此兩節之間。當有楚莊王及晉伐鮮虞兩節。晉伐鮮虞與鄭伐許固以類相從。而楚莊王節以楚莊殺陳夏徵舒。靈王殺齊慶封相提並論。逢丑父節以丑父欺晉祭仲許宋相提並論。是二事亦以類相從也。然則此兩節之當廁于其間無疑矣。傳寫者升此兩節於篇首。必非其舊。雖未敢率議遷迤。然不可不知其誤也。盧氏文弼注引錢說。以爲後人掇拾綴緝所致。蓋已見及此。但未知爲竹林篇之錯簡耳。

宋伯姬恐不禮而死於火。齊桓公疑信而虧其地。

樾謹按疑下亦當有不字。疑亦猶恐也。禮記雜記五十不致毀。六十不毀。七十飲酒食肉。皆爲疑死。鄭注曰疑猶恐也。大戴記曾子立事篇君子見善恐不得與焉。見不善恐其及己焉。是故君字疑以終身。然則疑與恐同矣。此文上言恐不禮。下言疑不信。文異而義同。傳寫奪不字。義不了矣。如何與同姓而殘賤遇我。

樾謹按與當作以古字通用。

視其溫辭。

樾謹按溫當讀爲蘊。古字通也。蘊辭謂蘊蓄之辭。卽上所謂微其辭者。

然而介以一言曰王者必改制。

樾謹按襄三十一年左傳介于大國。杜注曰介猶閒也。故古語以閒介連文。孟子盡心篇山徑之蹊閒介。文選長笛賦閒介無蹊。卽用孟子文是也。介以一言猶閒以一言。蓋春秋之於世事善復古譏易常。欲其法先王而或且出一言以介之曰王者必改制。此介字卽吾無閒然之閒。玉林篇。漢梁之盟信在大夫而春秋刺之爲其奪君尊也。平在大夫亦奪君尊而春秋大之。此所閒也。卽可說此介字矣。凌注曰介因也失之。

今天大顯已物襲所代而率與同。

樾謹按已字絕句。物當爲勿。尙書立政篇時則勿有閒之。論衡譴告篇作時則物有閒之。莊子天道篇中心物愷釋文物本亦作勿。是古字通也。此承上文受命之君天所大顯而言謂天旣大顯已於所代之國本不相襲而已不能改制。大率與同則非天意矣。

其有繼周之弊故若此也。玉杯。

樾謹按有猶爲也。言春秋所以貴志好誠者，爲繼周之弊，故若此也。爲有一聲之轉，爲可訓有，有亦可訓爲。見王氏引之經傳釋詞。

五其比。

樾謹按五當爲伍。古字通。伍其比，偶其類。兩義相近。伍猶偶也。比猶類也。

屠其贅。

樾謹按屠當爲杜。古字通。昭九年左傳，屠蒯。禮記檀弓篇作杜黃，是也。凡非經所本有之義，皆謂之贅。爲春秋者宜杜塞之。則聖人之大義，不爲羣言淆亂矣。

今夫天子踰年卽位，諸侯於封內三年稱子，皆不在經也。而操之與在經無以異，非無其辨也。有所見而經安受其贅也。故能以比貫類，以辨付贅者，大得之矣。

樾謹按文九年公羊傳曰：未稱王，何以知其卽位？以諸侯之踰年卽位，亦知天子之踰年卽位也。以天子三年然後稱王，亦知諸侯於其封內三年稱子也。夫經書公卽位，則諸侯踰年卽位見矣。而天子踰年卽位，于經無見也。武氏子毛伯不稱使，則天子三年然後稱王見矣。而魯十二公無有三年稱子於其封內者，是諸侯於其封內三年稱子，于經無見也。凡此皆所謂贅也。而學者操其說，與實在經者無異。然而其中固有辨也。何也？必於經實有所見，然後引而申之，觸類而長之，而經亦安然而受之也。董

子此言必有爲而發。當時若公孫宏以曲學阿世，其所學春秋雜說，必有附益于師說之外者，故以此辨之與。

書曰：厥辟不辟，去厥祗。

樾謹按：此文尙書也。祗者病也。易復初九：无祗悔。鄭注曰：祗，病也。說文：疝，病也。祗與疝通。攷意而觀指，則春秋之所惡者，不任德而任力，驅民而殘賊之，其所好者，設而勿用仁義以服之也。竹林、樾謹按其所好者，設五字，當爲衍文。

術修之義也。

樾謹按：術當讀爲通。爾雅釋詁：釋文引孫炎云：通，古述字。述與術通。述，通同字。則術通亦同字矣。匡謬正俗引逸禮記曰：知天文者冠鷖。鷖字音聿，亦有術音。故禮之衣服圖及蔡邕獨斷，謂爲術氏冠。以顏說推之，術通作鷖，則亦通作通矣。爾雅訓通爲自通修之義，卽自修之義。正與上文雷同之義相對成文。詩文王篇：聿修厥德。疑三家詩有作通修，而訓爲自者。董子此言，卽本詩文耳。

故按春秋而適往事。

樾謹按：詩殷武篇：勿予禍適。釋文引韓詩曰：適，數也。適爲責數之數，亦可爲計數之數。按春秋而適往事，猶云數往事矣。

春秋以薄恩，且施失其子心。

樾謹按：恩字絕句，施失二字連文。下文云：「子施失恩於親，是其證也。」施讀爲弛，古字通用。禮記樂記篇：「庶民弛政，釋文曰：弛，廢也。」然則弛失其子心者，廢失其子心也。下文施失恩，亦謂廢失恩，以本字讀之，則不得其解矣。

故君子爲之諱，不居正之謂避其後也。亂移之宋督，以成善志。玉英、

樾謹按：不居正之謂及也字，並衍文。此本云：「故君子爲之諱，句避其後亂移之宋督，以成善志。」今衍此六字，則文義不屬矣。下文云：「棄之則棄善志也，取之則害王法，疑不居正之謂也。」六字當在此下。王道篇云：「春秋嘉義氣焉，故皆見之，復正之謂也。」與此文法一律。

至於鄆取乎莒，以之爲同居。

樾謹按：同居二字無義，疑司君之誤。司君者嗣君也。尚書高宗彤日篇：「王司敬民。」史記殷本紀作王嗣敬民，是嗣與司古通用。

或請焉，或怒焉者何？精華、

樾謹按：怒當作攻，攻誤爲奴，因誤爲怒矣。上文曰：「大旱，雩祭而請雨；大水，鳴鼓而攻社。」此承上文而言，不得改爲怒也。下文曰：「故鳴鼓而攻之，亦不云怒，足知其誤。」



不救陳之患，而責陳不離。

樾謹按周易否九四，疇離祉。九家注曰：離，附也。責陳不離者，責陳不附也。本或作納，乃不得其義而妄改之。

故去其位辭，徒言君之子而已。

樾謹按位當作正，字之誤也。上文曰：奚齊避此正辭，而稱君之子，是其證。

剔孕婦見其化，王道。

樾謹按見字當作觀，乃壞字也。呂氏春秋過理篇：作剖孕婦而觀其化，可據以訂正。立適以長，不以賢；以貴，不以長。

樾謹按以貴上當據公羊隱元年傳補立子二字。

楚公子比脅而立，而不免於死。

樾謹按此本作楚公子比脅而立，而不免於誅絕。今誅絕二字傳寫誤入下文。淺人遂臆補死字耳。下文云：齊桓晉文擅封，致天子誅絕。繼絕存亡，侵伐會同，常爲本立。按擅封是一事，致天子是一事，繼絕存亡是一事，其間不得有誅絕二字。明是上文奪去，誤著於此也。

恩衛葆。

樾謹按莊六年經齊人來歸衛寶。惟左氏經作衛俘。而傳亦作衛寶。杜預注曰。公羊穀梁經傳皆言衛寶。此傳亦言寶。唯此經言俘。疑經誤。然公羊傳文曰。此衛寶也。則齊人曷爲來歸之。衛人歸之也。其文雖是寶。其義則皆可通。何休解詁曰。寶者玉物之凡名。於是始定爲寶玉字矣。董子固傳公羊之學者。而此篇有恩衛葆之文。葆之與寶。固得通用。然葆從保聲。保從采省。采卽古文孚也。則葆之與俘。亦得通用。若是衛寶。不得言恩。其下又言以正圉圉之平也。則其爲俘囚明矣。竊謂字當作寶。義當爲俘。何休所解。未達斯旨。

閔公妬其言曰。此虜也。爾虜焉知。魯侯之美惡乎致。萬怒。搏閔公。絕脰。

樾謹按莊十二年公羊傳。作爾虜焉。故魯侯之美惡乎至。傳文故字。蓋知字之誤。此文致字。當從傳作至。古字通也。爾虜焉知。四字爲句。魯侯之美惡乎至。七字爲句。惡音烏。至猶甚也。說詳羣經平議。自內出外。無亡不行。自外至者。無主不止。

樾謹按宣三年公羊傳。王者則曷爲必以其祖配。自內出者。無匹不行。自外至者。無主不止。此卽用彼傳文。而有譌字。然彼傳論祭祀配食之禮。與此論虞公貪財。全不相當。未詳其旨。

乾谿有物女。水盡則女見。水滿則不見。

樾謹按漢書郊祀志。有物曰蛇。注曰。物謂鬼神也。東平思王宇傳。或明鬼神信物怪。注曰。物亦鬼。然則

乾谿有物女者。殆亦鬼神之類。

匹馬隻輪無反者。

樾謹按。僖三十三年公羊傳。匹馬隻輪無反者。釋文曰。一本作易輪。董仲舒云。車皆不還。故不得易輪。轍。然則董子原文。必作易輪。今作隻者。後人所改也。惟不易輪轍之義。殊爲迂曲。而董子所見傳文如此。必當有說。今按易者。析之段字。析易疊韻。故蝦蟇名蜥蜴。而詩節南山篇。胡爲虺蜴。說文虫部引作胡爲虺蜥。然則易之通作析。猶蜴之通作蜥矣。說文本部析。破木也。其字亦或作析。張遷碑。陽氣厥析。是也。又或作析。魯峻碑。析薪弗荷。是也。析析並從片。則析輪猶片輪也。與馬之稱匹。正同一律。較隻輪之文爲優矣。

觀乎潞子。知無輔自詛之敗。

樾謹按。詛當讀爲作。言無輔而自作也。詩蕩篇。侯作侯祝。釋文曰。作本作詛。蓋作詛雙聲。古得通用耳。傳曰。諸侯相聚而盟。君子修國曰此將率爲也哉。盟會要。

樾謹按。修國二字。當在也哉之上。君子曰。此將率爲修國也哉。言將相率而修治其國也。上文曰。以爲本於見天下之所以致患。其意欲以除天下之患。夫諸侯相聚而盟。固欲相率而修治其國。其意本以除天下之患。而天下所以致患。卽在於此。此春秋所以善胥命也。修國二字。誤倒在上。則文不可通。

論賢才之義

樾謹按義者宜也。論賢才之義，卽論賢才之宜。言各有所宜也。

故元者爲萬物之本，而人之元在焉。安在乎？乃在乎天地之前。重政、

樾謹按乃在乎三字，衍文也。安在乎天地之前，言不必在天地之前也。易曰：有天地然後有萬物，聖人之言未有及天地之前者。有物混成，先天地生，此老氏之旨，非聖人之言也。下文曰：故春正月者，承天地之所爲也。繼天之所爲而終之也，其道相與共功持業。安容言及天地之元，天地之元，奚爲於此？此正申說安在乎天地之前之意，可證此三字是衍文矣。

安容言乃天地之元。

樾謹按乃是及字之誤。聚珍本曰：乃他本作及，當從之。

夫能通古今，別然不然，乃能服此也。服制象、

樾謹按下然字衍文也。此以通古今，別然不爲對文。玉篇：士部引傳曰：通古今，辯然不謂之士，是其證也。後人不知然不卽然否，而於不下又加然字，失之矣。荀子哀公篇：情性者，所以理然不取舍也。大戴

記哀公問五義篇：作所以理然不然，取舍者也。蓋亦後人所增，失與此同。

是故春秋之道，以元之深，正天之端。二端、

櫛謹按深字無義。據隱元年公羊傳注曰：故春秋以元之氣，正天之端。疑此文深字，亦氣字之誤。深字左旁之突，隸書或作來，與氣相似，氣誤作來，因誤作深矣。當據何劭公注訂正。

故予先言春秋，詳己而略人，俞序。

櫛謹按下文有故子夏言，故子池言，則此文予字必子字之誤。子先未知何人，殆亦七十子之弟子歟。此篇所稱引，皆七十子之微言，惜多奪誤，難以盡通耳。

任羣賢所以爲受成，離合根。

櫛謹按此本作任羣賢以受成，所爲二字，涉上下文而衍。

分障險阻，立元神。

櫛謹按淮南子覽冥篇曰：上天之誅也，雖在曠虛幽閒，遼遠隱匿，重襲石室，界障險阻，無所逃之，亦明矣。文義與此略同，則此文分字，疑介字之誤。介與晦通。

以爲名定實，考功名。

櫛謹按爲字衍文，以名定實，與上句以多除少相對。

其先比二三分，以爲上中下，以考進退。

櫛謹按比二皆衍文，比卽先字之誤。二卽三字之誤，皆因誤致衍者也。

以爲一最。

樾謹按當作以一爲最。與下文五爲中。九爲殿。一律。

順數四而相復。三代改制實文。

樾謹按此言五帝。不得言四而相復。其上當有闕文。

然則其略說柰何。曰。三正以黑統初。正日月朔于營室。斗建寅。

樾謹按三正以黑統初。謂三正以黑統爲始也。初下有闕文。當據下文補。正黑統柰何。曰。正黑統者。歷十一字。

是月不殺。

樾謹按凌氏注云。王者養微。故懷任新產之月。雖有罪。法所不刑。此誤以是月二字屬上爲義也。上云。法不刑有懷任新產者。其義已足。無取申說。下云。法不刑有身懷任。又云。法不刑有身重懷藏。以養微。夫既以養微說之。則是月不殺。不連上事明矣。今按是月不殺。與下文聽朔廢刑發德相次。是月。謂晦日也。僖十六年經曰。是月六鵠退飛過宋都。公羊傳以爲晦日。其明證矣。凌氏以公羊說董子書。抑何不達此旨。

用纖施舞。

櫛謹按此卽所謂旄舞也。周官樂師有旄舞。鄭司農注曰：旄舞者，鰲牛之尾。又春官序官旄人。鄭注曰：旄，旄牛尾。舞者所持以指麾。此稱爲織施者，據周書王會篇：樓煩以星施。孔晁注曰：施所以爲旄羽珎。然則織施舞之卽旄舞明矣。魯公子尾字施父，亦可爲證。

四法修於所故，祖於先帝，故四法如四時然。

櫛謹按四法卽上文所謂主天法商而王，主地法夏而王，主天法質而王，主地法文而王也。盧注引錢云：四法卽夫子所以答顏淵者，殊失其旨。

吾聞聖王所取，儀金天之太經，官制象天。

櫛謹按金字無義。下文云：何謂天之大經？又云：三而一成，天之太經也。不言金天。此金字乃法字之誤。言聖人所取者，無不儀法乎天之大經也。法古文作金，因誤作金矣。

一陽而三春，非自三之時與。

櫛謹按王道焄本作一陽而三者，當從之。陽卽春也。董子原文本作一春而三者，非自三之時與。晉人避諱改春爲陽。若春秋之稱陽秋矣。校正者不知一陽之卽一春，而反疑三者之爲三春，易其文曰：一陽而三春，不可通矣。

是故以其三爲選。

樾謹按依下文當作是故其以三爲選。

以十端四選。

樾謹按上云是故以四選率之。此當云以十端率之。四選二字涉上而誤。

以三公之勞率之。

樾謹按勞當讀爲僚。僚從寮聲。與勞聲相近。臆亦從寮聲。而或體作營。從勞省聲。卽其例也。昭七年左傳。隸臣僚服。注曰。僚勞也。是僚之與勞聲近而義通。

子猶安敢擅以所重受於天者。予他人也。堯舜湯武。

樾謹按此有闕文。當云子猶不敢擅以所重受於父者與他人。堯舜安敢擅以所重受於天者與他人也。

舟車甲器有禁。服制。

樾謹按甲乃申字之誤。申與陳通。詩大雅文王篇。陳錫哉。周商頌烈祖篇。申錫無疆。陳錫申錫一也。說詳羣經平議。申器卽陳器。定四年穀梁傳。徙陳器。范注曰。陳器樂縣也。是也。管子立政篇。正作舟車陳器。

天子分左右五等。三百六十三人。法天一歲之數。爵國。



櫛謹按下文天子有三公九卿二十七大夫八十一元士二百四十三下士合之適得三百六十三人。凌引天官疏天官總攝三百六十官未得其旨。

通佐十上卿與下卿而二百二十人。

櫛謹按十乃七字之誤。據下文云有七上卿有通作又三公九卿外又有七上卿卽所謂通佐也。故知十上卿當爲七上卿矣。二百二十人當作二百八十人。聚珍本云下二他本作六六與八形似而誤。今本作二十則後人依既誤之下文改之也。說詳後。

諸侯大國四軍。

櫛謹按諸經皆言大國三軍無言四軍者。凌氏注云考小司徒注百里之國凡四都一都之田稅入于王。古者計夫出稅有稅則有夫以其奉公家也。故不言四軍而言三軍其實暗中有一軍也。凌氏此注雖似合下文一軍以奉公家之說然奉公家非奉王家也。則與小司徒注所稱稅入于王者本非一事未可援以爲說。今以本文考之四軍實當爲三軍。下文曰大國十六萬口而立口軍三又曰定率得十六萬口三分之則各五萬三千三百三十三口爲大字缺一口軍三此公侯也。然則以十六萬口三分之而爲三軍不得更立一軍矣。其下又曰天子地方千里爲方百里者百亦三分除其一。定得田方百里者六十六與方十里者六十六定率得千六百萬口九分之各得百七十七萬七千七百七十七口爲

京口軍九。三京口軍以奉王家。然則天子九軍。以三軍奉王家。大國三軍。以一軍奉公家。皆與數適合。奉王家之三軍。卽在九軍之中。則奉公家之一軍。亦卽在三軍之中。不得有四軍也。古三四字皆積畫。往往致誤。儀禮覲禮四享。鄭注曰。四當爲三。古書作三四。或皆積畫。字相似。由此誤也。周官內宰疏引鄭注曰。純四。四當爲三。古三四積畫。是以三誤爲四。並其證。

方十里爲方百里者百。得二千四百口。

樾謹按。上百字。衍文也。方十里之地。不得有方百里者百。而方百里者百。則不止二千四百口。故知其誤。當云方十里爲方里者百。

得良田方十里者六十。六十與方里六十六。

樾謹按。凌氏注曰。與上十字。當在方字之下。里字之下。當有者字。此大誤也。與上十字。乃衍文耳。董子原文本云。得良田方十里者六十六。與方里者六十六。蓋方百里之地。爲方十里者百。三分去一。應除去方十里者三十三。得方十里者六十六。餘一箇方十里之地。三分去一。應除去方里者三十三。得方里者六十六。餘一箇方里之地。除之不盡。姑舉大數耳。下文言天子地方千里。得田方百里者六十六。與方十里者六十六。然則大國地方百里。爲方十里者六十六。方里者六十六。其數甚明。凌氏何猶未達乎。

有七上卿，二十一下卿，六十三元士，百二十九下士。

樾謹按三七二十一，二十一而三之得六十三，爲元士之數，六十三而三之，當得一百八十九，爲下士之數，今乃云百二十九下士，文之誤也。於是上文言通佐二百八十人，亦改爲二百二十人矣。

王后置一太傅太母。

樾謹按下文疑衍文，蓋尊之曰太傅太母，不當分之爲太傅太母也。

士入仕宿衛天子者，比下士，下士者如上士之下數。

樾謹按下文言大國次國，並云士宿衛公者，比上卿者有三人，下卿六人，比上下士者如上下之數，則此文亦當云士入仕宿衛天子者，比上卿者有三人，下卿六人，比上下士者如上下之數，傳寫奪誤。

士宿衛公者，比公者，比上卿者有三人，下卿六人。

樾謹按比公者三字衍文。

故伯七十里，七七四十九，三分除其一，定得田方十里者二十八，與方十里者六十六。

樾謹按當作方十里者三十二，與方里者六十六，蓋方七十里之地，爲方十里者四十九，三分去一，應除去方十里者十六，得方十里者三十二，餘一箇方十里之地，三分去一，應除去方里者三十三，得方里者六十六，餘一箇方里之地，除之不盡，今作方十里者二十八，方十里者六十六，失其數矣。

故子男方五十里。五五二十五。爲方十里者六十六。

樾謹按當作方十里者十六。與方里者六十六。蓋方五十里之地。爲方十里者二十五。三分除一。應除去方十里者八。得方十里者十六。餘一箇方十里之地。三分去一。應除去方里者三十三。得方里者六十六。餘一箇方里之地。除之不盡。今作方十里者六十六。傳寫奪誤耳。

故附庸字者。地方三十里。三三而九。三分而除其一。定得田方十里者六十。

樾謹按當作方十里者六。蓋方三十里之地。爲方十里者九。三分除一。應得方十里者六。傳寫誤衍十字。

稱名善者。地方半字君之地。九半四分除其一。定得田方十里者三。

樾謹按善衍字。蓋卽者字之誤而衍也。上云附庸字者方三十里。名者方二十里。而此云稱名者地方半字君之地。則止方十五里。與上文不符。九半之文。亦不可曉。據云四分除一。定得田方十里者三。則適是方二十里之地。蓋方二十里之地。爲方十里者四。四分除一。則方十里者三矣。然則所云半字君之地者。必誤也。

下四半三半二十五。三分除其一。定得田方十里者一。與方里者五十。

樾謹按文譌難讀。據云三分除其一。定得田方十里者一。與方里者五十。則是方十五里之地。蓋方十

五里之地，爲方五里者九，三分除一，則爲方五里者六，并四箇方五里之地，作爲方十里者一，則餘兩箇方五里之地，各爲方里者二十五，并之爲五十矣。上云附庸字者，方三十里，名者方二十里，人氏者方十五里，則此所說者，必是附庸稱人氏之制。上文所謂半字，君之地者，宜移之於此矣。

### 仁義發第二十九

樾謹按發乃法字之誤。篇中云：是故春秋爲仁義法。仁之法在愛人，不在愛我；義之法在正我，不在正人。是其證也。

未致豫備之則美之。

樾謹按致當讀爲至。

凡此六者，以仁治人，義治我。

樾謹按上文春秋刺上之過，而矜下之苦，小惡在外弗舉，在我書而誹之，並無六者，則此六字當爲衍文。

且論已見之而人不察。

樾謹按論卽謂論語也。言此所說者，在論語已有明文，而人顧不之察也。下文引君子攻其惡，不攻人之惡，居上不寬，爲禮不敬，皆論語文，可證必仁且智篇曰：論之所謂不知人也者，恐不知別此等也。論

亦卽是論語所謂不知人者卽患不知人是矣。

絕世無復殘類滅宗亡國是也。必仁且智、

櫛謹按無復當爲無後字之誤也。亡國下有闕文。據上文云。福及子孫。德加萬民。湯武是也。則此當云桀紂是也。

## 諸子平議卷二十六

### 春秋繁露二

今人有大義而甚無利身之養、

樾謹按當作大有義而甚無利與下文人甚有利而大無義相對、

泰伯至德之侔天地也、上帝爲之廢適易姓而子之、讓其至德海內懷歸之、觀德、

樾謹按讓字衍文、上帝爲之廢適易姓而子之、謂天與之也、其至德海內懷歸之、謂人歸之也、中閒不得有讓字、

魯桓卽位十三年、齊宋衛燕舉師而東、紀鄭與魯戮力而報之、後其日以魯不得遍、避紀侯與鄭厲公也、樾謹按上下文有避齊桓也、避楚莊也之文、則此文避紀侯與鄭厲公也八字爲句、遍乃偏字之誤、偏誤作徧、因爲遍矣、徧者徧戰也、春秋之例、詐戰月、徧戰日、桓十年公羊傳注曰、徧一面也、結日定地、各居一面、然則魯不得徧者、言不得獨當一面也、是時齊宋衛燕伐我、魯不能獨當、與紀鄭戮力、然後結日定地、各居一面、與之徧戰、徧戰然後得書日、故經書曰、公會紀侯鄭伯、己巳、及齊侯宋公衛侯燕人戰、傳曰、曷爲後日、恃外也、其恃外奈何、得紀侯鄭伯然後能爲日也、是可知魯不得紀鄭之助、不能爲

日不能爲日者，但能詐戰，而不能偏戰之謂也。故曰魯不能偏也。

號其大全，暝也者，名其別離分散也。深察名號、

樾謹按此本作號其大全，名其別離分散也。故下文曰：號凡而略，名詳而目。正承此而言。暝也者，三字當在上文。按上文云：士者事也，民者暝也。士不及化，可使守事從上而已。此下當有暝也者云云，乃釋民者暝也之義，傳寫奪之，又誤著在後耳。

是故王意不普大皇。

樾謹按大下奪而字。

詰其名實，觀其離合，則是非之情，不可以相調已。

樾謹按此下當接春秋辨物之理至五石六鬴之辭是也。六十三字下有脫簡在玉英篇，其文曰：是故治國之端在正名，至非子路之所能見三十六字，深察名號篇至此已畢。篇首云：治天下之端在審辨大，辨大之端在深察名號，末云：是故治國之端在正名，首末正相應也。今定其文如左。

詰其名實，觀其離合，則是非之情，不可以相調已。春秋辨物之理，以正其名，名物如其真，不失秋豪之末，故名實石則後其五，言退鬴則先其六。聖人之謹於正名如此。君子於其言，無所苟而已。五石六鬴之辭是也。是故治國之端在正名，名之正，興五世五傳之外，美惡乃形，可謂得其真矣。非子路之所能



見。

今世關於性言之者不同。胡不試反性之名。性之名非生與。如其生之自然之資謂之性。性者質也。詰性之質於善之名。能中之與。既不能中矣。而尙謂之質善。何哉。性之名不得離質。離質如毛。則非性矣。可不察也。

樞謹按此下當接樞衆惡於內云云。自此以下。卽爲實性上篇。董子論性。必反求諸性之名。故曰性之名非生與。論心必反求諸心之名。故曰心之爲名。樞也。蓋古人言義理。不離乎聲音訓詁。卽孔子正名之義。實性篇與深察名號篇。所以相次也。後人因兩篇之文。有相近者。遂將篇首今世關於性云云。誤入深察名號篇。春秋辨物之理一節之上。而兩篇遂不可分矣。今定此爲實性上篇。而孔子曰名不正。則言不順以下。則爲實性下篇。庶不失董子之舊乎。

樞衆惡於內。弗使得發於外者。心也。

樞謹按王道焄本注曰。樞疑。樞如甚切。榻也。然樞不訓榻。說文木部。桼。弱貌。則榻仍樞字之訓耳。非其旨也。今按。樞者衣襟也。襟有禁禦之義。釋名釋衣服曰。襟。禁也。交于前。所以禁禦風寒也。樞亦有任制之義。釋名釋喪制曰。小要。又謂之樞。任也。任制際會使不解也。任制與禁禦。其義相通。樞衆惡於內。弗使得發於外。正取任制之義。下文曰。天有陰陽禁。身有情欲。樞。樞禁對文。然則樞卽禁也。亦猶。樞卽

襟也。原注所訓未達其旨。

聖人以爲無王之世，不教之名民，莫能當善。

樾謹按名衍字。

土者火之子也。五行莫貴於土。土之於四時無所命者，不與火分功名。木名春，火名夏，金名秋，水名冬，忠臣之義，孝子之行，取之土。土者五行最貴者也。其義不可以加矣。五聲莫貴於宮，五味莫美於甘，五色莫貴於黃。此謂孝者地之義也。五行對。

樾謹按河閒獻王以夫孝天之經地之義爲問。董子以天有五行對天之經矣。又對地之義曰：地出雲爲雨，起氣爲風，風雨者地之所爲，地不敢有其功名，必上之於天命。若從天命者，故曰：天風天雨也。莫曰：地風地雨也。勤勞在地，名一歸於天，非至有義，其孰能行此？故下事上，如地事天也。可謂大忠矣。以下卽當云：此謂孝者地之義也。乃又有此土者火之子也八十三字。夫上文旣以五行爲天之經矣，豈此又以五行爲地之義乎？反覆推求，此八十三字，乃五行之義篇脫簡，誤屬於此耳。今訂正如左。

五行之主土氣也。猶五味之有甘肥也，不得不成。土者火之子也。五行莫貴於土。土之於四時無所命者，不與火分功名。木名春，火名夏，金名秋，水名冬。忠臣之義，孝子之行，取之土。土者五行最貴者也。其義不可以加矣。五聲莫貴於宮，五味莫美於甘，五色莫貴於黃。是故聖人之行，莫貴於忠，土德之謂也。

人官之大者，不名所職，相其是矣。天官之大者，不名所生，土是矣。

天之大數畢於十句，句天地之間，十而畢舉，句生長之功，十而畢成，陽尊陰卑。

樾謹按：上句字衍文。天地陰陽篇云：天地陰陽，木火土金水九與人而十者，天之數畢也。是天之數非以句計，安得言十句乎？下兩句字乃甸字之誤。甸者，周匝之本字也。基義篇同，而畢於十，又誤作畢有十。

安所加以不在。

樾謹按：以猶而也。說詳王氏引之經傳釋詞。安所加以不在，猶云何所加而不在，故下文云：在上下，在大小，在強弱，在賢不肖，在善惡，歷舉所在以明之也。

冬出居上，置之空處也。

樾謹按：處乃虛字之誤。上文曰：陰常居空虛是也。漢書董仲舒傳：陰常居大冬，而積於空虛不用之處，亦作空虛可證。

然而主好惡喜怒，乃天之春夏秋冬也。王道通三。

樾謹按：當作人主之好惡喜怒。下文云：然則人主之好惡喜怒，乃天之煖清寒暑也，可證。生既其樂以養，死既其哀以藏。

樾謹按漑讀爲既既盡也。

天無怒氣亦何以清而秋就殺天辨在人。

樾謹按就當讀爲曾史記魯世家考公曾索隱引系本作就是也。太元元文直曾相勅范望注曰曾殺是曾與殺同義。

以出入相損益以多少相漑濟也。陰陽終始。

樾謹按漑濟卽既濟損益既濟皆易卦名。

故清凜之於歲也若酸鹹之於味也。陰陽義。

樾謹按清凜同義不得以酸鹹爲比。據煖燠孰多篇云非薰也不能有育非凜也不能有熟。又云薰與凜其孰多皆以薰凜相對爲義疑此亦當云故薰凜之於歲也若酸鹹之於味也。淺人罕見薰凜故誤改耳。

上所右而上所左也。陰陽出入上下。

樾謹按當作上所右而下所左也。下文云以此見天之夏右陽而左陰也。上其所右下其所左與此文同可證。

以其有餘徐來不暴卒也。基義。

樾謹按有餘二字衍文。餘卽徐之誤而衍者。旣衍餘字。因又增入有字耳。上文云。天之氣徐。乍寒乍暑。故寒不凍暑不暍。並無有餘之義。故知其誤。

首爰員人副天數、

樾謹按爰讀爲頌。說文頁部。頌大頭也。詩魚藻篇。有頌其首。毛傳曰。頌大首貌。並合爰員之義。

木者君之官也。夫木者農也。五行相勝、

樾謹按下文云。土者君之官也。蓋土居中央。于五行最尊。故爲君之官。此乃云木者君之官也。義不可通。當爲衍文。

司營爲神。

樾謹按宣三年左傳。使民知神姦。是神與姦同類。上云司農爲奸。此云司營爲神。則神亦不美之名。故與司馬爲讒。司徒爲賊。司寇爲亂。一律矣。

士卒不使。

樾謹按不使謂不從也。爾雅釋詁。使從也。

比相生。而問相勝也。五行相生、

樾謹按問乃閒字之誤。比相生。若春木生夏火是也。閒相勝。若秋金勝春木是也。

鳳凰高翔五行順逆、

樾謹按上文恩及羽蟲則曰鳳凰翔此文咎及羽蟲則曰鳳凰高翔豈以高卑爲恩咎之別乎殆不然矣高翔當作不翔宣元年公羊傳注曰摘巢毀卵則鳳凰不翔是其證

木干金則地動治亂五行、

樾謹按當作木干火則地動

惡者不出五行變救、

樾謹按出乃黜之段字

隱武行文

樾謹按隱讀爲偃漢書古今人表徐隱王師古注曰卽偃王也是隱偃古通用

故王者爲民治則不可以不明準繩不可以不正五行五事、

樾謹按則下有闕文或於民字絕句治爲法字之誤法則不可以不明準繩不可以不正二語相對周官太宰曰灋則以馭其官

從作乂言王者言可從明正從行而天下治矣

樾謹按明正乃則臣二字之誤當作王者言可從則臣從行而天下治矣尙書洪範正義引鄭注曰君

言從則臣職治。與此義相近。

此十物者皆奇而可怪。郊語。

樾謹按上文有八物無十物也。蓋由淺人誤分蠹珥絲於室而絃絕於堂。禾實於野而粟缺於倉。爲四事耳。其誤顯然。不可不正。

言不必立校。

樾謹按校讀爲效。謂不必立有效驗也。

問爲而爲之。

樾謹按當作問其所爲而爲之。奪其所二字。

率由舊章。舊章者。先聖人之故文章也。率由各有修從之也。

樾謹按各字。乃者字之誤。修字乃循字之誤。循誤爲脩。因誤爲修矣。此引詩而釋之。舊章者。先聖人之故文章也。率由者。有循從之也。有與又通。本書借有爲又者。不可勝舉。循字解率字之義。從字解由字之義。言舉先聖人之故文章。又循而從之。是謂率由舊章也。

祭而地神者。春秋譏之。

樾謹按當作不祭天神而祭地神者。春秋譏之。蓋卽僖三十一年傳。譏不郊而望也。

今爲其天子而闕然無祭於天。天何必善之。

樾謹按郊語義郊祭郊祀四篇實止一篇。殆由後人欲取足崇文總目八十二篇之數。以意妄分之耳。其文多錯亂。盧注訂正已多。上文今郊事天之義。此聖人故以下文脫。當云。此古聖人文章之最重者也。盧以郊祭篇故古之聖王文章之最重者也。接之文氣一貫。於是自篇首至此文。始可讀。然至此處。天何必善之下。接所聞曰。天下和平云云。仍有脫誤。今考定其文。合四篇爲一。錄之如左。

今爲其天子而闕然無祭。天何必善之。春秋之義。國有大喪者。止宗廟之祭。而不止郊祭。不敢以父母之喪。廢事天地之禮也。父母之喪。至哀痛悲苦也。尚不敢廢郊也。孰足以廢郊者。故其在禮亦曰。喪者不祭。惟祭天爲越喪而行事。夫古之畏敬天而重天郊如此甚也。今羣臣學士。不探察曰。萬民多貧。或頗饑寒。足郊乎。是何言之誤。天子父母事天。而子孫畜萬民。民未偏飽。無用祭天者。是猶子孫未得食。無用食父母也。言莫逆於是。是其去禮遠也。先貴而後賤。孰貴於天子。天子不可不祭天也。無異人之不可不食父。爲人子而不事父者。天下莫能以爲可。今爲天之子而不事天。何以異。是故天子每至歲首。必先郊祭以享天。乃敢爲地。行子禮也。每將興師。必先郊祭告天。乃敢征伐。行子之道也。文王受天命而王天下。先郊乃敢行事。而興師伐崇。其詩曰。芃芃棫樸。薪之楨之。濟濟辟王。左右趨之。濟濟辟王。左右奉璋。奉璋戕戕。髦士攸宜。此郊辭也。其下曰。淠彼淠舟。烝徒櫓之。周王于邁。六師及之。此伐辭



也。其下曰：文王受命，有此武功。既伐于崇，作邑于豐。以此辭者，見文王受命則郊，郊乃伐崇。伐崇之時，何遽平乎？已受命而王，必先祭天，乃行王事。文王之伐崇是也。詩云：濟濟辟王，左右奉璋。奉璋我髦，士攸宜。此文王之郊也。其下之辭曰：淖彼涇舟，烝徒櫓之。周王于邁，六師及之。此文王之伐崇也。上言奉璋，下言伐崇，以是見文王之先郊而後伐也。文王受命則郊，郊乃伐崇。崇國之民，方困於暴亂之君，未得被聖人德澤，而文王已郊矣。安在德澤未洽者不可以郊乎？所聞曰：天下和平，則災害不生。今災害生，見天下未和平也。天下所未和平者，天子之教化不行也。詩曰：有覺德行，四國順之。覺者著也。王者有明著之德行於世，則四方莫不響應風化，善於彼矣。故曰：悅有慶賞，嚴於刑罰，疾于法令。周宣王時，天下旱，歲惡甚，王憂之。其詩曰：倬彼雲漢，昭回于天。王曰：嗚呼！何辜今之人？天降喪亂，饑饉薦臻。靡神不舉，靡愛斯牲。圭璧既卒，甯莫我聽。旱既太甚，蘊隆蟲蟲，不殄禋祀。自郊徂宮，上下奠瘞。靡神不宗，后稷不克。上帝不臨，耗射下土。甯丁我躬，宣王自以爲不能乎？后稷不中乎？上帝故有此災，有此災，愈恐懼而謹事天。天若不于是家者，是家安得立爲天子？立爲天子者，天子是家。天子是家者，天便是家。天便是家者，是天之所予也。天之所使也。天已予之，天已使之，其間不可以接天。何哉？故春秋凡議郊，未嘗譏君德不成于郊也。及不郊而祭山川，失祭之敘，逆於禮，故必譏之。以此觀之，不祭天者，乃不可祭小神也。郊因先卜，不吉不敢郊。百神之祭不卜，而郊卜，郊祭最大也。春秋譏喪祭，不譏喪郊。郊不辟

喪。喪尚不辟。況他物。春秋之法。王者歲一祭天於郊。四祭於宗廟。宗廟因於四時之易。郊因於新歲之初。聖人有以起之。其於祭不可不親也。天者百神之君也。王者之所最尊也。以最尊天之故。故易始歲更紀。卽以其初郊。郊必以正月上辛者。言以所最尊。首一歲之事。每更紀者。以郊郊祭首之。先貴之義。尊天之道也。郊祝曰。皇皇上帝。照臨下土。集地之靈。降甘風雨。庶物羣生。各得其所。靡今靡古。維予一人某。敬拜皇天之祐。夫不自爲言。而爲庶物羣生言。以人心庶天無尤也。天無尤焉。而辭順恭。宜可喜也。右郊祀九句。九句者。陽數也。

按郊祀之辭。舊有脫誤。今從盧校本。  
今羣臣學士不探察。

樾謹按探乃深字之誤。

天已予之。天已使之。其間不可以接天何哉。

樾謹按其間當作其家。上文曰。天若不于是家者。是家安得立爲天子。立爲天子者。天子是家。天子是家者。天使是家。故此云天已予之。天已使之。其家不可以接天何哉。以文義求之。當作其家無疑。每更紀者。以郊郊祭首之。

樾謹按此本作每更紀者。以郊祭首之。涉上文卽以其初郊。郊必以正月。而誤疊郊字耳。

父者子之天也。天者父之天也。順命。

樾謹按當作祖者父之天也。故下文曰。天者萬物之祖。州國人民。

樾謹按民乃氏字之誤。莊十年公羊傳曰。州不若國。國不若氏。氏不若人。臣不奉君父。

樾謹按當作臣不奉君命。

或以驚當鳧。驚非鳧。可用否。郊事對。

樾謹按此本作或以驚當鳧。鳧當驚。可用否。故仲舒對曰。驚非鳧。鳧非驚也。又曰。柰何以鳧當驚。驚當鳧。可證此文之誤。

搔而不可從繞。執贊。

樾謹按從衍字。繞者撓之段字。搔而不可撓。卽荀子法行篇所謂折而不撓也。漢書枚乘傳。足可搔而絕。然則搔與折義亦相近。

賜有似於聖人者。

樾謹按聖人下當疊聖人二字。下所說皆聖人之德也。至賜亦取百草之心。始說賜之似聖人。然則此

當作聖人者明矣。上文云：雁乃有類於長者，長者在民上，亦疊長者二字，正與此一律也。

山則巖嵒巖嵒，巖嵒巖嵒，山川頌。

樾謹按：此本作山則巖嵒巖嵒，說苑雜言篇作夫山巖嵒巖嵒，即本此文，可證也。因傳寫之本不同，或作巖嵒巖嵒，或作巖嵒巖嵒，而後人誤合之，於是作巖嵒巖嵒巖嵒矣。一聲之字，不應疊用，其誤可知。上林賦：於是乎崇山巖嵒，巖嵒巖嵒，亦本此文，並可爲證。

不遺小問。

樾謹按：問乃閒字之誤。說苑雜言篇正作不遺小閒。

丈夫五人，齋三日，服黃衣而舞之。老者五人，亦齋三日，衣黃衣而立之。

求雨。

樾謹按：聚珍本云：他本無老者二字。今以文義求之，無此二字者是也。據下文：冬求雨，用老者六人，則季夏之月不得亦用老者一也。且上文於春云：小童八人，皆齋三日，服青衣而舞之。田嗇夫亦齋三日，服青衣而立之。於夏云：壯者七人，皆齋三日，服赤衣而舞之。司空嗇夫亦齋三日，服赤衣而立之。於秋云：鰥者九人，皆齋三日，服白衣而舞之。司馬亦齋三日，衣白衣而立之。於冬云：老者六人，皆齋三日，衣黑衣而舞之。尉亦齋三日，服黑衣而立之。是舞之者，或小童，或壯者，或鰥者，或老者，皆擇用民間之人而立之者。或田嗇夫，或司空嗇夫，或司馬，或尉，皆在官之人也。此乃用丈夫五人舞之，老者五人立之。

於義不合二也。然則此文宜如何。曰此文直云五人亦齋三日。衣黃衣而立之。所謂五人。非如丈夫五人。以數計也。五人乃當時有此名目。其字本作伍。漢書酷吏尹賞傳。乃部戶曹掾史與鄉吏亭長里正父老伍人。是伍人與亭長里正同類。此所使衣黃衣而立之者。即其人也。作五者古字通耳。後人不達其義。謂五人是以數計。則五人之上。不得無文。臆加老者字。而古制失矣。

夏之所受初也。祭義。

樾謹按受初當作初受。傳寫誤倒。

夏約故曰初。

樾謹按此本作初受故曰初。即承夏之所初受而言。與始生故曰祠。先成故曰嘗。畢熟故曰烝。皆承上而言者一律。因上文初受誤作受初。於是此文亦作受初。而今本作夏約者。即受初之誤。受之與夏。初之與約。字形皆相似也。

天有兩和。以成二中。循天之道。

樾謹按兩和謂春分秋分。二中謂冬至夏至。

是故和東方生而西方成。東方和生。北方之所起。前而西方和成。南方之所養。長起之不至。於和之所不能生。養長之不至。於和之所不能成。

樾謹按此節多衍字。今正之曰：是故東方生而西方成，東方和生，北方之所起，西方和成，南方之所養，起之不至，於和之所逼不能生，養之不至，於和之所逼不能成。

天地先盛壯而後施精，故其精固。

樾謹按地誤字，盛壯而後施精，以天言不以地言也。下文曰：地氣盛牝而後化，故其化良，則此文天地必天氣之誤。

天地之經，生至東方之中，而所生大養，至西方之中，而所養大成。

樾謹按生衍字，蓋卽至字之誤而衍者。

鶴之所以壽者，無宛氣於中，是故食冰。蜎之所以壽者，好引其末，是故氣四越。

樾謹按凌注以是故食冰四字屬下爲義，非也。蜎無食冰之說，於義無取。且鶴之所以壽者，蜎之所以壽者，兩文相對，是故食冰，是故氣四越，兩文亦相對，則食冰自屬鶴矣。董子原文疑作是故食不冰，冰者疑之正字，說文於冰篆下出重文，疑曰：俗冰從疑，是也。食不凝，謂所食不凝滯也。蓋中無宛氣，故食不凝滯，此鶴之所以壽也。相鶴經謂大喉以吐，故修頸以納新，是矣。淺人但知冰爲冰凍字，誤刪不字，遂失其義。

氣不傷於以盛通，而傷於不時天并。

樾謹按天井二字無義。疑當作弃天。弃與井字相似。傳寫又誤倒耳。下文曰：不與陽陰俱往來。謂之不時。恣其欲而不顧天數。謂之天井。夫不顧天數。正弃天之謂。可知其誤矣。

### 冬避重溼

樾謹按溼爲涕溼字。說文本作濕。而今經傳相承皆以濕爲燥溼之溼。然則此言重溼。卽重溼也。以溼爲溼。猶經傳之以濕爲溼矣。李翕析里橋郿閣頌。醴散關之漸溼。溼卽溼也。與此正同。說詳王氏念孫漢隸拾遺。

是故當百物大生之時。羣物皆生。而此物獨死。可食者告其味之便於人也。其不可食者。告殺穢除害之不待秋也。當物之大枯之時。羣物皆死。如此物獨生。

樾謹按如此物獨生。卽而此物獨生也。惟其文傳寫錯誤。今正之曰：是故當百物大生之時。羣物皆生。而此物獨死。不可食者。告殺穢除害之不待秋也。當物之大枯之時。羣物皆死。如此物獨生。可食者告其味之便於人也。

故貴爵而臣國所以爲仁也。天地之行。

樾謹按此皆承上文而言。上文云：高其位所以爲尊也。下其施所以爲仁也。則此文貴爵下奪所以爲尊也五字。

聖人何其貴者。起於天至於人而畢。天地陰陽、

樾謹按聖衍字也。此明人貴於物之義。上文曰。天地陰陽木火土金水九。與人而十。是起於天畢於人也。此人之所以貴也。但言人貴。非言聖人貴。聖字之衍明矣。

物者投所貴之端。而不在其中。

樾謹按投字無義。疑數字之誤。

受其治者。不能辭其終。天道施、

樾謹按治乃始之誤。



## 諸子平議卷二十七

### 賈子一

東割膏腴之地，北收要害之郡。過秦上。

樾謹按史記無北字，是也。文選有北字，而李善注引李斯上書曰：「惠王用張儀之計，西并巴蜀，南取漢中，東據成皋之險，割膏腴之壤，亦無北字。」蓋要害之郡，卽指成皋之險，在東不在北，則北字衍文也。合縱締交，相與爲一。

樾謹按明吉府本作相舉爲一，舉與古通用，作舉者必古本也。良將勁弩，守要害之處。

樾謹按吉府本守上有而字，疑勁弩上闕一字。下句云：「信臣精卒，陳利兵而誰何。」此句良將與信臣精卒對，勁弩與利兵對，必更有一字方與陳字對也。此字偶闕，後人誤以良將勁弩四字對信臣精卒四字，遂覺而字無謂，輒刪去之矣。吉府本有而字，猶可推尋其迹，然所闕者何字，無可據補也。俛起阡陌之中。

樾謹按俛當從始皇本紀作倮，字誤作俛，而陳涉世家遂作俛仰矣。阡陌亦當從史記作什伯，十人爲

什百人爲伯，以軍法言，卽上文所謂行伍之閒也。

然秦以區區之地，致萬乘之勢，序八州而朝同列。

樾謹按致字衍文，萬乘當從史記作千乘。區區之地，言其地之小也。與序八州相對，千乘之勢，言其勢之弱也。與朝同列相對，序者次第之也。陳涉世家作抑，蓋字之誤。因而始皇本紀又誤爲招矣。

二世不行此術，而重以無道，壞宗廟，與民更始，作阿房之宮，過秦中。

樾謹按與民更始四字，當在不行此術句下。

故先王者見終始之變。

樾謹按此本作故先生觀終始之變，觀字誤分爲者見二字，亦猶禮記祭義篇分鬯字爲閒見二字矣。循津關，過秦下。

樾謹按潭本循作修，是也。修通作脩，因誤作循耳。

案士息民，以待其弊。

樾謹按案士無義，案當從史記作安。士乃士字之誤。吉府本正作士，言安息其士民，以待諸侯之弊也。臣故曰，時且過矣。上弗蚤圖，疑且歲閒所不欲焉。宗首。

樾謹按閒乃閒字之誤，疑猶恐也。禮記雜記篇，皆爲疑死。鄭注曰，疑猶恐也。是矣。且猶將也。淮南時則

篇雷且發聲高誘注曰且猶將也是矣疑且歲聞所不欲焉猶曰恐將歲聞所不欲焉上文云今或親弟謀爲東帝親兄之子西嚮而擊今吳又見告矣聞所不欲卽指此等事而言蓋謂不蚤圖之則此等事恐無歲不聞也聞與閒形似致誤儀禮士虞禮篇鄭注曰不言養禮畢於尸聞嫌又曰此記更從死起異人之聞其義或殊兩聞字今皆誤作閒辯見羣經平議此文聞誤作閒正與彼同盧氏文弼不能訂正反謂此十九字不成文理而刪去之謬矣匈奴篇云疑將一材而出奇厚贄以責漢此云疑且猶彼云疑將可以互證

且謂天何權不甚奇而數制人豈可得也

樾謹按吉府本建本並有此十六字在豈有異秦之季世乎句下當從之且謂天何四字爲句天卽天時也上云時且過矣上弗蚤圖故此曰且謂天何權不甚奇而數制人八字爲句奇之言奇羨也奇贏也史記貨殖傳曰時有奇羨漢書食貨志曰操其奇贏是其義也言漢與諸侯王比權量力亦不甚奇贏而欲諸侯王數數受其制豈可得也此乃賈子原文班固刪去之而後人依漢書以刪賈子故潭本無此十六字盧氏謂其不成文理從潭本削去是讀漢書非治賈子也

臣聞之自禹以下五百歲而湯起數甯

樾謹按漢書射獵之娛與安危之機孰急也卽接使爲治勞知慮苦身體云云文氣脗合今以臣聞之

自禹以下至又將誰須也一段橫隔其中殊不可通。若移在篇首。臣竊惟事勢之上。則文理俱順矣。蓋由後人依漢書刪去此段。而校補者又不當其處耳。

自武王已下。過五百歲矣。聖王不起。何怪矣。

樾謹按。僞字難通。明吉府本作何怪矣。當從之。怪猶異也。言何其異也。蓋過五百歲而聖王不作。可怪異之甚也。作怪者。形似而誤。

臣觀寬大知通。竊曰。是以摻亂業。握危勢。

樾謹按。是當爲足下文。食穀之法。固百以是。盧校曰。是當爲足。正與此同誤。因諸侯附親軌道致忠而信上耳。

樾謹按。自此以下凡用因字耳字者十。其句法皆同。班固刪改以入漢書。大失賈子之真。當以此書爲正。後人習讀漢書。不覩賈子原文。故亦無襲用此句法者。或反以爲誤。失之。

因觀成之廟。爲天下太宗。承太祖與天下漢長亡極耳。

樾謹按。此當作爲天下太宗。承天下太祖。與漢長亡極耳。天下二字。誤在漢上。義不可通。

子生而立。其身以子。夫將何失。藩僞。

樾謹按。立字絕句。其身以子句。當有闕文。蓋謂奪之其身以與其子也。盧校謂當作其身而天子將何

失非是。

若與臣下相殘，與骨肉相飲茹，天下雖危，無傷也。則莫如循今之故而勿變，以前觀之，其國最大者反最先，藩疆。

樾謹按：盧校本刪此四十一字，非也。此與上文欲令天下之治安，天子之無憂，莫如衆建諸侯而少其力，反覆相明，其云以前觀之，其國最大者反最先，則又起下文也。上文大都篇曰：昔楚靈王問范無宇曰：我欲大城陳蔡葉與不羹，與此句正相接，蓋賈子原文本是一篇也。後人割而分之，盧氏遂疑其語氣不了矣。

臣聞大都疑國，大臣疑主，亂之謀也。大都

樾謹按：謀當爲媒。古字通用。權重篇曰：亂媒日長，是其證也。審微篇曰：故明者之感奸由也蚤，其除亂謀也遠，謀亦當爲媒。奸言由亂言媒，語意相近。

以皇帝所在宮法論之，等齊。

樾謹按：建本作皇帝在所宮法論之，非也。上句云：諸侯王所在之宮，衛織履踰夷，則此句當作皇帝所在宮明矣。兩所在字正相應也。盧校本反從建本作在所，殊誤。

諸侯之言曰：令儀令言是也。

樾謹按明吉府本作諸侯之言曰令儀之言是也儀之言句雖不可解必是古本如此後人因上文天子之言曰令令甲令乙是也遂臆改之曰令儀令言是也使與上文一律然令儀令言亦仍不可解當從古本而闕疑

是以高下異則名號異則權力異則事勢異則旗章異則符瑞異則禮寵異則秩祿異則冠履異則衣帶異則環佩異則車馬異則妻妾異則澤厚異則宮室異則牀席異則器皿異則飲食異則祭祀異則死喪異服疑

樾謹按名號異下當疊名號異三字本云是以高下異則名號異名號異則權力異以下諸句皆同古書遇疊句多省不書止於字下加二小畫識之傳寫奪去耳建本於則死喪異下又加則字是誤於則字絕句矣

其苦之甚矣其欲有卒也類良有所至逋走而歸諸侯殆不少矣益壤

樾謹按卒乃立字之誤其欲有立也類良有八字爲句蓋言吏民苦屬漢欲有所立者多有也類乃語詞良猶甚也良有即甚有也漢書作其苦屬漢而欲得王至甚即本文而潤色之耳屬遠篇云甚苦屬漢而欲王類至甚也逋遁而歸諸侯類不少矣可與此篇互證所至二字屬下句讀

今所恃者代淮陽二國耳皇太子亦恃之

樾謹按特之下脫二國耳三字。皇太子亦特之二國耳。謂亦特此二國耳。之猶此也。上文曰。陛下所特以爲藩捍者。以代淮陽耳。又曰。唯皇太子之所特者。亦以之二國耳。與此文相同。可證。

天子無可以徵倖之權。五美

樾謹按天子當作天下。吉府本不誤。

於是齊悼惠王之子孫王之。分地盡而止。

樾謹按此本作於是齊悼惠王之子孫。各以次受其祖之分地。下文云。趙幽王。楚元王之子孫。亦各以次受其祖之分地。即承此而言。可據訂也。又按漢書盡而止上有地字。此亦當有傳寫奪之。特賴其尙幼倫煖之數也。制不定。

樾謹按倫乃倫字之誤。煖乃緩字之誤。倫緩者。言苟緩之而已。建本誤作倫煖。其字形尙相近。譚本作倫煖。則彌遠矣。

所排擊所剝割。皆象理也。

樾謹按此當從漢書作皆衆理解也。象即衆字之誤。

周襄王出逃伯鬬。審微

樾謹按周襄王出居於鄭。左傳以爲避大叔帶也。而此以爲逃伯鬬。乃古事相傳之異。宜表出之。以廣

異聞闕卽闕之俗字。

其中罪者聞命而自弛階級。

樾謹按弛讀爲縶。說文糸部。縶。繫縶也。聞命而自縶者。聞命而自繫也。故下曰。上不使人頸鑿而加也。據說文。弛或作張。與縶同聲。故得通用。師古注漢書曰。弛。廢也。自廢而死。無論自廢而死。不得但謂之自弛。且與下文大罪之聞命自裁。何別乎。

慮非顧行也。俗激。

樾謹按慮猶無慮也。古人常語。慮非顧行也。謂大氏非顧行也。建本慮下衍念字。乃淺人不得其義而妄增。下云。盜者慮探柱下之金。撥寢戶之簾。亦言其大氏如此也。潭本作利。亦淺人改之。

攻擊奪者爲賢。貴人善突盜者爲忤。時變。

樾謹按攻當作工。貴人並衍文。貴卽賢字之誤而衍者。因又衍人字耳。忤乃折字之誤。故潭本作圻。圻與折尤相似也。善突盜者爲折。折讀爲哲。古字通用。尙書呂刑篇。折民惟刑。墨子尙賢中篇作哲。民惟刑。是也。爲哲與爲賢同意。下云。諸侯設詔而相飭。設輶而相紹者爲知。知亦哲也。諸侯二字未詳。疑衍字。

今俗侈靡。以出相驕。出倫踰等。以富過其事相競。



樾謹按下出字衍文。倫踰等三字，卽在上出字之下。本作今俗侈靡，以出倫踰等相驕，以富過其事相競，傳寫脫倫踰等三字，補者誤著句下，又衍一出字耳。

民不爲奸而貧爲里母也。

樾謹按母當作侮，言爲里人所輕侮也。下文廉吏釋官而歸爲邑笑，語意相近。

夫雕文刻鏤，周用之物繁多，瑰璋，

樾謹按周疑害字之誤，害用者害於用也。下文云，黼黻文繡纂組害女工。

作之宜一日，今十日不輕能成，用一歲，今半歲而弊，作之費日挾巧，用之易弊，不耕而多食農人之食，是天下之所以困貧而不足也。

樾謹按用一歲，當作用之宜一歲，與作之宜一日相對爲文。作之費日，用之易弊，兩文亦相對，其中閒不當有挾巧二字。此二字當在不耕而多食之上，謂其挾巧伎而不耕作，反多食農人之食也。是使天下公得冒主，而夫人務侈也。

樾謹按公得冒主者，謂顯然得冒主也。漢書吳王濞傳，公卽山鑄錢，胡建傳，公穿軍垣以求賈利，師古注並曰，公謂顯然爲之也，是其義也。夫人務侈，謂人人務侈也。襄八年左傳，夫人愁痛，杜注曰，夫人猶人人也，是其義也。

曰爲大夫治可也。若爲大亂，豈若其小。孽產子、

樾謹按：建本如此。潭本無夫字。然夫字非衍文，但當移在曰字之上。其文云：夫曰爲大，句治，句可也，句若爲大，句亂，句豈若其小。蓋此因獻計者類曰：無動爲大耳。故以此破之。無動是一說，爲大又是一說。上文云：夫無動而可以振天下之敗者，何等也。乃破無動之說也。此云：夫曰爲大，治可也。若爲大，亂豈若其小。乃破爲大之說也。賈子以爲獻計者，但知爲大耳。爲大而治誠可也。爲大而亂，則豈若爲其小乎。文義甚明。盧本刪去此十五字，則上文有無動爲大兩說。此但破無動一說，於文爲不備矣。進計者猶曰無爲。

樾謹按：上文云：獻計者類曰：無動爲大耳。夫無動而可以振天下之敗者，何等也。夫曰爲大，治可也。若爲大，亂豈若其小。蓋舉獻計者之說，而一一破之也。此文當云：進計者猶曰：無動爲大。方與上文相應。乃云：進計者猶曰無爲。則既遺爲大一說，而上云無動，此云無爲，亦殊不合矣。蓋賈子原文本作無動爲大，班固刪削，遂成此誤，不可不正也。

所謂禁游宦諸侯，及無得出馬關者，壹通、

樾謹按：所謂卽所爲也。古書謂爲字多通。呂氏春秋特君篇：凡吾所爲爲此者。趙策作所謂。史記蕭相國世家：上所爲數問君者。漢書作所謂。此文用所謂。正賈子之原文。盧校云：本作所謂。誤。今改正。則失

之矣。上文云。所謂建武關函谷臨晉關者。所謂亦所爲也。盧氏何不改乎。天子都長安。而以淮南東南邊爲奉地。

樾謹按自此至陛下柰何久不正。此與前段罷關意不相承。當合下屬遠篇爲一。蓋壹通篇之文。至害兼覆之義。不便而止。天子都長安以下。卽爲屬遠篇。傳寫者誤割之。非賈子之舊矣。故陳勝一動。而天下不振。屬遠。

樾謹按不字衍文。天下振者。言天下爲之振動也。今衍不字。非其意矣。

行中道而衣行勝。已羸弊矣。彊提荷弊衣而至。慮非假貸自詣。非有以所聞也。

樾謹按盧校疑行勝當作行滕。已得之矣。自詣當從潭本作自儲。吉府本作自諸。諸卽儲之段字也。以所聞三字涉下竊以所聞句而衍。慮非假貸自儲。非有也。言大氏非假貸自儲。則無有也。非有猶無有耳。痺篇曰。死而非補。猶死而無補也。可證此非字之義。

竊以所聞縣令丞相歸休者。慮非甚彊也。不見得從者。

樾謹按盧氏以丞相二字連讀。大誤也。此以縣令丞連讀。相歸休者連讀。見字衍文。卽得字之誤。而衍者。古得字作尋。闕壞而爲見字。校者注得字於下。傳寫誤合之。遂成見得二字矣。此言道路遼遠。人不願往。縣令丞之歸休者。大氏非彊有力。卽不得從者耳。

六七諸公皆無恙，親疏危亂、

樾謹按六七下又言諸不辭甚矣。諸公當作公諸。諸讀爲者。古字通用。爾雅釋魚，龜俯者靈，仰者謝。前弁諸果，後弁諸獵。諸卽者字也。禮記郊特牲篇，或諸遠人乎。士虞禮注作或者遠人乎，是其證也。六七公諸皆無恙，猶言六七公者皆無恙，後人不達其義，涉下文屢言諸公，因誤倒之耳。漢書正作六七公者可證。

慮無不宰制，而天子自爲者。

樾謹按白虎通諫諍篇曰：宰制也。故此以宰制連文。漢書作帝制，則與天子自爲複矣。誰與領諸侯，此所謂親也者。

樾謹按漢書作誰與領此，此卽指諸侯而言。班固所改也。又刪此所謂親也者六字。然此句上應臣請試言其親者，下起故疏必危親必亂，似未可刪。盧校從漢書削去，則不如讀漢書矣。

故禹水九年，湯旱七年，甚也。野無青草，憂民。

樾謹按甚也卽甚者，屬下爲義。猶曰甚者野無青草也。禮記檀弓篇：古者冠縮縫，今也衡縫。論語陽貨篇：古者民有三疾，今也或是之無也。並上言古者，下言今也，是也與者同。未稷年，富人不貸，貧民且飢。

樾謹按年當從潭本作耳。吉府本同。此言豐歲特未收穫耳。然其困已若此。

上弗自憂。將以誰偷。

樾謹按偷讀爲輸。荀子脩身篇。偷儒轉脫。楊倞注曰。偷當爲輸。是其例也。言上弗自憂。則此憂無可委輸也。

中國乘其歲而富彊。

解縣。

樾謹按歲乃威字之誤。此說匈奴事。與歲無涉。

此其示武昧利之時也。

匈奴。

樾謹按昧利猶貪利也。漢書匈奴傳贊。昧利不顧。師古曰。昧。貪也。

愛人之狀。好人之技。人道。信爲大操。帝義也。

樾謹按師古注漢書本傳。引此曰。愛人之狀。好人之技。仁道也。信爲大操。常義也。此文人道下奪也字。

仁人古通。帝常形似。然上文曰。妨害帝義。則帝字不誤。

匈奴之使至者若大降者也。

樾謹按匈奴之使至者是一事。大降者是一事。若猶及也。猶言匈奴之使至者及大降者也。禮記內則篇。父母有婢子。若庶子。庶孫。與此若字同義。下文曰。降者之傑也。若使者至也。又曰。陛下之所召幸。若

所以約致也。並與此同。

美臠臠炙肉。

臠謹按炙肉二字。衍文也。臠卽炙之異文。炙從肉從火。此變從火爲從炙。則以義而兼聲矣。故炙亦作臠。顏氏家訓曰。火旁作庶爲炙是也。庶與煮同聲。周官庶氏注曰。庶讀如藥煮之煮。然則臠從炙聲。猶臠從庶聲矣。讀者以臠卽炙肉之炙。故注炙肉二字於下以識之。傳寫誤合之正文耳。美臠臠具醢醢。皆三字爲句。今衍炙肉二字。則與下句不倫矣。

上使樂府幸假之但樂。

臠謹按但乃具字之誤。具誤爲俱。因誤爲但矣。下文云。上幸令官助之。具假之樂。與此同義。彼分言之。則曰助之具。假之樂。此合言之。則曰假之具樂矣。具謂器具。樂爲鼓樂。非一事也。

陛下必時有所富。

臠謹按富當從建本作官。盧梭依他本作富。非是。官者館之古文。說詳余所著字義載疑。保傳篇云。學者所學之官也。師古注漢書曰。官謂官舍。官舍卽館舍也。此云時有所官。猶云時有所館。下文云。必令此有高堂邃宇。善廚處。大困京。廐有編馬。庫有陣車。並就館舍言。可證。下文又曰。於來降者。上必時時而有所召幸拊循。而後得入官。益知此文作富者之誤矣。

皆過其故王。慮出其單于。或時時賜此而爲家耳。

櫛謹按王乃土字之誤。屬上讀。言皆過其故土也。慮出其單于。或六字爲句。或讀爲域。說文戈部。或邦也。從口。從戈。以守一地也。重文域曰。或又從土。是或本域之正字也。出其單于。或者出其單于之邦域也。慮與無慮同。猶大氏也。言大氏出其單于之邦域。時時賜此而爲家也。

上乃幸自御此薄。

櫛謹按薄讀爲博。謂博戲也。莊十二年公羊傳。與閔公傳。釋文曰。博字書作簿。然則此作薄者。疑簿之誤矣。上文或薄或揜。義與此同。

具帶服賓餘。

櫛謹按賓餘。卽史記匈奴傳所謂比余也。餘余同聲。古字通用。周官委人職。凡其余聚以待頒賜。鄭注曰。余當爲餘。是也。賓與比亦一聲之轉。白虎通封禪篇。賓連者木名也。其狀連累相承。然則賓連卽比連也。說文目部。引詩國步斯曠。今詩桑柔篇。作國步斯頻。鄭箋云。頻猶比也。蓋頻比一聲之轉。曠頻亦一聲之轉。賓得通比。猶曠得通頻也。國語齊語。夫管夷吾射寡人中鉤。是以濱於死。管子勢篇曰。動靜者比於死。比於死。卽濱於死也。並可爲賓餘卽比余之證。

衆欲無來。恐或軒之。

樾謹按軒乃擻字之誤。文選長楊賦。麾城擻邑。李善注引蒼頡曰。擻。拍取也。恐或擻之言。恐爲人所取。方與上句若虎在後一律。漢書楊雄傳作擻。卽擻之誤。此作軒。又擻之壞字矣。

大每一關。屠沽者。賣飯食者。美臠炙臠者。每物各一二百人。

樾謹按大字不誤。潭本作夫。非也。大猶言大率也。數甯篇曰。故聖王之起。大以五百爲紀。與此大字正同。

闔閭富。故然使專諸刺吳王僚。燕太子丹富。故然使荆軻殺秦王政。淮難。

樾謹按此本云闔閭富。句。然故使專諸刺吳王僚。燕太子丹富。句。然故使荆軻殺秦王政。然故猶是故也。禮記少儀篇曰。然故上無怨而下遠罪也。管子任法篇曰。然故譴杵習士。聞識博學之人。不可亂也。荀子大畧篇曰。然故民不困財。韓子難三曰。然故忠臣盡忠於公。諸書並以然故連文。說見王氏引之。經傳釋詞。此文兩言然故。正與彼同。今作故。然。則不可通矣。

今陛下將尊不億之人。

樾謹按不億猶不逞也。襄二十四年左傳。不可億逞。是億與逞同義。

或稱春秋而爲之聳善而抑惡。以革勸其心。傳職。

樾謹按革者戒也。文選三國名臣序贊。訓革千載。李善引蒼頡篇曰。革。戒也。革勸卽戒勸。國語楚語正。



作以戒勸其心。

德言以揚之。

樾謹按楚語作德音以揚之。疑此言字誤。

天子不姻於親戚。

樾謹按古人稱父母爲親戚。昭二十年左傳。親戚爲戮。不可以莫之報也。韓詩外傳。親戚旣沒。雖欲孝誰爲孝。並其證也。此本作天子不恩於親戚。後人不達親戚之義。故易以姻字耳。大戴記保傳篇作天子無恩於父母。父母卽親戚也。

天子居處燕私安所易。

樾謹按此本作安而易。與下句樂而湛相對爲文。隸書所字或作𠂔。見魏孔羨碑。與而字相似。因致誤耳。大戴記保傳篇作安如易。如卽而也。

夜漏屏人而數。

樾謹按數者說也。詩擊鼓篇。與子成說。毛傳曰。說數也。說爲數。故數亦爲說。禮記儒行篇。遽數之不能終其物。正義曰。數說也。蓋稱說者必一一數之。故數與說其義得通。隱十二年穀梁傳曰。桓言同時也。累數皆至也。范甯注曰。累數總言之也。然則累數卽累說也。屏人而數。猶屏人而言。盧校未得數字之

義。故疑其有脫文矣。

左臆右臆連語、

樾謹按臆讀爲十萬曰億之億。左億右億。極言其數之多也。

提石之者猶未肯止。

樾謹按史記絳侯周勃世家。以冒絮提文帝。索隱引蕭該曰。提猶擲也。廣雅釋詁。石。擲也。此提石二字之義。

以時巡循輔佐、

樾謹按巡乃順字之段借。巡順並從川聲。古通用也。循乃脩字之誤。循脩二字。隸書相似。往往致誤。荀子王制篇曰。以時順脩。楊注曰。謂不失其時而順之。脩之。可據訂正。盧校本。循卽巡字。後人妄增。猶未得也。

審詩商命禁邪言息淫聲、

樾謹按命字上奪脩憲二字。審詩商脩憲命禁邪言息淫聲。皆三字爲句。荀子王制篇作脩憲命。審詩商禁淫聲。是其證也。

# 諸子平議卷二十八

## 賈子二

虞人翼五豝以待一發。所以復中也。禮。

樾謹按復乃優字之誤。言優假尊者。使之易中也。上文云。所以優飽也。文義正同。今誤作復。義不可通。旣云以待一發。則無再發之事。又何復中之有。

禮者所以節義而沒不還。

樾謹按還乃選字之誤。小爾雅廣詁。沒。無也。方言曰。選。及也。沒。不選者。無不及也。故下所說。皆逮下之事。

不出穎羅。

樾謹按穎讀爲結。太元元瑩篇。禍福結羅。正以結羅二字連文。可證也。結從圭聲。穎從頃聲。而得相通者。說文。炷讀若同。卽其例矣。禮記祭義篇。故君子頃步而弗敢忘孝也。鄭注曰。頃當爲跬。聲之誤也。然則結之通作穎。猶跬通作頃矣。

魚肉不入廟門。

樾謹按魚肉之義未詳。肉疑育之壞字。育下從肉。闕其上半。則爲肉字矣。魯語曰。鳥獸成。水蟲孕。水虞於是禁罟罟設罝。以實廟庖。卽魚育不入廟門之義。

攪鬻搏擊之獸。鮮毒蠹猛蚋之蟲。密毒山不蕃草木少薄矣。鑠乎大仁之化也。

樾謹按盧校本於鮮字密字絕句。是矣。惟未解密字之義。密讀爲伏。古人書伏字。或作處。或作宐。故伏羲氏漢書五行志作處。古今人表作宐。密與處宐同聲。故亦得通作伏矣。毒山句不可曉。疑毒字衍文。蓋卽涉上句而衍者。薄矣二字傳寫誤倒。賈子原文云。山不蕃草木少矣。言山之不蕃草木者少也。又云。薄鑠乎大仁之化也。薄鑠連文。猶言灼鑠也。古音灼與暴近。墨子親士篇。靈龜近灼。神蛇近暴。以灼暴爲韻。是其證也。而薄與暴聲相同。匡謬正俗七引山海圖讚曰。暴有薄音。漢書宣帝紀注曰。薄亦暴也。並其證也。是故薄鑠卽灼鑠也。凡形況之辭。本無定字。亦無定義。在以聲求之而已。爾雅釋詁。毘劉。暴樂也。桑柔篇。毛傳作暴鑠。卽此文薄鑠也。暴鑠本希疏之義。而因有光明之義。凡樹木茂密則幽。希疏則明也。因又變其字爲灼鑠。詁文新附。灼鑠光也。許書無灼鑠。而有均鑠。實則皆後出字耳。

漻然漻然憂以漻。容經。

樾謹按此當從潭本作憂以下。漻卽漻之異文。不當重出。

喪紀之容。恻然惻然若不還。

樾謹按還亦當爲還。與禮篇沒不還同誤。若不還者。若不及也。下云言若不足。喪紀之言也。不足猶不及也。

身似不則。

樾謹按不則之義不可曉。或改爲側字。亦非也。身自不宜傾側。豈但似之而已乎。則當讀爲卽。禮記王制篇。必卽天倫。鄭注曰。卽或爲則。是古字通用。故廣雅釋言曰。則卽也。身似不則者。身似不卽也。言其身若不往就之者然。故下句曰。從容而任。

旄如濯絲。

樾謹按淮南墜形篇。多旄犀。高誘注曰。旄讀近綢繆之繆。急氣言乃得之。此文旄字。當從彼讀。方合如濯絲之義。

隨前以舉。

樾謹按隨乃骹之段字。隨從隋聲。與妥聲相近。儀禮士虞禮注曰。今文墮爲綏。特牲饋食禮注曰。墮與按讀同。並其證也。古無骹字。故以隨爲之。說詳羣經平議周易執其隨下。此云隨前以舉。與下句項衡以下相對爲文。言拜之時。其骹必前以舉。其項必衡以下也。益知隨之爲骹段字矣。

故能宗揖其國。

樾謹按揖與輯通。宗疑安字之誤。安輯之文。史傳屢見。漢書段會宗傳。使安輯烏孫。孫寶傳。蠻夷安輯。西域傳。可安輯。安輯之。王莽傳。安輯海內。並其證也。

審乎明王。

樾謹按淮南子本經篇。審于符者。高誘注曰。審。明也。審乎明王。正以審乎爲形況之辭。審乎所以擬其明也。譚本審作沈。非是。

故威勝德則信。德勝威則施。

樾謹按信當讀爲愍。周書世俘篇。凡愍國九十有九國。孔晁注曰。愍。惡也。威勝德則惡矣。故曰愍也。施者弛之段字。言德勝威則廢弛也。

是法廢而威不立也。春秋

樾謹按此下有非所聞也四字。盧梭以爲不類原文而去之。此大誤也。論衡福虛篇載此事云。念謹之而不行其罪乎。是廢法而威不立也。非所以使國人聞之也。然則此文亦必與彼同。但奪去以使國人之五字耳。當據論衡補。

惠王之後而蛭出。故其久病心腹之積皆愈。

樾謹按故字衍文。論衡福虛篇作及久患心腹之積皆愈。無故字。

故天之視聽不可謂不察。

樾謹按視聽乃親德之誤。論衡作故天之親德也。可謂不察乎。是其證也。上云臣聞皇天無親。惟德是輔。故此云天之親德。卽承上文爲說也。廣雅釋詁。察至也。不可謂不察者。不可謂不至也。後人不達察字之義。疑與天之親德意不相承。遂以形似之字易之。而爲天之視聽矣。

寇挾城堞矣。

樾謹按挾讀爲接。儀禮鄉射禮。兼挾乘矢。大射儀。挾乘矢。鄭注並曰。古文挾皆作接。

小而生大必伯於天下。

樾謹按戰國策作小而生巨。當從之。古占驗之辭。必有韻。巨與下爲韻。大與下則非韻矣。當據國策訂正。

昔楚莊王卽位。自靜三年。先醒。

樾謹按靜讀爲靖。古字通用。尚書堯典篇。靜言庸遠。漢書王尊傳作靖言庸遠。是其證也。爾雅釋詁。靖謀也。自靖者自謀也。韓詩外傳載此文。作昔者楚莊王謀事而居。雖與此不同。然彼謀字卽此靜字之義。

天下服而□御耳瘳。

樾謹按上句云上下調而無尤。下句云四境靜而無虞。則此句所闕亦必是無字矣。御讀爲悟。御從卸聲。卸從午聲。悟從吾聲。吾從五聲。故御與悟聲近而得通。說文金部。鑄或作鑄。卽其例也。天下服而無悟者。天下服而無逆也。說文午部。悟逆也。後人不解御字。以無御不可通而闕之。又或妄補在字。更失之矣。

飲腑水。

樾謹按腑卽腐字。移下半肉字於古旁耳。呂氏春秋盡數篇。流水不腐。然則腐水謂淤積之水。楚辭離世篇。淹芳芷於腐井兮。王逸注曰。腐臭也。卽此所謂腐水矣。

請婦人爲妾。丈夫爲臣。百世名寶。因閒官爲積。

樾謹按官乃館之古文。說詳匈奴篇。閒官卽閒館。謂館舍之空虛者。上林賦。靈囿燕於閒館。是也。此言請以越國百世之名寶。因吳國館舍之空虛者。而以爲積。故曰因閒館爲積也。

稱善累德。

樾謹按稱讀爲稱。說文甚部。稱并舉也。并舉亦有積累之義。故與累德對文。

范蠡負室而歸五湖。

樾謹按潭本作負石而蹈五湖。吉府本同。當從之。蓋此文言越之君臣皆不善終。以明誣神而逆人。則



天必敗其事也。下文曰：大夫種繁領謝室，渠如處車裂回泉，句踐不樂，憂悲菴至，內崩而死，然則范蠡負石蹈湖，亦是言其不得其死，非如蔡澤所謂超然避世，長爲陶朱者也。呂氏春秋悔過篇：故箕子窮于商，范蠡流于江，意與此近。古事相傳，往往不同，卽如子胥爲夫差所殺，其事甚著，此云子胥見事之不可爲也，何籠而自投水，然則說范蠡事，豈必如世所傳乎？

天之處高，其聽卑，其牧芒，其視察。

樾謹按：牧乃狀字之誤，言天之處雖高，而其聽則甚卑，其狀雖若芒芒然，而其視則甚察也。

寡人朝飢，時酒二醢，諡誠。

樾謹按：說文角部，觶，小觶也。醢，卽觶字，變從角者而從酉耳。說文以爲小觶，實卽觶之異文，觶之爲觶，猶觶之爲觶也。

大夫國士畜我。

樾謹按：大字衍文也。上云：夫衆人畜我，此云：夫國士畜我，兩文正同。古人書大夫字，或止於夫下，積二書，如嶧山碑：御史夫二臣德是也，故往往相亂。晏子春秋問篇：晏子聘於魯，魯昭公問曰：夫儼然辱臨，是誤大夫爲夫也。此云：大夫國士畜我，是誤夫爲大夫也。雖屬錯譌，而尙可見古書之眞，別本有作是者，則後人率意妄改耳。盧校反謂建本譌，非也。又階級篇：作國士遇我，此作畜我，義通。盧氏必從別

本作遇我亦失之拘矣。

翟竄國也。惡見此臺也。退讓、

樾謹按見當作尋。古得字也。與見相似。往往致譌。史記趙世家。踰年歷歲。未得一城。趙策得作見。亦尋字之譌。

文王有志爲臺。令近境之民間之者。裹糧而至。君道、

樾謹按民間之者。民自聞之也。非文王令之聞之也。於義殊不可通。潭本作令近規之。民間之者。響裹而至。吉府本同。據此則當於規之絕句。近乃匠字之誤。干祿字書所載。如匠作迺。匹作迺。匠作迺。陋作陋。凡從匚之字。每變而爲辵。然則匠之誤作近。亦猶是矣。此言文王有志爲臺。令匠氏規度之。而民之聞之者。已裹糧而至矣。詩曰。經始靈臺。經之營之。此卽所謂令匠規之者。蓋古詩說也。因匠誤作近。遂改規字爲境字以合之。其句讀舛。而義亦全失矣。

榆缺陂。雜芷若。蚩虱視。益口笑。勸學、

樾謹按此皆以三字爲句。榆缺陂。未詳。疑榆字讀若司馬相如傳榆紵縞之揄。揄之言引也。陂乃輶段字。此句蓋言衣服之美耳。雜芷若者。芷若皆香草也。列子周穆王篇。雜芷若以滿之。正以雜芷若連文。故知此當以三字爲句也。蚩虱視。義不可通。蚩疑望之段字。虱則風之誤字。言望風而視也。益口笑者。

益讀爲翳。堯典之益。秦本紀作翳。是其例也。方言曰。翳。掩也。翳口笑。卽掩口笑也。此數句。惟第一句之義。尙當闕疑。以下三句。皆明白矣。盧校本疑榆缺卽陝輪。因以榆缺陝雜爲句。芷若蜚虱爲句。無理殊甚。不可從也。

昔者南榮跖醜聖道之忘乎己。

樾謹按忘當爲亡。亡乎己者。不在乎己也。古人謂不在爲亡。禮記祭法篇。諸侯在其地則祭之。亡其地則不祭。荀子正論篇。然則鬪與不鬪邪。亡於辱之與不辱也。乃在於惡之與不惡也。正名篇。故治亂在於心之所可。亡於情之所欲。淮南子原道篇。聖亡乎治人。而在於得道。樂亡於富貴。而在於得和。諸書並以亡與在對。是亡猶不在也。後人不達亡字之義。加心作忘。轉不可通矣。

鏡儀而居。道術。

樾謹按儀讀爲俄。詩賓之初筵篇。側弁之俄。傳曰。俄。傾貌。廣雅釋詁曰。俄。衺也。凡人置鏡必稍傾衺之。然後可以自鑒。故曰鏡俄而居也。

反友爲齒。

樾謹按齒字無攷。說文齒部。齒。缺齒也。讀若權。疑卽此字。蓋相齟齬之意。放理潔靜謂之行。反行爲汗。

樾謹按隱三年左傳服注曰水不流謂之汙字亦作滂一切經音義八引三蒼曰停水曰滂是汙爲停積之水故反行爲汙也。

行歸而過謂之順。

樾謹按過當作和古書和字或以𠩺爲之淮南子說山篇𠩺氏之壁高誘注曰𠩺古和字是也賈子原文本作𠩺後人不識因改爲過矣和與順義正相應。

六理無不生也。六術

樾謹按無字絕句言無此六理則不生也。

以與詩書易春秋禮樂六者之術。

樾謹按與乃與字之誤。

是故先王設爲昭穆三廟以禁其亂何爲三廟上室爲昭中室爲穆下室爲孫嗣令子各以其次上下更居。

樾謹按此所謂廟非廟祧之廟也呂氏春秋慎勢篇曰古之王者擇天下之中而立國擇國之中而立宮擇宮之中而立廟是王者所居謂之廟也此三廟卽所謂三寢莊三十二年公羊傳何休注曰天子諸侯皆有三寢一曰高寢二曰路寢三曰小寢父居高寢子居路寢孫從王父母妻從夫寢夫人居小

寢其說略同。而謂孫從王父母。似不若此書所說之善矣。  
數加於少而度出於居。

樾謹按此本作數加於少而度出於小。言數之多者由少而加。度之大者從小而出也。下文曰。數度之始。始於微細。有形之物。莫細於豪。是故立一豪以爲度始。此正度出於小之證。建本作數加於小。蓋卽下句之小字。誤移至上句耳。於是下句遂不得其字。妄加居字以足句。校者雖知上句之當作少。而不知移小字於下句。則終無以得其義也。

德生理。通之以六德之畢離狀。六德者。德之有六理。理離狀也。道德說。

樾謹按盧校本改畢作華。而說以周官彤方氏華離之地。恐未足據。其於離字絕句。尤誤。據下文。故曰如膏謂之德。德生理。通之以六德之畢離狀。則狀字當屬上讀。此云理離狀也。亦離狀連文。不得於離字絕句。明矣。理離狀卽畢離狀。蓋畢誤作里。又誤作理耳。  
未變者道之頌也。

樾謹按未字乃夫字之誤。

易者察人之精德之理與弗循。而占其吉凶。

樾謹按精乃循字之誤。察人之循德之理與弗循十字爲句。下文云。春秋者。守往事之合德之理與不

合句法與此一律。因循字誤作精。盧校遂於弗字絕句。下句亦讀至不字絕句。殊失之矣。

故國以爲力。君以爲力。吏以爲力。大政上。

樾謹按。此下有闕文。以上文例之可見。

知善而弗行。謂之不明。知惡而弗改。必受天殃。

樾謹按。謂之不明句。當在知惡而弗改下。

至於子孫而衰。則士民皆曰。何君子之道衰也。數也。

樾謹按。衰也當作衰之。此云何君子之道衰之數也。下云何天誅之遲也。兩文相對。數之言促速也。禮記曾子問篇。不知其己之遲數。鄭注曰。數讀爲速。此以數與遲對。正與彼同。亦當讀爲速。下文曰。故堯舜禹湯之治天下也。所謂明君也。士民樂之。皆卽位百年然後崩。士民猶以爲大數也。桀紂所謂暴亂之君也。士民苦之。皆卽位數十年而滅。士民猶以爲大久也。久數對文。可知數字之義。卽可證此句之誤。

故爲人君者。其出令也。其如聲。士民學之。其如響。曲折而從君。其如景矣。

樾謹按。曲折而從君。上有闕文。當有如形一喻。然後如景句乃有所承。蓋聲響一喻。形景一喻。不可并而爲一。下文曰。君鄉善於此。則佚佚然協民皆鄉善於彼矣。猶景之象形也。君爲惡於此。則惇惇然協

民皆爲惡於彼矣。猶響之應聲也。以後證前。知此文將言如景。必先言如形。其有闕文明矣。信道而不爲國家必空。大政下。

樾謹按信疑倍字之誤。

故苟上好之。其下必化之。此道之政也。

樾謹按此道之政也。文不可通。當作此道之謂也。傳寫誤耳。上文云。故勸之其上者。由其下而上。暗矣。此道之謂也。與此文法一律。

故國也者。行之綱。然後國臧也。

樾謹按行下本有政字。上云。臣忠君明。此之謂政之綱也。此云故國也者。行政之綱。然後國臧也。兩文相承。今奪政字。則文不成義矣。

故古聖王君子不素距人。以此爲明察也。國之治政在諸侯大夫。士察之理在其與徒。

樾謹按察也二字。誤倒。侯字衍文。士察二字亦誤倒。本云。故古聖王君子不素距人。以此爲明也。察國之治。句。政在諸大夫。察士之理。在其與徒。下文云。君必擇其臣。卽所謂察國之治政在諸大夫也。惟國之治在諸大夫。故君必擇其臣也。又云。臣必擇其所與。卽所謂察士之理在其與徒也。惟士之理在其與徒。故臣必擇其所與也。舊校本作察國之治。在夫諸侯。察士之理。在其與徒。下句得之。上句猶未得。

又按上句所謂政在諸大夫者。此政非政令之政。乃是語詞。猶言正在於此也。下文政有命國無君也。政有命國無吏也。政有命國無人也。又云。故政謂此國無君也。故政謂此國無吏也。故政謂此國無人也。諸政字並同。論語述而篇。正唯弟子不能學也。卽此文政字。

分人而不譚者。其惟道矣。脩政語。

樾謹按譚讀爲劓。說文刀部。劓。滅也。字或作搏。管子五輔篇。整齊搏誦。以避刑戮。又或作縛。荀子不苟篇。不能則恭敬縛紕以畏人。搏。謂縛紕。並卽劓滅之義。而引申之。字異而義同也。分人而不譚者。謂雖分以與人。而其數不爲之減也。盧解以譚沓釋之。則與分人之義不相應矣。吉府本譚字下注云音搏。故播之於天下而不忘者。其惟道矣。

樾謹按忘讀爲亡。太元交次四。往來熏熏。得亡之門。范望注曰。亡猶絕也。播之於天下而不亡。謂播之於天下而不絕也。詩有女同車篇。德音不忘。謂德音不絕也。國語周語。令聞不忘。謂令聞不絕也。其義並同。若以本字讀之。則胥失之矣。

學黃帝之道而賞之。

樾謹按賞讀爲償。廣雅釋言。償。復也。

帝嚳曰。緣道者之辭而與爲道已。緣巧者之事而學爲巧已。行仁者之操而與爲仁已。故節仁之器以脩



其躬而身專其美矣。故士緣黃帝之道而明之。學帝顓頊之道而行之。而天下亦平矣。帝譽曰。德莫高於博愛人。而政莫高於博利人。故政莫大於信。治莫大於仁。吾慎此而已矣。

樾謹按。故士緣黃帝之道。至天下亦平矣。二十五字。皆衍文也。上文載帝顓頊之言云。故上緣黃帝之道而行之。學黃帝之道而賞之。加而弗損。天下亦平矣。此文涉彼而衍。又改下句黃帝爲顓頊。以實其爲帝譽之言。盧氏校親疏。危亂篇云。傭書小人。唯欲篇幅稍溢。利多得金。其知言乎。困學紀聞卷二引此書曰。帝譽曰。緣巧者之事。而學爲巧。行仁者之操。而與爲仁也。故節仁之器。以脩其財。而身專其美矣。德莫高於博愛人。而政莫高於博利人。故政莫大於信。治莫大於仁。吾慎此而已矣。是王厚齋所見本。無此數語。且兩條合爲一條。亦無下帝譽曰三字也。或疑王氏所引不備。未足爲據。則固不然。如下文有兩湯曰。王氏引之。則云湯曰。又曰。未嘗并爲一談也。若此有兩帝譽曰。則亦當云帝譽曰。又曰。何以并而一之乎。

故吾詳取之以敬也。

樾謹按。困學記聞引此無詳字。當據刪。

粥子曰。唯攻守而勝乎同器。脩政語下、

樾謹按。盧校別本作戰乎。當從之。上文周武王問守而必存。攻而必得。戰而必勝。則吾爲此奈何。故粥

子告以攻守戰三者同器也。攻守而戰乎。猶大政上篇云。明君而君子乎。賈子自有此文法。言攻守與戰也。三者並舉。以而字連屬之。又用乎字爲語詞耳。上下文弼子之對並曰唯疑。此文唯下亦當有疑字。

上下之人等其志矣。

樾謹按禮記樂記篇。然後立之樂等。鄭注曰。等。差也。周官司勳職。以等其功。鄭注曰。等。猶差也。然則等其志矣。謂其志有等差也。與上文賢不肖之人別其行矣一義。非齊等之謂。

賓禮贈賄同。是禮而從。禮容語下。

樾謹按是當爲視。釋名釋姿容曰。視是也。視與是義本相通。故古書或段是爲視。荀子解蔽篇是其庭可以搏鼠。楊倞注曰。是蓋當爲視。此其證也。國語周語載此事曰。賓禮贈餼。視其上而從之。此言是彼言視。文異而義同矣。

命者制令也。基者經也。勢也。

樾謹按制令當爲制度。蓋訓命爲制度。訓基爲經。故下文曰。經制度。卽釋基命之義。後人不達其意。疑命當訓令。遂改爲制令。然詔令稱制。三代未聞。制令二字。義不相連。賈子述叔向之言。不當以制令連文也。至基之訓勢。未聞其義。直當爲衍文耳。

太宰持斗而御戶右。胎教。

樾謹按斗大戴記保傳篇作升。盧辯注曰。升所以斟。孔氏廣森補注。以士冠禮注勺尊升所以斟酒說之。然穆天子傳。佐者承斗而哭。郭璞注曰。斗。斟水杓也。御覽七百六十二引通俗文曰。木瓢爲斗。則斗亦未始不可以斟。盧氏所據大戴記。其作升作斗未可知也。且下文云。荷斗而不敢煎調。則並非斟酒之物。孔氏謂持升卽持勺。義亦未安。今按斗與豆音近而易誤。考工記梓人一獻而三酬。則一豆矣。鄭注曰。豆當爲斗。又云。飲一豆酒。注曰。一豆酒又聲之誤。當爲斗。並其證也。疑此文本作太宰持豆而御戶右。詩生民篇。卽盛于豆。毛傳曰。木曰豆。豆薦菹醢也。大戴記曾子事父母篇。執觴觶杯豆而不醉。盧注曰。豆。醬器。則與下文不敢煎調。文義正合。因豆斗聲近而誤。豆爲斗。又因斗升形似而誤。斗爲升。均非本字耳。

也。正之禮者王太子。無羞臣領臣之子也。故謂領臣之子也。身朝王者妻朝后之子。朝王太子。是謂臣之子也。

樾謹按羞臣領三字。及故謂領臣之子也七字。並疑衍文。此本云。正之禮者王太子。句。無臣之子也。身朝王者妻朝后。句。之子。朝王太子。句。是謂臣之子也。蓋以上文所說諸禮。惟王太子得行之。人臣之子皆無是也。故曰正之禮者王太子。無臣之子也。正之禮者。猶云正其禮者之猶其也。呂氏春秋音初篇。

之子是必大吉。高誘訓之爲其是也。此下云云。又申說臣之子之義。謂其身朝王者。其妻必朝后。其子必朝王太子。是乃所謂臣之子也。因多衍字。故文譌難讀耳。

威王以齊彊於天下。而簡公以殺於檀臺。

樾謹按威王在簡公之後。不應先言威王之彊。而後言簡公之殺。與上下文皆不一律矣。大戴記文與此同。惟說苑尊賢篇作威王以齊強於天下。而湣王以弑死於廟梁。則與上下文一律。或賈子原文也。無宜治之民。

樾謹按上云無常安之國。則此當云無恆治之民。恆與宜相似而誤。說苑尊賢篇正作恆字。當據訂正。使天下之俗。失明尊敬而不讓。立後義

樾謹按俗字絕句。明疑所字之誤。失所尊敬而不讓七字爲句。盧校於失字絕句。而解明尊敬爲明知所當尊敬。義未安也。吉府本作失開尊敬。尤誤。

# 諸子平議卷二十九

## 淮南內篇一

神與化游以撫四方原道、

樾謹按撫讀爲撫說文巾部。撫覆也。古書或以撫爲之。荀子宥坐篇。勇力撫世。守之以怯。楊倞注曰。撫掩也。掩卽覆也。此云以撫四方。猶言以覆四方。上文云。舒之幙於六合。高誘注曰。幙覆也。幙幙同義。作撫者段字耳。高注撫安也。失之。

神託於秋豪之末而大宇宙之總

樾謹按大下疑脫於字。謂神雖託於秋豪之末而視宇宙之總合更大也。今脫於字。文義未明。

遂兮洞兮

樾謹按遂讀爲邃。離騷經。閨中既邃遠兮。招魂篇。高堂邃宇。王逸注並曰。邃深也。洞亦深也。文選西京賦。赴洞穴。薛綜注曰。洞穴深且通也。是洞有通義。亦有深義。遂兮洞兮。皆言其深也。方輿上句幽兮冥兮。意義相稱。高注曰。洞達也。非是。

扶搖猗抱羊角而上

樾謹按此當作扞扶搖抱羊角而上。讀者因淮南書多以扞抱連文。高氏此注又曰扞抱引戾也。故移扞字於下。使扞抱連文以合於高注。不知高注自總釋二字之義耳。非正文必相連也。扶搖也。羊角也。皆風也。莊子逍搖遊篇搏扶搖而上者九萬里。釋文引司馬云上行風謂之扶搖。又曰搏扶搖羊角而上者九萬里。司馬云風曲上行若羊角是其義也。扞扶搖抱羊角而上。猶云搏扶搖羊角而上。今作扶搖扞抱羊角。則義不可通矣。

執道要之柄而游於無窮之地。

樾謹按既言要又言柄。於義未安。當作執道之柄而游於無窮之地。文子道原篇作執道之要。觀無窮之地也。彼言要此言柄。彼言觀此言游。文異而義同。後人據文子以讀此文。遂有改柄爲要者。傳寫兩存其字。又誤入上文耳。又按地下亦當有也字。蓋此是答問之辭。若無也字。則與上文何也不相應矣。當據文子補。

人生而靜。天之性也。感而後動。性之害也。

樾謹按害乃容字之誤。禮記樂記作性之欲也。欲亦容字之誤。史記樂書作性之頌也。徐廣曰。頌音容。蓋古本樂記字本作容。故徐廣讀頌爲容也。靜性爲韻。動容爲韻。作欲作害。則皆失其韻矣。且上言動。下言容。容亦動也。說文手部。容。動容也。容卽容之段字。亦或作溶。韓子揚摧篇曰。動之溶之。是也。感而

後動。卽是性之動。故曰性之容也。作欲作害。則皆失其義矣。史記作頌者。頌與容古通用字。若是欲字害字。則史記無緣誤作頌。徐廣又何據而讀爲容乎。故知此與禮記並誤也。說詳羣經平議。是故鞭噬狗策驪馬而欲教之。雖伊尹造父弗能化。

樾謹按伊尹不聞以善御名。何得與造父並稱。伊尹疑當作尹儒。呂氏春秋博志篇。尹儒學御三年。夢受秋駕於其師。卽其人也。傳寫脫儒字。後人臆補伊字於尹字之上耳。道應篇作尹需。

夫井魚不可與語大。拘於隘也。夏蟲不可與語寒。篤於時也。曲士不可與語至道。拘於俗束於教也。

樾謹按大字泛而無指。義不可通。疑本作夫井魚不可與語大海。拘於隘也。夏蟲不可與語寒雪。篤於時也。曲士不可與語至道。拘於俗束於教也。曰大海曰寒雪曰至道。皆二字爲文。與莊子秋水篇不同。彼云井醴不可以語於海者。拘於虛也。夏蟲不可以語於冰者。篤於時也。曲士不可以語於道者。束於教也。曰海曰冰曰道。皆一字爲文。古人屬辭必相稱如此。高注於次句曰。言蟬蛭不知寒雪也。則其所據本正有雪字。若正文但言寒不言雪。則高注何以橫加雪字乎。卽謂增字以足句。何不據莊子加冰字。而必加雪字乎。此句既有雪字。則上句亦有海字可知。不然。次句曰語寒雪。三句曰語至道。而首句獨曰語大。文不相稱。且寒以雪言。至以道言。大以何物言乎。文又不備矣。梁張綰文曰。井魚之不識巨海。夏蟲之不見冬冰。巨海卽大海也。

藏於不敢。

樾謹按文子道原篇作藏於不取。當從之。卽所謂百姓足君孰與不足也。取與敢形似而誤。

授萬物而無所前後。

樾謹按授上當有稟字。上文曰。稟授無形。又曰。布施稟授而不益貧。下文曰。稟授於外而以自飾也。並以稟授連文。是其證也。文子道原篇作稟授萬物而無所先後。當據補。

味者甘立而五味亭矣。

樾謹按說文高部。亭。民所安定也。是亭有定義。故文選謝靈運初去郡詩注引蒼頡曰。亭。定也。亦通作停。釋名釋言語曰。停。定也。定於所在也。五味亭矣。猶曰五味定矣。文子道原篇字正作定。可證也。高注曰。亭。成也。於義轉迂。

憂悲者德之失也。

樾謹按上云。喜怒者道之邪也。下云。好憎者心之過也。喜之與怒。好之與憎。皆二字相反。此云憂悲。則非其義矣。憂悲當作憂樂。下文云。心不憂樂。德之至也。卽承此文而言。精神篇曰。夫悲樂者。德之邪也。與此文異義同。悲卽憂也。當由別本從彼作悲樂。而傳寫謬合之。轉脫樂字耳。

豈必處京臺章華。



樾謹按京臺卽強臺也。戰國策魏策楚王登強臺而望崩山是也。強字籀文作疆。從彊得聲。與京聲相近。靈或作𧈧。𧈧或作鯨。皆其例也。故強臺亦稱京臺矣。強臺見道應篇。而文選應璩與滿寵書注引作京臺。此京臺卽強臺之明證。

此其爲樂也。炎炎赫赫。恍然若有所誘慕。

樾謹按高注曰。恍然猶惕然。此說非也。下文解車休馬。罷酒徹樂之後。方云忽然若有所喪。悵然若有所亡。則此時不得遽云惕然也。若已惕然。又何樂之有乎。恍當讀爲誑。說文言部。誑。誘也。下言有所誘慕。故上言誑然。義正相應。作恍者。段字耳。

夫內不開於中而強學問者。不入於耳而不著於心。

樾謹按不入於耳。句衍不字。言雖入耳而不著於心也。不字涉上下句而誤衍。

此齊民之所爲形植。黎累憂悲而不得志也。

樾謹按王氏念孫據文選江淹上建平王書注。訂黎累爲黎黑。是也。惟未說植字之義。植當讀爲殖。管子地員篇五殖之狀。甚澤以疏。離圻以臞瘠。是殖有臞瘠之義。形殖謂形體臞瘠也。蓋卽從脂膏殖敗之義而引申之耳。

今夫狂者之不能避水火之難。而越溝瀆之險者。

樾謹按不能當作能不傳寫誤倒。

夫精神氣志者靜而日充者以壯躁而日耗者以老。

樾謹按下兩者字皆衍文日充以壯日耗以老猶言日充而壯日耗而老也。有者字則文不成義。文子九守篇正無兩者字。

一範人之形而猶喜傲異。

樾謹按範卽犯之段字。周易繫辭傳。範圍天地之化而不過。釋文曰。範圍馬王肅張作犯違。是範犯古字通也。莊子大宗師篇正作特犯人之形而猶喜之。又曰。今一犯人之形而曰人耳。耳皆其證也。高注曰。範猶遇也。遭也。此說得之。郭象注莊子曰。人形乃是萬化之一遇耳。是亦以遇釋犯也。高注又曰。一說範法也。言物一法效人形而猶喜也。則望文生訓。失之泥矣。

其道可以大美興而難以算計舉也。

樾謹按美當作筴。隸書筴字也。史記五帝紀。迎日推筴。晉灼曰。筴。數也。是大筴卽大數也。興亦舉也。言止可以大數舉也。筴與美形似而誤。大戴記易本命篇。此乾坤之筴。盧辯注曰。三百六十。乾坤之筴。而今正文筴字亦誤作美。是其證也。高注曰。言天地萬物。但可以大美興而育之。是其所據本已誤。中徙倚無形之域。而和以天地者乎。

樾謹按和以天地義不可通。地疑倪字之誤。莊子齊物論篇曰和之以天倪。休于天鈞而不礪。

樾謹按高注曰礪敗也。天鈞北極之地。積寒之野。休之輒敗。唯體道能不敗也。此說天鈞之義殊爲無據。莊子齊物論篇曰是以聖人和之以是非而休乎天鈞。郭象注曰莫之偏任故付之自均而止也。釋文引崔譔曰鈞陶鈞也。淮南休乎天鈞之文即本莊子義亦當與彼同。謂休乎自然之陶鈞故不敗也。他書無以積寒之地爲天鈞者足徵高注之非矣。

其所居神者臺簡以游太清。

樾謹按高注曰臺猶持也。以持訓臺蓋以聲爲訓。釋名釋宮室曰臺持也。築土堅高能自勝持也是其證也。方言曰臺支也。支與持義同。錢氏坫謂臺當作臺古文握字。然臺之訓持自是古訓不必疑其字誤也。莊子庚桑楚篇曰靈臺者有持而不知其所持而不可持者也。是亦以臺爲持。故釋文曰靈臺謂心有靈智能任持也。然則臺簡即持簡猶靈臺即靈持矣。

譬若周雲之龍從遼巢彭澤而爲雨。

樾謹按高注曰周雲密雨雲也。然密雨之雲謂之周雲甚爲未安。殆失之矣。周當讀爲朝。詩汝墳篇。愬如調飢。毛傳曰調朝也。周之爲朝猶調之爲朝也。朝雲爲雨。即詩所謂朝隤于西。崇朝其雨也。鄭箋云。

朝有升氣於西方。終其朝則雨。氣應自然。升氣卽雲也。文選高唐賦。王問玉曰。此何氣也。玉對曰。所謂朝雲者也。卽可說此周雲之義。

芒然仿佯于塵埃之外。而消搖于無事之業。

樾謹按廣雅釋詁。業。始也。無事之業。謂無事之始也。文子精神篇作無事之際。乃淺人不得其義而臆改。九守篇亦作無事之業。

華藻鍾鮮。

樾謹按高注曰。華藻。華文也。鍾。今之金尊也。鮮。明好也。此說於鍾字之義未得。鍾。鮮。連文。若是金尊。則與鮮字不屬矣。陳氏壽祺左海經辨說。以說文金部之鍾。鱗。謂鮮當爲鱗。然鍾。鱗。自是鐘上橫木之飾。此言犧尊。非所施也。今按鍾從尊聲。尊猶敷也。謂以金敷布其上也。古者以金飾物。謂之鍾。史記禮書注金薄瑤龍。索隱引劉氏曰。薄。猶飾也。薄。卽鍾之段字也。鮮。讀爲獻。禮記月令篇。天子乃鮮羔開冰。注曰。鮮當爲獻。是其證也。明堂位篇。周獻豆。注曰。獻。疏刻之。然則鍾。獻。謂疏刻而以金飾之也。畫爲華藻之形。疏刻而金飾之。是爲華藻鍾獻。

不知耳目之宣。而遊于精神之和。

樾謹按宣當作宜。字之誤也。莊子德充符篇。夫若然者。且不知耳目之所宜。而遊心乎德之和。卽淮南

所本文子精誠篇作知九竅四肢之宜而游乎精神之和字正作宜但知上脫不字耳

夫世之所以喪性命有衰漸以然所由來久矣

樾謹按衰乃等衰之衰上文自伏羲氏而歷數之以至于周室之衰每降而愈下故曰有衰漸以然與其有說也不若尙羊物之終始也而條達有無之際

樾謹按終始下衍也字不若尙羊物之終始而條達有無之際兩句一氣相屬今衍也字則文義隔絕矣

人莫鑑於流沫而鑑於止水者以其靜也

樾謹按高注曰沫雨潦上沫起覆甌也又說山篇人莫鑑于沫雨而鑑于澄水者以其休止不蕩也注曰沫雨雨潦上覆瓮也沫雨或作流潦今按此當以流潦爲正流潦卽行潦也詩洞酌篇毛傳曰行潦流潦也孟子公孫丑篇趙注曰行潦道旁流潦也是其義也流潦與止水正相對爲文莊子德充符篇人莫鑑於流水而鑑於止水流潦猶流水也文子九守篇亦作流潦可知古本如此矣高本作流沫者疑流泉之誤隸書泉字或作源楊君石門頌平阿源泥是也古本作流潦別本作流泉義初不異源與沫相似因誤爲沫矣高據誤本作注而以雨潦上沫起覆甌說之蓋謂是水中浮漚耳其說迂曲而說山篇之沫雨則又涉高注而誤因高注沫雨二字相連淺人妄謂是舉正文而釋之遂改正文流沫作

沫雨。又於注文雨下加雨字。以從既改之正文。斯爲謬矣。王氏念孫謂當作流雨。流雨之文。殊不成義。不可從也。文選江賦注引作流藥。藥卽說文泉部斲字之異文。許君云。泉水也。此正可爲別本作流泉之證。

莫窺形於生鐵。而窺於明鏡者。以觀其易也。

樾謹按太平御覽服用部方術部引此文。並無觀字。是觀爲衍文。以其易也。與上句以其靜也。正相對。惟易字於義無取。疑明字之誤。明字從日從月。而易字據說文引祕書說日月爲易。象陰陽也。則亦從日從月。故明誤爲易耳。

能有名譽者。必無以趨行求者也。

樾謹按趨乃越字之誤。越之言逸也。躡也。越行猶言過行也。謂不以過甚之行求名譽也。文子九守篇作能有名譽者。必不以越行求之。是其證。

勢利不能誘也。辯者不者說也。聲色不能淫也。美者不能濫也。智者不能動也。勇者不能恐也。

樾謹按聲色句移在辯者句前。則勢利聲色以類相從。辯者美者智者勇者。亦以類相從矣。文子九守篇正如此。可據以訂正。

夫化生者不死。而化物者不化。

櫨謹按化生當作生生。涉下句而誤。精神篇曰：故生生者未嘗死也。其所生則死矣。化物者未嘗化也。其所化則化矣。是其證也。

橫扁天地之閒而不窅。

櫨謹按高注曰：扁猶閉也。則與橫字之義不貫矣。儀禮士冠禮鄭注曰：扁所以扛鼎。考工記匠人注曰：大局，牛鼎之局，長三尺。小局，腳鼎之局，長二尺。是局者橫木以扛鼎者也。宣十二年左傳服注曰：局，橫木校輪閒。一曰：車前橫木也。是凡橫木皆謂之局。故以橫扁並言。

蚤蟲嚼膚而知不能平。

櫨謹按知猶志也。禮記緇衣篇：爲上可望而知也。爲下可述而志也。鄭注曰：志猶知也。是知與志義通。知不能平者，平，定也。謂志不能定也。與上句蜂蟄螫指而神不能澹。高注曰：澹，定也。義正一律。太平御覽蟲豸部引作性不能平。恐後人不達知字之義而臆改。未足爲據。王氏念孫謂性猶體也。此恐不然。神也志也。皆就在內者而言。故下文曰：夫憂患之來，攫人心也。直蜂蟄之螫毒而蚤蟲之慘怛也。言攫人心不言攫人體。則此不當以體言矣。

雖欲勿稟，其可得邪？

櫨謹按國語晉語：將稟命焉。楚語：是無所稟命也。韋注並曰：稟，受也。此言萬物之來，擢拔吾性，攬取吾

情。吾雖欲勿受之。而不可得也。高注曰。稟猶動用也。於辭意未合。且稟字亦無動用之義。

東北曰變天。天文。

樾謹按周易說卦傳。艮東北之卦也。萬物之所成終而成始也。正義曰。東北在寅丑之間。丑爲前歲之末。寅爲後歲之初。則是萬物之所成終而所成始也。東北變天之義。亦取諸此。以其居終始之交。故以變名。高注以萬物萌芽說之。尙未盡變字之義。

景風至。則爵有位。賞有功。

樾謹按既云有位。又何爵焉。爵有位之文。殊不可通。位疑德字之誤。有德有功。相對爲文。草書德字作位。與位相似。故德誤爲位耳。白虎通義八風篇。正作爵有德封有功。可據以訂正。

何謂五官。東方爲田。南方爲司馬。西方爲理。北方爲司空。中央爲都。

樾謹按都上疑脫官字。官都者。官之都總也。蓋以二字爲官名。管子問篇曰。問五官有度制。官都其有常斷。今事之稽也。何待。此五官有官都之塙證。又揆度篇云。自言能爲司馬。不能爲司馬者。殺其身以釁其鼓。自言能治田土。不能治田土者。殺其身以釁其社。自言能爲官。不能爲官者。剗以爲門父。故無敢姦能誣祿。至於君者矣。故相任寅爲官都。按司馬及治田土。卽此東方南方之官也。然則官都亦卽此五官之一矣。



太微者太一之庭也。

樾謹按下文曰紫宮者太一之居也。然則太一自在紫宮。不在太微。此太一乃天子二字之誤。太平御覽引天官星占曰紫宮太一坐也。太微之宮。天子之庭。五帝之坐也。是其明證。

天阿者羣神之闕也。

樾謹按高注曰闕猶門也。然開元占經甘氏中官占引甘氏曰天阿一星在昴西。以察山林之妖變也。則非門闕之謂。北堂書鈔太平御覽引此。並作天河。然天河非星也。徧考書傳無以天河爲星名者。今按天河當作兩河。史記天官書曰鉞北北河。南南河。兩河天闕。是其證也。天字篆文作𠂔。與兩字相似。故兩誤爲天矣。

日冬至則水從之。日夏至則火從之。故五月火正而水漏。十一月水正而陰勝。

樾謹按此文有錯誤。冬至水王。夏至火王。豈得但曰水從之火從之一也。火正與水漏有二義。水正與陰勝則止一義耳。兩文不稱二也。且連下文讀之曰陽氣爲火。陰氣爲水。水勝故夏至溼。火勝故冬至燥。夫冬至水從之。夏至火從之。則夏至何以溼。冬至何以燥乎。前後不相應。三也。今按日冬至則水從之。日夏至則火從之。水火二字當互易。冬至一陽生。故日冬至而火從之也。夏至一陰生。故日夏至而水從之也。五月火正而水漏。正說夏至水從之之義。言五月火方用事。而水氣已滲漏也。十一月水正

而陰勝陰乃火字之誤。勝字當讀爲升。勝升古通用。謂十一月水方用事。而火氣已上升也。正說冬至火從之之義。如此則與下文一貫矣。

二陰一陽成氣二。二陽一陰成氣三。

樾謹按陽之數以三而奇。陰之數以二而偶。所謂參天兩地也。周書武順篇曰。男生而成三。女生而成兩。是其義也。二陰一陽。則二二如四。一三如三。其數七。除五生數。則得成數二。所謂二陰一陽成氣二也。二陽一陰。則二二如六。一二如二。其數八。除五生數。則得成數三。所謂二陽一陰成氣三也。高注未得其解。此陰陽之數。卽易少陽少陰之數。說詳羣經平議。

以至于仲春二月之夕。乃收其藏而閉其寒。

樾謹按高注曰。收斂其所藏而閉之。然二月非收斂之時。義不可通。太平御覽時序部引作乃布收其藏而閉其寒。引高注作收斂其所藏而出布之。是今本脫布字。然布收連文。義亦未安。收疑斂字之誤。尙書洛誥篇。乃惟孺子頒。說文支部作乃惟孺子斂。是布斂卽布頒。猶言頒布也。上文云。至秋三月。地氣下藏。故至二月乃布頒之也。高氏據誤本作注。後人以布收異義。不得連文。遂以布爲衍字。而削之矣。

太陰治春。則欲行柔惠溫涼。

櫟謹按溫涼異義不得連文涼當作良聲之誤也

南方曰巨風地形

櫟謹按巨乃豈之壞字豈讀爲愷高注云一曰愷風愷正字豈借字巨誤字耳說詳呂氏春秋其高萬一千里百一十四步二尺六寸

櫟謹按萬一千里言城之高則百一十四步二尺六寸當言城之厚然其數奇零疑有脫誤旁有四百四十門門間四里里間九純純丈五尺

櫟謹按門間四里言每門相距之數也里間九純義不可通疑本作門九純言門之廣也門誤爲閒後人遂妄加里字耳

自東北方曰大澤曰無通

櫟謹按此當作自東北方曰無通曰大澤方與下文東方曰大渚曰少海東南方曰具區曰元澤南方曰大夢曰浩澤西南方曰渚資曰丹澤西方曰九區曰泉澤西北方曰大夏曰海澤北方曰大冥曰寒澤文義一律蓋無通也大渚也具區也大夢也渚資也九區也大夏也大冥也所謂八殯也大澤也少海也元澤也浩澤也丹澤也泉澤也海澤也寒澤也所謂八澤也故下文總之曰凡八殯八澤之雲是雨九州今無通大澤傳寫誤倒則先澤而後殯與下不一律矣高注大澤無通皆數名也本作無通藪

名也。蓋無通是數。大澤是澤。澤名已顯。故不必注。數名未顯。故必注之。因無通大澤傳寫誤倒。遂增大澤於無通之上。而以爲皆數名矣。其注少海曰。東方多水。故曰少海。亦澤名也。上注無澤名之文。而此云亦者。亦大澤也。大澤是澤名。少海亦是澤名。特因東方多水。故從大稱而曰海耳。實亦澤也。故言亦也。卽此可見大澤與少海同所八澤之數。然則大澤不應在無通之上。其證一矣。下文浩澤注曰。浩亦大也。上注無大文。而此云亦者。亦大澤也。大澤以大得名。浩澤亦以大得名。故言亦也。卽此可見大澤與浩澤同在八澤之數。然則大澤不應在無通之上。其證二矣。

是故堅土人剛。弱土人肥。

樾謹按下文壘土人大。沙土人細。息土人美。耗土人醜。大與細對。美與醜對。剛與肥則不對矣。肥當作脆。廣雅釋詁。脆。弱也。脆卽脆之俗體。堅土人剛。弱土人脆。正相對成義。家語執轡篇。作堅土之人剛。弱土之人柔。柔亦脆也。

食土者無心而慧。

樾謹按高注曰。蚯蚓之屬是也。然蚯蚓之屬。何慧之有。大戴記易本命篇。作無心而不息。盧辨注曰。蚯蚓之屬。不氣息也。此文慧字。疑亦不息二字之誤。

其人面未僂修頸。

樾謹按高注曰未猶脊也。然則未僂者謂其脊句僂也。末上不當有面字。疑是衍文。又按莊子外物篇末僂而後耳。釋文引李云末上謂頭前也。蓋訓末爲上。又以上爲頭。故以末僂爲頭前。此說末字之義較合。說文木部木上爲末。故人亦以上爲末矣。

汶出弗其流合於濟。

樾謹按說文水部汶水出琅瑯朱虛東泰山東入濰。又曰桑欽說汶水出泰山萊蕪西南入沔。是汶水有二一入濰一入沔。沔卽濟也。高注曰弗其山在北海朱虛縣東。是誤以入濰之汶說入濟之汶。王氏讀書雜誌已辯正矣。惟弗其之名未能塙指。漢書地理志曰泰山郡萊蕪有原山。禹貢汶水出西南入沔。今原山在山東泰安府萊蕪縣東北七十里。亦名馬耳山。弗其二字疑卽馬耳之誤。弗與馬其與耳字形皆相似。

𧈧生海人。

樾謹按下文又曰凡𧈧者生於𧈧人。兩𧈧字皆𧈧字之誤。史記司馬相如傳躬腩胝無𧈧。韋昭曰𧈧戚中小毛也。漢書相如傳注引孟康曰𧈧𧈧膚皮也。然則凡𧈧者生於𧈧人。與下凡羽者生於𧈧鳥。凡毛者生於𧈧獸。凡鱗者生於𧈧魚。凡介者生於𧈧龜。一律人以𧈧言。猶鳥獸魚龜以羽毛鱗介言也。其字本從肉。傳寫誤從穴。後人以從穴之字多上形下聲。因變爲𧈧矣。管子侈靡篇有𧈧字。卽寫字之誤。墨

子備城門篇有鱗字。卽寶字之誤。說見本書。彼蓋先誤穴爲肉。後人以從肉之字多左形右聲。因變爲鴈爲鱗。與此正可互證也。道藏本作凡容者生於庶人。則與窆生海人不相應。卽與下文羽毛鱗介不一律矣。又按窆生海人。窆下脫一字。說詳下條。

介鱗生蛟龍。

樾謹按蛟龍乃鱗蟲。非介蟲也。不當兼言介。上文羽嘉生飛龍。毛犢生應龍。下文介潭生先龍。曰羽嘉曰毛犢曰介潭。是羽毛介各有一字以配之。使成二名。則此文鱗下亦當有一字。傳寫脫去。又涉下文介潭而誤衍介字耳。以此推之。上文窆生海人。窆下亦必脫一字矣。

孟春行夏令。則風雨不時。時則

樾謹按月令作雨水不時。是也。仲春之月始雨水。則孟春之月而雨水。卽爲雨水不時矣。漢太初以後。更改氣名。以雨水爲正月中。則正月雨水不復爲異。於是改雨水不時爲風雨不時。非淮南之舊矣。呂氏春秋孟春紀。亦作風雨不時。並大初以後人所追改。

草木旱落。

樾謹按月令作草木蚤落。呂氏春秋作草木早稿。此旱字卽早字之誤。

令滂人入材章。

械謹按高注曰滂人掌池澤官也。然池澤之官，不聞謂之滂人。高注非也。滂人當作榜人。月令命漁師伐蛟，鄭注曰：「今月令漁師爲榜人。」文選司馬相如子虛賦：「榜人歌。」張揖曰：「榜，船也。」月令曰：「命榜人。」船長也。張所據月令，卽鄭君所謂今月令。船長之義，亦必月令舊說也。淮南書用榜人字，正本月令。高氏以爲掌池澤官，蓋據月令作命澤人納材葦，故云然耳。非榜人之本義也。後人因高注池澤之文，疑榜字從木無義，改榜爲滂，而古義湮矣。

### 大禱祭于公社

械謹按月令作大割祠于公社。割者禱字之誤也。禱之與禱，猶輶之與輶。說文分禱禱爲二字，非是。阮氏積古齋鐘鼎款識所錄無專鼎銘有勛字，釋爲割字。然其文云：「用勛眉壽萬年。」則非割字也。此字當讀爲禱。其左旁乃周字，蓋段周爲禱，而右旁又作刀。翁氏方綱以爲持刀立戈之類。古鐘鼎文往往有之，不足異也。用禱眉壽萬年，卽用禱眉壽萬年也。說詳余所著金石瑣談。月令大割祠之文，甚爲無義。以此鼎文證之，疑本亦作勛。學者不識古文，故誤以爲割字耳。淮南作禱，可證月令之誤。余著羣經平議，未見及此，故於此詳之。

### 奉行夏令泄

械謹按下云：「冬行春令泄，不當重複。」且上文云：「仲春始出，季春大出，則春日發泄，不足爲咎也。」管子幼

官篇作春行夏政闔當從之蓋發泄太過故奄然而息也方言及廣雅並曰奄息也闔與奄通因脫闔字而寫者以泄字補之殊非其義高注曰象盛陽發泄也是其所據本已誤夫下文冬行春令泄高注曰象春氣布散發泄也然則布散發泄自是春氣所固然豈行夏令所致乎卽此可知其非矣直而不爭

樾謹按爭讀爲紆儀禮士喪禮鄭注曰紆屈也江沔之間謂繫收繩索爲紆故此曰繩之爲度也直而不紆

自古及今不可移匡

樾謹按移之言迪也說文是部迪衺行也移亦有衺義禮記玉藻篇手足毋移正義曰移謂靡迪搖動也是其證也匡與輶通說文車部輶車戾也考工記輪雖敝不匡匡卽輶字不移匡言不衺曲也



# 諸子平議卷三十

## 淮南內篇二

陽侯之波逆流而擊覽冥。

樾謹按高注曰陽侯陽陵國侯也。然陽陵自是漢侯國。史記高祖功臣侯表有陽陵侯傳寬是也。高注以說古之陽侯殆失之矣。春秋閔二年齊人遷陽。杜注曰國名正義曰世本無陽國不知何姓。杜世族譜土地名闕不知所在。古之陽侯當卽此陽國之侯。水經沂水南逕陽都縣故城東縣故陽國城是其所在矣。

直偶於人形。

樾謹按偶與寓通言特寄寓於人之形耳。高注曰外直偶與人同形則增出同字矣。觀九鑽一。

樾謹按高注曰九謂九天一龜也。此說迂曲。九一皆以數言也。數始於一而極於九。至十則復爲一矣。素問三部九候論曰天地之至數始於一終於九焉是其義也。故古人之言凡至少者以一言之。如孟子一杯水一鉤金是也。至多者以九言之。如公羊傳叛者九國是也。觀九鑽一。言所觀覽者多而所鑽

聖者少也。精神篇曰：能知一則無一之不知也，不能知一則無一之能知也。是其義，知不能論。

樾謹按：論者知也，說山篇以小明大，以近論遠。高注曰：論，知也。此論字不訓爲知，蓋以正文已有知字故耳。不知正文知字當讀爲智，知不能論，謂智者不能知也。說文心部：愉，欲知之貌。論與愉通。下文曰：心意之論，不足以定是非，論亦知也。

然以掌握之中引類於太極之上，而水火可立致者，陰陽同氣相動也。

樾謹按：高氏注太極之上曰：太極，天地始形之時也。上猶初也。此說殊失其義。周易繫辭傳：易有太極，釋文曰：太極，天也。然則太極之上，言天之上也。上文曰：夫陽燧取火於日，方諸取露於月。此云取類於太極之上，而水火可立致，卽以取火於日，取露於月而言。日月麗乎天，故曰太極之上也。注以爲天地始形之初，則與上義不相屬矣。

其得之乃失之，其失之非乃得之也。

樾謹按：非上脫未始二字，非下衍乃字。本作其失之未始非得之也，故高注曰：自謂得道，乃失道者也。自謂失道，未必不得道也。各依正文爲說耳。文子精神篇曰：其得之也，乃失之也；其失之也，乃得之也。雖用淮南文，然意同而字句固小異矣。不得據彼改此，而轉與高注不合也。

左台若鞭。

樾謹按鞭當讀爲縋。說文糸部。縋交杲也。段氏玉裁曰。謂以杲二股交辯之也。交絲爲辯。交杲爲縋。此云左右若縋。言如杲之交辯也。左右若縋。周旋若環。兩句一律。高以本字讀之。故所列二說皆非。黃雲絡。

樾謹按此當作絡黃雲。方與上下文句法一律。高注曰。黃雲之氣絡其車。正說絡黃雲之義。猶下注曰。白螭導在於前。是說正文前白螭之義。奔蛇騰蛇也。從在於後。是說正文後奔蛇之義。非正文作白螭前奔蛇後也。後人因注文絡字在黃雲之下。輒改正文作黃雲絡以合之。謬矣。

羣臣準上意而懷當。

樾謹按高注曰。準望懷思當合也。取合上意。不復以道正諫也。然懷當二字。甚爲不辭。高注亦曲說耳。懷當乃壞常之誤。言羣臣皆準上意而敗壞其典常也。文子上禮篇作羣臣推上意而壞常。是其明證。獵不聽其樂。

樾謹按高注曰。樂崩故不復聽田獵之樂。是此樂字是喜樂字而非音樂字。乃言不聽於義未安。聽疑德字之誤。家語本命篇。効匹夫之聽。王注曰。聽宜爲德。是其例也。德與得通。不德其樂。卽不得其樂。言雖田獵而不得其樂也。正與上句喪不盡其哀。文義一律。後人不知德爲得之段字。遂臆改爲聽耳。

相攜於道。奮首於路。

樾謹按高注曰。奮首。民疲於役。頓仆於路。僅能搖頭耳。此說極爲迂曲。淮南原文本作奮於首路。首猶嚮也。漢書司馬遷傳。北首爭死敵師。古曰。首嚮也。是其義也。相攜於道。奮於首路。言不得已自奮勉而嚮路也。兵略篇曰。百姓之隨逮肆刑。挽輅首路死者。一旦不知千萬之數。正以首路連文。可證此篇之誤。

潦水不泄。瀆穢極望。旬月不雨。則涸而枯澤。受瀆而無源者。

樾謹按者當作也。澤字絕句。如而古通用。涸而枯澤者。涸如枯澤也。此言潦水雖瀆穢極望。然旬月不雨。則涸如枯澤矣。所以然者。以其受瀆而無源也。與上文河九折注於海而流不絕者。昆侖之輸也。正相對成義。句末也字誤作者。則文義轉似不了矣。

古未有天地之時。惟像無形。精神

樾謹按惟乃惘字之誤。隸書罔字或作𠄎。故惘與惟相似而誤也。惘像卽罔象也。文選思元賦。馘汨𠄎。戾沛以罔象兮。亦作象罔。莊子天地篇。乃使象罔。象罔得之是也。罔象乃疊韻字。與下文瀕灤鴻洞一律。皆無形之象。故曰罔象無形。今作惟像無形。義不可通。乃高注訓惟爲思。則其誤久矣。

天有四時五行九解。

樾謹按高注九解有三說。當以八方中央之義爲塙。天文篇。天有九野。中央曰鈞天。東方曰蒼天。東北曰變天。北方曰元天。西北方曰幽天。西方曰顯天。西南方曰朱天。南方曰炎天。東南方曰陽天。卽此九解矣。解者分也。謂分周天三百六十五度四分度之一而爲九也。

人之耳目易能久。靈勞而不息乎。

樾謹按靈當爲勳。勳勞二字連文。古人常語。主乎勳而言之。則勞亦勳也。禮記明堂位篇。成王以周公爲有勳勞於天下。言有勳於天下也。主乎勞而言之。則勳亦勞也。此文曰。易能久勳勞而不息乎。言不能久勞而不息也。文子九守篇作何能久燠而不息。蓋由後人不達古語而改之。

故事有求之於四海之外而不能遇。或守之於形骸之內而不見也。

樾謹按守當作得。言求之於四海之外而不能遇者。或得之於形骸之內也。求與得文義相應。下文曰。故所求多者所得少。正承此而言。今作守之。失其義矣。一切經音義一引衛宏古文官書曰。導得二字同體。導與守相似。故誤爲守耳。

夫惟能無以生爲者。則所以脩得生也。

樾謹按脩得生。本作得脩生。得脩生者。得長生也。淮南以父諱長。故變長言脩耳。文子九守篇正作得長生。是其證。今作脩得生。則文不成義矣。高注曰。無以生爲者。輕利害之鄉。除情性之欲。則長得生矣。

長得生亦當作得長生。後人依既倒之正文而改之耳。

以死生爲一化。以萬物爲一方。

樾謹按文子九守篇作以千生爲一化。當從之。言生之數雖有千而以爲一也。以千生爲一化。以萬物爲一方。兩文相儷。而意亦相準。若作死生。則不類矣。且以死生爲一化。義亦未安。當據文子訂正。

此精神之所以能登假於道也。是故真人之所游。

樾謹按是故真人之所游。本作是真人之游也。乃結上之辭。文子九守篇亦有此文。大略相同。結之曰此真人之遊也。乃其明證也。下文曰。若吹呬呼吸。吐故納新。熊經鳥伸。鳧浴蟻躍。鷗視虎顧。是養形之人也。不以滑心。高注曰。是非真人之道也。若如今本作是故真人之所游。則下文云云。皆爲真人之道矣。其謬殊甚。不可不正。

使神滔蕩而不失其充。

樾謹按充當作元。元者本也。謂不失其本也。文子九守篇作使精神暢達而不失於元。與此不同。雖不必據彼改此。而元字之義。自較充字爲長。高注曰。充實也。是其所據本已誤。

子求行年五十有四。而病僂僂。脊管高於頂。膈下迫頤。兩脾在上。燭營指天。匍匐自闕於井曰。偉哉造化者。其以我爲此拘拘邪。

樾謹按子求當作子來字之誤也。子來事見莊子大宗師篇。其文曰：子祀子輿子犁子來四人相與友。又曰：俄而子輿有病。子祀往問之曰：偉哉！夫造物者將以予爲此拘拘也。曲僂發背，上有五管，頤隱於齊，肩高於頂，句贅指天。又曰：俄而子來有病，喘喘然將死。淮南所見莊子，其子輿有病，子來有病，兩文蓋與今本互易。故以僂僂之病屬之子來也。莊子釋文引崔譔云：淮南作子永，抱樸子博喻篇亦云：子永歎天倫之偉。顧氏千里以作永爲是，誠知其當爲子來，則求與永並屬形似之誤，求固非而永亦未是也。說互詳莊子。

行快而便於物本經

樾謹按快當爲決。周易文言傳鄭注：謂古書傳作立心與水相近，決快相亂，正由此矣。說文水部：決，行流也。是決有行義。上句曰發動而成於文，發亦動也。此云行決而便於物，決亦行也。

元元至碣而運照

樾謹按高注曰：元，天也。元，氣也。分兩字爲兩義，殊不可通。疑正文及注均誤。正文本曰：元光至碣而運照。注文本曰：元，天也。光，氣也。倣真篇曰：弊其元光而求知之於耳目。此元光二字見於本書者。高彼注曰：元光，內明也。一曰：元，天也。然則此曰元天也，正與彼注同。疑彼亦有光氣也三字，而今脫之也。

菑榛穢聚埒畝

樾謹按高注曰茂草曰蓄木聚曰榛積之於疆畝此注殊失其義蓄者殺草之名爾雅釋地田一歲曰蓄孫炎曰蓄始災殺其草木也榛穢連文其義相同漢書楊雄傳注曰榛榛梗穢貌是也蓄榛穢聚埽畝皆三字爲句言榛穢之區皆災殺之而集成埽畝也下云芟野蕪長苗秀是此四句皆言治田之事蓄榛穢故芟野蕪聚埽畝故長苗秀也下文曰草木之句萌銜華戴實而死者不可勝數正見殺草之多若從高注則與下文不貫矣

療檐榱題雕琢刻鏤喬枝菱阿夫容菱荷

樾謹按高注曰阿曲屋不說菱字之義疑高氏所據本菱字作淩言療檐榱題之上雕刻樹木故其喬枝上淩於曲阿也淩字之義易明故不煩訓釋後人因下句言菱荷遂改淩作菱以配之則義不可通矣

故聖人者由近知遠而萬殊爲一古之人同氣於天地與一世而優游

樾謹按古之人三字衍文也四句一氣相屬皆蒙故聖人者爲文若有古之人三字則文義不貫矣此文本云故聖人者由近而知遠以萬殊爲一同句氣蒸於天地與一世而優游今本而字脫去校者誤補於遠字之下遂誤刪以字一同與萬殊本相對爲文今衍古之人三字遂以同字下屬而誤刪蒸字皆非其舊文子下德篇作聖人由近以知遠以萬里爲一同炁蒸乎天地宜據以訂正彼云由近以知



遠。卽由近而知遠也。以萬里爲一同。卽以萬殊爲一同也。彼云炁蒸乎天地。故知此脫蒸字矣。上文云。氣乃上蒸。卽此蒸字之義也。

故德之所總。道弗能害也。

樾謹按總字無義。乃利字之誤。利古文作𠂔。總俗作惣。其上平相似。因而致誤。周書大匡篇。及其利害。今本利亦誤作總。是其證也。德之所利。道弗能害。利與害義相應。高注曰。總一也。是其所據本已誤矣。

九嬰大風。

樾謹按高注曰。大風。風伯也。能壞人屋舍。此下當有一曰鷖鳥四字。而今脫之。文選劉孝標辨命論注。引高誘曰。大風鷖鳥。是其證也。下文繳大風於青丘之澤。注曰。羿于青丘之澤繳遮。使不爲害也。一曰。以繳繫矢射殺之。繳遮之說。以風言也。繳射之說。以鳥言也。

堯乃使羿誅鑿齒於疇華之野。殺九嬰於凶水之上。繳大風於青丘之澤。

樾謹按王氏念孫謂疇華之野。野本作澤。青丘之澤。澤本作野。引北堂書鈔太平御覽爲證。然劉孝標辨命論曰。鑿齒奮於華野。華野者疇華之野也。若本作疇華之澤。何不曰華澤而曰華野乎。然則古本自作疇華之野。青丘之澤。類書所引。殆未足據。

燎焚天下之財。

樾謹按天下之財不當言燎焚。燎焚當作撩聚。古人書聚字或作聚。漢書古今人表聚子。師古注曰聚。聚字也。俗書焚字作林。兩形相似而誤。聚誤爲焚。自然改撩爲燎矣。廣詁釋詁。撩取也。聚與取古字通。周易萃彖傳聚以正也。釋文曰聚荀作取。漢書五行志內取茲爲禽。師古曰取讀如禮記聚麀之聚。並其證也。撩聚卽撩取。謂撩取天下之財也。

地愛其平。

樾謹按詩黍苗篇原隰旣平。毛傳曰土治曰平。此平字之義也。高注曰平正也。未得其旨。

抑減怒瀨以揚激波。

樾謹按高注曰減怒水也。減旣爲怒水何以又云怒瀨乎。高說非也。減者逆也。言抑而逆之以揚其波也。莊子天下篇其風飂然。郭注曰逆風所動之聲。水逆謂之減。猶風逆謂之飂。

樂斯動。動斯蹈。蹈斯蕩。蕩斯歌。歌斯舞。歌舞節則禽獸跳矣。

樾謹按歌舞節則禽獸跳矣。本作舞則禽獸跳矣。與下文動則手足不靜發怒則有所釋憾矣。文義一律。歌字節字皆衍文也。下文曰故鐘鼓管簫干鍼羽旄所以飾喜也。是此時所謂舞者。尙未有干鍼羽旄之飾。不過手之舞之足之蹈之而已。其去禽獸跳跟無幾也。今衍歌字節字義不可通。王氏念孫謂當作歌舞無節不知節與不節尙非所論於此也。

言爲文章，行爲儀表於天下，主術。

樾謹按：於天下三字，衍文也。涉高注曰：爲天下人所法，則也。故誤衍此三字。

昔孫叔敖恬臥，而郢人無所害其鋒。

樾謹按：害字無義。王氏念孫謂是用字之誤，然用與害字形不似，無緣致誤也。害蓋容字之誤。容亦用也。釋名釋姿容曰：容，用也。合事宜之用也。是其義也。無所容其鋒，卽無所用其鋒。老子曰：兵無所容其刃，此淮南所本也。

木擊折轉，水戾破舟，不怨木石而罪巧拙者。

樾謹按：水戾破舟，當作石戾破舟。故云不怨木石。今作水戾，則下句石字無著矣。巧字疑功字之誤。功與工通。周官肆師職：凡師不功，故書功爲工。是也。不罪木石而罪工拙，工卽工人之工。言不罪木石而罪作舟車者之拙也。高注曰：罪御者刺舟者之巧拙也。是其所據本已誤。

任輕者易權。

樾謹按：文子下德篇：作任輕易勸也。勸字之義，視權字爲長。言任輕則易舉，故人皆相勸而爲之也。高注曰：權，謀也。其所據本已誤。

夫乘衆人之智，則無不任也；用衆人之力，則無不勝也。

樾謹按無不任也。當作無不聖也。上文曰。文王智而好問。故聖。武王勇而好問。故勝。此即承上文而言。說文耳部。聖。通也。無不聖。即無不通也。後人不達聖字之義。疑無不聖也。於文難通。故臆改爲任字。不知任即勝也。勇當言勝。智當言聖。若亦言任。則與勝義複。而無以爲智勇之別矣。

是以勇者盡於軍。

樾謹按此下當有智者云云。而今闕之。下文云。爲智者務於巧詐。爲勇者務於鬪爭。亦以智勇並舉。是其證也。

不隨南畝。

樾謹按脩務篇隨山槩木。注曰。隨。循也。不隨南畝者。不循南畝也。王氏念孫以隨爲脩字之誤。非。

大羹不和。

樾謹按高注曰。不致五味。疑本作大羹不致。故高注云然。桓二年左傳曰。大羹不致。杜注亦曰。不致五味。即本諸此。

舉天下而以爲社稷。非有利焉。

樾謹按此本作以爲社稷。非有利焉。言皆以爲社稷。而非自以爲利也。涉下文舉天下而傳之舜句。衍此四字。當刪。

縣法者法不法也。設賞者賞當賞也。

樾謹按設賞者賞當賞也。七字疑衍文。下文法定之後，中程者賞，缺繩者誅，卽承縣法者法不法也而言。文子上義篇，正作縣法者法不法也。法定之後，中繩者賞，缺繩者誅，可據以訂正。王氏念孫謂上句當作縣罰者罰不法也，與下句對。若然，何不竟改爲罰當罰，與下句不尤對乎。

夫寸生於稌，稌生於日，日生於形，形生於景，此度之本也。

樾謹按王氏引之以稌爲標字之誤。標與秒同，其說是也。惟標生於日，義不可通。疑本作寸生於標，標生於形，形生於景，景生於日，與下文樂生於音，音生於律，律生於風，文義一律。言度之本生於日，聲之宗生於風也，傳寫錯亂其文耳。

景桓公臣管晏，位尊也。

樾謹按此本作桓景臣管晏，言桓臣管景臣晏也。因傳寫誤作桓公，後人遂加景字於桓字之上。先景後桓，與管晏不相當，而景桓公臣管晏，與上文衛君役子路，句法又參差不一律，足知其非矣。故握劍鋒以離北宮子司馬蒯黃，不使應敵，操其觚招其末，則庸人能以制勝。

樾謹按王氏念孫謂離是雖字之誤，使上應有可字，皆是也。疑握劍鋒以之下有脫文，則尚未盡得。此當於鋒字絕句，操其觚招其末之下，更無它文，則握劍鋒下亦不必更有何字矣。以字本在雖字之下。

其文曰故握劍鋒雖以北宮子司馬蒯賁不可使應敵因雖字誤作離遂移以字於上使成句耳

中田之獲卒歲之收

樾謹按既言之獲又言之收重複無謂疑本作中田卒歲之收無之獲二字故文子上仁篇作中田之收蓋省卒歲二字耳若使本作中田之獲卒歲之收而文子省其一句則何不曰中田之獲而必變獲言收乎

處靜持中

樾謹按文子微明篇作處靜以持躁當從之靜躁對文與上文得要以應衆執約以治廣文義一律凡此六反者不可不察也

樾謹按高注曰六反謂孔墨婁宏孟賁吳起張儀也其行相反故曰六反此注大謬上文雖有此六人然非舉以相較婁宏孟賁不過謂孔子之智勇過此二人耳初非言其相反也六反者卽上文所謂心欲小而志欲大智欲員而行欲方能欲多而事欲鮮也小與大反員與方反多與鮮反是謂六反衆愚人之所見者寡事可權者多愚之所權者少此愚者之所多患

樾謹按此有脫誤當云物之可備者衆愚人之所備者寡事之可權者多愚人之所權者少此愚者之所以多患也下文曰物之可備者智者盡備之可權者盡權之此智者所以寡患也與此文反覆相明

是其證也。衆上脫物之可備者五字。王氏念孫遂欲以衆字屬上句讀。然上文云。物之若耕織者。始初甚勞。終必利也。其文義已足。必綴衆字於句末。轉爲不詞矣。

治國上使不得與焉。

樾謹按高注曰。使不得與亡傷之危。是上術也。此蓋屬上文讀之。然文義迂迴。不可從也。此當屬下文讀之。下文曰。孝於父母。弟於兄嫂。信於朋友。不得上令而可得爲也。釋己之所得爲。而責于其所不得制。悖矣。是不得可得兩文。反覆相明。疑治國下脫非字。本云。治國非上。使不得與焉。蓋上文言國無義。雖大必亡。人無善志。雖勇必傷。此言國之有義無義。乃治國之事。治國之事。非上使我爲之。我不得與焉。若人之有善無善。則在我而已。故曰不得上令而可得爲也。上令卽上使也。不得上令而可得爲。正與非上使不得與相對。高所據本已脫非字。故失其解矣。

故上世體道而不德。中世守德而弗壞也。末世繩繩乎惟恐失仁義。

釋

樾謹按文子微明篇。作中世守德而不懷。此文壞字亦懷字之誤。懷卽懷來之懷。言中世守德。未知仁義之爲美。猶無意乎懷來之也。字誤作壞。失其旨矣。

凡行戴情。雖過無怨。不戴其情。雖忠來惡。

樾謹按高注曰。戴。心所感也。此未得戴字之義。戴當讀爲載。釋名釋姿容曰。戴。載也。載之於頭也。是戴

載聲近義通。下文曰：其載情一也。施人則異矣。可證此文戴之當爲載矣。下文又曰：義載乎宜之謂君子。亦與此載字同。

蓋力優而克，不能及也。

櫟謹按高注曰：克猶能也。則是克不能及，爲能不能及矣。於義難通。王氏念孫以能爲衍字，然力優而克不及，義亦未安。今按此文蓋有錯誤。此注亦後人竄入，非高氏原文也。克當作𢇛，及當作𢇛，皆以形似而誤。惡者惡之古文與德字通。𢇛者服之本字也。古書服字每作𢇛，而傳寫多誤爲及。尙書呂刑篇：何度非及。大戴記王言篇：及其明德也。及並𢇛字之誤。說詳羣經平議。此文本云：蓋力優而惡不能𢇛也。高注於上文注曰：力能殺虎而德不能服之。本當注於此句之下。德不能服四字，卽本正文。因惡誤作克，𢇛誤作及，遂移注於上文。又竄入克猶能也四字爲此句之注，而文義俱晦矣。

喜憎議而治亂分矣。

櫟謹按高注曰：下有喜議而國治，有憎議而國亂也。此未得議字之旨。議當讀爲儀。周易繫辭傳：議之而後言。釋文曰：議陸姚桓元荀柔之本作儀。國語鄭語：伯翳能議百物。漢書地理志：議作儀。是議儀古通用。廣雅釋詁：儀，見也。喜憎儀，謂喜憎見也。倣真篇：是非無所形。高注曰：形，見也。儀與形同。故廣雅形與儀並訓。見齊俗篇曰：是非形則百姓眩矣。此云喜憎儀而治亂分矣。句法一律。乃諸書多以形爲見。



少以儀爲見。而此又段議爲之。其義益晦。宜表出之。以存古訓也。

故戎兵以大知小。人以小知大。

櫛謹按戎兵以器言。猶曰器以大知小。人以小知大耳。兵器有大小。如考工記所載。弓與劒皆有上制中制下制是也。知上制如干。則等而下之。皆可知矣。故曰戎兵以大知小。高氏以湯武說上句。堯舜說下句。殊非其旨。

羊羹不斟。而宋國危。

櫛謹按方言曰。斟。益也。凡相益而少。謂之不斟。然則羊羹不斟。謂羹少也。上句魯酒薄。而邯鄲圍。酒薄羹少。其事正相類。宣二年左傳。其御羊斟不與。羊斟自是人名。此云羊羹不斟。自謂羹少。必并爲一談。則皆失之矣。

夜行瞑目而前其手。事有所至。而明有不害。

櫛謹按至當作宜。害當作容。皆字之誤也。容。用也。說見主術篇。容與庸通。莊子胠篋篇。容成氏。六韜大明篇作庸成氏。庸爲用。故容亦爲用也。夜行者不用目而用手。是事之宜也。故曰事有所宜。而明有不害也。說林篇曰。夜行者掩目而前其手。涉水者解其馬載之舟。事有所宜。而有所不施。可證此文至字之誤。不施亦卽不用也。

雍門子以哭見孟嘗君，涕流沾纓。

樾謹按：孟嘗君下當更有孟嘗君三字，而今脫之。覽冥篇曰：昔雍門子以哭見於孟嘗君，已而陳辭通意，撫心發聲，孟嘗君爲之增歎歔咷，流涕狼戾不可止。彼文再言孟嘗君，故知此亦當同。不然，則涕流沾纓，仍屬雍門子，而不屬孟嘗君，不見其感人之至矣。

其衣致煖而無文，其兵戈銖而無刃。齊俗

樾謹按：文子道原篇作其衣煖而無文，其兵鈍而無刃。故王氏念孫謂致與戈皆衍文，其說是也。高解銖字曰：楚人謂刃頓爲銖，是銖與無刃一意也。煖與無文，則非一意矣。疑煖當爲緩，緩者緩之段字也。說文糸部：緩，繒無文。國語晉語曰：乘緩不舉。韋注曰：緩，車無文也。是凡無文者，皆謂之緩。故曰其衣緩而無文，正與其兵銖而無刃同義。緩與緩古音相同，得以通用。廣雅釋詁：慢、謾並訓緩，故緩亦通作緩也。後人不知緩爲緩之段字，因其言衣，輒改作煖，似是而實非矣。

山處者木。

樾謹按：木乃采之壞字，謂采樵也。山處者采，與上句水處者漁，下句谷處者牧，陸處者農，一律。漁也，采也，牧也，農也，皆言其事也。若作山處者木，則上句當云水處者魚矣。文子自然篇作林處者採，可據以訂正。說林篇：漁者走淵，木者走山，木亦當爲采。

涕之出於目。

樾謹按莊氏達吉曰：太平御覽引此目作鼻，疑是。此說非也。周易萃上六：齎咨涕洟。釋文引鄭注曰：自目曰涕，自鼻曰洟。然則涕出乎目，非出乎鼻，不得據御覽之誤字以改淮南之不誤者也。

雖之夷狄徒保之國。

樾謹按廣雅釋詁：徒，袒也。徒保猶袒保。徒與袒一聲之轉。呂氏春秋異用篇：非徒網鳥也。高注曰：徒猶但也。袒與但同。

絹以綺繡。

樾謹按絹當爲絹。漢書司馬相如傳：絹要褱。師古注曰：絹謂羅縠之也。文選上林賦：李善注引聲類曰：絹係取也。絹以綺繡，謂以綺繡繫之作絹者，省不從罔耳。太平御覽皇王部引作飾以綺繡，殆由不得其義而臆改也。

故天之圓也不得規，地之方也不得矩。

樾謹按兩得字皆當爲中。周官師氏掌國中失之事，故書中爲得，是其例也。文子自然篇正作天圓不中規，地方不中矩。

跌衽宮壁。

櫪謹按跌衽宮壁。於文未明。高注曰。跌衽至平。公衣衽中宮壁。疑本作跌衽中壁。跌猶越也。言越過平公之衽。而中於壁也。今作宮壁。卽涉注而誤。

常欲在於虛。則有不能爲虛矣。若夫不爲虛而自虛者。此所慕而不能致也。

櫪謹按此言欲爲虛。則不能爲虛。若夫不爲虛而自虛。則又慕之而不能致也。蓋性之自然。非可勉強。故慕之而不能致。文子道德篇作此所欲而無不致也。於義不可通。王氏念孫反據以訂正淮南。殊爲失之。

秦王之時。或人蒞子。利不足也。

櫪謹按或人卽國人也。說文戈部。或邦也。口部。國邦也。或國古通用。

# 諸子平議卷三十一

## 淮南內篇三

可以窈，可以明，道應、

樾謹按：窈讀爲幽，故與明相對。禮記玉藻篇：「再命赤韍幽衡。」鄭注曰：「幽讀爲黝。」窈之通作幽，猶幽之通作黝也。

若以石投水中，何如？

樾謹按：中字衍文。列子說符篇：「呂氏春秋精諭篇」並作「若以石投水」。

惠子爲惠王爲國法已成，而示諸先生，先生皆善之。

樾謹按：先生乃長老有德者之稱。惠子爲國法而示諸先生，乃就正有道之意。呂氏春秋淫辭篇：「先生皆作民人。」舊校云：「一作良人。」此當以良人爲是。序意篇：「良人請問十二紀。」高注曰：「良人，君子也。」然則諸良人卽諸先生也。若是民人，則惠子豈能一一示之，且使民人皆以爲善，則其可行也必矣。下文霍煎何以云「善而不可行乎」？王氏念孫反以民人爲是，而欲改淮南以從之，誤矣。

飄風暴雨，日中不須臾。

樾謹按飄風暴雨下脫不終朝三字老子曰飄風不終朝驟雨不終日是其義也日中不須臾乃日中則仄之義今脫不終朝三字則若飄風暴雨亦不須臾者失其義矣列子說符篇正作飄風暴雨不終朝日中不須臾可據以訂正呂氏春秋慎大篇亦脫不終朝三字

異哉歌者非常人也

樾謹按呂氏春秋舉難篇歌者上有之字當從之之猶是也之歌者卽是歌者也無之字則文不備新序襟事篇作此歌者此亦猶是也

寡人得立宗廟社稷

樾謹按立字無義疑主字之誤

輪扁曰其人在焉

樾謹按焉猶乎也儀禮喪服傳曰野人曰父母何算焉禮記檀弓篇曰子何觀焉論語子路篇曰又何加焉皆是也詳見王氏經傳釋詞其人在焉猶曰其人在乎故桓公告之曰已死矣莊子天道篇作聖人在乎與此文異而義同

夫國家之安危百姓之治亂在君行賞罰

樾謹按君字衍文涉下文君自行之而衍此但言行賞罰下乃分別言之曰夫爵賞賜予民之所好也

君自行之殺戮刑罰民之所怨也。臣請當之。若此文有君字，則下文不可通矣。王壽負書而行，見徐馮於周。

櫟謹按韓非子喻老篇周下有塗字，是也。行而見之，則必在道塗之間，故曰見徐馮於周塗。周塗猶周道也。

爭者人之所本也。

櫟謹按本字無義，乃去字之誤。下文始人之所本，逆之至也。說苑指武篇作殆，人所棄，逆之至也。彼作棄，此作去，文異而義同。惟始字亦不可通。說苑作殆，尤爲無義。始乃治字之誤。吳起欲砥礪甲兵，故屈子以爲治人所去，言取人之所去者而治之也。文子下德篇作治人之亂，逆之至也。治字不誤，可據以訂正。

差須夫子也。

櫟謹按此本作嗟，句須夫子也。嗟乃歎辭。說苑指武篇作嘻，且待夫子也。是其證也。嗟字闕壞，高注遂以差須連讀而釋之曰：猶意須也，失之甚矣。

周伯昌行仁義而善謀。

櫟謹按行字衍文也。下云：太子發勇敢而善謀，中子且恭儉而知時。若此句有行字，則與下兩句不一。

律矣。蓋涉上文與之競行而衍。

元玉百珌。大貝百朋。

樾謹按高注曰。三玉爲一珌也。五貝爲一朋也。然三玉爲一珌。它無所見。疑本作元玉百珌。注本作二玉爲一珌也。說文珌部。二玉相合爲一珌。是也。莊十八年左傳。賜玉五珌。僖三十年傳。納玉於王與晉侯皆十珌。襄十八年傳。獻子以朱絲係玉二珌。國語魯語。行玉二十珌。穆天子傳。於是載玉萬珌。杜預韋昭郭璞注並以雙玉說之。珌卽珌之或體。是古人用玉。率以珌計。未聞其以工計也。蓋珌字闕壞而爲耳。後人因改爲工。又改高注二玉爲三玉。以別異於珌耳。至朋之訓。五貝。本詩著著者莪篇鄭箋。然正義曰。五貝者。漢書食貨志以爲大貝壯貝。小貝不成貝爲五也。言爲朋者。爲小貝以上四種。各二貝爲一朋。而不成者不成朋。鄭因經廣解之。言有五種之貝。貝中以相與爲朋。非總五貝爲一朋也。然則高氏泥鄭箋五貝之說。以注此文。殊非塙詁。古者實以二貝爲一朋。周易損六五。十朋之龜。李鼎祚集解引崔憬曰。雙貝曰朋。得之矣。詩七月篇。朋酒斯饗。毛傳曰。兩樽曰朋。貝以兩爲朋。猶樽以兩爲朋也。此云元玉百珌。大貝百朋。珌也朋也。皆以兩計。元玉百珌者。玉二百也。大貝百朋者。貝二百也。其數正相當矣。

是以犯敵能威。



櫟謹按威乃威字之誤。威讀爲滅。言能滅之也。呂氏春秋悔過篇正作滅。又按呂氏春秋。此句下有去之能速四字。高注曰。故進能滅敵。去之能速也。此文無此四字。則於文爲不備。疑寫者脫去之。

虛敖仰而視之弗見。乃止。駕止。杯治。悖若有喪也。

櫟謹按王氏念孫謂止杯治之止。乃心字之誤。是也。杯治之義。高注曰。楚人謂恨不得爲杯治也。其實杯治卽不怡也。不怡二字。本於虞書。古人習用之。國語晉語曰。主色不怡。太史公報任少卿書曰。聽朝不怡。此言心不怡。非必楚語。因聲誤而爲杯治。其義始晦矣。論衡道虛篇作乃止喜。句心不怠。卽乃止。駕。心不怡也。喜者嘉字之誤。駕之假字也。怠者怡之假字也。

嘗有如此而得活者乎。

櫟謹按嘗下脫見字。下文對曰。未嘗見也。嘗見字與此相應。呂氏春秋知分篇作子嘗見。有兩蛟繞船。能兩活者乎。正有見字。能兩活當作而能活。說見呂氏春秋。

棄劍而已。

櫟謹按己乃人已之己。己上當有全字。呂氏春秋正作棄劍而全己。

孔子聞之曰。夫善載腐肉朽骨棄劍者。飲非之謂乎。

櫟謹按載當作哉。聲之誤也。哉下脫不以二字。呂氏春秋正作夫善哉。不以腐肉朽骨而棄劍者。其次

非之謂乎。

故大人之行不掩以繩。

樾謹按掩字無義。高注曰：掩猶揮也。義亦未詳。掩乃扶字之誤。管子宙合篇曰：千里之路不可扶以繩。是其證也。下文此所謂筦子梟飛而維繩者，王氏念孫引陳觀樓說，謂當作此筦子所謂鳥飛而準繩者。按鳥飛準繩，本管子宙合篇，其曰千里之路不可扶以繩，萬家之都不可平以準，卽說鳥飛準繩之義也。然則此云大人之行不扶以繩，亦本管子掩字之誤無疑矣。宙合篇又曰：夫繩扶撥以爲正，卽此扶字之義。因扶字闕壞，止存扶形，淺人遂以意補成掩字耳。

道全爲無用之事，煩擾之教。

樾謹按全乃令字之誤，令猶使也。道與導同，謂導使爲無用之事，煩擾之教也。於是乃去其瞽而載之木。

樾謹按高注曰：瞽被髮也。木，鵲鳥冠也。知天文者冠鵲。王氏引之以木爲朮字之誤。朮卽鷓字也。引匡謬正俗鷓字音聿，亦有術音。蔡氏獨斷謂爲術氏冠爲證，其說洵塙不可易矣。惟未說瞽字之義。瞽當爲瞽。瞽者兜瞽也。說文兜部：兜，瞽首鎧也。從省言之，則止曰瞽。汜論篇：古者有瞽而縵領。高注曰：瞽頭著兜瞽帽是也。去其瞽而載之朮，謂去其首鎧而戴之鷓鳥之冠。正與解其劒而帶之笏文義一律。

作替者段字耳。高注以被髮說之。夫被髮豈可言去。足知其非矣。

夏后氏祭於闕。殷人祭於陽。周人祭於日出以朝。汜論、

樾謹按高注首句曰。於室中夜祭之也。二句曰。於堂上日平旦祭也。三句曰。於日出時祭於庭中。朝者庭也。所說皆未得其義。此文本禮記祭義篇。其文曰。郊之祭。大報天而主日。配以月。夏后氏祭其闕。殷人祭其陽。周人祭日以朝及闇。鄭注曰。闇。昏時也。陽。讀爲日。雨曰暘之暘。謂日中時也。朝。日出時也。夏后氏大事以昏。殷人大事以日中。周人大事以日出。亦謂此郊祭也。以朝及闇。謂終日有事。正義曰。此郊之祭。一經止明郊祭之禮。郊之祭者。謂夏正郊天。然則此文所說。本屬郊祭。郊祭必爲壇。初非廟祭。有何室中堂上庭中之分乎。祭於闕者。於中夜時祭也。祭於陽者。於日中時祭也。祭於日出。卽是祭以朝。朝者日出也。因周人尙文。郊祭終日有事。日出而祭。及闇而畢。故曰以朝及闇。淮南引此文不連及闇二字者。意在明三代之祭不同。若言闇則疑與夏同。且周人初非有取於闇。直以禮繁。不得不及闇耳。檀弓篇止言大事以日出。其無取於闇明矣。故淮南省此二字也。高氏誤以朝爲庭中。遂并上文亦以室中堂上言之。與祭義不合。不可從也。

有奉持於文王。洞洞屬屬而將不能。恐失之。

樾謹按而將不能恐失之。義不可通。高注曰。而將不能勝之。恐失之。慎之至也。疑本文作而將不能勝。

之而與如古通用。謂如將不能勝之也。恐失之三字。高氏自解如不能勝之義。此三字誤入正文。而轉脫去勝之二字。於是文不成義矣。

古者人醕工廬商樸女重。

樸謹按本作童。大戴記王言篇。民敦工璞商憖女憧。卽淮南所本也。童與憧通。今作重者。形聲相似而誤。

和者陰陽調。日夜分而生物。春分而生。秋分而成。

樸謹按。下言春分而生。上言日夜分而生物。文義重複。且春分秋分。皆日夜分也。日夜分而生物。於秋分而成。義亦不合。文子上仁篇作和者陰陽調。日夜分。故萬物春分而生。秋分而成。然則此亦當同上。而生二字。乃故萬之誤。

國之所以存者道德也。

樸謹按。德當爲得。字之誤也。文子上仁篇正作得。國之所以存者道得也。與下句家之所以亡者理塞也。正同一律。高注曰。理。道也。然則道理一也。得則存。塞則亡矣。高注此句曰。道德施行。民悅其化。故國存也。蓋以道德本屬恆言。故加德字以足句。非正文本作道德也。下文曰。存在得道。而不在於大也。亡在失道。而不在於小也。正與此文相應。疑此塞字亦卽失字之誤。故高氏無注矣。

湯武救罪之不給。何謀之敢當。

樾謹按當字無義。羣書治要作慮。然謀卽慮也。何謀之敢慮。義亦難通。當疑蓄字之誤。言救罪且不給。不暇更蓄他謀也。

昔楚恭王戰於陰陵。潘尫養由基黃衰微公孫丙相與篡之。

樾謹按高解相與篡之句曰。四子楚大夫。篡管取恭王。夫上文並無恭王見禽於晉之事。卽云相與篡之。於文不備。據戰於陰陵下。有高注曰。恭王與晉厲戰於陰陵。呂錡射恭王中目。因而禽之。疑此二十字是正文。本在昔楚二字之下。因此二十字誤作注文。後人遂於昔楚下補恭王戰於陰陵六字耳。玉工眩玉之似碧盧者。

樾謹按上云。劔工惑劔之似莫邪者。莫邪是良劔之名。則碧盧亦必是美玉之名。地形篇。碧樹瑤樹在其北。高注曰。碧。青玉也。是其義也。下文云。闇主亂於姦臣。小人之疑君子者。然則莫邪碧盧是喻君子。非喻小人。高注曰。碧盧或云砮砮。失之。

薛燭庸子見若狐甲於劔。而利鈍識矣。

樾謹按狐甲之義不可曉。狐疑爪字之誤。荀子大略篇。爭利如蚤甲而喪其掌。楊注曰。蚤與爪同。此爪甲連文之證。若爪甲者。言其小也。言燭庸子之於劔。止見若爪甲者。而已識其利鈍矣。下文曰。史兒易。

牙溜澠之水合者。嘗一哈水而甘苦知矣。一哈言其少也。與此文正一律。

故達道之人。不苟得不讓福。

樾謹按讓當爲攘。詮言篇。不能使福必來。信己之不攘也。高注曰。攘。卻也。此云不攘福。義與彼同。不貪無用。則不以欲用害性。詮言。

樾謹按下用字衍文。文子符言篇作不貪無用。卽不以欲害性。是其證。

故治未固於不亂。而事爲治者必危。行未固於無非。而急求名者必剋。

樾謹按襄二十七年公羊傳。我卽死。女能固納公乎。秦策。王固不能行也。何休高誘注並曰。固。必也。治未固於不亂。行未固於無非。言爲治未必不亂。爲行未必無非也。下文曰。爲義之不能相固。威之不能相必也。是可知固必同義。高此注以尙未牢固說之。其義轉迂。

故常無禍。不常有福。常無罪。不常有功。

樾謹按常與尙通。史記衛綰傳。綰尙盛。漢書尙作常。漢書賈誼傳。尙憚以危爲安。賈子宗首篇尙作常。並其證。

其智也。告之者至。然後覺其動也。使之者至。然後覺其爲也。

樾謹按使之者至上。當有其能也三字。上文云。有智而無爲。與無智者同道。有能而無事。與無能者同。

德下文云。有智若無智。有能若無能。皆以智能對舉。故知此亦當然。

然而守重寶者。必關戶而全封。

樾謹按。全字無義。乃璽字之誤。國語魯語。迫而予之璽書。韋注曰。璽書。璽封書也。此璽封二字之證。時則篇曰。固封璽。封璽與璽封同。五音集韻曰。璽俗作全。與全字形相似。故誤爲全矣。汜論篇。盜管金。高注曰。金印封。所以爲信。金亦璽字之誤。說見王氏讀書模志。彼璽誤爲金。此璽誤爲全。其誤正同。雖有聖賢之寶。不遇暴亂之世。可以全身。而未可以霸王也。

樾謹按。寶字無義。疑當作資。荀子性惡篇。離其資。楊注曰。資。材也。謂雖有聖賢之材也。質與寶形似而誤。

一身之身。旣數變矣。

樾謹按。上身字當作人。汜論篇曰。故一人之身而三變者。所以應時矣。文義與此同。此四者。耳目鼻口。不知所取去。心爲之制。各得其所。

樾謹按。鼻字衍文也。上文云。目好色。耳好聲。口好味。接而說之。不知利害嗜慾也。食之不甯於體。聽之不合於道。視之不便於性。三關交爭。以義爲制者。心也。然則此承上文而言。亦當止言耳目口。不當兼言鼻。今衍鼻字者。蓋後人據文子符言篇。增入。不知彼文上言目好色。耳好聲。鼻好香。口好味。故下言

耳目鼻口此文上言目好色耳好聲口好味故下止言耳目口兩文不同未可據彼以增此也。聖人內藏不爲物先倡。

樾謹按先字衍文先卽倡也言倡不必言先文子上德篇正作不爲物唱無先字。

智邊於事。

樾謹按遽讀爲劇說文力部勞劇也然則劇亦勞也劇於事謂勞於事也遽劇古通用公羊宣六年傳釋文曰劇本作遽。

不能爲御者不可以爲僕無害於爲佐。

樾謹按高注曰佐君位也則正文及注佐字均當作左禮記曲禮篇正義曰車行則有三人君在左僕人中央勇士在右是左爲君位也今加人旁作佐則失其旨矣。

行成獸止成文。

樾謹按成獸之文殊不成義高注曲爲之說非也獸疑獻字之誤隸書獸或作獸見桐柏廟碑形與獸似故獻或誤爲獸周官庖人職賓客之禽獻注曰獻古文爲獸杜子春云當爲獻是其例也論語八佾篇文獻不足故也文獻對文自有所本行成獻止成文者獻賢也言行則成賢善止則成文采也字誤作獸則不可通矣。



其作始簡者其終本必調。

樾謹按王氏念孫以本爲卒字之誤其說是矣。惟調之言和也合也與簡字之義殊不相應。調當作𦏧。玉篇多部。𦏧丁么切。多也大也。其作始簡者其終卒必𦏧。言始於少而終於多也。莊子人間世篇曰其作始也簡其將畢也必巨。巨者大也大與多義相近故玉篇𦏧調多亦調大且其字亦或從大作𦏧也。故神制則形從形勝則神窮。

樾謹按文子符言篇作故神制形則從形勝神則窮當從之。此申明上文神貴於形之義言可使神制形不可使形勝神也。觀高注則其所據本已誤。

故不得不中絕。

兵略

樾謹按此當作故人得不中絕言聖人勃然而起夷險除穢故人類不至於中絕也。今作不得不中絕於義難通文子上義篇亦然則其誤久矣。

夫畜池魚者必去獼獼養禽獸者必去豺狼。

樾謹按主術篇夫華駟綠耳一日而至千里然其使之搏兔不如豺狼太平御覽獸部引作狼契王氏引之曰狼契皆犬名也廣雅曰狼狐狂獫犬屬也玉篇獫公八切獫犬也獫與契通犬能搏兔而馬不能故曰不如狼契說見讀書樸志今以其說推之此文豺狼亦當作狼契蓋獼獼能食魚狼契能搏獸。

故獼獼不可與池魚並畜，而狼契不可與禽獸同養。若豺狼本非人之所養，又何待言去乎？此於義不可通。且獼與契爲韻，若作豺狼則於韻亦不可協矣。蓋由後人習聞豺狼，罕聞狼契，故率意更改，皆非其舊。

此天之所以誅也，此民之所以仇也。

樾謹按兩以字皆衍文。呂氏春秋懷寵篇作若此者，天之所誅也，人之所讎也。無兩以字。文子上義篇同。

有逆天之道，帥民之賊者。

樾謹按帥字義不可通。呂氏春秋作衛是也。當由衛誤作衛，因改爲帥耳。

是故至於伏尸流血，相支以日。

樾謹按相支以日，甚爲無義。文子上義篇作相交於前，當從之。交與支形似而誤，交誤爲支，因改於前爲以日，使成文義耳。

凡物有朕，唯道無朕。

樾謹按高注曰：言萬物可朕也，而道不可朕也。則正文及注文朕字，皆勝字之誤，故以不可言。若是朕字，則但當言有無，不當言不可也。文子自然篇作夫物有勝，唯道無勝，當據以訂正。

察行陳解贖之數。

榷謹按解贖當爲解續。解之言解散也。續之言連續也。解續猶言分合。下文曰：出入解續。是其證。博則能禽缺。

榷謹按博與缺義不相應。與上文靜則能應躁。後則能應先。數則能勝疏。不一律矣。博當作搏。字之誤也。說文手部：搏，圓也。故與缺相對爲文。太元中次六曰：月闕其搏。月之有闕有搏。卽此文搏缺對文之證。

是故處於堂上之陰。而知日月之次序。見瓶中之冰。而知天下之寒暑。

榷謹按於字衍文也。處堂上之陰者。謂察堂上之陰也。兵略篇曰：相地形。處次舍。是處與相同義。主術篇曰：援白黑而示之。則不處焉。不處猶不察也。蓋物居其所謂之處。使物各得其所。亦謂之處。國語魯語曰：夫仁者講功。而知者處物。是也。故處卽有辨別之義。後人不達。而妄加於字。處於堂上之陰。於義殊不可通。且處堂上之陰。本與見瓶中之冰相對。今增於字。則句法亦參差不齊矣。

典凝如冬。

榷謹按高注曰：典。常。凝。正也。此未得典字之義。典讀爲頤。典之典。考工記：轉人。是故轉欲頤典。鄭注曰：頤典。堅刀貌。然則典凝猶堅凝也。與上句湫漻如秋一律。若訓典爲常。則失其義矣。

故將必與卒同甘苦俟饑寒。

樾謹按俟字義不可通。乃併字之誤。併與并通。廣雅釋詁。并同也。併饑寒與同甘苦一律。

魄曰言者獨何爲者。吾將反吾宗矣。說山、

樾謹按吾將反吾宗矣。上當有魂曰二字。此乃魂之言也。吾將反吾宗者。魂欲反其宗也。故下文曰。魄反顧魂。忽然不見。惟反其宗。所以不見也。高解反吾宗曰。魂將反于無形。則其所據本正有魂曰二字。不然。何知其是魂而非魄乎。

鸚鵡能言而不可使長。

樾謹按藝文類聚鳥部。太平御覽羽族部。引此並作不可使長言。當從之。高注曰。長主也。又曰。不知所以長言。下注又曰。不能自爲長主之言。則未得長字之義。長主也。則長猶典也。不可使長言。猶曰不可使典言。謂不可使典主教令也。

獸不可以虛氣召也。

樾謹按氣當作器。莊子人間世篇。氣息肅然。釋文曰。向本作諛器。云器氣也。是器氣聲近義通。大戴記文王官人篇。其氣寬以柔。逸周書官人篇。氣作器。此古書以器爲氣之證。獸不可以虛器召。猶上句云。魚不可以無餌釣也。文子上德篇。正作獸不可以空器召。

保者不敢畜噬狗。

樾謹按高注曰保城郭居也。然以居城郭者謂之保者義殊未安。此保字乃阿保之保。禮記內則篇其次爲保母是也。保者不敢畜噬狗恐其驚孺子也。上句云亡者不敢夜揭炬亡者保者皆以事言非以地言。

小馬非大馬之類也。小知非大知之類也。

樾謹按上非字衍文也。本作小馬大馬之類也。小知非大知之類也。言馬則小大同類。知則大小迥殊。正以馬之類明知之不類也。孟子告子篇然則犬之性猶牛之性牛之性猶人之性與亦以物之同見人之不同。與此語意相近。呂氏春秋別類篇曰小方大方之類也。小馬大馬之類也。小智非大智之類也。卽淮南所本。後人不達其旨誤謂兩句一律於上句亦增非字失之矣。然觀高注曰小馬不可以進道致千里故不得與大馬同類。小知不可以治世長民故不得與大知同類。則其所據本已衍非字。見卵而求晨夜。

樾謹按晨當作辰。淺人誤謂與夜對文故加日作晨。不知非其義也。辰者時也。詩東方未明篇不能辰夜。毛傳曰辰時也。正義曰不能時節此夜之漏刻。然則辰夜卽時夜也。莊子齊物論篇正作見卵而求時夜。蓋皆本於毛詩。淮南用其文。莊子用其義耳。

見一葉落而知歲之將莫。睹瓶中之冰而知天下之寒。

樾謹按：寒下當有暑字。兵略篇曰：是故處堂上之陰而知日月之次序，見瓶中之冰而知天下之寒暑。彼以暑與序爲韻，此以暑與莫爲韻。今刪暑字，則失其韻矣。上文曰：嘗一臠肉，知一鑊之味。縣羽與炭而知燥溼之氣，味氣爲韻，則此文亦必有韻可知。當據兵略篇補。

孫叔敖制冠浣衣。

樾謹按：制疑刷字之誤。爾雅釋詁：刷，清也。故與浣衣對文。

祭之日而言狗生。

樾謹按：生當作胜。說文肉部：胜，犬膏臭也。狗胜猶言狗臭。

爲醫之不能自治其病，病而不就藥，則勃矣。

樾謹按：藥當讀爲療。說文疒部：療，治也。或作療。古每以藥爲之。詩：板篇不可救藥。韓詩外傳：作不可救療。毛用段字。韓用正字也。病而不就藥，謂不就其療治。申鑒俗嫌篇曰：藥者療也。

# 諸子平議卷三十二

## 淮南內篇四

曹氏之裂布說林

樾謹按高注曰。楚人名布爲曹。今俗閒以始織布繫著其旁。謂之曹布。然則高氏所據本。疑無氏字。若有氏字。則曹是人之氏族。何得以布言之乎。今有氏字者。蓋涉下文夏后氏之璜而衍。非高本之舊也。惟高注義亦未安。若從前一說。則曹卽布之異名。言曹不必更言布。若從後一說。則當以曹布連文。不當曰曹之裂布也。曹疑當讀爲襜。廣雅釋器曰。襜。襜也。玉篇巾部曰。襜。藉也。襜卽襜之異文。又衣部曰。襜。小兒衣也。然則襜者。疑是小兒承藉。鹵屨之布。故亦謂之襜。襜猶席也。漢書宣帝紀注引李奇曰。綠。小兒大藉也。卽其類也。襜之裂布者。說文衣部。裂。繒餘也。字通作烈。爾雅釋詁。烈。餘也。裂布卽餘布。言承藉小兒其四邊所有之餘布也。是其爲物至賤。然而棘者貴之。正上文時有所合之意。

鳥飛反鄉。兔走歸窟。狐死首丘。將將翔水。各哀其所生。  
樾謹按文子上德篇。作各依其所生也。哀與依古聲同。此作哀者。卽依之段字耳。高注曰。哀猶愛也。非是。

大匠不斷大豆不具大勇不鬪

樾謹按大匠大勇皆以人言而大豆獨以器言且大豆不具義亦難通殆非也淮南原文本作大庖不豆呂氏春秋貴公篇曰大匠不斷大庖不豆大勇不鬪卽淮南所本高氏彼注曰但調和五味使神人享之而已不復自列簠簋籩豆也疑高氏此注亦與彼同今但存豆簠簋籩豆之器七字蓋後人刪改之以合於既誤之正文非其舊也又按豆者剗之段字廣雅釋詁剗裂也大庖不剗謂不自割裂與不斷不鬪一律說詳呂氏春秋

任動者車鳴也

樾謹按高注曰任者輦也詩曰我任我輦此說失之黍苗篇我任我輦我車我牛毛傳曰任者輦者車者牛者鄭箋曰有負任者有輓輦者有將車者有牽牛者是毛鄭皆以任輦爲二事若曰任者輦也亦將曰車者牛也其可通乎今按此任卽所謂任木也考工記輈人曰凡任木任正者十分其輈之長以其一爲之圍衡任者五分其長以其一爲之圍鄭康成說任正衡任未得其義宋戴侗六書故曰任正者輈也衡任者軸也近世學者程氏瑤田則謂必在輿下者始足當任木之名隧深四尺四寸輈在四尺四寸下者任正也車廣六尺六寸軸在六尺六寸下者衡任也金氏榜則謂凡任木縱者皆名任正橫者皆名衡任任正者輈也伏兔也衡任者軸也衡也其說皆本戴氏而推之可以說此文任動車鳴



之義。

使但吹竽。使氏厭竽。雖中節而不可聽。

樾謹按高注曰。但古不知吹人。此殆望文生訓。且既不知吹矣。又何能中節乎。文子上德篇作使倡吹竽。使工捻竽。然則但氏二字。乃倡工之誤。倡也。工也。特爲異名以別之。明非一人。實則同義。蓋倡與工。雖善吹竽。然必自吹之而自厭之。若一人吹竽。一人厭竽。則雖中節而不可聽矣。韓子外儲說右篇曰。田連成竽。天下善鼓瑟者也。然而田連鼓上。成竽撫下。而不能成曲。此意卽淮南所本。倡也。工也。猶曰。田連也。成竽也。彼舉其人以實之。此則不舉其人耳。倡字闕壞而成但字。隸書工或作互。氏或作互。二形相似。故工誤作氏。高據誤本作注。曲爲之說。失之矣。

蜎狄之捷來乍。

樾謹按高注訓乍爲暫疾。而以疾擊取之。申明其義。此曲說也。乍與作通。當讀爲斲。爾雅釋器。魚曰斲之。禮記內則篇作魚曰作之。卽其例也。成二年公羊疏引樊光曰。斲。砍也。砍乃斲之俗字。斲者擊也。蜎狄之捷來斲。謂見斲擊也。方輿上句虎豹之文來射。文義一律。繆稱篇曰。蜎狄之捷來擗。高注曰。擗。刺也。刺擊義亦相近。

穀立三十幅。各盡其力。不得相害。使一幅獨入。眾幅皆棄。豈能致千里哉。

樾謹按文子上德篇作穀虛而中立。是此文穀下脫虛而中三字。一幅文子作一軸。亦當從之。蓋一軸在穀中三十幅在穀外。若一軸獨入而三十幅皆棄。卽不成爲輪矣。故不可以致千里也。

蘇秦步曰何故。趨曰何趨。馳

樾謹按此當作蘇秦步曰何步。趨曰何趨。馳曰何馳。因首句高注有何故二字。遂誤正文何步爲何故。而馳下又脫曰何馳三字。則文不成義矣。

的者獲。提提者射。

樾謹按高注曰的。的。明也。爲衆所見。故獲。提提。安也。王氏念孫謂的。提提。皆明也。引管子白心篇爲善乎無提提爲證。其說得之矣。惟未說獲字之義。今按的猶提提也。獲猶射也。兩句實止一意。儀禮鄉射禮篇。獲者坐而獲。鄭注曰。射者中則大言獲。是古謂射中爲獲。上句言獲。下句言射。變文以成辭耳。

扶之與提。謝之與讓。故之與先。諾之與已。也之與矣。相去千里。

樾謹按故之與先。本作得之與失。草書得字作乃。故字作ㄩ。兩形相似。隸書失字或作失。先字或作先。兩形亦相似。因誤得爲故。誤失爲先耳。之與矣三字衍文也。蓋校者見淮南舊本有得之與失句。因補注於諾之與已也下。而傳寫又脫得字。且誤失爲矣耳。文子上德篇正作扶之與提。謝之與讓。得之與

失。諾之與已。相去千里。可據以訂正。

待利而後拯溺人。亦必以利溺人矣。

樾謹按以字衍文。高注曰。利溺人者。利人之溺得其利也。則其所據本無以字。

聖人處於陰。衆人處於陽。聖人行於水。衆人行於霜。

樾謹按四語相對成文。且陽霜爲韻。非有脫誤。文選洛神賦注。引作聖足行於水。無迹也。衆生行於霜。有迹也。太平御覽天部。引作聖人行於水。無迹。衆人行於霜。有迹。疑無迹也有迹也。是許叔重注。引者并注文舉之。使其意明顯耳。王氏念孫欲據以增入正文。然則處於陰處於陽下。又將增入何語乎。足知其非矣。

寅丘無壑。泉原不溥。

樾謹按寅丘謂大丘也。方言。蚤。大也。廣雅釋詁同。寅卽蚤之段字。言丘雖大而無壑。則泉原不溥也。下文曰。尋常之壑。灌千頃之澤。尋常言其小。則寅丘必言其大矣。高注以爲汙潦水名。非是。

扞和切適。

樾謹按高注曰。扞。轉也。轉其和更作急調。然則正文疑當作扞和適切。切者急切也。適猶之也。往也。言轉其和平之音。而適於急切之調也。

尾生之信，不如隨牛之誕。

樾謹按高注曰：隨牛，弦高矯君命爲誕以存國，然隨牛未知何人。據人間篇注曰：蹇他，弦高之黨。未聞其有隨牛也。隨牛，疑當作隨生，卽謂漢初之隨何也。生，猶先生也。史記儒林傳索隱曰：自漢已來，儒者皆號生，亦先生省字呼之耳。然則稱隨何爲隨生，乃漢時常語也。隨何爲漢初辯士，故曰尾生之信，不如隨生之誕。陸士衡漢高祖功臣頌曰：隨何辯達，因資於敵，紓漢披楚，唯生之績。此卽隨何稱生之證。發一端，散無竟。周八極，總一筦，謂之心人明。

樾謹按總一筦三字，當在周八極之上。蓋言發於一端，而散於無竟，總於一筦，而周於八極。猶下文所云執一而應萬也。兩句誤倒，失其義矣。

歸而封孫叔敖，辭而不受，病疽將死。

樾謹按諸書無言孫叔敖以病疽死者。疽乃疔且二字之誤。病將二字，皆衍文也。說文疔部：疔，痼也。人有疾痛，象倚著之形，是古疾病字止作疔。其從矢之疾，蓋疾速字，而非疾病字也。後人段疾爲疔，疾行而疔廢矣。疔且，卽疾且死也。其事亦見列子說符篇：呂氏春秋異寶篇，並作疾將死，將猶且也。彼作疾，此作疔，古今字耳。因疔且二字誤合爲疽字，後人乃於上加病字，下加將字，失之矣。

楚國之俗，功臣二世而爵祿，惟孫叔敖獨存。

樾謹按二世而爵祿文義未完疑本作二世而奪祿下文曰夫孫叔敖之請有復之丘沙石之地所以累世不奪也奪字即承此而言因奪與爵草書相似又以文在祿上故奪誤爲爵耳夫所謂孫叔敖獨存者存其復丘之地也祿也非爵也不當兼言爵韓子喻老篇作楚邦之法祿臣再世而收地亦言祿不言爵則爵字之誤無疑矣

魯君聞陽虎失

樾謹按失當讀爲逸荀子哀公篇其馬將失楊注曰失讀爲逸是其證也桓八年左傳隨侯逸杜注曰逸逃也陽虎逸卽陽虎逃古字逸與佚通故亦通作失

智伯求地於魏宣子宣子弗欲與之

樾謹按弗欲與之本作欲弗與之下文求地而弗與卽承此而言戰國趙策作魏桓子欲勿與虞之與號相恃而勢也若假之道號朝亡而虞夕從之矣

樾謹按勢字義不可通疑本作相恃而存也呂氏春秋權勳篇曰夫號之不亡也恃虞虞之不亡也亦恃號也若假之道則號朝亡而虞夕從之矣卽淮南所本號不亡恃虞虞不亡恃號故曰相恃而存也今本誤作勢者蓋因呂氏春秋此文之上有虞號之勢是也句韓子十過篇亦有虞號之勢正是也句疑淮南不當無此句因以意竄改非其舊矣

此吉祥以饗鬼神。

樾謹按吉祥下脫也字。列子說符篇論衡福虛篇並作此吉祥也。當據補。

近塞上之人有善術者。

樾謹按近謂近時也。此蓋淮南舉近事言之。故曰近。非連塞字爲義也。班孟堅幽通賦北叟頗識其倚伏。卽用此事。而云北叟者。以下文言胡人大入塞。故知是北方之塞耳。乃顏師古注漢書敍傳引此文作北塞上之人。蓋涉正文北叟而誤。非顏注之舊。是以李善注文選幽通賦止云塞上之人。若使本作北塞。則正宜引之以證北叟之義。安得刪去之。惟其是近字。故可有可無也。後漢書蔡邕傳得北叟之後福。李賢注曰北叟塞上叟也。但言塞上不言北塞上。然則淮南子原文不作北塞。明甚。而藝文類聚太平御覽引此文並作北塞上之人。則爲漢書注所誤。王氏念孫反據以訂正淮南謬矣。下文近塞之人死者十九。則當作塞上之人。漢書後漢書注文選注及諸類書所引無作近塞者。可知近字之非。然亦無作北塞者。又可見此文作北塞上之誤矣。

無害子之慮。無中於策謀。無益於國。然而心調於君。有義行也。

樾謹按調當爲周。楚辭離騷雖不周於今之人兮。王逸注曰周合也。心周於君。謂心合於君也。作調者古字通用。文子微明篇正作心周於君。

以詐僞遇人。雖愈利。後無復。

樾謹按。愈當爲愉。古愉字也。周官大司徒職。以俗教安則民不愉。釋文云。愉音偷。是其證也。愉利卽偷利。謂雖偷取利。而後不可復也。呂氏春秋義賞篇曰。雖今偷可。後將無復。至其日之夜。

樾謹按其當作期。謂所期之日之夜也。韓子十過篇正作至於期日之夜。

佞人得志。是使晉國之武舍仁而後佞。

樾謹按。後字義不可通。乃從字之誤。佞人得志。故晉國之士皆舍仁而從佞也。晉國之武。卽晉國之士。淮南一書。通謂士爲武。

陳成常果攻宰子於廷中。而弑簡公於朝。

樾謹按。攻乃殺字之誤。殺宰子。弑簡公。君臣異辭。其實一也。下文曰。廷殺宰子。是其明證。邠公作難。

樾謹按。邠昭伯魯大夫。不得稱邠公。乃邠氏之誤。上文云。邠氏介其難。是其明證也。今作邠公者。涉下文魯昭公出走而誤。又按魯昭公出走句。王氏念孫謂衍公字。以上下文皆四字句故也。然上文云。簡公遇殺。身死無後。疑此文本作昭公。昭公不稱魯。猶簡公不稱齊。後人誤加魯字。遂致句法參差。而王

氏乃議刪公字失之矣。

西屬流沙北擊遼水東結朝鮮。

樾謹按擊字無義疑馨字之誤爾雅釋詁馨也言北盡遼水也史記作起臨洮至遼東至卽有盡義哀公默然深念憤然自反。

樾謹按憤然非自反之貌。憤疑隕字之誤。周易繫辭傳夫坤隕然示人簡矣。虞注曰隕安也。馬注曰柔貌皆與自反之義合。上文孔子讀易至損益未嘗不憤然而歎。王氏念孫謂憤然當作噴然。此誤。隕爲憤猶彼誤噴爲憤皆形似而誤。古書從賁從貴之字往往相亂詳見讀書櫟志。

武王蔭喝人於樾下。

樾謹按注曰樾下衆樹之虛也。此注未得精神。篇曰當此之時得蔭越下則脫然而喜矣。注曰楚人樹上大本小如車蓋狀爲越言多蔭也。越讀經無重越之越也。此注得之。越樾古同字而前後異說疑有許高之異。繆稱齊俗道應詮言兵略人閒秦族要略八篇標目下無因以題篇四字與它篇不同或許注也因無塙證故不別言之。

子發盤罪威王而出奔。

樾謹按盤罪二字甚爲無義。盤疑本作服。服古字作𠂔與般字相似往往致誤。爾雅釋詁服宜貫公事。



也。釋文曰：服又作般。荀子賦篇：讒人服矣。楊注曰：服本或作般，並其證也。服誤爲般，因又誤爲盤耳。服者負之段字。考工記車人注：鄭司農曰：服讀爲負，是負服一聲之轉。古得通用。服罪威王而出奔，言其負罪而出奔也。高注曰：盤辟也，是其所據本已誤。

禹沐浴露雨櫛扶風脩務

櫛謹按浴字衍文。王氏念孫已訂正矣。扶字疑卽疾字之誤。隸書疾字或作疾，見圉令趙君碑。扶字作扶，見桐柏廟碑。兩形相似，故誤耳。莊子天下篇：禹沐甚雨櫛疾風，卽淮南所本。

夫地勢水東流，人必事焉，然後水潦得谷行。

櫛謹按高注曰：水勢雖東流，人必事而通之，使得循谷而行也。然循谷而行，謂之谷行，甚爲不辭。且水注谿曰谷，水之東流，豈必循谷而行乎？於義亦不可通。谷疑沿字之誤。沿字缺壞，止存右畔之沿，因誤爲谷矣。荀子禮論篇榮辱篇楊倞注並曰：沿，循也。然則沿行者循行也。高注本作循沿而行，蓋以循訓沿耳。又下文說申包胥事曰：於是乃羸糧跣足，跋涉谷行。夫申包胥自楚至秦，非必行於谷中，且其下說所經歷之地曰峭山曰深谿曰川水曰津關，乃獨以谷行二字冠之，則於文轉爲不備矣。谷亦沿字之誤。沿亦循也。申包胥恐爲吳軍所得，不敢從正路，循沿邊際而行，故曰沿行。楚策載此事曰：於是羸糧潛行，是其義也。

憤於中則應於外，故在所以感。

樾謹按：感下本有之矣二字。傳寫脫之，則文義未完。文子精誠篇正作故在所以感之矣。世俗廢衰，而非學者多，人性各有所脩短。若魚之躍，若鵲之駭，此自然者，不可損益。

樾謹按：非學者多下有闕文，或是言字，或是曰字，未敢臆補。蓋人性各有所脩短云云，乃世俗非學者之說，意謂人性之自然者，非學所能損益也。下文吾以爲不然，則淮南自爲破之之說，使未嘗鼓瑟者。

樾謹按：瑟當作琴。上文云：然而搏琴撫弦，此與相應，不容異文。然而莫能至焉者，偷慢懈惰，多不暇日之故。

樾謹按：不字衍文。多暇日者，謂其人偷慢懈惰而不學，故多暇日也。今衍不字，失其指矣。荀子脩身篇曰：其爲人也多暇日者，其出入也不遠矣。卽淮南所本。

此所謂名可彊立者。

樾謹按：彊立本作務立。上文名可務立，功可彊成。高注曰：務，事也。然則此亦當言務立。今作彊立者，乃後人據文子精誠篇改之。不知彼上文云：名可彊立，功可彊成。與此文本不相同，不得據彼以改此也。戰而身死，卒勝民治，全我社稷，可以庶幾乎。

樾謹按治字衍文。本作卒勝民全。此時但求民之全。不當計其治不治也。後人誤以全字屬下句讀。故妄增治字耳。楚策作社稷其庶幾乎無全字。然則此全字上屬無疑。

申包胥竭筋力以赴嚴敵。伏尸流血。不過一卒之才。不如約身卑辭。求救於諸侯。

樾謹按竭筋力以下。皆申包胥之言也。申包胥下當有曰吾二字。而今脫之。楚策曰。楚冒勃蘇曰。吾被堅執銳。赴強敵而死。此猶一卒也。不若奔諸侯。是其明證。

琴或撥刺枉撓。闔解漏越。而稱以楚莊之琴。側室爭鼓之。

樾謹按側室二字無義。高注曰。側室或作廟堂也。廟堂亦無義。疑淮南原文本作則尙士爭鼓之。尙與上通。尙士卽上士也。考工記桃氏爲劍。弓人爲弓。並有上士服之之文。故此言琴亦曰上士鼓之也。上文曰。今劍或絕側羸文。齧缺卷鉞。而稱以頃襄之劍。則貴人爭帶之。兩文相對。此曰則上士爭鼓之。猶彼曰則貴人爭帶之也。因段尙爲上。而尙士二字誤合爲堂字。淺人因改則字爲廟字。高所據或是也。又因古本實是則字。遂改堂字爲室字。而加人旁於則字之左。使成側字。高所據本是也。皆非淮南之舊。

藜藿之生。螻蟻然。日加數寸。不可以爲櫨棟。

樾謹按高注曰。櫨屋也。然則正文及注文並當作廬。漢書食貨志注曰。廬田中屋也。故高注訓廬爲屋。

以爲廬棟猶曰以爲屋棟。說山篇曰：郢人有買屋棟者，彼云屋棟，此云廬棟，其義一也。因棟字從木，遂并廬字而亦誤從木作櫨。櫨者柱上桷也。若果是櫨字，何得以屋訓之？本篇標抹櫨櫨，高注曰：櫨柱上桷，卽梁上短柱也。然則高氏非不知柱上桷之義，何以於此篇必變其說乎？且以文義言之，日加數寸，言其長也。屋棟之木必取其長，若櫨則短柱耳，以方木爲之，其形如斗，故亦謂之斗拱，非必長木乃可爲之，何取於日加數寸者乎？

一言聲然大動天下秦族。

櫨謹按聲然二字，文不成義，聲當作磬。涉上文四海之內寂然無聲而誤也。周書太子晉篇：師曠磬然又稱曰：孔注曰：磬然，自嚴整也，是其義也。下文：故聖人者懷天心，聲然能動化天下者也。聲然亦磬然之誤，能讀爲而。

奚仲不能旅，魯般不能造。

櫨謹按旅字無義，疑放字之誤。廣雅釋詁：放，效也。言天地所生者，雖奚仲不能放效之，雖魯般不能造作之也。高注曰：旅，部旅也，其所據本已誤。

故聖人懷天氣，抱地心。

櫨謹按文子精誠篇作懷天心，抱地氣是也。上文云：故聖人者懷天心，則此文亦當作懷天心矣。懷天

心之文。既與文子同。則下句亦當作抱地氣矣。傳寫誤耳。上文故聖人者懷天心下。疑亦當有抱地氣三字。今闕此句。文義不備。

### 巢枝穴藏。

樾謹按枝乃歧字之誤。巢歧穴藏。相對成義。史記梁孝王世家索隱引通俗文曰。高置立歧棚曰歧閣。卽此歧字之義。巢高故言歧。穴深故言藏。

### 乃澄列金木水火土之性。故立父子之親而成家。

樾謹按故立當從文子上禮篇作以立。王氏念孫已訂正矣。惟木水二字傳寫誤倒。當作水木。蓋金水木火土相生之序。故本之以立父子之親也。

故勇者可令進鬪。而不可令持牢。重者可令埴固。而不可令凌敵。貪者可令進取。而不可令守職。廉者可令守分。而不可令進取。信者可令持約。而不可令應變。五者相反。聖人兼用而財使之。

樾謹按勇者當作輕者。上文云。故用兵者或輕或重。或貪或廉。此四者相反。而不可一無也。輕者欲發。重者欲止。貪者欲取。廉者不利非其有。然則此承上文而言。亦當以輕重貪廉對舉。其本作輕者明矣。淺人不尋上下文理。見有進鬪之文。妄改爲勇者。非其舊也。又按上言四者。而下言五者。義亦可疑。且輕與重反。貪與廉反。所謂四者相反也。信則與何者相反乎。乃云五者相反。義不可通。疑信者可令持。

約而不可令應變十二字。淺人竄入。淮南本無此句。五者亦作四者。與上文相應。因竄入信者句。遂改四爲五以合之。而不悟其不可通耳。

小見不達必簡。

樾謹按小上當有道字。因涉上句小蘖破道。兩道字適相連。寫者之於上句道字下作二小畫以識之。而遂脫去也。見乃則字之誤。則字闕壞。止存左旁之貝。因誤爲見矣。達下當更有達字。亦因止作二小畫而脫去也。其文本曰。道小則不達。達必簡。文子上仁篇作道小必不通。通則必簡。與此文小異而義同。若如今本。則不成文理矣。

故不言而信。不施而仁。不怒而威。是以天心動化者也。

樾謹按天心動化。本作無心動化。因無字作无。故誤爲天耳。文子上仁篇亦作天心。誤與此同。而精誠篇曰。一言而大動天下。是以无心動化者也。无字不誤。可據以訂正上仁篇。卽可以正淮南子矣。

夫欲治之主不世出。而可與興治之臣不萬一。

樾謹按興字衍文。蓋卽興字之誤而衍者。高誘注呂氏春秋觀世篇引此文曰。欲治之君不世出。可與治之臣不萬一。是其明證。文子下德篇亦無興字。

乘衰而流。

樾謹按衰乃等衰之衰。水之從高流下，必有次第，故曰乘衰而流。高注訓衰爲下，未得。王氏引之，因以衰爲衰之誤字，更非矣。

故百川並流，不注海者，不爲川谷。

樾謹按既云百川，則不得又云不爲川。川字衍文也。後人因下句云不爲君子，故妄增川字，使字數相當耳。文子上義篇，正作不注海者不爲谷。

使人左據天下之圖，而右刎喉。

樾謹按刻下當有其字。文子上義篇作左手據天下之圖，而右手刎其喉。

天下大利也，比之身則小，身之重也，比之義則輕。

樾謹按身之重也，本作身。句所重也，與天下句大利也，一律。涉上下句兩言比之而誤。文子上義篇作身之所重也，比之仁義則輕。所字不誤，之字亦涉上下句而衍。

昭王奔隨，百姓父兄攜幼扶老而隨之，乃相率而爲致勇之寇，皆方面奮臂而爲之圖。

樾謹按乃相率而爲致勇之寇，文不成義。當作乃相率爲勇而致之寇，與下句相對，致如致師之致。寇卽謂吳人也。言致死於吳也。下文曰各致其死，卻吳兵復楚地，是其義也。王氏念孫改爲相率致勇而爲之寇，然百姓卻敵，初非爲寇，於義不可通矣。

天地之間無所繫戾。

樾謹按繫戾當爲擊戾。主術篇曲得其宜無所擊戾是也。擊戾猶拂戾也。擊者敲之段字。說見荀子脩身篇。

故因其患則造其備。

樾謹按因乃困字之誤。言困於患難則造作其備也。與下句犯其難則得其便一律。

又況知應無方而不窮哉。犯大難而不懼。見煩繆而不惑。晏然自得其爲樂也。豈直一說之快哉。

樾謹按知應無方而不窮哉。句衍知字哉字。應無方而不窮。犯大難而不懼。見煩繆而不惑。三句一律。皆蒙又況二字爲文。因涉上文欲知高下欲知輕重欲知遠近而誤衍知字。則與下二句不一律。遂於句末加哉字。使自爲句。而文義隔絕矣。

根深則本固。

樾謹按根卽本也。不得云根深則本固。本乃末字之誤。上文云草木洪者爲本而殺者爲末是也。後人習於根本之說遂妄改爲本字失其義矣。根深則末固與下句基美則上甯一律。說文本部曰木上曰末。然則末卽木之上也。末固上甯文異而義同。王氏念孫據上文猶城之有基木之有根謂本當作木。然則下句上字亦當作城字矣。下句不言城知此句亦不言木。王說非也。



師曠曰。此亡國之樂也。大息而撫之。

樾謹按撫下脫止字。本作大息而撫止之。史記樂書作師曠撫而止之。韓非子十過篇作師曠撫止之。論衡紀妖篇作曠撫而止之。並有止字。是其證。

故事有鑿一孔而生百隙。樹一物而生萬葉者。

樾謹按生百隙本作開百隙。涉下句而誤也。下文曰。所鑿不足以爲便。而所開足以爲敗。是其證。

懼爲人之惛惛然弗能知也。要略

樾謹按爲字涉下句多爲之辭。博爲之說而衍。本作懼人之惛惛然弗能知也。與下文又恐人之離本就末也一律。衍一爲字。則文不成義。

發號施令。以時教期。

樾謹按期當讀爲基。宣二年左傳。楚人基之。杜注曰。基。教也。文選西京賦。人基之謀。薛綜注曰。基。教也。是基與教同義。故曰以時教基。

標舉終始之壇也。

樾謹按高注曰。壇。場也。然終始不當以壇場言。此注未得其義。壇當讀爲壇。說文女部。壇。一曰傳也。精神篇。以不同形相壇也。高注曰。壇。傳也。終始之壇。卽終始之傳。作壇者。段字也。

一盃酒白蠅漬其中

樾謹按酒白二字文不成義疑本作白酒而傳寫誤倒之周官酒正職鄭注曰昔酒今之曾久白酒然則白酒正漢時常語藝文類聚襍器部引此白作甘蓋因已倒爲酒白故臆改爲甘字一盃酒甘亦於義不安未足據也

# 諸子平議卷三十三

楊子太元

火魁頤水包貞中

樾謹按諸家本皆作大魁頤。溫公從王涯本作火魁頤。與水包貞對文是也。惟魁字義當從范望訓藏。周次三吉凶之魁。積次七魁而顏而元告篇神之魁也。范並曰魁藏也。魁之訓藏他書所無。而范注屢見必有所受之說。文衣部裹袖也。一曰藏也。訓魁爲藏。蓋讀魁爲裹。魁裹並從鬼聲。故得通也。說文包部。包象人裹妊。是則裹與包同義。故曰火裹頤水包貞。漢書外戚傳晉灼注曰包藏也。是裹包皆藏也。測曰曾曾之包。任臣則也。言包不言裹。以其義同耳。因段魁爲裹。學者但知有魁首之義。而范注遂莫之從矣。

拔車山淵微

樾謹按山疑出字之誤。言拔其車而出之於淵也。范望注雖亦有山字。然曰民溺於世。惟大位能濟之也。則其所據本必作拔車出淵。若作山淵。則淵可言溺。山不可言溺也。注中山字。或後人竄入。非其舊耳。次六測曰將車入虛。道不得也。拔車出淵。與將車入虛。文正相對。

諸子平議

楊子太元

將其車入于丘虛。

樾謹按丘字衍文也。次七出險登丘。或牽之牛。范注曰。火生土故爲丘。彼丘字有注。此丘字無注。知所見本無丘字也。因注云。將車入險。在於丘虛之中。故後人於經文增入丘字。不知注有丘字以足句耳。其下云。車以喻君。君而隨臣。臣道不正。猶入虛也。是可爲經文無丘字之證。測曰。將車入虛。道不得也。亦無丘字。增次七丘貞。范注亦曰。火生土。故言丘。可和七有丘象。六無丘象矣。且以義言之。次五曰。拔車出淵。次六曰。將其車入于虛。次七曰。出險登丘。蓋由淵而虛而丘。經文固自有次第也。今出淵誤作山淵。入于虛誤作入于丘虛。全失其義矣。

閑于遽條。或寢之慮。閑。

樾謹按范本作遽條。王涯宋惟幹本作遽條。溫公從宋衷陸績本作遽條。然止字體之小異。古文以聲爲主。不足爲異同也。惟范訓遽條爲不能俯者。王訓遽條爲傳舍。則皆失之。方言曰。簠。宋魏之間。或謂之遽。其麤者謂之遽條。上文次六。閑黃埃。席金第。王曰。埃。古雉字。謂城也。第。簠也。此云閑于遽條。或寢之慮。慮則非黃埃之固。遽條則非金第之安。兩贊之義正相反。然則遽條當從方言訓簠矣。

赤臯播關

樾謹按王曰。赤臯者。陰陽交爭殺傷之象也。播於遠關之外。然播于遠關之外。而但曰播關。似爲不辭。

播疑當作燔。或字之誤。或聲同而借也。干次八曰。赤舌燒城。此云。赤鼻燔關。兩文相近。燔猶燒也。關猶城也。

閉門以終虛。

樾謹按終衍文也。測曰。閉門以虛。終不可實也。贊辭終字。卽涉測辭而衍。

眇于謙少。

樾謹按范注曰。眇。微也。溫公同。然測曰。不見謙也。則是不見解眇字。當爲眇能視之眇。易釋文。眇。盲也。

少持滿。今盛後傾。

樾謹按持疑特字之誤。惟其以滿自恃。故今盛而後傾也。若作持滿。則與持盈同。詩鳧鷖篇序曰。能持盈守成。國語越語曰。夫國家之事。有持盈有定傾。不當反以致傾危也。

女不女。其心予。

樾謹按予猶我也。女子從人者也。今其心惟知有我。斯不女矣。所以覆夫謂也。范注曰。予。我也。得其旨矣。又曰。我謂五也。則未必然。溫公謂予與與同。非是。

殺生相午。戾。

樾謹按范本作相矢，然其注云：矢，乖也。則疑矢乃失字之誤。因其下云：射兕東南而矢西北，故乖。後人遂改失爲矢，不知范引次五之文，以說此贊射兕東南而矢西北，正見乖失之意。今改經作相矢，改注文作矢乖也，不可通矣。必非范本之舊。諸家本作相午，違悟之與乖失，義亦不甚遠耳。

思登于天，谷在于淵上。

樾謹按谷當作谷，字之誤也。谷者卻之借字。古文以聲爲主，卻從谷聲，故卽以谷爲之。廣雅釋言：卻，退也。卻入於淵，猶退入於淵也。思登天而退入淵，正由上無根之故。今字譌作谷，失其義矣。

陽扶物如鑽乎堅干。

樾謹按范王本作陽氣扶物而鑽乎堅。溫公從二宋陸本，然諸首辭多言陽氣者，如中首曰：陽氣潛萌于黃宮。周首曰：陽氣周神而反乎始。礪首曰：陽氣微動。閑首曰：陽氣閑於陰，皆是也。范王本作陽氣，未始不可從。至如與而，古書通用。二宋陸本作如鑽乎堅，卽而鑽乎堅也。增首云：日宣而殖。二宋陸本亦作如。溫公於彼不從，於此從之，何歟。

蚩蚩于干，于干，或錫之坏。

樾謹按干，飴未詳何義。范注曰：干，聚也。飴，美食也。溫公曰：干以喻高大，飴，錫也。以喻甘美。其義皆似未安。干，飴疑甌飴之借音。說文瓦部：甌，甌謂之飴是也。甌從區聲。禮記曲禮篇鄭注曰：嫌名謂聲音相近。

若禹與雨。丘與區也。是古音丘與區同。故丘可讀爲甌。至飴之與甌。並從台聲。義更可通矣。范曰。未成瓦曰坏。温公說同。所求者甌。甌而或錫之以未成瓦之坏。故測曰。蚩蚩之干。錫不好也。坏之與甌。實爲同類之物。但不好耳。若釋飴爲美食爲錫。則與坏絕遠矣。豈楊子屬辭之旨乎。

#### 四馬就括奏

櫛謹按括當讀爲廕。說文广部。廕。芻橐之藏也。軸折衡捫。則車不可行。故四馬反而就廕也。廕從會聲。括從昏聲。兩聲相近。話籀文作誼。卽其例也。詩車輦篇。德音來括。毛傳曰。括。會也。括之訓會。亦以聲近而義通。儀禮士喪禮。髻用組。鄭注曰。古文髻皆爲括。尙書禹貢篇。杅榦括柏。史記集解引鄭注曰。柏葉松身曰杅。爾雅釋木篇則曰。杅。柏葉松身。然則以括爲廕。猶以括爲髻。以杅爲杅矣。迷腹達目。以道不明也。達。

櫛謹按范本如此。温公從之。宋。陸本作以不道明。似於義爲長。蓋必達於腹。而後達於目。此明之以道者也。今迷腹而達目。則明不以道矣。是謂以不道明。范本誤。

#### 大圈閱閱。小圈交之。交。

櫛謹按管子幼官篇。強國爲圈。弱國爲屬。然則范望訓圈爲國。正得其解。大圈。小圈。猶大國。小國。謂小國交於大國也。王曰。圈者殺羞之器。温公謂圈養畜閑也。並與交之義未合。

不禍禍倭天活我倭、

樾謹按測曰禍不禍非厥說也疑贊辭亦當作禍不禍范注曰近比於九秋氣將降禍不爲禍正釋禍不禍之義是范氏作注時經文未倒也下云故言不禍禍則後人據已倒之經文而改之

進以高明其道迂也進

樾謹按迂大也蓋卽訃之段字爾雅釋訃訃大也字亦作盱周易豫六三盱豫釋文引王肅注曰盱大也又或作于書大傳名曰朱子鄭注曰于大也蓋于盱訃迂並聲近而義通禮記文王世子篇況迂其身以善其君乎正義曰迂猶廣也大也是其義矣進以高明故其道大范注以迂遠釋之非是

動之丘陵失澤朋

樾謹按范注曰朋類也此未得朋字之義古朋字與崩通史記齊太公世家隰朋集解引徐廣曰朋或作崩周易復彖辭朋來无咎漢書五行志引作崩來無咎並其證也此贊朋字當讀作崩言高以下爲基其下無澤則丘陵不能成其高而致崩壞矣測曰動之丘陵失下危也以失下危明失澤朋之義可知朋之當爲崩矣

柔嬰兒于號三日不嘔夷

樾謹按二宋陸王本嘔作嘔溫公從范本作嘔然實以作嘔爲長蓋此贊三句柔一字爲句嘔與柔韻



若作嘔。失其韻矣。玉篇口部。嘔。於求切。老子曰。終日號而不嘔。嘔。氣逆也。而今本老子亦皆作嘔。惟傳奕本作數。尙爲近之。

或飫之徒。

樾謹按王曰。徒。猶空也。或飫以食。徒。空爾也。此說於義未安。溫公謂雖有美食。不能食。適足飫其徒屬而已。然按之經文。亦未允協。測曰。食不足嘉也。豈謂有美食而不能食乎。徒。蓋塗之段字。或飫之塗。卽所謂嘖爾而與之。行道之人不受者。故曰。食不足嘉也。列子天瑞篇。食于道。徒者。道徒卽道塗。故釋文曰。徒。道旁也。以徒爲塗。正與此同。

臂膊脛如等。

樾謹按王。小宋本脛作脛。然脛爲鳥胃。於此殊非所施。溫公從大宋范陸本作脛。言臂大如脛。不可使也。然脛如乃形容之詞。與下句股脚膜如一律。若以脛如爲如脛。則下句膜如當爲如膜。溫公曰。膜音噴。肉脹起也。然則兩句不一律矣。脛當訓直。漢書楊惲傳注。脛脛直貌。是也。臂膊脛如。言其不能屈伸也。爾雅釋詁。頰直也。禮記曲禮篇。鮮魚曰脰祭。鄭注曰。脰直也。脛與頰脰聲並相近。

丈人扶孤。豎子提壺事。

樾謹按王曰。丈夫有扶持孤弱之事。然居次七曰。老夫揜車。少女提壺。與此贊辭義相近。揜車與提壺。

並實指一事言。則扶孤與提壺亦當如之。若謂扶持孤弱之事。則虛實不倫矣。孤疑弧字之誤。國語晉語。侏儒扶盧。韋注曰。扶。援也。然則扶弧者。援弧也。孟子告子篇。思援弓繳而射之。是其義也。丈人扶弧。小子提壺。弧壺對文。與周易睽上九。先張之弧。後說之壺。相似。太元本準周易。楊子所見周易。蓋與京馬鄭王本同也。

懷威滿虛歟

樾謹按范注曰。虛。空也。雖威而消。故曰滿虛。然次三曰。戴威滿頭。句法與此同。若訓虛爲空。則與滿成兩義。以次三之文例之。殆非然也。淮南子俶真篇。虛室生白。高注曰。虛。心也。蓋虛訓空。故亦訓孔竅。淮南子汜論篇。若循虛而出入。注曰。虛。孔竅也。訓孔竅。故亦訓心矣。史記吳起傳。批亢擣虛。猶言批其亢。擣其心也。管子心術篇。心者智之舍也。淮南子詮言篇。虛者道之舍也。是虛與心義相近。更以本經證之。斷初一日。斷心滅斧。失初一日。刺虛滅刃。滅刃與滅斧同。則刺虛與斷心同矣。此云懷威滿虛。猶云懷威滿心。與戴威滿頭一律。盛次三。懷利滿胷。次五。何福滿肩。末一字皆屬形體。更可證矣。

不田而穀。穀于揀祿

樾謹按宋陸王本揀作棟。溫公從范本作揀。言剛果所施。施于擇祿而已。然揀祿之文。義殊未安。范望注云。五爲天子家。性毅毅然自亢。處高食祿。故不田也。是范氏並無揀擇之說。尋繹其意。所謂自亢者。

正釋棟字之義。周書作雒篇孔晁注曰：重亢，重棟也。是棟與亢同。范氏所據本，必亦作棟，故以亢字釋棟字。又以處高中明之，見經文所謂毅于棟，祿者棟則高亢之意，祿則但知食祿之謂也。若是棟字，則注何以不及，而所謂自亢與處高者，何指乎？次五毅于棟柱，卽承此贊而言。毅于棟祿，處高食祿而已。毅于棟柱，則處高而有楹柱之功，下徒食祿也。兩贊意本相承，後人不達，因棟祿連文，他書罕見，遂妄改爲棟字，非范本之舊。溫公從之，誤也。

躐戰啗啗，若熊若羆，衆。

櫟謹按：躐卽康字。說文豕部：康，鬪相凡不解也。從豕，虎之鬪不相捨，是康之本義。爲兩獸相鬪，老子曰：猛獸不據鹽鐵論曰：虎兇相據，並卽康字也。彼從手作據，此從足作躐，皆古文借字耳。躐戰卽以熊羆言，溫公謂躐當作劇，非是。

其志資戚親。

櫟謹按：范注曰：資，用也。二爲平人，未仕於世，志在親戚骨肉。王曰：資，取也。戚，親也。其志惟取於相親附也。此二說並非經義。初一日：其志齟齬。此曰：其志資戚。文法正同。資戚與齟齬並雙聲字也。資讀爲咨。周易略例：不諮于闇，釋文：諮本作資，是其例也。資戚猶咨戚，訓用訓取，分資戚爲二義，胥失之矣。準繩不市，法。

樾謹按范注曰甫始也然準繩不始甚爲不辭溫公訓爲美義亦未合甫當讀爲專說文寸部專布也昭三年左傳寡君使虎布之杜注曰布陳也然則準繩不專猶言準繩不陳禮記經解篇繩墨誠陳是其義矣

幽遇神及師夢遇

樾謹按范注師衆也此未得其解也衆次七師孕暗之哭且嘖范曰師盲者也曹次三師或導射范曰師爲瞽者也此贊師字亦當同之蓋所遇者神已爲幽矣而又見夢於無目之人幽益甚也

兌人遇雨

樾謹按易繫辭傳潤之以風雨又曰上棟下宇以待風雨虞注並曰兌爲雨然則兌本有雨象蓋雨者水氣兌爲澤故爲雨也兌人言處川澤之人以兌人而遇雨故測曰還自賊也范注以兌爲巫說之雖亦用易義然非楊子之旨

陽蓬其外大

樾謹按范本蓬作逢溫公從二宋陸王本作蓬宋曰蓬猶盛也其實逢亦盛也禮記儒行篇衣逢掖之衣鄭注曰逢猶大也荀子非十二子篇其衣逢楊倞注曰逢大也逢訓大則亦卽與盛同義矣蓋逢與豐通淮南天文篇五穀豐昌史記天官書豐作逢是其證也訓大訓盛皆豐字之義是故作逢者豐之

段字作蓬者。逢之異文。溫公疑逢無盛義。必作其葉蓬蓬之蓬。始得訓盛。是猶未達乎古訓也。雉之不祿。而鷄蕞穀文。

樾謹按宋陸本而下有不字。蓋卽而字之誤而衍者。王本無而字。則更非矣。溫公從范本。是爲得之。惟未解蕞字之義。方言蕞餘也。秦晉之間。炊薪不盡曰蕞。廣雅釋詁亦曰蕞餘也。雉之不祿。而雞蕞穀言雉不祿。而雞有餘穀也。

子序不序。永。

樾謹按上序字疑衍文。蓋卽子字之誤而衍者。王云子而不居子之次序。則祭祀賓客長無主矣。疑王涯所據本正作子不序。而溫公不言有異同。蓋寫者改從旣衍之本矣。居次三。長幼序。子克父。宋陸王本並同。而范本作長幼序。誤亦類此。

決欲招寇。積。

樾謹按王本決作快。當從之。方言。逞曉懷苦快也。自關而東。或曰曉。或曰逞。自關而西曰快。然則快欲猶逞欲也。逞欲故招寇矣。諸家作決。乃字之誤。溫公從之。非是。

前尸後喪。洗。

樾謹按尸當訓陳言。前雖陳列之。後終喪失也。故測曰。終以貪敗也。王曰。危亡之道。相繼而至。故前尸

後喪未得其旨。

爾儀而悲坎我西階內。

樾謹按范注曰坎憂也親迎之道婦升西階有代親之義故悲也然坎我西階甚爲不辭且旣言悲不必更言憂矣范說非也坎乃次字之誤次者卽也說文盜古文作聖是次卽古音相同尙書康誥勿庸以次女封荀子致士篇宥坐篇並引作勿庸卽是次與卽通用也次我西階者卽我西階也范引婦升西階爲說是矣。

眇提明晦。

樾謹按眇當從小宋音眇云一目盲也范云眇目不明也意亦與眇同眇從目少聲眇從目肖聲少與肖並從小聲其聲同也本或誤從日王涯以爲古宵字然宵何以從日乎殆不然矣提字之義自來莫得其解王云提明自照提明謂燭之類其說至爲鄙陋提當爲睇說文目部睇迎視也眇睇明謂眇而視明正周易眇能視之義范本明下有德字因測而誤溫公已正之。

天禍以他窮。

樾謹按他古字作佗說文人部佗負何也負何故有加義詩小弁篇予之佗矣傳曰佗加也字亦作挖易訟上九終朝三褫之鄭本作挖云三加之也佗挖字異義同然則天禍以他猶曰天禍以加故測曰

逢不幸也。范注以爲不偶天禍，非是。王曰：咎非他作，亦於文義未合。

車疊馬擗，行可鄰也。<sub>止</sub>

樾謹按：大戴記子張問入官篇，故不先以身，雖行必鄰也。盧注訓鄰爲鄰，蓋鄰者遴之段字。說文辵部，遴，行難也。行難則宜止而不行，故亦得訓鄰。此云行可鄰也，謂其行可以鄰退也。范注謂止於鄰里，失之矣。

弓善反，弓惡反。<sub>止</sub>

樾謹按：范注云，善反，詩云四矢反兮，言反其故處也。惡反者，不善發則徧然反也。此注非是。弓善反，弓惡反，言弓善者亦反，弓惡者亦反。與下文善馬很惡馬很，義正一律。不曰善弓惡弓，而曰弓善弓惡，故與下文錯綜其辭。見文法之變，亦猶論語迅雷風烈，楚辭吉日兮辰良之比耳。善惡以弓言，不以反言，注以善反惡反爲說，則兩反字義異矣。

成微改，改未成而殆。<sub>成</sub>

樾謹按：殆當讀爲怠。詩元鳥篇，受命不殆。鄭箋云，受天命而行之不解殆。論語爲政篇，思而不學則殆。何晏注曰：徒使人精神疲殆。解殆與疲殆，其字並當作怠，而作殆者，古字通也。此贊言成之尙微，而改之又改，則未及其成而先已解怠矣。故測曰：不能自遂也。王以危殆釋之，非是。

羈角之吾勸、

樾謹按吾當讀爲牙。後漢書崔駰傳注。童牙謂幼小也。是其義也。牙吾古同聲。故得通用。猶駟吾之或爲駟牙矣。管子海王篇。吾子食鹽二升少半。尹注曰。吾子謂小男小女也。與此吾字義同。王曰。吾者。吾吾然無所歸之貌。此未得其義。而曲爲之說。

闕也。皆合二而密也。成用一元錯、

樾謹按成乃咸字之誤。咸用一與皆合二相對爲文。范注曰。二氣協和而成一。是其所據本已誤矣。親附疏。割犯血。

樾謹按血與疏對文。則血是親近之意。猶言骨肉也。

疑者提之。元攤、

樾謹按范注曰。提猶正也。然提無正義。且於文亦未合。提當爲題。說文見部。題顯也。從見是聲。疑者題之。謂使之明顯也。提亦從是聲。故得通用耳。

織也入歲、

樾謹按歲字無義。當讀爲歲。說文大部。歲空大也。玉篇大部。歲空也。空與孔同。謂其纖細者可入乎孔穴之中也。



榆漏率刻元瑩、

樾謹按范注曰榆猶寫也。則榆當讀爲榆。說文手部榆引也。榆訓引。故得訓寫。作榆者段字。或字之譌也。

嘖情也。抽理也。瑩事也。昭君子之道也。

樾謹按上云陰陽所以抽嘖也。從橫所以瑩理也。明晦所以昭事也。此當云抽嘖也。瑩理也。昭事也。方與上合。今抽嘖誤作嘖情。情字蓋卽嘖字之誤而衍者。於是移抽字以易下句瑩字。而瑩理誤作抽理矣。又移瑩字以易下句昭字。而昭事誤作瑩事矣。至昭字無下句可易。因置之下句之首。楊子原文本作抽嘖也。瑩理也。昭事也。君子之道也。今作昭君子之道也。此昭字卽昭事之昭。其致誤之由。尙歷歷可指耳。

爲猛。元數、

樾謹按許翰曰唐人避諱。書多改虎爲猛。此字疑當作虎。而未有本證定。然范注曰金堅剛也。則晉時已作猛矣。非唐人改也。又按以虎爲猛。楊子書固自有之。養次七小子牽象。婦人徽猛。君子養病。范注曰婦人謂四三爲虎。而四在前。故徽猛。然則以虎爲猛。亦非自唐人避諱始也。若謂彼文正避唐諱而改。則固不然。象猛養三字爲韻。若本文作虎。則非韻矣。故知不然也。

爲大哆。

樾謹按許翰曰丁未無此一句。今考范望本此句無注。是范本亦無此一句也。當刪。

辰辰未戌丑。

樾謹按許曰多作辰戌丑未。今從丁宋本。然范注曰辰取其延長。未取其冥昧。戌取其悉戌。丑之言畜也。是亦以辰未戌丑爲次。今作辰戌丑未。寫者誤耳。非范本之舊。

二爲方沮。

樾謹按沮與且通。婁壽碑榮且溺之耦耕且卽沮也。方沮當爲方且。廣雅釋詁方始也。莊子庚桑楚篇與物且者釋文且始也。是方且並有始義。一爲規模。二爲方且。言規模既定始爲之也。范注謂將有事而自止非是。

蒙南方也。夏也。物之修長也。皆可得而戴也。元文。

樾謹按許昂黃伯思本均作戴。范注曰枝葉已成。蒙覆於上。皆可戴者。是范本亦作戴。然戴載自是兩義。蒙則戴也。而非戴也。不當并爲一談。而以戴載說蒙字之義也。章簪丁謂郭元亨本並作戴。戴與蒙義合。自以作戴爲長。

福則有膊。禍則有形之謂直。

樾謹按膊字無義。乃端之段字。膊從專聲。端從耑聲。兩聲相近。禮記雜記篇載以輶車。注云輶或作搏。史記屈原賈誼傳何足控搏。案隱云本作控揣。文選長笛賦冬雪揣封乎其枝。注曰揣與團古字通。並專聲聲近之證。膊之爲端。猶搏之爲輶。搏之爲揣。團之爲揣也。福則有膊。猶云福則有端。正與禍則有。形。文義一律。

日月相斛。星辰不相觸。元規

樾謹按斛與觸同義。御覽八百三十引風俗通曰。斛者角也。廣雅釋言曰。角。觸也。然則相斛猶相角。相角猶相觸也。日月歲十二會。故相斛。星辰不相干犯。故不相觸。斛與觸變文以成句耳。其義一也。范曰。斛。量也。非是。

與物旁震。元圖

樾謹按丁謂本與作與。是也。下文云。與物時行。正與此句一律。涉上文百卉權輿。下文天地與新。故誤作與耳。

南征不利遇崩光。

樾謹按章簪本作遇乎崩光。宋惟幹本作遇於崩光。並非。范注曰。陽而南征。與陰相遇。光明崩毀。故不利。然則遇崩光。謂相遇而崩毀其光。若作遇乎崩光。或作遇於崩光。均不可通矣。讀者因此篇多四字。

爲句故妄增之。然下文曰：天地人功成會貞，亦七字句。

天句其道

樾謹按詩信南山篇：維禹甸之。周官稍人注引作維禹讎之。是甸與讎通。古田陳同聲。甸通作讎。亦猶齊陳氏之爲田氏也。說文支部：讎，列也。今經典皆以陳爲之。天甸其道者，天陳其道也。范注曰：甸之言挺也。言天挺立其道於上，未得其義。

歲寧悉而年病元告

樾謹按日躔黃道一周，歷春夏秋冬四時，共三百六十五日有奇，是爲一歲。月離白道一周，歷朔弦望晦復，追及日而合朔，十二合朔共三百五十四日有奇，是爲一年。歲與年較多十一日弱，所謂氣盈也。年與歲較少十一日弱，所謂朔虛也。歲寧悉，卽氣盈之謂。年病卽朔虛之謂。寧乃語詞，諸本或作能，能亦語詞也。悉者盡也。自立春至大寒而歲實始盡，然正月朔日立春，至十二月晦日，尙未至大寒，是年病也。病者病其不足也。於是三年必置閏焉。故下文曰：十九年七閏，天之僨也。范注曰：一歲之數足則年安，不足則病，混歲年而一之，然則足與不足，於何見之乎。

# 諸子平議卷三十四

楊子法言一

羿逢蒙分其弓學行、

樾謹按分字之義不可通。當讀爲焚。文十一年左傳獲僑如之弟焚如。史記魯世家作焚如。爾雅釋天焚輪謂之殯。釋文作焚。曰本或作焚。然則分之通作焚。猶焚之通作焚也。羿逢蒙焚其弓。正與下文良舍其策。般投其斧一律。

川有瀆。山有嶽。高而且大者。衆人所不能踰也。

樾謹按李軌注曰。言諸賢之有妙蘊。猶百川之有四瀆。衆山之有五嶽。而川可度。嶽可登。高而且大者。惟聖人之道。如天不可升也。宋咸曰。觀正文之意。當云高而且大者。衆人所不能踰也。脫其不字矣。何以明之。或人問般。羿周孔之名如一。楊以川有瀆。山有嶽。而對之。是謂般羿之徒。猶川山。周孔之道。猶嶽瀆。自然小大不同。高低有異矣。故下篇亦云。仲尼之道。猶四瀆也。由是詳之。楊之旨。皆以嶽瀆比聖人明矣。注不能辨。但依誤文以爲之解。反謂聖人之道。如天不可升。且正文安有如天之說哉。吳祕曰。周孔顏子之道。如山川之有嶽瀆。豈曰處一而已。羿逢蒙良般之蘊。如山川高而且大者。甚衆人所能

踰也。今按正文初無如天之說。李氏增益其義。誠非楊子雅意。然宋著作謂其依誤文爲解。則非然也。李云高而且大者。惟聖人之道。如天不可升也。則其所據本作高而且大者。衆人所不能踰也。明矣。使無不字。何以有天不可升之說哉。推尋李意。直以論語有他人仁陵仲尼日月之說。疑嶽瀆未足擬聖人之高大。故必極之於天。然後見人之不能踰也。以是言之。李本當有不字。宋氏糾之。反爲疏矣。惟吳司封本實無不字。故云羿逢蒙良般之藝。如山川高而且大者。甚衆人所不能踰也。音義謂俗本脫不字。殆指此而言。然也。字古通作邪。荀子正名篇。其求物也。養生也。粥壽也。楊倞注曰。也皆當爲邪。問之辭。今依此讀之。衆人所不能踰也。猶曰衆人所不能踰邪。雖無不字。其旨亦同。疑楊子原文本如此。其有不字者。乃後人不達古語而臆加之。音義所斥爲俗本者。轉是古本矣。

桐子之命也。

樾謹按桐者。侗之段字。法言序云。天降生民。倅侗顯蒙。卽此桐子之桐。序用正字。經用段字耳。李注曰。桐洞也。桐子洞然。未有所知之時。夫洞有通達之義。故淮南子原道篇。遂兮洞兮。高誘注曰。洞達也。此乃云洞然未有所知。義不可通。疑注文洞字卽侗字之誤。注本云。桐侗也。侗子侗然。未有所知之時。蓋不破經字。而卽以訓詁明段借。用毛傳例也。莊子山木篇。侗乎其無識。正李注所本矣。宋著作以經文桐字爲誤。又譏李氏依誤文訓爲洞。恐皆失之。至吳司封以桐子爲太甲。則不達段借之旨。務穿鑿而

喜新奇。宋以後說經者多此類矣。

或曰顏徒易乎。曰晞之則是。曰昔顏嘗晞夫子矣。正考甫常晞尹吉甫矣。公子奚斯常晞正考甫矣。不欲晞則已矣。如欲晞孰禦焉。

樾謹按晞之則是上已有曰字。而其下又有曰字。明世德堂本遂將上曰字刪去。然晞之則是明是楊子應語。不得以爲或人問也。以文義求之上曰字不當刪。下曰字當在正考甫句上。因或人問顏徒易乎。故應之曰晞之則是。昔顏嘗晞夫子矣。又恐或人聞此疑夫子大聖非人所能晞。故又曰正考甫嘗晞尹吉甫矣。公子奚斯嘗晞正考甫矣。不欲晞則已矣。如欲晞孰禦焉。古人之文往往有一人之辭。而亦加曰字以別之者。若禮記檀弓篇公瞿然失席曰是寡人之罪也。曰寡人嘗學斷斯獄矣。哀十六年左傳乞曰不可得也。曰市南有熊宜僚者。若得之可以當五百人矣。論語憲問篇子曰若臧武仲之知公綽之不欲。卞莊子之勇。冉求之藝。文之以禮樂。亦可以爲成人矣。曰今之成人者何必然。微子篇齊景公待孔子曰若季氏則吾不能以季孟之間待之。曰吾老矣不能用於世。皆加曰字以別更端之語。此文亦猶是耳。不然楊子之意自以顏晞夫子爲主。至正考甫公子奚斯不過泛舉之以小見大。以淺見深。若其間無曰字以別之。則顏之晞夫子。正考甫之晞尹吉甫。公子奚斯之晞正考甫。直是一律而論。漫無主賓之辨矣。

吾不觀參辰之相比也。是以君子貴遷善。遷善者聖人之徒與。

樾謹按君子貴遷善。與參辰之相比。意不相承。下文云百川學海而至于海。丘陵學山不至於山。是故惡夫畫也。頻頻之黨。甚於鸚斯。亦賊夫糧食而已矣。頻頻之黨。與惡畫之義。亦不相承。疑此兩節傳寫互誤。楊子蓋因參辰之不相比。而戒人之黨比游晏。故曰頻頻之黨。甚於鸚斯。廣雅釋訓曰。頻頻比也。李軌注亦以黨比游晏釋之。則與參辰之不相比。意正一貫矣。至君子貴遷善。乃申明惡畫之義。遷善是不畫也。兩節傳寫互易。而其義皆不可通。今訂正如左。

吾不觀參辰之相比也。頻頻之黨。甚於鸚斯。亦賊夫糧食而已矣。

百川學海而至於海。丘陵學山不至於山。是故惡夫畫也。是以君子貴遷善。遷善者聖人之徒與。

吾聞先生相與言。則以仁與義。市井相與言。則以財與利。如其富。如其富。

樾謹按如其富。言如何其以富也。重言之者。深疾之之辭。此句法本於論語之如其仁。如其仁。孔安國注云。誰如管仲之仁。增字解經。頗非經旨。以楊子之意推之。則如其仁者。不許之也。孔子於管仲。但許其事功之盛。而未嘗予之以仁。故其意若曰。論管仲者。但以事功論之足矣。如何其以仁也。如何其以仁也。卽下章民到於今受其賜。可謂推許之至。而於仁字固不一及也。非楊子此文。則孔子之意。不見矣。吾子篇或問屈原智乎。曰如玉如瑩。爰見丹青。如其智。如其智。此與孔子之論管仲正可互明。蓋若



管仲者論其事功可也。不必論其仁也。若屈原者論其志節可也。不必論其智也。楊子以法言擬論語。正在此等處。吳秘注曰。如何其智。如何其智。非智也。卽所以說論語之如其仁矣。使我紆朱懷金。其樂不可量已。

樾謹按。不字衍文。已當從世德堂本作也。也邪古字通。其樂可量也。猶云其樂可量邪。與上文衆人所能踰也。文法一律。學者不達古語。妄增不字。又改也字爲已字。失其舊矣。文選鮑明遠擬古詩。李善注引此文。正作使我紆朱懷金。其樂可量也。當據以訂正。有教立道。無心仲尼。有學術業。無心顏淵。

樾謹按。術當讀爲述。禮記祭義篇。結諸心形諸色。而術省之。鄭注曰。術當爲述。韓勅後碑。其術。韓君德政張表碑。方伯術職。樊敏碑。臣子褒術。並以術爲述。皆其證也。述業與立道正相對。有教立道。作者之謂聖也。有學述業。述者之謂明也。又按音義曰。天復本心作止。當從之。言立道不止。則爲仲尼。述業不止。則爲顏淵也。李宋吳本並作心。於義難通。溫公從之。非是。

或問蒼蠅紅紫。曰。明視。吾子。

樾謹按。蒼蠅當以聲言。此乃與紅紫並以色言。義似可疑。李注曰。蒼蠅閒於白黑。夫蒼蠅則何閒於白黑之有。疑楊子原文。本作蒼騭。騭與蒼皆色也。周易說卦傳。震爲龍。虞翻本龍作騭。云。騭。蒼色。字亦通。

作虬。文選思元賦。尉虬眉而郎潛兮。舊注曰。虬蒼也。是蒼驪同義。故得連文。廣雅釋器。蒼青也。故亦曰青驪。史記匈奴傳。其西方盡白馬。東方盡青驪。北方盡烏驪。南方盡騂馬。然則李注所稱閒於白黑。其卽本史記爲說與。

如玉如瑩。爰見丹青。

樾謹按宋龔鼎臣東原錄曰。嘉祐中。予在國子監。與監長錢象先進學官校定李軌注楊子法言。後數年。乃於唐人類書中。見如玉如瑩一義。惜其未改正也。或問屈原智乎。曰。如玉加瑩。爰見丹青。軌注曰。夫智者達天命。如玉加瑩。磨而不磷。往日不知其誤。遂改軌注。以就文義。爾以上皆龔說。今按華嚴經音義引倉頡篇曰。瑩。治也。爾雅釋鳥篇釋文曰。瑩。磨瑩也。如玉加瑩。爰見丹青。言屈原之放逐。猶玉加磨瑩而成文采也。說文玉部引逸論語曰。如玉之瑩。然則楊子此文。自有所本。今作如玉如瑩。不可通矣。當據龔說訂正。

足言足容。德之藻矣。

樾謹按學行篇曰。吾未見好斧藻其德者。若斧藻其案者也。然則德之藻矣。自是美之之辭。容猶用也。釋名釋姿容曰。容。用也。字亦通作庸。莊子胠篋篇。容成氏。六韜大明篇作庸成氏。是也。庸亦用也。足言足容。謂旣足以言之。又足以用之。斯其言非空言。乃德之藻飾也。李注曰。足言。夸毗之辭。足容。戚施之面。

言皆藻飾之僞，非篤實之真。恐非楊子之意。今試連上文讀之，或問君子尙辭乎？曰：君子事之爲尙，事勝辭則伉，辭勝事則賦。事辭稱則經，然則足言足容，所謂事辭稱者，正申明君子事之爲尙也。上文並未言及容儀，烏得分言容而二之乎？

升東嶽而知衆山之尉施也，況介丘乎？

樾謹按廣雅釋詁，介，獨也。此介字當訓獨，與衆山相對爲義。

多聞則守之以約，多見則守之以卓。

樾謹按卓亦約也。莊子大宗師篇，彼特以天爲父，而身猶愛之，而況其卓乎？郭象注曰：卓者獨化之謂也。是卓有獨義。說苑君道篇，蹕然獨立，蹕與卓同。多聞則守之以約，多見則守之以卓，並謂聞見宜多，而所守宜少也。蓋卓與約本疊韻字。莊子逍遙游篇，淖約若處子。文選上林賦，便嬛綽約。此云守之以約，守之以卓，亦猶淖約綽約之比。變文以成辭，初無異義也。溫公注曰：約謂擇其精要，卓謂取其高遠，強爲區別，未達古人用字之法矣。

焚魂曠枯，糟莩曠沈。修身。

樾謹按焚魂以喻輕清之氣，糟莩以喻重濁之質。糟者酒之滓，莩者米之皮也。其輕清者日以枯，其重濁者日以沈，斯旨矣。柳宗元注以糟爲精之誤，而訓莩爲目精之表，殆失其旨。李注曰：莩，孰也。義亦未

安。

簞瓢掉茹。

樾謹按掉讀爲啐。禮記雜記篇。主人之酢也。噉之。衆賓兄弟則皆啐之。鄭注曰。噉啐皆嘗也。噉至齒。啐入口。

仁以人之問道。

樾謹按禮記中庸篇。仁者人也。鄭注曰。人也。讀如相人偶之人。以人意和存問之。言仁以人之當從此讀。咸曰。有仁則人必歸之。光曰。仁者人道之常。均未達古義。

佗則荅。

樾謹按咸曰。荅當爲蒙。字之誤也。然荅與蒙雖並從艸。其下絕不相似。安得致誤。祕曰。荅。荅耳也。荅耳徒有其名。而無聆聞之實。然上文言惟聖人爲可以開明。此當從目取喻。不當從耳取喻也。光曰。荅音聆闕。蓋於二說皆未安。故闕其義。今按荅當讀爲答。說文竹部。答。車答也。釋名釋車曰。答。橫在車前。織竹作之。孔荅荅也。此言惟聖人爲可以開明。其佗則如車答然。所見者小矣。

閉之闌然。不覩牆之裏。

樾謹按此卽所謂不得其門而入。不見宗廟之美。百官之富者。上句云。開之廓然。見四海。言聖道之大。

也。此云閉之闢然。不覩牆之裏。言聖道之深也。李注云。不開聖卷。喻無所見。非楊子之意。祕曰。自背其道。不見數仞之內。光曰。不學牆面。皆仍李注之誤。

夫智用不用。益不益。則不贅虧矣。

樾謹按宋吳二說。皆未解贅虧之義。溫公謂有餘曰贅。不足曰虧。是也。惟疑不爲衍字。非也。凡物用之則虧。益之則贅。知者以不用爲用。以不益爲益。用而不用。是不虧也。益而不益。是不贅也。故曰。夫智用不用。益不益。則不贅虧矣。文義甚明。亦無衍字。舊說均失之。

或問太古塗民耳目。

樾謹按塗當讀爲戲。說文丹部。臙篆下引周書。惟其戲丹臙。今書梓材篇。作惟其塗丹臙。是塗與戲通也。說文支部。戲。閉也。從支度聲。讀若杜。經典卽以杜爲之。尙書棨誓篇。杜乃攬。周官雍氏注引作戲。乃攬。是也。戲民耳目者。謂閉塞民之耳目也。若以今字書之。當云杜民耳目矣。

若牛羊用人。則狐狸螻蟻不臙臙也與。

樾謹按李注曰。臙。八月旦也。今河東俗奉之以爲大節。祭祀先人也。臙。腊也。見禮記。是但釋臙臙二字之義。而於狐狸螻蟻。未有發明。咸曰。臙。獵也。冬則獵取百獸。故狐狸至是死矣。呂氏春秋曰。南呂之月。蟄蟲入穴。故螻蟻至是絕矣。夫以申韓刑名。如牛羊之用人。則人之生也。何可久乎。其趨死猶狐狸螻

蝨不過乎臙臙之候矣。此說亦殊不可通。正文言狐狸蝨蝨。不言人如狐狸蝨蝨。不可通一也。正文言不臙臙也歟。若謂不過乎臙臙之候。當云不臙臙矣。如左傳云虞不臙矣。於義方合。詠歎之文。非所施也。不可通二也。且冬日雖獵取百獸。然狐狸之類。不應便絕。而云不過此候。不可通三也。尋楊子之意。直以申韓之法行。則人死者多。屍相枕籍。狐狸蝨蝨得饜其肉。如人過臙臙有酒食醉飽之樂。故曰狐狸蝨蝨不臙臙也。與正與上文牛羊用人相應。以人爲牛羊。則食之者必狐狸蝨蝨也。自來未達此旨。如申韓。如申韓。

樾謹按兩言如申韓。謂如何其用申韓也。與學行篇如其富如其富。吾子篇如其智如其智。淵騫篇如其寢如其寢。同義。祕曰。豈如申韓之法。光曰。如申韓者何足爲法。皆未達楊子語意。請問之。問神。

樾謹按之當作心。隸書相似而誤也。上文或問神曰心。故或人又請問心也。音義曰。天復本作請問之。蓋既誤心爲之。因又改問爲聞。以就其義。溫公從之。非是。聖人以不手爲聖人。

樾謹按李軌注曰。手者桎梏之屬。義甚淺陋。咸曰。手當爲干。聖人雖爲紂囚。然終不干其刑。祕曰。手持也。執也。雖以非禮見囚。終不能執而戮之。此二說亦未安。既見幽囚。安得云不干其刑。亦安得云終不

能執也。光曰：手謂人所提攜指使，枉己之道，而隨人左右也。如此說，則與姜里之間不相應矣。今按手當爲午，成二年公羊傳：「曹公子手。」釋文曰：「手本作午，是其例也。」說文：「午部，午，𦣻也。五月陰氣午逆，陽冒地而出，釋名：釋天曰，午，𦣻也。陰氣從下上，與陽相忤逆也。然則不午者，不逆也。此言聖人之德與神龍異，龍以不制爲龍，聖人則以不午爲聖人。」記曰：「素富貴行乎富貴，素貧賤行乎貧賤。」素夷狄行乎夷狄，素患難行乎患難。君子無入而不自得焉。此不午之義也。文王之囚於羑里，正所謂素患難行乎患難，何損于文王之聖乎？

惜乎書序之不如易也。

樾謹按：書有序，易亦有序。今序卦傳是也，序卦傳自盈天地之間者唯萬物，故受之以屯，至物不可窮也，故受之以未濟終焉，皆以意義聯貫。其或闕失，可以推求。故上文曰：「易損其一，雖憊知闕焉。」至書序則但云：「爲某事作某篇，不相聯貫。」故上文曰：「至書之不備過半矣。」而習者不知此，或人歎書序不如易之意也。自來說此者，皆未明曉。吳說略近之。宋以大衍虛一說上文易損其一，謬甚矣。

狄牙能喊。

樾謹按：李注曰：「喊，啞物聲也。然義不可通。」吳曰：「喊，聲也。直訓爲聲，更無義矣。喊者，誠之異文。從口與從言同。」詠詠吟吟，即其例也。說文：「言部，誠，和也。廣雅釋詁：誠，調也。」狄牙能喊，謂狄牙能和調也。戰國魏策

曰。易牙乃煎熬燔炙和調五味而進之。所謂狄牙能喊矣。又按狄牙卽易牙。猶簡狄漢書古今人表作簡湯也。溫公以狄爲儀狄。牙爲易牙。失之。

面相之辭相適。

樾謹按之字絕句。相之相適。對文成義。溫公曰之亦適也。宋注非。

著古昔之嗜嗜。傳千里之恣恣者。莫如書。

樾謹按恣恣與嗜嗜同義。史記屈原傳。受物之汶汶。索隱曰。汶汶猶昏昏不明也。汶汶卽恣恣也。李注曰。嗜嗜目所不見。恣恣心所不了。得其義矣。宋吳從本義訓爲勉。非是。

或問經之艱易曰。存亡。或人不諭曰。其人存則易。亡則艱。

樾謹按光曰。人當作文。字之誤也。今以下文證之。頗以溫公之說爲是。下文曰。延陵季子之於樂也。其庶矣乎。如樂弛。雖札末如之何矣。夫人如延陵季子。而樂弛則無如何。是所重者在其文。不在其人也。下文又曰。如周之禮樂。庶事之備也。每可以爲不難矣。如秦之禮樂。庶事之不備也。每可以爲難矣。是難不難由於備不備。益足見經之艱易。存乎文矣。溫公所改。殆非無見。

或曰。君子病沒世而無名。蓋勢諸名卿可幾也。

樾謹按李注曰。勢。親也。名卿。親執政者也。言何不與之合勢以近名也。祕曰。言何不附勢於有名之卿。



可以近名也。二注大略相同。以下文求之。則似皆失其義。且失其讀矣。此當以盍勢諸三字爲句。古勢力字止作執。種藪字亦止作執。蓋本一字耳。盍勢諸。卽盍藪諸。藪猶樹也。襄三十一年左傳。吾子盍與季孫言之。可以樹善。正與此言盍藪諸同意。名卿可幾也。五字爲句。名可幾。是一事。卿可幾。又一事。下文梁齊趙楚之君。非不富且貴也。惡乎成名。是對名可幾而言。谷口鄭子真不屈其志。而耕乎巖石之下。名振於京師。豈其卿。豈其卿。是對卿可幾而言。

愆語。君子不出諸口。

櫟謹按李於愆下出注曰。欲聞其義。是愆一字爲句。或人問辭也。吳讀同。然義實未安。愆字當合下語字爲句。愆語者。過愆之言也。過愆之言。君子不出諸口。咸曰。恥言之也。正得其義。或宋固以愆語連讀乎。

不聽。實無耳也。不明。實無目也。問明。

櫟謹按兩實字皆當爲是。不聽是無耳也。不明是無目也。非實無耳無目也。是通作寔。故爾雅釋詁曰。寔是也。寔通作實。故詩韓奕篇鄭箋云。趙魏之東。實寔同聲。然則實亦可通作是矣。如庸行翳路。銜銜而潛。君子不貴也。

櫟謹按咸曰。翳塞也。銜銜多也。祕曰。翳路。言多也。然上文言明哲。此文宜與相應。但言其多。不相應矣。

漢書甘泉賦。迺登夫鳳皇兮。而翳華芝。注引韋昭曰。翳。隱也。如庸行翳路。謂以庸愚之人而行翳隱之路也。衡說文作衡。本從童得聲。此衡字卽上文童蒙之童。因或人言童蒙則潛。故楊子應之曰。衡衡而潛。君子不貴也。字不作童而作衡者。承上庸行翳路爲文。故從行作衡也。此古人屬辭之法。後世解此者希矣。

舉茲以旃。不亦寶乎。

樾謹按旃字義不可通。咸曰。旃之也。言舉此諸德以議之。莊亦寶也。則增出議字矣。旃疑稱字之誤。禮記射義篇注曰。稱猶言也。

靈場之威。宜夜矣乎。

樾謹按李注曰。靈場。鬼神之壇祠也。靈壇所以爲威。可冥夜。不可經白日。儒謬之談。可獨說不可核諸實。此未得楊子之意也。楊子因或問堯讓天下於許由而爲此說。靈場者。禪位之壇也。鄭康成注尙書大傳曰。古者天子命大事。命諸侯。則爲壇國之外。堯聚諸侯。命舜涉位。居攝。致天下之事。使大錄之。其後漢魏之事。循用此義。故魏公卿上尊號奏有曰。遵大鹿之遺訓。遂於繁昌築靈壇。皇帝乃受天子之籍云云。此靈場之義也。楊子以爲帝者禪位。其事至大。其禮至嚴。若如或說。堯讓天下於許由。則以天下之重輕相傳受。靈場之威。不必在白日。而宜乎在冥夜矣。豈其然乎。故曰。靈場之威。宜夜矣乎。說者

誤以靈場爲鬼神壇祠。斯失其義。且如李說靈場之威實宜於夜矣乎之文。施之不當矣。

或問韓非作說難之書。而卒死乎說難。

樾謹按。下難字衍文也。此本云。韓非作說難之書。而卒死乎說。蓋傷其知說之難。而終以說秦王爲李斯姚賈所毀害致死也。太史公曰。余獨悲韓子爲說難。而不能自脫耳。亦是此意。今作死乎說難。義不可通。且如此。則或人已知韓非之死由於說難矣。何以楊子又應之曰。說難蓋其所以死乎。然則此文卒死乎說下。不當有難字。蓋涉上下文並言說難而衍。

如賢人謀之美也。詘人而從道。如小人謀之不美也。詘道以從人。寧見。

樾謹按。如猶與也。如賢人謀者。與賢人謀也。如小人謀者。與小人謀也。如與聲近。故得通用。說見王氏經傳釋詞。

古者之學耕且養。

樾謹按。此本作古之學者耕且養。傳寫誤倒耳。古之學者。與下文今之學也相對爲文。上句用者字。下句用也字。亦猶論語陽貨篇。惡紫之奪朱也。惡鄭聲之亂雅樂也。惡利口之覆邦家者。孟子盡心篇。孩提之童。無不知愛其親者。及其長也。無不知敬其兄也。並以者也互用。是其例也。

魯不用真儒故也。

樾謹按祕曰齊人歸女樂季桓子使定公受之三日不朝孔子行言不聽孔子故也此恐非楊子之意上文曰昔在姬公用於周而四海皇皇奠枕於京孔子用於魯齊人章章歸其侵疆是楊子固以魯人爲能用孔子矣豈有甫言其能用而又言其不能用乎且如吳說但當曰魯不用儒足矣何以言不用真儒乎蓋或人所問魯用儒而削自指魯穆公時事鹽鐵論相刺章曰昔魯穆公之時公儀爲相子柳子原爲之卿然北削於齊以泗爲境南畏楚人西賓秦國或人此問意亦猶是楊子則以公儀諸人皆未足爲真儒必如周公孔子乃見用儒之效故曰魯不用真儒故也孟子告子篇魯穆公之時公儀子爲政子柳子思爲臣魯之削也滋甚是魯穆公以用儒而削自戰國時已有此說子思疑亦當作子原不然何以反列子柳之下且果用子思不得謂非真儒矣觀楊子不用真儒之說益見穆公之未能用子思也

奔壘之車

樾謹按光曰奔壘謂馬驚逸抵敵壘者此未解奔字也說文天部奔走也從夭賁省聲故賁與奔古通用詩鶉之奔奔禮記表記引作鶉之賁賁是也奔壘當作賁壘射義賁軍之將鄭注曰賁讀爲賁賁猶覆敗也大學此謂一言賁事釋文曰賁本又作賁猶覆敗也然則賁壘之車謂車之覆於壘者下句沈流之航謂舟之沈於流者兩文正相對隱三年左傳鄭伯之車賁於濟車以賁言古語然也賁通作賁

又通作奔。而學者據本字說之。失其義矣。



# 諸子平議卷三十五

## 楊子法言二

因往以推來雖千一不可知也五百

樾謹按千謂千歲一謂一歲從其極疏者言之或千歲而生一聖人從其極數者言之或一歲而生一聖人故曰雖千一不可知也李軌注曰千歲一人一歲千人不可知也夫聖人之生必無一歲千人之理疑李注本作一歲一人傳寫誤耳祕曰雖千年一聖亦未可知也則但從其疏者言於義爲不備矣若是則仲尼之開跡諸侯也非邪

樾謹按國語晉語夫樂以開山川之風呂氏春秋樂成篇夫開善豈易哉韋昭高誘注並曰開通也然則開跡者通跡也如魯兩生之不肯行則絕跡於漢廷矣故以孔子之歷聘諸侯爲通跡也宋訓開爲開布於義未安吳分開跡爲二義則更失之

不聽正諫而不用噫者吾於觀庸邪無爲飽食安坐而厭觀也

樾謹按不聽正當從宋讀作不聽政溫公亦云正與政同也噫當作意意者吾於觀庸邪七字爲句邪乃語詞蓋託爲孔子之言若曰意者吾將於此觀彼庸庸者邪故又曰無爲飽食安坐而厭觀也楊子

書每以庸爲庸衆之稱。問明篇甚矣。聖道無益於庸也。又曰。如庸行翳路。宋吳並以庸愚釋之。此文庸字亦當與同。因段噫爲意。說者遂不得其解。宋吳本又增雉字於噫字之上。於義益不可通矣。

世人之益者。倉廩也。取之如單。

樾謹按如讀爲而。古字通用。故李注曰。有時而盡。

或問聖人占天乎。占天地。

樾謹按地疑也字之誤。下文。史以天占人。聖人以人占天。但言天不言地。可證地字之誤。

德隆則晷星。星隆則晷德也。

樾謹按晷者日景也。古人以土圭致日景。以定南北。易通卦驗所謂樹八尺之表。日中視其晷是也。故楊子卽借晷爲推測之義。言君德隆盛。則當晷之於星。以驗德之至與不至。星象隆盛。則當晷之以德。以驗星之應與不應也。吳訓晷爲規。本之釋名。意蓋近之。惜所說不了。咸曰。晷。影也。猶影蔽之也。義殊未安。光曰。影從形者也。德崇則星從而祥。星崇則德從而壞。夫星崇何以壞德。此說甚不可通。且正文但言晷星晷德。亦不得強爲區別也。

月未望則載魄於西。

樾謹按李注曰。載。始也。魄。光也。載魄於西者。光始生於西面。以漸東滿。此古義也。咸曰。按周書召誥。惟



丙午朏。傳曰：朏，明也。月三日明生之名。康誥曰：惟三月載生魄。傳曰：三月始生魄。月十六日明消而魄生。是則朏爲明，魄爲晦矣。夫月未望者，卽始生明之時也。正文宜曰：月未望則載朏於西。今未望亦言魄，蓋字之誤。溫公從其說，故曰魄當作朏，明也。明始於西，以漸變魄。今以古義求之，則宋說非也。康誥蕭釋文引馬云：魄，朏也。謂月三日始生兆，朏名曰魄，是朏卽魄矣。說文月部：霸，月始生霸然也。承大月二日，承小月三日，從月，羣聲。周書曰：哉生霸，以是言之。魄者霸之段字。壁中古文本作霸。後人因經傳相承作魂魄字，遂誤以魄爲月質，而有死霸朔生霸望之說。與禮記鄉飲酒義月三日則成魄，白虎通三日成魄，八日成光之說，皆不合矣。是故康誥之惟三月載生魄，實卽洛誥之越若來惟三月丙午朏。說詳羣經平議。此文云：月未望則載魄於西，旣望則終魄於東，始終皆以魄言，足徵僞孔傳之誤。而宋咸輒生異說，溫公亦爲之惑，信古義之久湮矣。

聆聽前世清視在下。

樾謹按聆聽疊用無義。故宋吳本改作聆德。溫公從之。然其注曰：前世不可見，故云聽。臣民今在下，故云視。則雖從作德之本，而仍不及德字之義。若然，德字爲贅設矣。宋吳之本，殆不可從。今按聆當作洽。洽與清本雙聲字。文選風賦曰：清清洽洽。蓋聲近者義亦相同。洽聽前世清視在下，洽亦清也。楊子正以洽聽與清視相對爲文，後人不達，因其與聽連文，改洽爲聆。又因聆聽不宜疊用，而改聽爲德，愈改

而愈失其真矣。

先甲一日易。後甲一日難。先知、

樾謹按管子四時篇曰。春三月。以甲乙之日發五政。夏三月。以丙丁之日發五政。秋三月。以庚辛之日發五政。冬三月。以壬癸之日發五政。是以周易稱先甲三日。後甲三日。蓋以春三月言也。又稱先庚三日。後庚三日。蓋以秋之日言也。楊子此文獨稱先甲。則專以春言耳。其三日一日。皆行事之節。如冠禮前期三日簪賓。此先三日之例也。子生三日。卜士負之。此後三日之例也。祭禮前期一日視濯視牲。此先一日之例也。鄉射禮明日有息司正之事。此後一日之例也。說互見羣經平議。先甲一日易。後甲一日難。卽所謂靡不有初。鮮克有終耳。舊說皆未得。

死者逋。

樾謹按既死矣。又何逋之有。祕曰。見死者逋逃而不葬。光曰。逃棄不葬。皆就生者言。亦曲爲之說耳。逋乃膊之段字。膊從專聲。專從甫聲。逋亦從甫聲。故得通用。說文肉部膊。薄脯膊之屋上也。方言。膊。暴也。燕之外郊。朝鮮洌水之間。凡暴肉發人之私。披牛羊之五藏。謂之膊。然則死者膊。猶言暴露也。正與上文死者葬相對。

或問民所勤。

樾謹按僖二年穀梁傳。不雨者勤雨也。釋文曰。麋氏音覲。集韻去聲二十二稇。勤渠吝切。憂也。春秋傳勤雨。麋氏說此文勤字。當從彼讀。音義無音失之。

吾見玄駒之步。

樾謹按襄二十六年左傳。見夫人之步馬者。杜注曰。步馬。習馬。字亦作駢。玉篇馬部。駢。盆故切。習馬。此云玄駒之步。蓋因蠟有駒名。故借用步馬之義。正古人屬辭之密。吳注但曰步行也。未得其旨。雷不一。風不再。

樾謹按李解上句曰。三令五申。解下句曰。制無二也。甚得楊子之旨。惜其說下句未了耳。易通卦驗曰。立春。調風至。春分。明庶風至。立夏。清明風至。夏至。景風至。立秋。涼風至。秋分。闔闔風至。立冬。不周風至。冬至。廣莫風至。是一時有一時之風。風不再。謂不並至也。王者法之。故號令亦無錯出矣。光曰。一再言其少。洊雷隨風。乃能動物。三令五申。乃能齊衆。然則一與再。何必異其文乎。

聖人樂陶成天下之化。使人有士君子之器者也。

樾謹按宋吳本樂下有天字。然於義殊不合。疑天乃夫字之誤。聖人樂夫陶成天下之化。使人有士君子之器者也。其旨亦與李本不殊。因夫字誤作天。宋吳遂依誤本爲說。鑿矣。宜溫公不之從也。爲國不迪其法。而望其效。譬諸算乎。

樾謹按李注曰。夫算者不運籌策。不能定其數。然正文並無不運籌策之說。光曰。譬如無財而運算。終無益於富。然正文亦無無財之說。是二說皆以意增益。非楊子意也。算疑纂字之誤。方言曰。凡取物而逆謂之纂。爲國者必先迪其法。而後望其效。今不迪其法。而卽望其效。猶之乎逆而取之矣。故曰。譬諸纂乎。論語陽貨篇。譬諸小人。其猶穿窬之盜也。與。亦以人事爲喻。正與此同。法言固擬論語而作也。蓋哉蓋哉。應難未幾也。重黎。

樾謹按應難二字。衍文也。此本云。蓋哉蓋哉。未幾也。李注曰。再言蓋哉者。應難以事未有近其理者是。應難之文。乃李氏解再言蓋哉之意。猶言應之難也。正文卽涉注而衍耳。

迄始皇三載而咸。

樾謹按始皇二十六年。始并天下。始稱皇帝。而此言三載。於義可疑。祕曰。蓋言稱皇帝後三年。東行郡縣。上鄒嶧山。刻石頌秦功德。封泰山。禪梁父。而天下咸一也。此亦曲說矣。今按重黎一篇。多楊子之微言。李注上文黃帝終始章曰。深矣。楊子之談也。王莽置羲和之官。故上章寄微言以發重黎之間。而此句明言真僞之分也。然則楊子之文。固有深意矣。夫始皇以二十六年并天下。當時無不知之。乃云始皇三載者。故爲悠謬之辭。以寓意也。按漢書元始五年。平帝崩。莽稱攝皇帝。改明年爲居攝元年。至居攝三年十一月戊辰。遂卽真天子位。以十二月癸酉朔爲始建國元年。然則所謂始皇三載者。其文則

指始皇。其意則在新莽。以居攝三年當始皇之二十六年。使其文若謬誤者。而其旨微其辭曲矣。學者拘文牽義。烏足以語此哉。又按咸者。戔之段字。說文戈部。戔。絕也。讀若咸。經傳卽以咸爲之。尙書君奭篇。咸劉厥敵。周書世俘篇。越五日。甲子朝。至接于商。則咸劉商王紂。咸皆戔之段字也。迄始皇三載而咸。謂至始皇三載而絕也。李注云。皆屬秦也。訓咸爲皆。失之。

子弟且欲喪之。況於民乎。況於鬼神乎。

樾謹按此論秦楚。而秦楚初無子弟欲喪之事。楊子是言。豈虛設乎。蓋爲王莽發也。莽子宇非莽隔絕衛氏。恐帝長大後。見怨與師吳章婦兄呂寬議其故。使寬持血灑莽第門。吏發覺之。莽執宇送獄。飲藥死。其後皇孫功崇公宗。坐自畫容貌。被服天子衣冠。自殺。莽有宗屬爲皇孫。爵爲上公。不知厭足。窺欲非望之語。事在天鳳五年。亦楊子所及見也。然則所謂子弟且欲喪之。殆以是而發乎。至地皇二年。太子臨與莽妻侍者通。恐事泄。謀共殺莽。此則非楊子所及見。然其言愈信而有徵矣。重黎一篇。雖論古人實寓時事。上文或問趙世多神何也。曰神怪茫茫。若存若亡。聖人曼云。此刺莽之以符命自立也。下文論韓信黥布云。忠不終而躬逆焉。攸令亦刺莽始以誅淳于長。及徵去定陶太后坐。獲忠直名。而後乃躬爲大逆也。孟子曰。頌其詩。讀其書。不知其人可乎。是以論其世也。讀楊子書。宜論其世矣。如矯世則葛溝尙矣。

樾謹按葛溝未詳何義。李注曰：古者未知喪送之禮，死則裹尸以葛，投諸溝壑。然裹尸何必以葛，亦似曲說也。葛疑楊之段字。周官蜡氏：若有死于道路者，則令埋而置楊焉。楊溝言棄尸於溝而置楊其上，較之保葬爲更疏略矣。

攀龍鱗附鳳翼，巽以揚之。淵齋

樾謹按：光曰：宋吳本作巽以揚之，今從李本。揚發揚也。是李本無巽字。盧氏昭弓云：李本巽作翼，不知翼者卽涉上句附鳳翼而誤衍。溫公但云：揚發揚也，不及翼字之義。是其所據本無巽字，亦非別有他字也。今各本皆作巽以揚之，蓋據宋吳本加，非李本之舊。

起臨洮擊遼水。

樾謹按：擊字無義。疑擊字之誤。爾雅釋詁：擊，盡也。言起臨洮而盡遼水也。史記作起臨洮至遼東，至卽有盡義。

力不足而死有餘。

樾謹按：力者功也。周官司勳：治功曰力。是也。言蒙恬爲秦築長城，無救於秦之亡，以論功則不足，以致死則有餘矣。故曰力不足而死有餘。宋吳本死作屍，誤也。溫公從之，非是。忠不足相也。

樾謹按說文木部相省視也。從目從木。易曰：地可觀者莫可觀於木。是相與觀義近。忠不足相也。猶曰：忠不足觀也。不曰觀而曰相。子雲好爲艱深之辭故耳。李注訓相爲助。將使誰助之乎。失楊旨矣。實蛛蝥之靡也。

樾謹按李注曰：若蜘蛛之蟲小巧耳。然下文曰：實壯士之靡也。實刺客之靡也。豈亦小巧之謂乎。祕曰：靡披靡而死也。光曰：謂靡爛也。義皆未安。靡與爲古音相近。故廣雅釋詁曰：靡爲也。蛛蝥之靡卽蛛蝥之爲。猶曰是乃蛛蝥之所爲耳。下文兩靡字義同。

曼面爲姊。

樾謹按曼當讀爲鋤。爾雅釋宮：鋤謂之朽。說文木部：朽所以涂也。是鋤者所以涂之具。故涂卽可謂之鋤。鋤面者塗面也。音義曰：曼謨官切。塗面此說得之。祕曰：曼無也。使他人無所識認。則不可通矣。

折節周昌汲黯。

樾謹按以周昌汲黯而謂之折節。義不可通。祕曰：折節言其能降也。夫彊直之人降則爲亂。若二公者天姿彊直而乃能降。其折節可尙矣。斯亦曲爲之說。非楊子意也。折疑抗字之誤。言其能抗節而不撓也。隸書亢字或作亢。華山碑禮與岱亢是也。凡從亢之字亦或作亢。劉寬碑。伉浮雲之志。伉卽亢字。殺阮神祠碑。於是殺阮以爲之資。阮卽阮字。並其證也。此文抗字從隸體作拊形與折似。因誤爲折。吳氏

曲爲之說謬矣。

滕灌樊鄴曰：俠介。

樾謹按：俠與夾通。尙書多方篇：爾曷不夾介父我周王。此卽楊子所本。一切經音義十二引倉頡曰：夾輔也。爾雅釋詁曰：介，助也。夾介猶言輔助。說詳羣經平議。李注曰：此四人前後輔夾高帝，得其義矣。吳說非。

叔孫通曰：槩人也。

樾謹按：李注謂見事敏疾，未詳其義。據五百篇：楊子以魯兩生爲大臣，則其不滿於叔孫通也甚矣。不當如李氏說也。祕曰：叔孫通采古禮與秦儀，模著漢儀，簡牘之人也。槩猶牘也。此說亦殊未安。槩疑當爲鋤。大元上初一，挫厥鋤鋤。溫公解爲挫其銳進躁急之志。叔孫通不知禮樂百年而後興，而急欲爲之，豈非所謂鋤鋤者乎？故楊子以爲鋤人。鋤字依說文本作鑿，茲作槩者，或亦如鑿之與槩。古本一字耳。

曰：血國三千，使捋疏飲水，褐博沒齒，無愁也。

樾謹按：咸曰：昔禹會塗山，執玉帛者萬國。於商周之世，已漸并之矣。故至漢世，但可三千而已。此說殊謬。古之建國，蕩然無存，安得云可三千乎？祕曰：周一千八百國，而漢郡國一百三，縣邑千三百一十四。



云三千者。蓋貨殖之人。倍取於國。且言其多。此亦曲爲之說。非楊意也。今按漢書王莽傳。始建國四年。授諸侯茅土。諸侯之員。千有八百。附城之數亦如之。是合諸侯與附城。凡三千六百國。血國三千。依莽制言之。舉成數耳。楊子此文。蓋亦有譏焉。是時以圖簿未定。未授國邑。且令受奉都內月錢數千。諸侯皆因乏。至有庸作者。楊子因或問貨殖而應之曰。蚊又復爲此言。若謂彼貨殖者。亦猶蚊之爲蟲。食人之血以生耳。今天下建國三千。彼得國者。亦將血之以自肥也。乃使之掇疏飲水。褐博沒齒。無愁邪。句末也。字當讀爲邪。楊子書多有此文法。學行篇。衆人所能踰也。其樂可量也。並以也爲邪。說已見前矣。上文已有曰字。而此復有曰字。乃更端之語。溫公謂衍字。非也。說此文者。皆不達血國三千之義。故不得其解。

陳平之無悟。

樾謹按李注曰。內明奇畫。外無達悟。疑其所據本作無悟。說文午部。悟。逆也。故注曰。外無達悟。若是悟字。則達悟之文。不相屬矣。後人多見悟少見悟。因改悟爲悟。宋吳本又因悟字無義。易以悞字。而訓爲謬悞。愈失其真。溫公反謂悞與忤同而從之。其失甚矣。

鼓之以道德。征之以仁義。

樾謹按征乃鉦字之誤。詩采芣篇。鉦人伐鼓。傳曰。鉦以靜之。鼓以動之。是鉦鼓相對爲文。鼓之以道德。

鉅之以仁義。猶言以道德動之。仁義靜之耳。今誤作征。殊失其義。

應諧似優。

樾謹按李注曰。似倡優。此說非也。下文不窮似哲。正諫似直。穢德似隱。哲也直也隱也。皆美名。不應首句言似倡優也。且似倡優矣。尙何名過其實之有。與問意亦不相應也。此優字乃優游之義。論語憲問篇皇侃疏曰。優猶寬閑也。左氏春秋序。優而柔之。正義曰。優柔俱訓爲安。寬舒之意也。皆可說此優字之義。

或問航不漿。衝不齋。有諸君子。

樾謹按李注曰。樓航不挹漿。衝車不載齋。然齋有三。說文艸部。齋。蒺藜也。此一齋也。詩谷風篇。其甘如齋。釋文曰。齋。菜也。又一齋也。禮記月令。靡草死。鄭注曰。靡草。齋。亭歷之屬。又一齋也。此所謂齋何齋乎。且草類亦多矣。何獨言齋乎。齋當爲齏。周官醢人以五齋七醢。七菹三醢。實之。鄭注曰。齋當爲齏。凡醢醬所和細切爲齏。然則航不漿。衝不齏。謂樓航不可挹酒漿。衝車不可盛齏醢也。漿與齏以類相從。作齋者。段字耳。以本字讀之。則不倫矣。

玩而廉。

樾謹按上句柔而堅。堅與柔對。則此句必廉與玩對。祕曰。玩猶珍也。廉。棧也。珍玩與廉棧。則不對矣。光

曰。玩當作刈。音完。謂廉而不劇。如溫公說。則當改玩而廉。謂廉而不玩矣。殆亦未得也。蓋溫公雖知玩爲刈之段字。而未得其義。凡物刈之則圓。楚辭懷沙篇。刈方以爲圓兮。是也。故史記酈生陸賈傳。刻印刈而不能授。集解引孟康曰。刈。刈斷無復廉鍔也。然則刈而廉。正與刈斷無廉鍔相反。漢書陳平傳。士之頑鈍者。利無恥者。如淳曰。頑鈍。謂無廉隅也。孟子萬章篇曰。頑夫廉。頑與廉對。足證此文之義。以物言之爲刈而廉。以人言之爲頑而廉矣。

隊乎其不可形也。

樾謹按宋訓隊爲衆。未知何據。祕曰。隊乎。猶言垂之如隊。溫公從之。然玉之德多矣。何獨以下之如隊言之乎。說文心部。慘深也。隊疑慘之段字。或學者多見隊少見慘。而改之也。惟其深故不可得而形矣。甚矣傳書之不果也。

樾謹按說文木部。果。木實也。木實謂之果。故果與實同義。淮南子道應篇高誘注曰。果。誠也。誠卽實也。傳書之不果。言傳記之書多失實也。宋吳說果字皆未得其義。

如回之殘牛之賊也。焉德爾。

樾謹按焉德爾當作焉得爾。咸曰。言假令顏行之殘。冉行之賊。則安得不朽之壽如是哉。正釋焉得爾之義。因涉上文德故爾而誤耳。

天地裕於萬物乎。萬物裕於天地乎。孝至、

樾謹按世德堂本無兩乎字。然觀宋咸注曰。正文當云。萬物非裕於天地。疑脫其非字。裕。饒裕也。天地生萬物。非冀其報。故能饒裕於萬物。而萬物不能饒裕於天地也。是宋所據本亦無兩乎字。不然則豈不知其爲疑問之辭。而顧疑其脫非字乎。

是以祭不賓。

樾謹按以儀禮言之。則祭必有賓。楊子此言。非古制矣。祭疑齊字之誤。上文曰。夫能存亡形屬荒絕者。惟齊乎。故孝子之於齊。見父母之存也。此云。是以齊不賓。義正相應。謂方齊之時。不接見賓客也。齊誤作祭。義不可通。宋吳之解。與禮不合。光曰。賓謂敬多而親少。如待賓客。則曲爲之說矣。

或曰。何以處僞。

樾謹按物居其所謂之處。使物各得其所。亦謂之處。魯語。夫仁者講功。而知者處物。是其義也。故處卽有審察之義。文十八年左傳。則以觀德。德以處事。大戴禮文王官人篇。以其聲處其氣。漢書谷永傳。臣愚不能處也。淮南子主術篇。援白黑而示之。則不處焉。其義並同。何以處僞。謂何以辨別其僞也。下文楊子應之曰。有人則作之。無人則輟之。之謂僞。觀人者審其作輟而已矣。是告之以審察之道。故知此處字非居處之謂也。祕曰。何以居僞。失之矣。

知情天地形不測。

樾謹按光曰。知與智同。是也。咸曰。知情天地者。言知天地之情。祕曰。知天地之情。其形不可測。並誤讀知字矣。知情天地形不測。與上文德諧頑鬻讓萬國相對爲文。天地不能匿其情。是謂情天地。不測者無所隱其形。是謂形不測。舊說皆失之。不亦享乎。

樾謹按享字無義。乃厚字之誤。隸書厚字或作厚。婁壽碑。高位厚祿。是也。亦或作厚。度尙碑。惠以厚下。是也。厚厚二形。均與隸書享字作享者相似。因誤爲享耳。此言單于來臣。禮之太厚也。自來皆依誤本作注。祕曰。不亦施饗禮之盛乎。增益其文。殊非本義。光曰。享當作亨。亨猶泰也。亦爲迂曲。周公以來。未有如漢公之懿也。勤勞則過於阿衡。

樾謹按王莽居攝三年。劉歆與博士諸儒議莽母功顯君服。稱殷成湯既沒。而太子蚤夭。其子大甲幼少不明。伊尹放諸桐宮。而居攝。以興殷道。周武王既沒。周道未成。成王幼少。周公屏成王而居攝。以成周道。是以殷有翼翼之化。周有刑錯之功。然則伊尹周公者。莽居攝以前所以自比者也。至始建國元年。莽曰。王氏。虞帝之後也。出自帝嚳。劉氏。堯之後也。出自顓頊。則不自以爲伊尹周公。而以爲虞舜矣。楊子仍以伊尹周公待之。蓋不許其爲虞舜也。楊子此言。與阮嗣宗爲鄭沖勸晉王箋同意。箋曰。昔伊

尹有莘之媵臣耳。一佐成湯，遂荷阿衡之號。周公籍已成之勢，據既安之業，光宅曲阜，奄有龜蒙，是以伊周比之也。末云：「令大魏之德光於唐虞，明公盛勳超於桓文，然後臨滄洲而謝支伯，登箕山以揖許由，豈不盛乎？」是亦不許其爲虞舜也。此皆古人之微辭，後人鮮或能喻矣。或疑楊子旣諂莽，何必爲此言？溫公釋之曰：「晉袁宏作東征賦，下序桓彝陶侃，猶爲桓溫陶胡奴所刼。況楊子作法言，品藻漢興以來將相名臣，而獨不及莽，莽能無恥且忿乎？溫公之論亦屬膚淺。楊子特著此文，蓋有微意矣。法言一書終以孝至，是篇論唐虞成周而終之以漢。上文曰：「或問秦和曰：『其在唐虞成周乎？』」又曰：「漢德其可謂允懷矣。」下文曰：「漢興二百一十載而中天，其庶矣乎？」終之曰：「唐矣夫。」蓋以漢德上媲唐堯也。中間特著此文，以見漢祚中絕之由，且上言允懷，見民心之思漢也。下言中天，見漢祚之方半也。若無此文，則前後文之微意皆不見矣。故依楊子之文觀之，自唐虞成周而漢，漢絕於新，新復爲漢，歷歷可數。至誠前知，楊子之謂矣。

辟靡以本之，校學以教之。

樾謹按：後漢書世祖建武五年初起太學，中元元年起辟靡。楊子之言至是驗矣。上文漢興二百一十載而中天，柳宗元曰：「楊子極陰陽之數，此言知漢祚之方半耳，其信然乎？」陳施于意序。

樾謹按。意。漢書作億。李奇曰。布陳於億萬事也。溫公不言諸本有異同。是其所據本皆作意。然祕曰言陳施之動成萬法。則吳司封本固作億也。

幽宏橫廣。

樾謹按。宋吳及溫公本均作橫度。當從之。廣卽度字之誤耳。惟橫度之義。宋吳皆未得。橫與光同。書堯典光被四表。後漢書馮異傳作橫被四表是也。度與宅同。堯典五流有宅。史記五帝紀作五流有度。禹貢三危既宅。夏本紀作三危既度是也。然則橫度卽光宅也。書序昔在帝堯。聰明文思。光宅天下。此卽楊子所本。

參差不齊。一概諸聖。

樾謹按。舊讀皆於齊字絕句。非也。詩載馳篇毛傳曰。進取一概之義。正義曰。一概者一端。然則此云一概諸聖。不可通也。疑當於一字絕句。淮南子脩務篇。故立天子以齊一之。是齊一連文之證。惟其參差不齊。一故必概諸聖也。學行篇序曰。訓諸理。五百篇序曰。經諸範。此云概諸聖。句法正同。















\*書 號 26475

定價人民幣 27,500 元